


Balóchi Balochi



Latin version of the Balochi Bible

Balóchi Balochi
Latin version of the Balochi Bible

copyright © 2015 Wycliffe Bible Translators, Inc.

Language: Balochi, Southern

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source files dated 29 Jan 2022
bd42840d-f6ae-537b-95db-adaaa3efeb6c

Contents

Psalms	1
Mattá	57
Markás	93
Luká	116
Yuhanná	156
Kásedáni Kár	183
Pulosay kágad pa Rumián	220
Ákub kágad	235
Petrosay Awal Kágad	239
Petrosay Domi Kágad	244
Yuhannáy Awali Kágad	247
Yuhannáy Domi Kágad	251
Yuhannáy Saimi Kágad	252
Yahudáy Kágad	253
elhám	255

Zabur Zaburay awali ketáb

1

Zabur 1—41

Pahrézkár o badkáráni ráh

- 1 Bahtáwar hamá ent
ke badkáráni shawr o saláhay sará
narawt,
gonahkáráni rahsará naóshtit o
rishkand kanókáni diwáná nanendit,
2 hamá ke wáhagi gón Hodáwunday
tálimá ent o
róch o shap áiy tálimay sará pekra
kant.
3 Á hamá drachkay paymá ent
ke rombókén jósaréay Kerrá keshag
butag o
mósomay sará nibaga dant o
táki nagimmorant,
harché ham ke kant kámyába bit.
4 Bale badkár chosh naant,
á hamá pog o paláráni paymá ant ke
gwátesha rópit o bárt.
5 Gorhá bezán ke badkárán, pa dádrasiá*
óshtagay wák o twán nést o
gonahkár pahrézkáráni diwáná hór
buta nakanant.
6 Ke Hodáwand pahrézkáráni ráhay ne-
gahpán ent,
bale badkáráni ráh tabáhi o bégwáhi
ent.

2

Hodáay bádsháha kayt, pádáni kapét

- 1 Á dega kawm pa ché shóresha kanant o
ráj chiá mopt o náhudagén pandala*
sázant?
2 Jahánay bádsháh tayára bant o hákem
yakjáh mocch,
Hodáwand o áiy Masihay helápá
óshtant:
3 “Byáét tán áyáni sád o bandán beborrén
o zamzilánesh besendén.”
4 Hodáwand ke ásmáná bádsháhia kant
kandit o
áyán maskará kant.
5 Á wahdá wati hezhmay tahá gón áyán
habara kant,
wati gazabay tahá áyána torsénit:

* 1:5 1:5 Dádrasi, bezán hakkén paysalah, hamá shawr ke cha dádgáhána kayt, dáwari. * 2:1 2:1 Pandal, bezán
repk, mandr, makr. * 3:2 3:2 Pa óshtá asligén Ebráni gál “saláh” ent. É gál báz barán Zaburay ketábá átkag.
Mánái pakká zánag nabutag bale balkén pa wánókay mahtal bayagá muzikay yak gálé. † 3:6 3:6 Angerrish kanag,
bezán chapp o chágérdá gerag, Arabi o Pársiá “moháserah”.

- 6 “Man wati bádsháh, wati pák o
gechénién kóh, Sahyunay sará
nendárentag.”
7 Nun Hodáwunday hokmá darshána
kanán ke maná gwashti:
“Taw mani Bacch ay, maróchi man
tará pédá kortag.
8 Cha man belóth tán kawmán tai mirás
bekanán o
zeminay chárén kondháni ráján tai
sawgát.
9 Gón ásenén asáé áyán prósha dayay o
kunzagáni paymá hurt hurtesha
kanay.”
10 Paméshká, oo bádsháhán! Aglmand
bebét.
Anchosh oo jahánay hákemán! Adab
bezurét.
11 Pa tors, Hodáwunday hezmatá bekanét
o
pa drahay pádáni kapét.
12 Chokká bechokkét chó mabit ke zahr
begipt o
shomá ráhay némá gár o bégwáh
bebét,
chiá ke á anágat bránza gipt.
Bahtáwar hamá ant ke áiy mayár o
báhótha bant.

3

Oo Hodáwand! Pád á

Dáuday Zabur, hamá wahdá ke cha wati
chokk Abshálumá jehagá at.

- 1 Oo Hodáwand! Mani dozhmen
chenkadar báz ant.
Bázéné mani helápá pád áyagá ent.
2 Bázéné mani bárawá gwashagá ent:
“Hodá eshiá narakkénit.” Ósht...*
3 Bale taw oo Hodáwand! Wat mani
chágérdá espar ay,
Mani shán o shawkat ay,
maná sarperáza kanay.
4 Hodáwandon gón borzén tawaré peryáta
kort o
áiá cha wati pák o gechénién kóhá
maná passaw dát. Ósht...
5 Man ásudag waptán o pád átkán,
chiá ke Hodáwand mani posht o
panáh at.
6 Cha lákkáni lakká natórsán ke cha har
némagá maná angerresh kortag†.
7 Oo Hodáwand! Pád á.

Oo mani Hodá! Maná berakkén.

Taw ay ke mani dozhmenáni demá shahmáta janay o

badkáráni dap o dantánána próshay.

⁸ Rakkénók Hodáwand ent, tai barkat tai kawmá berasát! Ósht...

4

Démá pa má rozhnág kan

Pa sázger o washáwázáni sálará. Gón zehi o simmi sázán. Dáuday Zabur.

¹ Oo mani dádrasén Hodá! Passaw beday wahdé peryáta kanán.

Sakki o sóriáni wahdá mani dast o bánzolet pach kortant.

Maná mehr o rahmat baksh o dwáyánon gósh dár.

² Oo mardomán! Tán kadená mani ezzat kamsharap kanaga bit?

Tán chontá náhudagiá dósta dárét o drógay padá gardét? Ósht...

³ Bezánét ke Hodáwandá Hodádóst pa wat zortag o jetá kortagant.

Wahdé Hodáwandá tawára kanán, á eshkont.

⁴ Hezhmay tahá gonáh makanét.

Éshiy badalá, wapsagay wahdá, wati delá é bárawá pegr kanét o árám gerét. Ósht...

⁵ Barhakkén korbánig peshkash kanét o Hodáwanday sará tawkal.

⁶ Bázéné gwashit: "Kay ent pa má néki bekant?"

Oo Hodáwand! Wati demá pa má rozhnág kan.

⁷ Taw mani del cha shádániá sarréch kortag,

cha áyáni hamá wahday shádániá géshter ke dán o gallah o tázagén sharábesh báz bebant.

⁸ Árámiá drája kasshán o wáb ham kapán, chiá ke tahná taw, oo Hodáwand, maná émeniy tahá nendénay.

5

Maná rástén ráhá bar

Pa sázger o washáwázáni sálará. Gón nali sázán. Dáuday Zabur.

¹ Oo Hodáwand! Mani gappán gósh bedár, mani nálagán delgósh kan.

² Oo mani bádsháhén Hodá! Mani peryátá beshkon,

chiá ke tai gwará dwá kanán.

³ Oo Hodáwand! Bámgwáhán taw mani tawará eshkonay,

bámgwáhán, gón dazbandi wati wáhagán péssha kanán o wadáriga bán.

⁴ Taw choshén Hodáé naay ke cha badiá delwassh bebay,

badi gón taw jalleta nakant.

⁵ Porkebr o gorunák tai demá óshtáta nakant o

cha sajjahén badkárán naprata kanay.

⁶ Drógbandán bégwáha kanay,

Hodáwand cha hónig o prébkárán naprata kant.

⁷ Bale man cha tai mehrá tai lógá káyán o cha tai torsá tai parasteshgáhá kónhdhána kapán.

⁸ Oo Hodáwand! Pa mani dozhmenáni sawabá,

gón wati adl o ensápá maná rahshóni beday o

wati ráhá pa man sáp o tachk bekan.

⁹ Chiá ke rásti áyáni zobáná nést o del o darunesh tabáhi ent o bass.

Gotth o galuesh práhén kabré o wati zobáná pa cháplusi kára bandant.

¹⁰ Oo Hodá! Eshán mayárbár hesáb kan, bell ke wati shawráni tahá bebdandant.

Áyáni bázén náparmániáni sawabá, cha wat duresh kan,

chiá ke tai helápá shóreshesh kortag.

¹¹ Bale á sajjahén ke tai báhóth o mayára bant, shádmáni bekanant,

dáemá sáz o zémel bejanant.

Áyán wati sáhegay chérá negahpáni bekan,

tán harkas ke tai námay dóstdár ent gón tai námá shádán bebit.

¹² Allamá, taw, oo Hodáwand, pahrézkárán barkata dayay o

áyán gón wati mehr o rahmatá esparay paymá negahpána bay!

6

Oo Hodá! Maná berakkén

Pa sázger o washáwázáni sálará. Gón zehi o simmi sázán. "Sheminitay"* tarzay sará. Dáuday Zabur.

¹ Oo Hodáwand! Maná gón wati hezhmá hakkal maday o

gón wati gazabá neherr.

² Hodáwandá! Mani sará rahm kan chiá ke gimmortagán.

Oo Hodáwand! Maná dráh bekan chiá ke jesm o jánon paréshán ent.†

³ Arwáhon sakk békarár o jalájósh ent.

* 6: 6:0 Sheminitay máná "hashtomi" ent. Báwar esh ent ke edá muzikay yak gálé. † 6:2 6:2 Asligén Ebráni zobána gwashit: "Haddh o bandon paréshán ant."

- Oo Hodáwand! Tán kadén? Tán kadén?
- ⁴ Hodáwandá! Wati démá gón man tarrén o mani sáhá berakkén, wati mehray sawabá maná neját be-day.
- ⁵ Chiá ke mordag tará yát korta nakanant, kay ent ke cha mordagáni jahána tai shográ begipt?
- ⁶ Cha nálagán dam bortagán, har shap gandalán cha gréwagá ménán o tahtá gón arsán tarra kanán.
- ⁷ Chammon cha bázén andóhán nezór butagant o cha bázén dozhmenán tahár.
- ⁸ Oo sajjahén badkárán! Cha man dur bét, chiá ke Hodáwandá mani gréwagáni tawár eshкотagant.
- ⁹ Hodáwandá mani peryát gósh dáshtagant, Hodáwand mani dwáyá mannit.
- ¹⁰ Mani sajjahén dozhmen sharmendag o sakk paréshána bant, á démá chahra dayant o pashal o sharmendaga bant.

7

Tai mayár o báhótha bán

Dáuday Shigáyun.* Dáudá é Zabur Benyáminay kabilahay Kush námén mardoméay habaráni sawabá pa Hodáwandá darshán kortag.

- ¹ Oo Hodáwand, mani Hodá! Tai báhóth o mayára bán.
Maná cha á sajjahénán ke mani randá kaptagant berakkén.
- ² Agan na, á maná shéráni paymá derrant, chondh chondha kanant o maná rakkénóké nabit.
- ³ Oo Hodáwand, mani Hodá! Agan man choshén káré kortag o daston gonáhéa mén ent,
- ⁴ agan pa dóstéa badión kortag, yá ke dozhmené bémayará poletag,
- ⁵ bell ke dozhmen mani padá byayt o áiy dast pa man berasit, mani zendá pádmál bekant o maná hákání tahá bwápénit. Ósht...
- ⁶ Oo Hodáwand! Gón wati hezhmá jáh bejan o mani dozhmenáni gazabay démá pád á!
Ágáh bay, oo mani Hodá!

- Taw ay ke dádrasiay járet jatag!
- ⁷ Bell ke kawmáni romb tai gwará yakjáh bant,
cha borzá esháni sará hákemi bekan!
- ⁸ Bell ke Hodáwand pa kawmán shawr o hokm beborrit.
Oo Hodáwand! Gón mani rásti o tachkiá,
wati dadrasiá mani pahrézkáriáni sará bekan.
- ⁹ Oo ádelén Hodá ke del o darunána zánay!
Badkáráni sherrián halás kan o pahrézkárán pa del mohr bedár.
- ¹⁰ Mani espar Hodá ent ke nékdelána rakkénit.
- ¹¹ Hodá ádelén dadrasé,
Hodáé ke har róch hezhma gipt.
- ¹² Agan ensán pashómán mabit,
wati zahmá téza kant o wati kamáná kasshit o tayára kant.
- ¹³ Áiyá koshókén seláh tayár kortag o wati tirán ácheshéna kant.
- ¹⁴ Á mardomá bechár ke cha sherr o shórá ápos ent o cha petnahá lápporr, á dróga zayt.
- ¹⁵ Kallé kóchit o johla kant o hamá chátá kapit ke wat kótkagi.
- ¹⁶ Áiyay petnah wati sará kapit o pasáti ham sará laggit.
- ¹⁷ Hodáwandá pa áiyay adl o ensápá shogra gerán,
borzén arshay Hodáwanday námá názénán.

8

Porshawkat ent tai nám

Pa sázger o washáwázáni sálará. "Gittitay"* tarzay sará. Dáuday Zabur.

- ¹ Oo Hodáwand, may Hodáwand!
Chenkadar porshawkat ent tai nám jahánay chárén kondhán.

Taw wati shán o mazani ásmánáni sarborá sheng o tálán kortag.
- ² Pa wat satá o saná, chokk o shirmechén nonnokáni dapá ham dátag ke tai dozhmenáni sawabá tará satá bekanant,
tánke dozhmen o bérgirán chopp o bétawár bekanay.
- ³ Wahdé tai ásmánáni némagá charán ke tai lankokáni ezm o honar ant máh o estáráni némagá,
ke taw barjáh dáshtagant,
- ⁴ ensán chié ke taw áiyay gamwár bebay o

* 7: 7:0 É gáláy maná zánag nabutag bale balkén adab yá muzikay yak gálé.

* 8: 8:0 Báwar esh ent ke Gittit muzikay yak gálé.

- bani ádam kay ent ke áiy delgóshá bedáray?
- ⁵ Bale angat taw cha préshtagán[†] bass kammoké kamter kort o mazani o ezzatay táj sará dát.
- ⁶ Wati dastay sajjahén káráni sará hákem kort o har chizz áiy pádáni chérá esht.
- ⁷ Sajjahén ramag o górróm[‡] gyábán o sahráí jánwar
- ⁸ ásmánay báli morg o daryáay máhig o har ché ke cha zeray[§] ráhá gwazit.
- ⁹ Oo Hodáwand, may Hodáwand! Chenkadar porshawkat ent tai nám jahánay chárén kondhán.

9

Ádelén Hodá

Pa sázger o washáwázáni sálará. "Mawt-labbénay"* tarzay sará. Dáuday zabur.

- ¹ Tará, oo Hodáwand, cha delay johlánkián shogra gerán, tai sajjahén ajabén kárán darshána kanán.
- ² Tai gwará gal o shádmánia kanán. Oo borzén arshay Hodá! Tai námá názénán.
- ³ Wahdé mani dozhmen pada kenzant, cha tai démá lakoshant o tabáh o haláka bant.
- ⁴ Chiá ke taw mani hakk o ensáp pa sharri dáshtag, wati tahtá neshtagay o pa ensáp dádrasi kortag.
- ⁵ Kawmet hakkal dátagant, badkár tabáh o barbád kortagant o áyáni nám abad tán abad gár o bégwáh kortag.
- ⁶ Dozhmen, dáemi wayránagáni tahá gár o gomsár butagant, áyáni shahráni risshag o wandhálet cha boná kasshetagant, tantaná[†] áyáni yát ham gár o zawál butag.
- ⁷ Bale Hodáwand tán abad bádsháhia kant, áiyá wati shawr o dádrasiay taht páydár kortag.
- ⁸ Á wat jaháná gón adlá dádrasia kant,

kawmáni sará gón ensápá shawra borrit.

- ⁹ Hodáwand pa zolm distagénán, borzén kalaté kalaté borzén, mán sakkén sáhatán.
- ¹⁰ Á ke tai námá zánant tai sará tawkala kanant chiá ke taw, oo Hodáwand, wati hodónákén[‡] lóthók yalah nakortagant.
- ¹¹ Hodáwandá, ke tahti Sahyuná ent, benázénét, kawmáni nyámá áiy kortagén kárán jár janét.
- ¹² Chiá ke á ke hónáni bérgir ent, eshán yáta kant zolm distagénáni peryátána nashamóshít.
- ¹³ Oo Hodáwand! Mani sará rahm kan, hamá ázárán ke cha dozhmenáni dastá maná rasant bechár, taw ke cha markay darwázagán maná sarperáza kanay,
- ¹⁴ tánke tai sajjahén satá o tawsipán Sahyunay Jenekay darwázagáni démá[§] barjáh dárán o shádmáni bekanán ke taw maná rakkéntag.
- ¹⁵ Kawm, wati hamá kótkagén kallá kaptagant, áyáni pád hamá dámá band geptag o passetagant ke watesh chér kortagat.
- ¹⁶ Hodáwandá watá gón wati adl o ensápá pájjáréntag, badkár cha wati kortagén kárán wat dámá kapant. Zegr...* Ósht...
- ¹⁷ Badkár mordagáni jaháná pera tarrant, á sajjahén kawm ke Hodáyá shamóshant.
- ¹⁸ Bale hájatmand harwahd shamóshaga nabant o zolm distagénáni omét tán abad barbáda nabit.
- ¹⁹ Oo Hodáwand! Pád á o mayl ke ensán báládist bebit, bell ke tai dargáhá kawmáni shawr o hokm borrag bebit.

[†] 8:5 8:5 Yá: cha Hodáyá. [‡] 8:7 8:7 Górróm, bezán gókáni romb. [§] 8:8 8:8 Zer, bezán daryá. * 9: 9:0 Mawt-labbénay maná "chokkay mark" ent. Báwar esh ent ke Mawt-labbén muzikay yak gálé. [†] 9:6 9:6 Tantaná, bezán hattá, tán é haddá ke. [‡] 9:10 9:10 Hodónák, bezán wáhagdár, armáni, lóthók, delmánag. [§] 9:14 9:14 Sahyunay Jenekay darwázagáni démá, bezán Urshalimay shahray darwázagáni démá. * 9:16 9:16 Asligén Ebráni gál "Higáyun" ent. É gáláy maná zánag nabutag bale báwar esh ent ke muzikay yak gálé.

20 Oo Hodáwand! Torsesh jesm o jáná perrén
tán kawm bezánant ke ensán ant o
bass. Ósht...

10

Chiá watá chéra dayay?

- 1 Oo Hodáwand! Pa ché dur óshtátagey?
Chiá watá sakkén sáhatán chéra
dayay?
- 2 Badkár gón kebr nezórénán shekára
kant,
bell ke wati pandaláni dámá gereptár
bebit.
- 3 Chiá ke badkára wati delay wáhagáni
sará pahr ent,
lálech kanókán barkata dant o
Hodáwandá bad o rada gwashit.
- 4 Badkár mán wati kebr o gorunákia
gwashit: “Hodá dar gétka nakant”,
áiyaj sajjahén pegr o hayál esh ent ke
“Hodáé nést”.
- 5 Wati ráhá modám kámyáb o sóbén* ent,
tai shawr o dádrasi cha áiyaj chammá
dur ant,
wati sajjahén dozhmenán rishkanda
kant.
- 6 Wati delá gwashit: “Hechbar cha wati
jáhá sorénag o jombénaga nabán
nasláni nasl cha kazá o baláhán dura
bán.”
- 7 Dap o zobáni cha nálat o préb o setamá
porr ent,
áiyaj zobánay chérá petnah o
sherkáriá kodám bastag.
- 8 Métag o ábádiáni kaminá† nendit,
chér o panáhén jáhán bégonáhána
koshit,
chérokái béwasáni shekár kanagay
shóházá ent.
- 9 Shéray paymá wati kaminá wadára kant,
wadára kant o nezór o nátwánán wati
panjagá kárit,
panjagá kárit o dámá dawra dant.
- 10 Áiyaj shekár, lagatmál o zár o wára bant,
áiyaj dastá gár o gomsára bant.
- 11 Wati delá gwashit: “Hodáyá shamoshtag
démi póshéntag o hechbara nagen-
dit.”
- 12 Oo Hodáwand! Pád á. Oo Hodá! Wati
dastá shahár.
Bazzagénán mashamósh.
- 13 Badkár pa ché Hodáyá bad o rada
gwashit?
Chiá wati delá gwashit:
“Hodá dar gétka nakant”?

- 14 Bale albat taw genday. Sakki o sóriána
genday,
tán kár o ehtiára wati dastá bedáray.
Bazzag o béchárag watá tai sepordaga
kanant,
chórawáni madat kanók taw ay.
- 15 Sherr o badkáráni báská beprósh,
áyáni sharáratay hesábá beger,
hamá káráni hesábá ham ke áiyaj
gwashtag: “Hodá dar gétka nakant”.
- 16 Hodáwand abad tán abad bádsháh ent,
kawm cha áiyaj sardhagará gár o
gomsára bant.
- 17 Oo Hodáwand! Taw bazzagáni
wáhagán gósha dáray,
áyán delbaddhia dayay o habaránesh
eshkonay.
- 18 Chóraw o setam distagénáni dadrasiá
kanay
tánke é hákién ensán dega baré tors o
dehshat maperrénit.

11

*Hodáwand wati Pákén parasteshgáhá
ent*

Pa sázger o washáwázáni sálará. Dáuday
Zabur.

- 1 Man Hodáwanday mayár o báhóth án,
gorhá shomá maná che paymá
gwashét:
“Morgé bebay o wati kóhá bál kan.
- 2 Chiá ke haw, badkár kamáná kasshant o
tiresh zehá dátág,
ke mán tahárokia nékdelán bejanant.
- 3 Agan bonred* tabáh kanag bebant,
gorhá pahrézkár ché korta kant?”
- 4 Hodáwand wati pákén parasteshgáhá
ent,
Hodáwanday taht ásmáná ent.
Chammi gendagá ant,
didagi ensánay chokkána ázmáit.
- 5 Hodáwand pahrézkár o badkárána
chakkásit†,
áiyaj ruh cha hamáyán naprata kant ke
sherr o sheddatesh dósta bit.
- 6 Badkáráni sará angar o gókorta
gwárénit,
áyáni jám o pyálahay bahr, sócháak o
lewárén gwát ent.
- 7 Hodáwand ádel ent,
áiyaj adl o ensáp dósta bit,
nékdel áiyaj démá gendant.

* 10:5 10:5 Sóbén, bezán péróz, kámyáb. † 10:8 10:8 Kamin, bezán sráp. * 11:3 11:3 Bonred, bezán lóg yá
diwáléay awali o johlterén red. † 11:5 11:5 Chakkásag, bezán ázmáesh kanag, emtehán gerag.

12

Hodádóste pasht nakaptag

Pa sázger o washáwázáni sálará. “Sheminitay”^{*} tarzay sará. Dáuday Zabur.

- 1 Oo Hodáwand! Berakkén, chiá ke hech Hodádóste pasht nakaptag o wapádár cha mardománi nyámá gár o bégwáh butagant.
- 2 Harkas gón hamsáhegá dróga bandit, cháplusén dapesch pa préb habara kanant.
- 3 Hodáwand har cháplusén dapá próshát o har bathák janókén zobáná borrhát.
- 4 Gwashant: “Má gón wati zobáná kámyáb o sóbéna bén, may dap o lonth ham gón má ant, may wájah o master kay ent?”
- 5 Hodáwanda gwashit: “Cha nezórén mardománi lagatmáli o hájatmandáni nálagáni sawabá nun jáha janán[†]. Man eshán hamá paymá émenia bakshán ke esháni armán ent.”
- 6 Hodáwanday habar asil o béayb ant, nograhay paymá ke cha kurahá dar átkag o hapt randá pák o sallah kanag butag.
- 7 Oo Hodáwand! Taw eshán negahpánia kanay, taw é dábén mardománi nyámá esháni posht o panáha bay.
- 8 Badkár har némagá tarr o tába kanant, á wahdi ke mardom palitiá ezzata dayant.

13

Oo Hodáwand! Tán kadén?

Pa sázger o washáwázáni sálará. Dáuday Zabur.

- 1 Oo Hodáwand! Tán kadén? Bárén maná tán abada shamóshay? Tán kadén wati démá cha man panáha kanay o póshénay?
- 2 Tán kadén mani pegr o andéshag maná ázar bedayant, har róch delon gamig? Tán kadén dozhmen mani sará báládest bebit?
- 3 Oo Hodáwand! Mani Hodá! Mani cháragá bekan o passaw day!

^{*} 12: 12:0 Sheminitay máná “hashtomi” ent. Báwar esh ent ke edá muzikay yak gálé. [†] 12:5 12:5 Jáh janag, bezán cha wati jáhá anáगतén pád áyag, Arabi o Pársiá “qiám, rastákhiz”. ^{*} 15:1 15:1 Tambu, bezán gedán, haymah. É gál pa Sháhediay tambuá esháráté. Sháhediay tambu Bani Esráilián Mussáay zamánagá gón Hodáay hokmá jórhéntagat o hamódá Hodáesh parastesh kortag.

Chammánon rozhná kan, agan na, markay wábá wapsán.

- 4 Chó mabit dozhmen begwashit: “Man áiy sará sóbén butagán”, badwáh shádán bebit ke mana larzán.
- 5 Bale tai mehray sará tawkala kanán, delon gal o bála bit ke taw maná rakkéntag.
- 6 Hodáwandá názénán, ke modám mani sará mehrabán butag.

14

Nádána gwashit: “Hodáé nést”

Pa sázger o washáwázáni sálará. Dáuday Zabur.

- 1 Nádán wati delá gwashit: “Hodáé nést.” É palit ant o káresh sell o gandah, nékkaré nést.
- 2 Hodáwand cha ásmáná bani ádamá chárit tán begendit bárén dánáé hast ke Hodáay shóházá ent.
- 3 Sajjahénán wati ráh gár dátag, hórígá palit butagant, nékkaré nést, yakké ham nést.
- 4 Badkár hechbar sarpada nabant? É mani kawmá anchosha warant ke mardom nagana warant o Hodáwandá hech tawára nakanant.
- 5 Bale ódá wati torsay tahá boddhant, chiá ke Hodá gón pahrézkáráni nasl o padréchá ent.
- 6 Shomá setam distagénáni shawrbandián rishkanda kanét, bale Hodá esháni panáhgháh ent.

- 7 Kasé cha Sahyuná byáyát o Esráilá berakkénát. Wahdé Hodáwand washbahtiá pa wati kawmá pera tarrénit, Ákub gal o bála bit o Esráil shádehiah kant.

15

Kay tai pákén kóhá jahmenend bebit

Dáuday Zabur.

- 1 Oo Hodáwand! Kay tai tambuá^{*} mehmán bebit? Kay tai pákén kóhá jahmenend bebit?
- 2 Hamá ke béayb gám bejant,

- adl o ensápá barjáh dárít o
pa delsetki rásténá begwashít,
3 hamá ke gón wati zobáná kaséay
báposhtá habaré magwashít,
pa hamsáhegá badi makant o
hamráhán ér majant,
4 hamá ke badkár áiy chammán hakim o
béarzesh bebant,
Hodátorsán ezzat o hormat bedant o
wati labzay sará wapá bekant, toré
zalar o zyán begendít,
5 hamá ke wati zarrá pa sutt madant o
bégonáheáy helápá reshwat magipt,
á ke eshán barjáha dárít hechbara
nalarzit.

16

Maná yalaha nakanay
Dáunday shayr.

- 1 Oo Hodá! Maná pa sharri bedár,
ke tai mayár o báhóth butagán.
2 Gón Hodáwandá gwashton: "Taw ay
mani Hodáwand,
abéd cha taw pa man hech sharrié
nést."
3 Á pák o palgártagén ke zeminá ant,
hamá sharapmand ant ke mani saj-
jahén shádmáni hamáyáni sawabá
ent.
4 Á ke dega hodáéay randá tachant, áyáni
gam o andóh sakk báza bit,
áyáni hónén korbánigáni rasmán
góna nabán o
námánesh wati zobáná nayárán.
5 Oo Hodáwand! Taw mani gisshetagén
bahrwandh o jám ay,
taw mani bahrá sharriay sará dáray.
6 Mani hadd o simsar, deltabén jágahán
gissshénag butagant,
maná delkasshén mirásé dastá kaptag.
7 Man Hodáwandá názénán ke maná
shawr o saláha dant,
delon shappásán ham maná ráh sója
dant.
8 Man modám Hodáwand wati dém pa
démá distag,
á mani rástén pahnatá ent,
cha hamé sawabá mana nalarzán.
9 Paméshká, delon wassh o zobán shádán
ent.
Jesm o jánon mán ométay kalatá
áráma gipt.
10 Chiá ke taw maná mordagáni jaháná
yalaha nakanay o
wati dóstdará sarhag o pussagá nay-
lay.
11 Taw maná zenday ráhá sója dayay o
wati bárgáhá maná cha shádmániá
sarrécha kanay.

Tai rástén kashá, wasshi abadmán
ent.

17

Tai bánzoláni chérá
Dáunday dwá.

- 1 Oo Hodáwand! Mani barhakkén
perýátán beshkon o
nálágánon gósh dár,
dwáyánon beshkon,
ke cha béryáén dap o lonthán dara
káyant.
2 Cha tai bárgáhá maná dádrasi o ázáti sar
bát,
chammet rásténá begendátant.
3 Taw mani del ázmáesh kortag o
shappásán mani chárágá átkagay,
maná chakkásetaget o hech dar
nagétkag,
ahdon kortag ke dap gonáh makant.
4 Mardománi kár har ché ke bit,
bale man cha tai lontháni gálá
watá cha zálemáni ráhá dur dáshtag.
5 Mani pádáni pad tai ráh á naksh ant,
pádon nalarzetagant.
6 Oo Hodá! Tará lóthán, chiá ke taw maná
passawa dayay,
gósh dár o habaránon beshkon.
7 Wati mehray ajabbatiá pésh bedár!
Taw hamáyána rakkénay
ke cha wati dozhmenán tai gwará
mayár o báhótha bant.
8 Maná chó wati chammá besambál o
wati bánzoláni sáhegá chér beday,
9 cha á badkárán ke maná gár o gomsára
kanant o
cha hamá jawrén dozhmenán ke maná
angerresh kortag.
10 Á wati sengén delán mohra kanant o
áyáni zobán porkebr o gorunákén
habara kant.
11 Mani padesh geptagant o hamé annun
maná angerresh kortag,
chammesh pa man dótkag tán zeminá
dawron bedayant.
12 Á shéréay paymá ant ke pa shekárá
shodig ent,
warnáén shéréay paymá ke kaminá
neshtag,
13 Oo Hodáwand! Jáh jan, esháni démá dar
á o zeminá bejanesh,
gón wati zahmá maná cha badkárán
berakkén.
14 Hodáwandá! Maná cha é paymén
mardománi dastá ázát kan,
cha é donyáay mardomán ke nasibesh
tahná hamé donyá ent o bass,

ke lápánesh cha wati hazánagá séra kanay,
chokkesh báza bant o
áyáni pasht kaptagén chizz pa
chokkánesha rasit.

- 15 Bale man pa pahrézkári tai démá gendán,
ágáh ke bán, cha tai gendagá séra bán.

18

Hodáwand mani talár ent

Pa sázger o washáwázáni sálára. Hodáwanday hezmatkár Dáuday Zabur. Dáudá é Zabur hamá wahdá pa Hodáwandá per bast ke Hodáwandá cha sajjahén dozhmenán o cha Sháulay dastá rakként. Dáudá chosh gwasht:

- 1 Oo Hodáwand, oo mani zór o wák! Tará báz dósta dárán.
2 Hodáwand mani talár ent, mani kalát o mani rakkénók ent,
mani Hodá mani talár ent o hamáiyay poshtá báhóth o mayára bán.
Á mani espar ent, mani zórakén rakkénók* o mani sangar.
3 Hodáwandá ke satá o sanáay láhek ent tawára kanán o cha wati dozhmenána rakkán.
4 Markay sád o bandán maná patátagat o tabáhi o zawáliay hár o hirrópán maná torséntagat.
5 Mordagáni jahánay sád o bandán patátagatán o gón markay dámá, dém pa dém atán.
6 Wati paréshániáni tahá Hodáwandon tawár jat o komak lóthagay peryáton wati Hodáay gwará borz kort.
Áiá cha wati parasteshgáhá mani tawár eshкот o mani komak lóthagay peryát áiy góshán raset.
7 Nun zemin chandhet o jomb o jóshá lagget,
kóháni béh o bonyát ham larzetant, chiá ke á hezhm geptagat.
8 Cha áiy pónzá dutt dar átk o sóznákén ásé cha dapá,
taptagén angar zobánok janagá atant.
9 Ásmáni ér áwort o jahl átk,
syáhén jambar áiy pádáni chérá at.
10 Karrubiéay† bánzoláni sará neshtagat o gwátay bánzoláni sará bál at.
11 Taháróki wati pósháki kort o

jambaráni gobár o syáhén hawri wati chágerday kápár kortant.

- 12 Rozhn o drapshnáki cha áiá démá at o jambar chest bayagá atant,
taptagén seng o ácheshén angar dara kaptant.
13 Hodáwandá cha ásmáná grandet o borzén arshay Hodáya cha taptagén seng o ácheshén angarán wati tawár sar dát.
14 Áiá wati tir shántant o dozhmen sheng o sháng kortant,
gróki dawr dát o sargardáni kortant.
15 Daryáay ápráh gendag butant o donyáay bonyát paddar,
cha tai neherr o hakkalán cha tai pónzay trondén gwátá, oo Hodáwand!
16 Áiá cha borzadá dast shahárt o maná gepti,
cha zyádahén ápá maná dar áworti o
17 cha zóráwarén dozhmená rakként,
cha áyán ke napratesh mani sará próshtagat,
chiá ke cha man zórakter atant.
18 Sakki o sóriáni róchá, mani démá dar átkant,
bale Hodáwand mani posht o panáh at.
19 Áiá maná práh o émenén jágahé áwort o maná rakkénti, chiá ke cha man báz washh o razá at.
20 Hodáwandá pa mani pahrézkáriá gón man néki kortag,
mani dastáni pákiay mozz bakshátag,
21 chiá ke man Hodáwanday ráh yalah nadátag o cha Hodáya dém pa badiá nashotagán.
22 Áiy parmán modám mani chammáni démá butagant o áiy hokm cha wat dur nadáshtagant.
23 Áiy démá tamán o béayb butagán o watá cha gonáhá dur dáshtag.
24 Hodáwandá mani pahrézkáriáni mozz dátag,
áiá mani dastáni páki distag.
25 Taw gón wapádarán wapádár ay o gón tachkénán tachk.
26 Gón pákénán pák ay o gón repkkarán chálák.
27 Chiá ke taw békebrána rakkénay,
bale porkebr o gorunákán chamjahla kanay.
28 Oo Hodáwandén Hodá! Taw ay ke mani cherágá rozhnága kanay.

* 18:2 18:2 Asligén Ebráni nebeshtánka gwashtit: mani rakkénókén kánth. Kánthay máná edá zór o kodrat ent.

† 18:10 18:10 Karrubi, ásmáni mahluké ke bánzolesh per o Hodáay tahtay chapp o chágerdá atant.

- Hamá ent ke mani tahárókíán
róshena kant.
- 29 Gón tai madatá lashkaréay sará orosh o
hamlaha barán o
gón Hodáay komaká ent ke cha borzén
diwálán koppa kanán.
- 30 Haw! Hodá, áiy ráh tamán o kámelén
ráhé,
Hodáay habar béayb ant,
pa harkasá ke áiy gwará panáha
zurit, esparé.
- 31 Hodáwandá abéd, kay Hodá ent o
Hodáyá abéd, kay talár?
- 32 É Hodá ent ke maná zór o wáka dant o
mani ráhá tamán o béayba kant.
- 33 Mani pádán áskáni‡ paymá téza kant o
maná borziáni óshtagá láhekia dant.
34 Mani dastán pa jangá ázmudaga
kant,
tán báskon brenjén kamáná be-
loppénit o chóth bekant.
- 35 Taw wati sóbén bayagay espará maná
bakshay o
rástén dastet mani posht o panáh ent,
tai narndeli o békebri maná mazania
dant.
- 36 Taw mani pádáni chéray ráhá práha
kanay
tánke pádon malarzant.
- 37 Dozhmenáni randá kapán o
mani dast pa áyána rasit,
tán halák mabant, pera natarrán.
- 38 Anchosh zeminá janán ke pád áyagay
móh o wákesh mabit,
mani pádáni chérá kapant.
- 39 Taw pa jangá maná zór o wáka bakshay
o
dozhmenán mani pádáni chérá dawra
dayay.
- 40 Mani pádán dozhmenáni gardenay sará
éra kanay o
man wati dozhmenán gár o gomsára
kanán.
- 41 Pa komaká peryáta kanant bale
rakkénóké nést,
cha Hodáwandá komaka lóthant, bale
passawa nadant.
- 42 Man áyán háka kanán o gwátá dayán,
damk o kuchaháni gelay paymá
chandhán.
- 43 Taw maná cha mardománi jang o
chópána rakkénay o
kawmáni sardára kanay,
hamá mardom mani hezmatá kanant
ke manesh pajjáha nayarán.
- 44 Tán mani tawará eshkonant, parmána
barant,

- darámad mani démá wati sará jahla
kanant.
- 45 Á deltrakka bant,
larzán o drahán cha wati kalátána
tachant.
- 46 Hodáwand zendag ent. Pa mani talárén
Hodáyá názénk.
Mani rakkénókéén Hodáyá shán o
shawkat bát.
- 47 Hodá ent ke mani bérá gipt,
kawm o ráján mani chérdastia
nádénit o
- 48 maná cha dozhmenána rakkénit.
Haw! Taw mani dozhmenáni démá
maná sarperáza kanay o
cha zálemén mardomána chotthénay.
- 49 Oo Hodáwand! Paméshká tará
kawmáni nyámá satá kanán o
tai námá názénán.
- 50 Á wati bádsháhá mazanén sób o pérózia
bakshit o
wati rógen per moshtagéá§ mehra
kant,
bezán Dáud o áiy nasl o padréchá tán
abad.

19

*Hodáwanday Sharyat tamán o béayb
ent*

Pa sázger o washáwázáni sálará. Dáuday
Zabur.

- 1 Ásmán Hodáwanday shán o mazaniá
paddara kant,
borzén arsh áiy dastay karán.
- 2 É róch pa á róchá habar rawána kant o
é shap pa á shapá zánt o hekmat
darshána kant,
- 3 na habaré o na gálé,
áyáni tawár eshkonaga nabit.
- 4 Padá ham áwázesh sarjamén zeminá
sheng o tálána bit o
habaresh tán jahánay goddhi marz o
simsarána rasant.
Pa róchá, Hodáyá ásmáná tambué
bastag,
- 5 róch sálónkéay paymá cha wati kella-
bandá* dara kayt o
chó ke pahlawáné shádán maydána
kant.
- 6 Cha ásmánay yak gwaréá dara kayt o
tán á dega gwará chahra wárt,
hech chizzé cha áiy horm o garmia
chér naent.
- 7 Hodáwanday Sharyat tamán o béayb ent
o

‡ 18:33 18:33 Ásk, bezán áhu, áhug. § 18:50 18:50 Rógen per moshag, bezán pa bádsháhiá gechén kanag.

* 19:5 19:5 Kellahband, bezán hamá jágah ke pa sálónk o bánórá jórh kanaga bit.

- jesm o jáná bóda kárit.
 Hodáwunday hokm porehdebár ant o kamzántán dáná o aglmand kant.
- ⁸ Hodáwunday rahband rást ant o delá shádána kanant.
 Hodáwunday parmán pák ant o chammán rozhnága kanant.
- ⁹ Hodáwunday tors pák ent o tán abad páydár.
 Hodáwunday parmán barhakk ant o sarjamiá adl,
- ¹⁰ cha teláhá delkashter, tantaná cha asilén zarr ham,
 cha shahdá shirkenter, tantaná cha béngay kodámáy har trampá washter.
- ¹¹ Tai hezmatkára cha áyán dháh o hoshdár rasit o gón áyáni dáragá mazanén mozzé.
- ¹² Kay ent á ke wati radián bezánt o sarpad bebit?
 Maná cha wati nazántagén gonáhán pák o sallah kan.
- ¹³ Wati hezmatkára cha gorunák o porkebrén kár o kerdán bedár,
 mayl ke mani sará báládest bebant. Hamá wahdá tamán o béayba bán o cha har mazanén gonáhá pák.
- ¹⁴ Oo Hodáwánd! Mani dapay habar o delay pegr o hayál tai delá benendátant,
 taw ke mani talár o posht o panáh ay.

20

Oo Hodáwánd! Bádsháhá sób o pérózi beday
 Pa sázger o washáwázáni sálará. Dáuday Zabur.

- ¹ Hodáwánd tará sakki o sóriáni róchá passaw bedayát,
 Ákubay Hodáay nám tará negahpán bát.
- ² Cha wati pákén jágahá pa taw komak berasénát o cha Sahyuná tará madat kanát.
- ³ Tai sajjahén korbánigán wati yátá bedárát,
 tai sóchagi korbánigáni mannók bát. Ósht...
- ⁴ Tai delay wáhagán barjáh dárát o tai sajjahén shawrbandián kámyáb kanát.
- ⁵ Tai sób o péróziá gón shádmáni kukkár bekanén o wati bayraká* tai námáy sará borzád bechandhénén.

Hodáwánd tai sajjahén dazbandián purah o sarjam bekanát.

- ⁶ Nun zánton ke Hodáwánd wati rógen per moshtagéná† rakkénit o cha wati pákén ásmáná áiá passawa dant,
 gón wati rástén dastay rakkénókén wák o tágatá.
- ⁷ Lahtén wati asp o arrábaháni‡ sará pahra kanant,
 bale má wati Hodáwándén Hodáay námáy sará pahra kanén.
- ⁸ Á srénprósha bant o kapant,
 bale má páda káén o mohra óshtén.
- ⁹ Oo Hodáwánd! Bádsháhá sób o pérózi beday.
 Tawár ke kanén, may passawá beday.

21

Hodáay dátagén sóbay shogriá
 Pa sázger o washáwázáni sálará. Dáuday Zabur.

- ¹ Oo Hodáwánd! Bádsháh cha tai zóra shádmánia kant o cha tai rakkéna gá ent ke inchok gal o bál ent.
- ² Taw áiy delay morád bakshátagant o áiy lontháni wáhaget cha áiá dur nadáshtagant. Ósht...
- ³ Chiá ke gón bázén barkatáni dayagá pa áiy wasshátka dar átkagay o tájé cha asilén teláhá sará dátet.
- ⁴ Áiá cha taw zend lóthet o taw bakshát, rócháni dráji, abad tán abad.
- ⁵ Cha tai bakshátagén kámránián, áiy shán o marháh mazan ent,
 áiárá shawkat o mazani dátag.
- ⁶ Pa rásti abadmánén barkat bakshátag o wati bagalá gal o shadánét kortag.
- ⁷ Chiá ke bádsháh Hodáwánday sará tawkala kant o borzén arshay Hodáwánday mehrá nalarzit.
- ⁸ Tai dast, sajjahén dozhmenán dara géjít, tai rástén dast pa áyán ke cha taw naprata kanant rasít.
- ⁹ Á wahdi ke záhera bay áyán porácheshén tarunéay paymá kanay.
 Hodáwánd wati hezhmay tahá áyán éra bárt o áiy áchesh áyána wárt.
- ¹⁰ Áyáni padréchá cha zeminá gár o bégwáha kanay,
 chokk o nabiragánesh cha mardománi nyámá.

* 20:5 20:5 Bayrak, bezán parcham. † 20:6 20:6 Rógen per moshag, bezán pa bádsháhiá gechén kanag. ‡ 20:7 20:7 Arrábah, bezán mazanén mansabdáráni hamá gárho ke aspia kasshant.

- 11 Harchont ke tai helápá palitén shawr-
bandi bekanant o
badén repk o pandal besázant bale
sóbéna nabant,
12 chiá ke taw áyána táchéney,
wahdé ke wati kamáná dém pa áyána
tarréney.
13 Oo Hodáwand! Gón wati zór o twáná
anchosh mazanshán bátay.
Tai wák o kodratá satá kanén o
názénén.

22

Taw chiá maná tahná esht?

Pa sázger o washáwázáni sálará. Dáuday
Zabur. "Sahargáhi áskay" tarzay sará.

- 1 Oo mani Hodá, oo mani Hodá! Taw chiá
maná tahná esht?
Pa ché cha mani rakkénagá dur ay,
cha mani áh o peryátán sakk jetá ay.
2 Oo mani Hodá! Sajjahén róchá peryáta
kanán o taw passawé nadayay,
sajjahén shapá ham, bale áráma
nagerán.
3 Angat ham taw pák o palgár ay,
Bani Esráil tará názénit ke taw pa
bádsháhi neshtagay.
4 May petán tai sará tawkal kort,
tai sará tawkalesh kort o taw
rakkéntant.
5 Tai dargáhá peryátesh kort o rakkéntant,
tai sará tawkalesh kort o pashal o
sharmendag nabutant.
6 Záná, man ensané naán, kermé án?
Mardománi demá sobakk án o kaw-
may chammá béezat.
7 Harkas ke maná gendit kalág o rishkand
kant.
Dapá chótha kanant, sará sorénant o
gwashant:
8 "Angat wati óst o ométá pa Hodáyá band,
bell á tará berakkénit,
berakkénit agan tará dósta dárit."
9 Bale taw maná cha mátay lápá dar áwort
o
mátay sénagá ásudagi dát.
10 Cha pédáeshá tai baddhá dawr dayag
bután,
cha mátay lápá mani Hodá butagay.
11 Cha man dur mabay,
chiá ke sakkí o sóri nazzik ent o
kassé pa komaká nést.
12 Bázén narén gókéá mani chapp o
chágerd geptag,
Báshánay sardhagáray zóráwarén
gókán maná angerr kortag,
13 wati práhén dapesch pa man parroptag,
gorrók o derrókéen shéráni paymá.

- 14 Chó ke ápá réchag o tálán butagán
sajjahén haddhon cha bandán dar
átkagant.
Delon chó ke momá áp ent o sénagá
sóchit.
15 Zór o tágatón kunzagi chondhé ke hoshk
butag o
zobánon nokká lacchetag,
maná markay háká wápéntaget.
16 Kočekán mani chapp o chágerd geptag,
sherr o badkáráni rombá angerr án,
mani dast o pádesh thong thong korta-
gant,
17 wati sajjahén haddhán shomár korta
kanán.
Áyán wati thélag pa man sakk korta-
gant,
18 mani pocchán wati nyámá bahra kanant
o
jámagay sará pála* janant.
19 Bale taw, oo Hodáwand! Dur mabay.
Oo mani zór o tawkal! Pa mani
komaká eshtáp kan.
20 Mani arwáhá cha zahm o shamshirá
berakkén o
mani zendagiá cha kočekáni zolm o
zórakíá.
21 Maná cha shér o mazáráni dapá neját
beday,
ke taw maná cha wahshiéni káigaráni†
kánthán rakkéntag.
22 Tai námá pa wati brátán jára janán o
mocchiay nyámá tará názénán.
23 Shomá, oo Hodátorsán! Áiá benázénét.
Oo Ákubay sajjahén chokk o
óbádagán! Áiá ezzat o shán
bedayét.
Oo Esráilay padréchán! Áiay haybatá
bechárét.
24 Chiá ke áiá cha setam distagény bazza-
giá posht nakortag o
démí cha áiá natarréntag.
Peryáti ke kortag áiá eshкотagant.
25 Mazanén diwáná mani satá o saná pa
taw ent,
wati kawlán hamáyáni demá sarjama
kanán ke Hodátors ant.
26 Békebr o darbesh waráka warrant o séra
bant o
á ke Hodáyá shóháza kanant áiá
názénant.
shomay del tán abad zendag bát.
27 Zeminay chárén kondh áiá yáta kanant
o
dém pa Hodáwandá pera tarrant,
sajjahén kawmáni hándán o kothom
áiy bargáhá sará jahla kanant.

* 22:18 22:18 Pál, bezán láthari, bay o shartbandi. † 22:21 22:21 Káigar, bezán mazanén narén gók.

- 28 Chiá ke bádsháhi Hodáwundayg ent o hamá ent ke kawmáni sará hákemia kant.
- 29 Zeminay sajjahén zóráwar waráka warant o áiy demá kapant, hákién ensán kóndhána kapit, hamá ke watá, wat zendag dáshta nakant.
- 30 Áyókén nasl áiy hezmatá bant, démi padréch Hodáwunday bárawá sahiy kanaga bant o
- 31 pa áyán ke angat wadi nabutagant áiy adl o ensápá jára janant.
Gwshant: "Á hamá at ke é kári kort."

23

Hodáwand mani shopánk ent
Dáuday Zabur.

- 1 Hodáwand mani shopánk ent, hech chizzay mohtája nabán.
- 2 Maná sarsabzén charágáhána wápénit o pa árámén ápán sara kant.
- 3 Mani arwáhá tázaga kant o pa wati námaygi pahrézkáriay ráhán maná demá bárt.
- 4 Agan cha markay tahárterén shép o daragán ham begwazán cha hech bimm o baláhá natorsán, chiá ke taw gón man gón ay, tai latth o asá maná tasallá bakshit.
- 5 Dozhmenáni chammáni demá parzónagé pa man pacha kanay, pa sharapa dayagá mani saragá théla janay o mani jámá modám porr kanán ay.
- 6 Allamá, mehr o néki zenday sajjahén róchán mani pad o randá ant o Hodáwunday kalátá jahmenenda bán, tán abad.

24

Mazanshánén bádsháh
Dáuday Zabur.

- 1 Zemin o áiy sajjahén hasti Hodáwundayg ant, jahán o sajjahén mahluk.
- 2 Chiá ke Hodáwandá áiy bonyát mán daryáyá nádént o ápáni sará óshatárént.
- 3 Kay cha Hodáwunday kóhá borzád shota kant?
Kay áiy pákén jágahá óshatáta kant?
- 4 Hamá ke deli sáp o dasti pák ent, hamá ke wati arwáhá dém pa náhudagiá natarrénit o drógén sawgenda nawárt.
- 5 Á cha Hodáwandá barkata gipt o

cha wati rakkénókén Hodáyá, adl o ensáp.

- 6 Hamé paymá ant, á mardom ke Ákubay Hodáay shóházá ant, hamá ke pa áiy demá hodónák ant. Ósht...
- 7 Oo darwázagán! Wati sará borz bedárét. Oo kwahnén dar o dapigán! Watá pa sháhegáni pach kanét, tánke mazani o shánay bádsháh begwazit.
- 8 Mazani o shánay é bádsháh kay ent? Porwák o zóráwarén Hodáwand, Hodáwand ke jangá delér ent.
- 9 Oo darwázagán! Wati sará borz bedárét! Oo kwahnén dar o dapigán! Watá pa sháhegáni pach kanét, tánke mazani o shánay bádsháh begwazit.
- 10 Mazani o shánay é bádsháh kay ent? Lashkaráni Hodáwand hamá ent mazani o shánay bádsháh. Ósht...

25

Ráhá maná pësh bedár
Dáuday Zabur.

- 1 Oo Hodáwand! Man pa del o ján dém pa taw káyán.
- 2 Oo mani Hodá! Tai sará tawkala kanán, mayl ke pashal o sharmendag bebán o dozhmen mani sará báládast bebant.
- 3 Ji haw! Á ke tai sará óst o ométa kant hechbar sarjahla nabít.
Á ke bé sawabá béwapáia kanant sarjahl o sharmendaga bant.
- 4 Oo Hodáwand! Ráhá maná pësh dár o wati keshká maná tálim day.
- 5 Dém pa wati rástia maná rahshón bay o sabak beday,
chiá ke taw mani rakkénókén Hodá ay o sajjahén róchá tai entezár o wadará án.
- 6 Oo Hodáwand! Wati rahmat o mehrá yát kan,
chiá ke á cha azalá hastant.
- 7 Mani warnáiy náparmáni o gonáhán yát makan,
wati mehray kesásá maná yát kan ke taw nék ay, oo Hodáwand!
- 8 Hodáwand nék o rást ent,
paméshká gonahkárán ráhá sója dant.
- 9 Békebr o darbéshén mardomán rástiy ráhá rahshónia dant,
wati keshká áyán pëshá dárít.
- 10 Hamá ke Hodáwunday ahd o paymánay sará óshtant,

- áiy sajjahén ráh pa áyán cha mehr o
wapáyá sarréch ant.
- 11 Oo Hodáwand! Pa wati námaygi mani
gonáh o mayarán bebaksh,
chiá ke mazan ant.
- 12 Kay ent hamá ke pa del Hodátors bebit?
Hodáwand áia hamá rástén ráhá sója
dant ke báyad ent gechéni bekant.
- 13 Á wati róchán pa séri o azgária
gwázénit,
áiy chokk o óbádag zeminay mirás
baróka bant.
- 14 Hodáwand wati delay ráz o ramzán gón
Hodátorsán darshána kant,
wati ahd o paymáná pa áyán pa-
jjárenit.
- 15 Mani chamm modám dém pa
Hodáwandá ant,
chiá ke hamá ent ke mani pádán cha
dámá ázáta kant.
- 16 Wati démá gón man bekan o maná
rahmat bebaksh,
chiá ke man békas o setam distagéné án.
- 17 Mani delay sakki o sóri báz ant,
maná cha paréshániá berakkén.
- 18 Mani ranj o sakkián bechár o
sajjahén gonáhánon bebaksh.
- 19 Mani dozhmenán bechár ke chinchok
báz ant o
cha man chón pa kahr naprata kanant.
- 20 Mani zendá bepahréz o berakkén,
mayl ke sharmendag bebán,
chiá ke tai báhóth o mayár án.
- 21 Tachki o rásti mani negahpán bát,
chiá ke mani omét taw ay.
- 22 Oo Hodá! Esráílá cha sajjahén sakki o
sórián berakkén.

26

*Oo Hodáwand! Wati dastán
bégonáhiay tahá shódán*
Dáuday Zabur.

- 1 Oo Hodáwand! Gonáhay bohtámá cha
mani sará bethagalén,
chiá ke wati bémayáriay tahá gámon
jatag o
bé larzagé Hodáwanday sará
tawkalon kortag.
- 2 Hodáwandá! Maná bechakkás o
ázmáesh kan,
mani del o hayálá cha chakkásá
begwázén.
- 3 Chiá ke tai mehr modám mani chammáni
démá ent o
tai wapádáriay sáhegá gáma janán.
- 4 Na gón prébkarán hamdiwána bán o
na dotal o dopóstén mardománi
hamráh.

- 5 Cha badkáráni hamráhiá naprata kanán
o
gón radkárán hamdiwána nabán.
- 6 Oo Hodáwand! Wati dastán bégonáhiay
tahá shódán o
tai korbánjáhay sará chahra warán,
- 7 tán wati shogrgozáriay tawará borz
kanán o
tai sajjahén ajabén káráni kessahá
byarán.
- 8 Oo Hodáwand! Maná tai lóg sakk dóst
ent,
tai shán o shawkatay jágah.
- 9 Mani sáhá gonahkáráni horigá mager o
zendá gón hónigán,
- 10 ke gandahén pandalesh dastá ent o
rástén dastesh cha reshwatá sarréch.
- 11 Bale man wati bémayáriay tahá gáma
janán,
maná berakkén o mani sará rahm kan.
- 12 Pádon tachk o sápen jágahé ér ent,
mazanén diwánán Hodáwandá
názénán.

27

Hodáwand mani rozhn o rakkénók ent
Dáuday Zabur.

- 1 Hodáwand mani rozhn o rakkénók ent,
cha kayá betorsán?
Hodáwand mani zenday kalát ent,
cha kayá bimmé bebit?
- 2 Wahdé badkár hamlaha kanant ke mani
jesm o jáná bederrant o ér bebarant,
wahdé dozhmen o badwáh mani sará
orosha kanant,
á wat thagala warant o kapant.
- 3 Bell ke lashkaré mani chágerdá wati
gedánán mekk bekant,
angat mani dela nalarzit,
agan jangé ham mani sará bekapit,
angat deljam án.
- 4 Cha Hodáwandá yak chizzé lóthetagon o
hameshiay pad o randá bán,
ke wati zenday sajjahén róchán
Hodáwanday lógá jahmenend bebán,
tánke Hodáwanday zébáiá begendán
o
parasteshgáhá cha hamáiá rahshóni
belóthán.
- 5 Chiá ke sakki o sóriáni róchá
maná wati sáhegá dárít,
wati tambuay tahá chéra dant o
taláréay sará borzá ósh tárénit.
- 6 Nun dozhmenáni angerrá
sarperáza bán o
gón shádmániáni kukkárá áiy tambuay
tahá korbánjaya kanán,

Hodáwandá pa sawt o sáza názénán.

⁷ Oo Hodáwand! Wahdé peryáta kanán
mani tawará beshkon,
mani sará rahm kan o passaw beday.

⁸ Taw gwashtag: “Mani chehragay shóháza
bebay.”

Dela gwashit: “Hodáwandá! Tai
chehragay shóháza án.”

⁹ Démá cha man chér maday,
wati hezmatkára gón hezhm per
matarrén,
taw ke mani madatkár butagay.

Oo mani rakkénókén Hodá!
Maná dawr maday o yalah makan.

¹⁰ Agan mát o pet ham maná yalah
bekanant,
Hodáwand wat maná zurit o dasta
gipt.

¹¹ Oo Hodáwand! Wati ráhá maná sój day,
dozhmenáni sawabá maná rást o
tachkén ráhá rahshón bay.

¹² Pa dozhmenáni wáhagá maná yalah
makan,
chiá ke drógén sháhed mani helápá
pád átkagant
ke jang o chópay ásá damant.

¹³ Deljam án ke Hodáwanday nékiá
zendagénáni zeminá gendán.

¹⁴ Hodáwanday wadará bay,
zórmand bay o delá dhaddh kan.
Haw! Hodáwanday wadará bay.

28

Peryát

Dáuday Zabur.

¹ Oo Hodáwand, oo mani talár! Tará
tawára kanán,
cha man nádelgósh mabay.
Agan taw bétawár bebay,
hamáyáni paymá bán ke kall o kabrá
kapant.

² Mani peryát o záriay tawará gósh dár,
wahdé cha taw madata lóthán o
wati dastán dém pa tai pákén bárgáhá
borza kanán.

³ Maná badkáráni hamráhiá gerrán makan
o makassh,
hamá ke radén kára kanant o
gón hamsáhegán cha sohl o saláhá habará
ant,
bale delesh cha sherr o shórá porr ent.

⁴ Kortagén káráni mozzáesh beday,
hamsang gón áyáni badén karán,

dastay kortagénáni mozzáesh beday,
áyáni káráni kaddá.

⁵ Paméshká ke Hodáwanday káráni
parwáhá nakanant,
áiy dazhonaray káráni háterá
nadárant,
á eshán tabáha kant o
hechbar pa rost o rodómá naylit.

⁶ Hodáwandá satá bát,
chiá ke mani peryát o záriay tawári
eshkotag.

⁷ Hodáwand mani zór o espar ent,
delon áiy sará tawkala kant o mada-
ton rasetag.
Del cha shádmániá sarréch ent o
gón wati sawt o názénkán áiy shográ
gerán.

⁸ Hodáwand wati mardománi zór o twán
ent,
pa rógen per moshtagéná* rakkagay
kalaté.

⁹ Wati mardomán berakkén o wati kawmá
barkat beday,
áyáni shopánk bay o tán abad wati
kópagá bejallesh.

29

Hodáwanday tawár zórmand ent

Dáuday Zabur.

¹ Oo ásmánián! Hodáwandá satá kanét,
Hodáwanday shán o kodratá satá
kanét.

² Hodáwanday námay shán o shawkatá
satá kanét,
Hodáwandá mán áiy pák o palgárén
drapshnákiá satá kanét.

³ Hodáwanday tawár ápáni sarborá ent,
shán o shawkatay Hodá grandit,
Hodáwand porzórén ápáni sarborá
grandit.

⁴ Hodáwanday tawár zórmand ent,
Hodáwanday tawár drapshnák ent.

⁵ Hodáwanday tawár gazzána próshit,
Hodáwand Lobnánay gazzána
próshit.

⁶ Á Lobnáná gwaskéay* paymá jáha
serrénit,
Siryuná† jalabén gókéay‡ paymá.

⁷ Hodáwanday tawár grand o grókén
áchesh rawána kant.

⁸ Hodáwanday tawár gyábáná larzénit,
Hodáwand Kádeshey gyábáná
larzénit.

* 28:8 28:8 Rógen per moshag, bezán pa bádsháhiá gechén kanag. * 29:6 29:6 Gwask, bezán góló, gókay chokk.

† 29:6 29:6 Siryun, Hermónay kóhay dega námé. ‡ 29:6 29:6 Jalabén gók, bezán warnáén narén góké ke pa kára
rám kanag nabutag. § 29:9 29:9 Yá: Hodáwanday tawár mazanén drachkána torrénit.

- 9 Hodáwanday tawár áposén áskána géjénitš o jangalá bé lamb o táka kant. Áiay parasteshgáhá sajjahén gwánka janant: “Shawkat o shán!”
- 10 Hodáwand hár o tuppánay sarborá, wati tahtay sará neshtag, Hodáwand tán abad wati bádsháhi tahtay sará neshtag.
- 11 Hodáwand wati kawmá wák o kodrat bebakshát, Hodáwand wati kawmá gón sohl o émeni barkat bedayát.

30

Mótkay badal nách o sohbat
Dáuday Zabur. Pa mazanén parasteshgáhay wapká* sawté.

- 1 Oo Hodáwand! Tará shán o shawkata dayán, chiá ke taw maná cha johlánkián chest kort o naeshтет dozhmen mani sará shádehi bekanant.
- 2 Oo Hodáwand, mani Hodá! Tai gwará pa komaká peryáton kort o taw maná cha nájórhiá dráh kort,
- 3 mani arwáh cha mordagáni jaháná dar áwort o cha áyáni nyámá ke kall o kabr butant zendag kort.
- 4 Oo Hodáwanday dóstdarán! Pa Hodáwandá nálzénk bejanét, áiay pák o palgárén námay shográ begerét.
- 5 Chiá ke hezhmi damáné o mehr o rahmati omray drájiá. Bit ke sajjahén shapé pa gréwag begwazit, bale bámgwáhá shádehi wati chehragá záhera kant.
- 6 Man wati ásudagiay wahdá gwasht: “Hechbar larzénaga nabán.”
- 7 Oo Hodáwand! Taw maná cha wati mehr o rahmatá mohrén kóhéay paymá óshtaréntagat, bale wahdé wati démet cha man tarrént, torseton.
- 8 Oo Hodáwand! Tará tawáron jat, tai gwará zári o peryáton borz kort:
- 9 “Mani marká che sutté mán o kabray tahá mani ér rawagá chónén páedagé? Záná, hák tará satá dant? Jára jant ke taw wapádár ay?

- 10 Oo Hodáwand! Beshkon o mani sará mehrabán bay. Hodáwandá! Mani madat kanók bay.”
- 11 Taw mani mótk nách o sohbaté kort, sugi god o póshák dar kort o maná gón shádmániá póshént,
- 12 tánke mani arwáh tará satá bedant o bétawár mabit. Oo Hodáwand, mani Hodá! Tán abad tai shográ gerán.

31

Tai mayár o báhóth án
Pa sázger o washáwázáni sálárá. Dáuday Zabur.

- 1 Oo Hodáwand! Tai mayár o báhóth butagán, hechbar mayl ke sharmendag bebán, wati adl o ensápáy tahá maná neját beday.
- 2 Wati delgóshá gón man bedár o maná zutt berakkén. Pa man panáhay talaré bay o pa mani rakkénagá mohrén kalaté.
- 3 Pa rásti mani talár o kalát ay, pa wati námaygi maná ráh sója dayay o rahshónia kanay.
- 4 Maná cha á dámá dar byár ke pa man chér o andém ent, chiá ke mani panáh taw ay.
- 5 Wati ruh o sáhá tai dastá dayán. Oo Hodáwand, oo wapádárén Hodá! Taw maná rakkénay.
- 6 Tará cha áyán naprat ent ke delgóshesh gón béarzeshén botán ent, bale man tai sará tawkala kanán, oo Hodáwand!
- 7 Tai mehrá gala bán o shádehia kanán, chiá ke taw mani syahróchi distagant o mani arwáhay sakkíáni némagá hayál gwar kortag.
- 8 Maná dozhmenáni dastá nadayay o mani pádán práh o sháygánén jágahé éra kanay.
- 9 Oo Hodáwand! Mani sará rahm kan chiá ke paréshán án, chammon cha gam o andóhán nezór butagant, jesm o arwáh ham.
- 10 Chiá ke zendon gamán wártag o omr nálagán, cha mani gonáhá,* tágaté pa man pasht nakaptag o

* 30: 30:0 Wapk, bezán chizzé ke pa Hodáyá gissshénaga bit.

* 31:10 31:10 Yá: cha mani syahróchiá.

haddh o bandon pussán ant.

11 Dozhmenáni sawabá sobakk o kalági butagán,
hás pa hamsáhegán,
pajjárók cha man torsán ant o
harkas maná kuchah o damkána gen-
dit, tachit.

12 Mordagáni warhá cha yátá shotagán o
proshtagén kunzagéay paymá bu-
tagán.

13 Chiá ke bázénéay bohtámán eshkonagá
án,
tors o dehshat cha har gwará,
gón yakdegará pandala jórhenant o
pa mani koshagá mandr o repka
sázant.

14 Bale oo Hodáwand! Man tai sará
tawkala kanán o
gwashán ke “taw mani Hodá ay.”

15 Mani wahd o damán tai dastá ant,
maná cha dozhmenán berakkén,
cha hamáyán ke mani randá kapta-
gant.

16 Démá pa wati hezmatkárá drapshán
kan,
gón wati mehrá maná berakkén.

17 Hodáwandá! Mayl ke sharmendag
bebán,
chiá ke tará tawáron per jatag,
bell ke sharur sarjahl o sharmendag be-
bant o
mordagáni jaháná bétawár.

18 Drógbandén lonthesh chopp bátant,
ke gón kebr o ér janag pahrézkáráni
helápá pa gorunáki habara kanant.

19 Tai néki chenkadar báz ent,
ke pa Hodátorsán ambáret kortag o
bani ádamáni chammáni démá pa
hamáyán purah o sarjam kortag
ke tai báhótha bant.

20 Eshán wati bárgáhay panáhá
cha mardománi pandalán chér o
andéma dáray o
wati sáhegá cha bohtám janókén
zobánán dur.

21 Hodáwandá satá bát,
chiá ke wati ajabén mehrá hamé
wahdá pa man paddara kant
ke man dawrah butagén shahréay
paymá angerr án.

22 Man cha wati torsá gwasht:
“Cha tai chammá sestag o dur kap-
tagán.”

Angat taw mani peryát o záriá eshkonay,
wahdé man pa madatá tará tawára
kanán.

23 Oo Hodáwanday sajjahén dóstdárán!
Áiá dóst bedáret,
Hodáwand wati wapádáráni ne-
gahpániá kant,
bale gorunákénán báz sezá dant.

24 Oo sajjahénán ke Hodáwanday wadará
ét!
Porzór bebét o delá dhaddh kanét.

32

*Bahtáwar hamá ent ke gonáhi bakshag
butagant*
Dáuday shayri gwashtánk.

1 Bahtáwar hamá ent ke Hodáwand cha
áiy násharián sar gwastag o
gonáhi bakshag butagant.

2 Bahtáwar hamá ent ke Hodáwand áiy
gonáhá hechbar hesába nayárit o
áiy arwáhá prébé mán nést.

3 Wahdé chopp o bétawár atán
haddh o bandon pussán atant,
cha sajjahén róchay zári o peryátán.

4 Chiá ke róch o shap tai dast mani sará
sanguin at,
sajjahén tágatton hoshagá at, chó
ke garmágay taptay chérá bebán.
Ósht...

5 Gorhá wati gonáhon tai dargáhá mannet
o
wati náparmániánon chér nadát.
Gwashton: “Wati gonáh o sarkashián
Hodáwanday gwará mannán” o
taw mani gonáhay mayárbári bakshet.
Ósht...

6 Paméshká, tán wahd o móh ent,
har Hodádóst tai gwará dwá bekant,
wahdé hárén áp chesta bant,
hech paymá pa áiá sar buta nakanant.

7 Taw mani chér bayagay jágah ay,
cha sakki o tangián maná émena
dáray o
gón ázátiay sawt o zémelán
gwarambáza kanay. Ósht...

8 Hodáwanda gwasht: “Tará hamá ráhá
sója dayán ke báyard ent beraway,
tará shawr o saláha dayán o
tará chárána bán.

9 Násarpadén asp yá kacharay* paymá
mabay,
ke tahná gón lagám o mahará rám
kanaga bit,
agan na, tai nazziká nayayt.”

10 Badkárar ranj o azáb báz ant,

* 32:9 32:9 Kachar, bezán kátel, katel, har o aspay chokk.

- bale Hodáwunday mehr hamáiy chapp o chágerdá gipt ke Hodáwunday sará tawkala kant.
- 11 Oo pahrézkárán! Hodáwunday bárgáhá shádehi kanét o shádán bebét. Oo sajjahén nékdelán! Shádehiay gwánká borz kanét.

33

Hodáwanda adl o rásti dósta bit

- 1 Oo pahrézkárán! Hodáwunday bárgáhá pa shádehi kukkár kanét, nékdelán, Hodáwunday satá kanag zéba dant.
- 2 Hodáwanda gón chang benázénét, gón dahtárén changá pa áiá sáz bejanét.
- 3 Pa áiá, nókén sawté byárét, gón washpanjagi simmán belarzénét o pa shádehi gwánk janét.
- 4 Chiá ke Hodáay habar tachk o rást ent o áiy sajjahén kár gón wapádáriá.
- 5 Áiá adl o rásti dósta bit, zemín cha áiy mehrá porr ent.
- 6 Gón Hodáwunday gál o habará ásmán addh butagant o áyáni sajjahén lashkar, gón áiy dapaý damá.
- 7 Daryáay ápán mocch o hákótha kant o johlián mán ambará.
- 8 Sajjahén zemín cha Hodáwanda betorsit, jahánay sajjahén mardom áiá ezzat bedayant.
- 9 Chiá ke áiá gwasht o hamá chizz paym but, parmáni dát o barjáh dárág but.
- 10 Hodáwand, kawmáni shawrbandián pacha réchit o rájáni kársáziána karójit.
- 11 Bale Hodáwunday shawr o saláh abadmán ant, áiy delay shawrbandi pa sajjahén nasl o padréchán.
- 12 Bahtáwar hamá kawm ent ke Hodáwand áiy Hodá ent, hamá mardom ke áiá pa wati mirásá gechéen kortagant.
- 13 Hodáwand cha ásmána jahláda chárit o sajjahén bani ádamána gendit,
- 14 cha wati bádsháhi tahtá zemínay sajjahén jahmenendána chárit,
- 15 á ke é sajjahénáni deli jórh kortag o áyáni har kár o kerdá zánt.

- 16 Bádsháhá, wati lashkaray mazani nejáta nadant o sarmachará, wati básk o panjagáni zór.
- 17 Pa sóbén bayagá, aspáy sará omét bandag náhudag ent, toré zórúwar bebit bale rakkénta nakant.
- 18 Haw! Hodáwunday chamm gón hamáyán ent ke cha áiá torsant, gón hamáyán ke óst o ométesh áiy mehr ent,
- 19 tánke áyáni arwáhá cha marká be-rakkénit o mán dhokkálá* zendagesh bedárit.
- 20 May arwáh Hodáwunday wadará ent, hamá may komak o espar ent.
- 21 May del áiy bárgáhá shádmánia kant, chiá ke may tawkal hamáiy pákén námáy sará ent.
- 22 Oo Hodáwand! Tai mehr may sará sáhél bát, hamá dábá ke ométen pa taw bastag.

34

Hodáwunday nékiá bechashét

- Dáuday Zabur. Hamá wahdá ke áiá Abimelekay kerrá watá ganókáni paymá kort, cha ódá dar kanag but o wati ráhá shot.
- 1 Dáemá Hodáwanda názénán áiy satá o saná modám mani dapá ent.
- 2 Mani arwáh Hodáwunday sará pahra kant, békebrén mardom beshkonant o shádehi bekanant.
- 3 Gón man hórígá Hodáwanda mazani bedayét, byáét ke hawáriá áiy námá názénén.
- 4 Hodáwandon shóház kort o maná pas-sawí dát, cha mani sajjahén torsán maná ázáti kort.
- 5 Á ke chammesh gón áiá ent drapshán ant, áyáni dém hechbar sharmsára nabít.
- 6 É meskiná tawár per jat, Hodáwanda áiy tawár eshkot o cha sajjahén sakkíán rakkénti.
- 7 Hodáwunday préshtag Hodátorsáni chapp o chágerdá pallé bandit o áyán nejáta dant.
- 8 Bechashét o bechárét ke Hodáwand nék ent,

* 33:19 33:19 Dhokkál, bezán kaht, hoshksáli.

- bahtáwar hamá ent ke áiy mayár o báhótha bit.
- 9 Oo Hodáwaday palgártagénán! Cha Hodáwandá betorsét, chiá ke Hodátorsán hech kammié nést.
- 10 Warnáén shér mohtáj o shodiga bant, bale Hodáwaday shóház kanókán cha nékiá hech kammié nést.
- 11 Oo chokkán! Byáét o cha man beshkonét, man shomará sabaka dayán ke Hodáwandá chón bemannét.
- 12 Cha shomá kay pa zendá hodónák ent o wasshén rócháni gendagay lóthók?
- 13 Wati zobáná cha badiá dur bedár o lonhán cha drógá.
- 14 Cha badiá per tarr o néki kan, sohl o émeniay shóházá bebay o hameshiay randá bekap.
- 15 Hodáwaday chamm gón pahrézkárán ent o góshi ham pa áyáni peryátán pach.
- 16 Hodáwaday dém badkáráni helápá ent, tán áyáni yátá cha jaháná beborrit o gomsár bekant.
- 17 Wahdé pahrézkár peryáta kanant, Hodáwanda eshkont o áyán cha sajjahén sakkíána rakkénit.
- 18 Hodáwand gón proshtadelán nazzik ent o droshtaruhán rakkénit.
- 19 Pahrézkará bázén sakkí o sória rasit, bale Hodáwand áiyá cha sajjahén sakkíána rakkénit.
- 20 Áiyá sajjahén haddhán mohra dárít, cha áyán yakké ham próshaga nabit.
- 21 Badi badkárá koshit o hamá ke cha pahrézkará naprata kant, mayárbára bit.
- 22 Hodáwand wati hezmatkáráni zendá rakkénit, harkas ke áiyá báhótha bit, mayárbára nabit.

35

Oo Hodáwand! Pa mani hakká jang kan
Dáuday Zabur.

- 1 Oo Hodáwand! Gón hamáyán bemerh ke gón mana merhant o gón hamáyán jang kan ke gón man janga kanant.
- 2 Wati kasán o mazanén esparán bezur o mani madatá jáh bejan.
- 3 Pa áyán ke mani randá kaptagant

- wati nayzahá chest kan o áyáni ráhá band.
- Mani arwáhá begwash:
“Tai rakkénók man án!”
- 4 Á ke mani zenday tabáhiay randá ant, roswá o sharmendag bátant. á ke pa mani táwáná pandala jórhénant, poshtá bekenzát o pashal bátant.
- 5 Chosh ke pog o palár gwátay démá, Hodáwaday préshtag áyán betáchénát.
- 6 Ráhesh tahárók o lakoshánk bát o Hodáwaday préshtag áyáni padá bekapát,
- 7 chiá ke mopt o náhakká pa man dámesh chér gétkag o pa mani arwáhá kallesh kótkag.
- 8 Anágat tabáhiesh chakká kapát o wati chér gétkagén dámá kapátant, kapát o gár o gomsár bátant.
- 9 Gorhá mani arwáh Hodáwaday bárgáhá shádehia kant o pa wati rakkagá lezzata bárt.
- 10 Á wahdá har band o bógon gwánka jant: “Oo Hodáwand! Tai matth kay ent? Taw nézgará cha zóráwarterená rakkénay o nezór o hájatmandá cha pol o pánych kanóká.”
- 11 Badwáh o bérahmén sháhed jáha janant o hamá mayáran maná laddhant ke cha áyán sahig naán.
- 12 Nékiay badalá gón man badia kanant o mani arwáh gamig o porsig ent.
- 13 Bale wahdé á nádráh atant, man sugi god o póshák gwará kort o jesm o ján gón róchag dáragá ranjént. Wahdé mani dwá bépassaw mantant
- 14 gréwán bután, hamá dábá ke pa dóst yá bratéá gamiga bant, sar jahl o mótk árán bután, hamá dábá ke pa mátá zára janant.
- 15 Bale wahdé thagonal wárt past o lagór gón mazanén shádehié mocch butant, mani helápá wahdé man sahig naatán, á maná derrán atant o bassesha nakort.
- 16 Chó Hodánábawarán, áyán wati maskará gésh kanána kort o pa man dantánesha drosht.
- 17 Oo Hodáwand! Tán kadéna nenday o cháray?
Mani arwáhá cha áyáni setamá be-rakkén,

- mani yakkén zendá cha shéráni dapá.
 18 Gorhá mazanén diwáná tai shográ gerán,
 mardománi mazanén mocchiá tará satá kanán.
- 19 Mayl ke prébkárén dozhmen
 mani sará shádehi kanant,
 mayl hamá ke mopt o náhakká cha man bészár ant
 chammok o pónzok bekanant.
- 20 Chiá ke pa sohl o émeni habara nakanant,
 pa á mardomán ke molká árám o béják neshtagant
 pormakrén habar payma kanant.
- 21 Dapá pa man pacha réchant o gwashant:
 “Hah, hah, hah!
 Gón wati chammánen distag!”
- 22 Oo Hodáwand! Taw é distag, chopp o bétawár mabay.
 Hodáwandá! Cha man dur mabay.
- 23 Ágáh bay o pa mani dádrasiá jáh bejan.
 Oo mani Hodá, oo mani Hodáwand!
 Pa mani hakká.
- 24 Oo mani Hodáwandén Hodá! Pa wati adlaygi gonáhay bohtámá cha man thagalén,
 mayl á mani sará shádehi bekanant.
- 25 Mayl wati delá begwashant: “Hah, hah, hah!
 Pa wati armáná rasetén.”
 Mayl begwashant: “Lonkahé kort o éren bort.”
- 26 Harkas ke mani mosibatáni sará shádehia kant
 sharmendag o sarjahl bát,
 á ke watá cha man borztera kanant
 gón sharm o béscharapi póshénag bátant.
- 27 Á ke wáhagesh mani bémayári ent
 shádmán bátant o shádehiay gwánká borz kanátant,
 modám begwashátant: “Hodáwand mazan ent
 ke cha wati hezmatkáray salámatíá gala bit.”
- 28 Gorhá zobánon sajjahén róchá tai adlá gwánka jant,
 tai satá o sanáyá.

36

Hodáay mehr chenkadar porarzesh ent
 Pa sázger o washáwázáni sálará.
 Hodáwanday hezmatkár Dáuday Zabur.

- 1 Gonáh, badkárá mán áiy delay
 johlánkiá gwánka jant,
 áiy chammán Hodátorsi nést.

- 2 Chiá ke á wati jenday delá haminchok
 wati tawsipá kant,
 ke wati gonáhá nazánt o cha áiá naprat korta nakant.
- 3 Dapay habari badi o préb ent,
 cha aglmandi o nékkáriá dasti shosh-tag.
- 4 Tantaná wati gandal o bestará pandala sázit,
 gonahkáriay ráhi geptag o badiá yalaha nakant.
- 5 Oo Hodáwand! Tai mehr arshá rasit o wapádári tán jambarán.
- 6 Tai adl o rásti borzterén kóháni dhawlá ent o
 ensáp, mazanén johlánkiáni.
 Oo Hodáwand! Taw ay ke ensán o haywánay rakkénók ay.
- 7 Oo Hodá! Tai mehr chenkadar porarzesh ent,
 bani ádam tai bánzoláni sáhegá panáha gipt.
- 8 Á cha tai bárgáhay sarréchéen nyámatán séra bant o
 cha wati lezzatáni kawrá áyán sérápa kanay.
- 9 Chiá ke zendmánay sarchammag taw ay o
 cha tai nurá ent ke nura gendén.
- 10 Pa wati dóstdarán wati mehrá modám barjáh dár o
 adl o rástíá pa nékdelán.
- 11 Porkebráni pád mani sará ér mabát,
 badkáráni dast maná sargardán makanát.
- 12 Bechár badkár che paymá kaptagant,
 háká sarshakun o pád átka nakanant.

37

Radkáráni sará hasadd makan
 Dáuday Zabur.

- 1 Badkáráni sawabá jósh majan o
 radkáráni sará hasadd makan.
- 2 Chiá ke é káhay paymá zutta gimmerant o
 sabzagáni paymá hoshka tarrant.
- 3 Hodáay sará tawkal kan o nékiay ráhá ger,
 wati molká jahmenend bay o wapádáriay randgir.
- 4 Cha Hodáwandá shádmán bay
 ke á tai delay morádá puraha kant.
- 5 Wati zendmánay ráhá Hodáwanday se-pordag kan o
 áiy sará tawkal,

ke kársáz hamá ent.
 6 Á tai bémayáriá nuray paymá róshena kant o dádrasiá chó bámgwáhay rozhnáíá drapshán.
 7 Hodáwanday bárgáhá árám bay o gón ópáre* áiy wadará.
 Áyáni sawabá jósh majan ke wati ráhá kámrán ant o áyáni sawabá ham ke palitén pandalán kára bandant.
 8 Cha hezhmá dur bay o gazabá yalah kan. Jósh majan ke tará dém pa badkáriá bárt.
 9 Chiá ke badkár goddhaga bant, bale á ke Hodáwanday wadará ant molká mirása barant.
 10 Kammoké wahdá rand badkára namánit, shomá áíá sakk báz shóháza kanét bale nagendéti.
 11 Narmdel molká mirása barant o cha wasshén sohl o émeníá shádkámia kanant.
 12 Badkár pahrézkáray helápá pandala sázit o pa áíá dantána droshit,
 13 bale Hodáwand badkáray sará kandit, chiá ke zánt áiy rócha kayt.
 14 Badkár wati zahmá cha nyámá dara kanant o kamáná kasshant, tán nezór o hájatmandán chér be-tarrénant o nékdelán tégáni dapá bedayant.
 15 Bale áyáni zahm, wati jenday delá nendit o kamánesha proshant.
 16 Pahrézkáray kammén hasti cha bázén badkáráni hastiá gehter ent.
 17 Chiá ke badkáráni báskay zóra proshit, bale Hodáwand pahrézkáráni madat kanók ent.
 18 Hodáwand bégonáháni rócháni negahpán ent o mirásesh namirána bit.
 19 Baláh o mosibatáni wahdá bazzag o sharmendaga nabant o kahti o dhokkálay róchán sér o ábáda bant.
 20 Bale badkár gára bant, Hodáwanday dozhmen charágáhay sabzagáni paymá gár.

Haw! Zyána bant, duttay paymá zyan.

21 Badkár wáma kant o padá nadant, bale pahrézkár pa daspachia bakshit.
 22 Allamá, áyán ke Hodáwand barkata dant molká mirása barant, bale áyán ke nálata kant, gár o bégwáha bant.
 23 Hodáwand hamáiy gámán mohra kant ke Hodáwanday ráhá shádehia kant.
 24 Toré bethagalit, zeminá nakapit, chiá ke Hodáwand áiy negahpán ent.
 25 Warná atán o nun pir án, bale choshén pahrézkaré nadiston ke Hodáwandá yalah kortag yá ke chokki pa nánéa gadá butagant.
 26 Modám daspach ent o pa ásáni wáma dant, chokki barkata kárant.
 27 Cha badiá démá chahr day o néki kan, gorhá tán abad molká jahmenenda bay.
 28 Chiá ke Hodáwandá adl dóst ent o wati dóstdarán yalaha nakant.
 Hodáwand tán abad pahrézkáráni posht o panáh ent, bale badkáráni nasl goddhaga bit.
 29 Pahrézkár molká mirása barant o tán abad hamódá jahmenenda bant.
 30 Pahrézkáray dap hekmat tálána kant o zobáni adl.
 31 Hodáwanday Sharyat áiy delá ent o pádia nalakoshant.
 32 Badkár, pa pahrézkára kamina kant o áiy kóshay randá ent.
 33 Bale Hodáwand áíá badkáray zóray tahá naperrénit o wahdé hakdiwáná baraga bit, pa mayárbáriá nayliti.
 34 Hodáwanday wadará bay o hamáiy ráhá bósht, ke tará pa molkay mirás baragá sarperáza kant, wata genday ke badkár chón goddhaga bant.
 35 Badkár o bérahmén mardé diston ke sarsabzén drachkéay paymá wati jáhá shádáb at,
 36 bale namant o zutt mort, harché shóházon kort, gendag nabut.
 37 Béaybén mardá begend o nékdelá bechár,

* 37:7 37:7 Ópár, bezán sabr, tahambol, bardásht.

- chiá ke sohl o émeniy shóház kanóká ákebaté hast,
 38 bale sajjahén sarkash gár o gomsára bant,
 badkár goddhaga bant o áyán ákebaté nést.
 39 Pahrézkáráni rakkénók Hodáwand ent o
 sakkiay wahdá áyáni kalát.
 40 Hodáwand áyán madata dant o rakkénit,
 cha badkáráni dastá rakkénit o nejáta dant,
 chiá ke áiyay mayár o báhóth ant.

38

Oo Hodáwand! Maná yalah makan Dáuday Zabur. Dazbandié.

- 1 Oo Hodáwand! Maná gón wati hezhmá hakkal maday o gón wati gazabá neherr.
 2 Chiá ke tai tirán mani ján soptag o tai dastay zór mani sará kaptag.
 3 Cha tai gazabá mani jesm o jáná hech dráhié pasht nakaptag o cha gonáhá, mán haddhán ham salámatié.
 4 Mani mayárbári cha sará sar gwastag, gránén béréay paymá cha tágatá gesh ent.
 5 Cha mani ahmakiá thappon bó geptag o bazhnák ant.
 6 Purah komp o dotal án, sajjahén róchá mátam kanáná gardán.
 7 Sréná sóchnákén dardé tawrénagá ent o jesmá dráhié nést.
 8 Man ájez án o droshag butagán, cha delay áshópá nálán.
 9 Oo Hodáwand! Mani sajjahén armán tai démá ant, áhsard o ginsárton cha taw chér naant.
 10 Delon mán sénagá kop koppá ent, wák o twánon dar shotag, chammáni rozhnái ham gár ent.
 11 Dóst o hambalon thappáni sawabá cha man watá kerré dárant o nazzikén ham dur óshtátagant.
 12 Á ke mani kóshay randá ant, dám chéra kanant,
 badwáh mani gomsár kanagay habará kanant o sajjahén róchá pandala sázant.

- 13 Bale man karréay paymá án ke naeshkont o gongéay paymá ke bétawár ent.
 14 Pa rásti man anchén mardoméay dhawlá án ke naeshkont o dapá passawé nésti.
 15 Oo Hodáwand! Pa taigi ent ke wadará án.
 Oo Hodáwand, mani Hodá! É taw ay ke passawa dayay.
 16 Chiá ke gwashton: “Wahdé pádona larzit,
 hamá mardomán mani sará shádehi kanagá mayl ke watá cha man mastera zánant.”
 17 Chiá ke kapagi án o mani dard modám gón man gón ent.
 18 Wati mayárbáriá mannán o cha wati gonáhá sakk padard án.
 19 Sarzór o salámat ant, á ke mani dozhmen ant,
 bázéné bé sawabá cha man naprata kant.
 20 Á ke nékiay badalá gón man badia kanant,
 mani dozhmen o bohtám janók ant, chiá ke man nékiay randá án.
 21 Oo Hodáwand! Maná yalah makan.
 Oo mani Hodá! Cha man dur mabay.
 22 Oo Hodáwand, mani rakkénók!
 Pa mani madatá eshtáp kan.

39

Mani rócháni hesáb chi ent?

Pa sázger o washáwázáni sálará. Pa Yedutuná.* Dáuday Zabur.

- 1 Gwashton ke “pahréza kanán tán gón wati zobáná gonáh makanán. Tán wahdé badkaré mani kerrá ent wati dapá lagáma kanán.”
 2 Chopp o bétawár bután, tantaná sharrén habaré ham nakorton,
 bale dard o andóhon géshter butant.
 3 Delon mán daruná jósh janagá ent.
 Wahdé géshter pegrona kort, ása shamálaha† kasshet,
 gorhá zobánon pach but.
 4 “Oo Hodáwand! Mani ákebatá paddar kan,
 mani rócháni hesáb chi ent,
 bell tán bezánán ke chón zutta gwazant.
 5 Taw mani zend bechilléay kaddá kortag,
 mani zendmánay sál, tai chammá hecch naant.

* 39: 39:0 Yedutun cha mazanén parasteshgáhay washáwázán yakké at. zobánok.

† 39:3 39:3 Shamálah, bezán ásay

Saddak án ke ensánay zend yak sáhé gésh naent.” Ósht...

⁶ Bëshakk ensán chó sáhegeá chakkarit, bëshakk ke á mopt o náhudagá tach o tága kant, mocch o ambára kant, bale nazánt ke kayá rasant.

⁷ “Bale nun oo Hodáwand! Man che chizzay wadára án? Ométon tai sará ent.

⁸ Maná cha sajjahén náparmánían chot-thén o ahmakáni kalági makan.

⁹ Bétawár án o dapá pacha nakanán, chiá ke é taw kortag.

¹⁰ Wati zarbatá cha mani sará dur kan, ke cha tai shahmátá tostog o kaptagán.

¹¹ Taw pa hakkal ensána cha gonáhá adaba dayay o

áiyay dósténán hamá paymá kanay ke raméz o waróka kant.

Saddak án ke ensánay zend sáh o damé gésh naent. Ósht...

¹² “Oo Hodáwand! Mani dwáyá beshkon o pa komaká mani peryátay némagá delgósh kan, arsánon mashamósh o bétawár mabay.

Chiá ke tai gwará mehmánéay paymá án, darámadé, wati pet o pirénáni dhawlá.

¹³ Wati gazabá cha man dur kan, tán cha jahánay yalah kanagá pésar padá gal bebán.”

40

Hodáwandá nókén sawté mani dapá dát

Pa sázger o washáwázáni sálará. Dáuday Zabur.

¹ Gón sabré pa Hodáwandá wadáron kort, démi gón man tarrént o mani peryáti eshkot.

² Maná cha johlánkén kalléa dar áworti, cha gel o gandápá, mani pádi talaréay sará óshtárént o gámi mohr kortant.

³ Nókén sawté mani dapá dáti, may Hodáay satá o sanáay shayr.

Bázéné gendit o mannit o Hodáwanday sará tawkala kant.

⁴ Bahtáwar hamá ent ke Hodáwanday sará tawkala kant o démá gón porkebrénána nakant,

gón hamáyán ke drógén hodáyáni randgiriá gomráh ant.

⁵ Oo Hodáwand, oo mani Hodá! Taw pa má bázén ajabén kár o shawré kortag,

hechkas tai matth buta nakant.

Agan belóthán tai káráni bárawá jár bejanán o habar bekanán, haminchok báz ant ke cha hesábá dar ant.

⁶ Tará pa hayrát o korbánigá hájaté nést, bale mani góshet pach kortag, sóchagi korbánig o gonáháni korbániget nalóthettag.

⁷ Gorhá gwashton: “Man átkag o tayár án, mani bárawá ketábay tumará* nebisag butag.

⁸ Oo mani Hodá! Armánon tai lóth o wáhagay sarjam kanag ent, tai Sharyat mani delá ent.”

⁹ Rakkénag o nejátay wasshén hálon mazanén diwáná jár jatag.

Oo Hodáwand! Hamá dhawlá ke taw zánay man wati dap lagám najatag.

¹⁰ Tai rakkénókén madaton wati delá chér nadáttag, tai wapádári o nejátbakshiyar bárawá habaron kortag o cha mazanén diwáná tai mehr o wapáon napóshéntag.

¹¹ Oo Hodáwand! Maná cha wati rahmatá zebahr† makan, tai mehr o wapá tán abad maná émen bedárát.

¹² Chiá ke béhesábén sakkían maná angerr kortag, mayárbárián maná geptag o dista nakanán, cha mani saray mudán gésh ant, mani del kaptag.

¹³ Oo Hodáwand! Mehrabáni kan o maná berakkén. Hodáwandá! Zutt pa mani madatá byá.

¹⁴ Á sajjahén ke mani kóshay randá ant o mani marká lóthant sarjahl o sharmsár bátant, á ke mani syahróchiay padá ant poshtá berawát o roswá bátant.

¹⁵ Á ke mani sará “hah, haha” kanant wati sarjahliá hayrán o habakkah bátant.

¹⁶ Bale á ke tai shóházá ant sajjahén tai bárgáhá shádehi kanát o gal o bál bátant,

* **40:7** 40:7 Tumár hamá ketábána gwashtant ke kwahnén zamánagá kágad yá póstáni sará nebisag o gerd gerdá patáyag butagant. † **40:11** 40:11 Zebahr, bezán bébahr.

á ke tai rakkénókén madatesh dóst ent,
modám begwashátant: “Hodáwand
mazan ent.”

17 Man garib o hájatmand án,
Hodáwandá mani hayál gwar bát.
Taw mani komak o rakkénók ay.
Oo mani Hodá! Dér makan.

41

Oo Hodáwand! Mani sará rahm kan
Pa sázger o washáwázáni sálará. Dáuday
Zabur.

- 1 Bahtáwar hamá ent ke garib o bazzagáni
hayálá ent,
Hodáwand áiá baláh o mosibatáni
róchá rakkénit.
- 2 Hodáwand áiy negahpániá kant o
zendaga dárit,
á, molkay tahá bahtáwara bit.
Taw áiá dozhmenáni wáhagáni sará
yalaha nakanay.
- 3 Hodáwand áiá nádráhiay wahdá zór o
wáka dant,
cha nájórhi o kamzórián áiá dráha
kant.
- 4 Man gwashit: “Oo Hodáwand! Mani sará
rahm kan,
maná dráh kan ke tai gonahkár án.”
- 5 Dozhmen pa badwáhi mani bárawá
gwashant:
“Kadéna merit o námi gára bit?”
- 6 Wahdé cha áyán yakké mani didará kayt
dozobáni habara kant o
delá badia ródénit,
dhanná ke dara kapit, wati delay
habará kant.
- 7 Sajjahén dozhmen mani helápá halwat o
soksoka kanant o
pa mani táwán dayagá pandala
sázant.
- 8 Gwashant: “Sellén nádráhiéá geptag,
cha waptagén jáhá hechbar pád átka
nakant.”
- 9 Tantaná mani nazzikén dóst ke cha áiá
deljam atán,
hamá ke gón man hamkásag at,
áiá ham maná dróhetag.*
- 10 Bale taw, oo Hodáwand! Mani sará
rahm kan,
maná pád kan tán wati jostánesh
bekanán.
- 11 Cha eshiá zánán ke cha man washnód
ay,
ke dozhmen mani sará báládast nabu-
tagant.

12 Cha mani tachki o rástiá, taw mani
posht o panáh butagay o
modám wati bárgáhá jágaha dayay.

13 Hodáwandá satá bát, Esráilay Hodáyá,
cha azal tán abad.
Anchosh bát. Ámin.

Zaburay domi ketáb

42

Zabur 42—72

Oo mani arwáh! Chiá paréshán ay?
Pa sázger o washáwázáni sálará. Kórahay
chokkáni shayri gwashtánk.

- 1 Áskay paymá ke pa kawray ápán za-
hirwár ent,
hamé paymá, oo mani Hodá, mani
arwáh tai zahirán ent.
- 2 Mani arwáh pa Hodáyá tonnig ent,
pa zend bakshókén Hodáyá,
ke baren kadi Hodáay bárgáhá rawán
o áiy démá záhera bán?
- 3 Shap o róch warákon ars ent,
Wahdé mardom modám maná
gwashant:
“Tai Hodá kojá ent?”
- 4 Wahdé wati delay dardán darshána
kanán,
hayálá kapán ke che paymá mazanén
mocchiay hamráh atán,
jashnay mazanén mocchiay o
gón shádehiay kukkár o shogr-
gozáriay sawtán
dém pa Hodáay lógá áyáni rahshón
atán.
- 5 Oo mani arwáh! Chiá gimmortagay?
Chiá mani del o daruná paréshán ay?
Óst o omét Hodáay sará bekan,
chiá ke nóksará hamáiá názénán,
wati rakkénók o
6 wati Hodáyá.

Mani daruná arwáh gimmortag
paméshká tará cha Ordonay sard-
hagár* o Hermónay kóhá yáta
kanán,
cha Mísaray kóhá.

7 Tai mazanén ápsaráni grandá,
johlánki, johlánkiá gwánka jant,
tai sajjahén chawl o mawj,
mani sará proshtagant.

8 Róchá, Hodáwand wati mehrá déma
dant o
shapá sawt o zémeli gón man ent,

* **41:9** 41:9 Dróhag, bezán pa repk rad dayag. Arabi o Pársiá “khiánat”. * **42:6** 42:6 Ordonay sardhagáray maná maróchigén Ordonay molk naent, Ordonay kawr o darag ent.

dwáé dém pa wati zend bakshókén
Hodáyá.

⁹ Gón Hodáyá ke mani talár ent gwashán:
“Chiá maná shamoshtaget?

Chiá cha dozhmenay ázará
mótk byárán?”

¹⁰ Dozhmenáni shegánán, mani haddh
hurt kortagant,
chiá ke sajjahén róchá maná
gwashant:
“Tai Hodá kojá ent?”

¹¹ Oo mani arwáh! Chiá gimmortagay?
Chiá mani del o daruná paréshán ay?

Óst o omét Hodáay sará bekan,
chiá ke nóksará hamáiá názénán,
wati rakkénók o wati Hodáyá.

43

Oo mani arwáh! Chiá paréshán ay?

¹ Oo Hodá! Gonáhay bohtámá cha mani
sará bethagalén,
Hodánábáwarén kawméay démá, pa
mani hakká jáh bejan o
maná cha badkár o prébkáráni dastá
berakkén,

² chiá ke taw mani kalát ay.
Taw parchá maná cha wat dur kortag?

Chiá cha dozhmenay ázará
mótk byárán?

³ Wati rozhn o rástiá ráh day,
tánke mani rahshón bebant o
maná pákén kóhá o tai bárgáhá
byárant.

⁴ Á wahdi Hodáay korbánjáhá rawán,
dém pa Hodáyá ke mani wasshi o
shádehi ent.

Oo Hodá, mani Hodá!
Tará gón changá názénán.

⁵ Oo mani arwáh! Chiá gimmortagay?
Chiá mani del o daruná paréshán ay?

Óst o omét Hodáay sará bekan,
chiá ke nóksará hamáiá názénán,
wati rakkénók o wati Hodá.

44

Oo Hodá! May madatá byá

Pa sázger o washáwázáni sálará. Kórahay
chokkáni shayri gwashtánk.

¹ Oo Hodá! Má wati góshán eshкотag,
may pet o pirénán gwashtag
ke áyáni zamánagá chónén káret kortag,
gwastagén dawr o bárigán.

² Taw gón wati dastá kawm dar kortant,
bale may pet o pirén sabz kortant.
Kawmet droshtant o

may pet o pirén sháhegáni bak-
shátant.

³ Na áyáni zahmáni zór at ke molkesh gept
na ke básk o bázuán sóbén kortant.

É tai rástén dast at, tai básk o
chehragay rozhn,
chiá ke áyáni sará mehrabán atay.

⁴ Oo Hodá! Taw mani bádsháh ay.
Pa Ákubá péróziay hokmá borr:

⁵ Cha tai némagá ent ke dozhmenán pada
kenzénén,
cha tai námá ent ke orosh barókán
lagatmála kanén.

⁶ Man wati kamánay sará tawkala
nakanán o
zahm maná sóbena nakant.

⁷ É taw ay ke mará cha dozhmenán
rakkéntag o
badwáh sarjahl kortagant.

⁸ Oo Hodá! Má modám tai sará pahr kortag
o
tán abad tai námay shográ gerén.
Ósht...

⁹ Bale nun taw mará dawr dátag o béezzat
kortag,
may lashkaray hamráha nabay.

¹⁰ Mará dozhmenáni démá pada kenzénay
o
badwáh mará áwára* janant.

¹¹ Mará korbánigén pasáni paymá pa
koshagá eshtaget o
kawmáni nyámá sheng o sháng ko-
rtag.

¹² Taw wati kawm arzáná bahá kortag o
cha áyáni baháyá sutté nabortag.

¹³ Mará hamsáhegáni rishkandi kortag o
kerr o gwaray mardománi kalági.

¹⁴ Taw mará kawmáni nyámá thekk o
neshán kortag,
darkawm sará chandhénant o
maskará kanant.

¹⁵ Sajjahén róchá gón sarjahliá dém pa
dém án o
sharmá mani dém póshetag,

¹⁶ cha bad o rad gwashókáni shegáná,
cha dozhmen o bérgiray dastá.

¹⁷ É sajjahén may sará átkagant,
bale angat má tará nashamoshtag o
gón tai ahdá nárást nabutagén.

¹⁸ May del cha taw per natarretag o
pád o gám cha tai ráh dar nabutag.

¹⁹ Bale taw mará prósh dátag o gón
wahshién haywánán yakjáh kortag,
gón tahárterén tahárókiá póshéntag.

²⁰ Agan má wati Hodáay nám be-
shamoshtén,

* 44:10 44:10 Áwár, bezán jangay tahá lotth o pol kortagén mál o mardom.

- yá dast pa bigánagén hodáéa borz kortén,
 21 Hodáyá nazántagat?
 Chiá ke á cha delay ráz o asrarán sarpad ent.
 22 Bale má tai sawabá sajjahén róchá gón marká dém pa dém én o korbánigén pasáni paymá hesáb áraga bén.
 23 Oo Hodáwand! Ágáh bay. Pa ché wáb ay?
 Jáh jan o mará tán abad yalah makan.
 24 Chiá wati demá chéra dayay o pa ché may bazzagí o lagatmáliá shamóshay?
 25 Chiá ke má háká dém pa chér én o láp zeminá lacchetag.
 26 Pád á o may madatá byá, wati mehray sawabá mará bemók† o berakkén.

45

Oo Hodá! Tai bádsháhi abadmán ent
 Pa sázger o washáwázáni sálará. “Susanáni” tarzay sará. Kórahay chokkáni shayri gwashtánk. Eshki sawt.

- 1 Delon cha zébaén gálán sarréché ent, shayré pa bádsháhá gwashán, zobán, zabardastén nebisókéay kala-may paymá ent.
 2 Taw ádamiáni nyámá zébáterén ay o cha tai lonthán lál o gawhara gwárit, paméshká Hodáyá tará abadmánén barkaté dátág.
 3 Oo tamardén bádsháh! Gón wati shán o shawkatá zahmá lánká band.
 4 Gón hamá shawkatá péróziay aspá betáchén, pa rásti, békebri o ensápáy dáragá, bell ke rástén dast tará bákamálén kár sój bedant.
 5 Tai tir téz ant o bádsháhay dozhmenáni delá nendant, kawm tai pádáni chérá kapant.
 6 Oo Hodá! Tai bádsháhi taht modámi o abadmán ent, tai bádsháhi asá, adl o ensápáy asá ent.
 7 Taw páki o rásti dóst dáshtag o cha badiá naprat kortag,

- paméshká Hodáyá, tai Hodáyá, tará géshter cha tai hamráhán shádehiay rógen per moshtag.*
 8 Sajjahén jámaget gón morr o aud o tójá moshtag o washbó butagant.
 Ájén† kasráni tahá simmi sázáni zémel tará shádána kanant.
 9 Bádsháháni jenek tai gránázén mehmán ant, tai rástén némagá, malakah gón Opi-ray‡ teláháni singará óshtátág.
 10 Oo jenek! Beshkon o sharriá delgósh kan, wati kawm o peti lógá shamósh,
 11 bell bádsháh tai zébáiy shaydá bebit, áiy demá pa adab bósht ke á tai wájah ent.
 12 Suray shahray mardom§ gón wati thékiá kayt, shahray hastómandén mardom tai razá o washnódiay randá bant.
 13 Sháhay jenek wati kasrá sakk zébdár ent, áiy póshák zargwáp ant.
 14 Gón pordóchéni jámagán bádsháhay kerrá baranti, neshtagén jenek, áiy dazgohár, áiy padá gón ant.
 15 Pa shádehi dém dayaga bant o bádsháhi kalátá sara bant.
 16 Tai pet o pirokáni jágahá, óbádageta nendant, áyán sajjahén molkay kamásh o mastera kanay.
 17 Tai námáy yátá nasláni nasl zendaga dárán, paméshká sajjahén kawm tará abad tán abada názénant.

46

Hodá may kalát ent
 Pa sázger o washáwázáni sálará. Kórahay chokkáni Zabur. “Alámutay”* tarzay sará. Sawté.

- 1 Hodá may panáhgáh o zór o wák ent, madat kanóké ke sakkíáni wahdá tayár ent.
 2 Paméshká natórsén, toré zemin bejombit o kóh daryáay delá bekapant.

† 44:26 44:26 Mókag, bezán pa kaséay jánay rakkénagá gránén kimmaté dayag, Pársiá “bázkharid”. * 45:7 45:7 Rógen per moshag, bezán pa bádsháhiá gechéni kanag. † 45:8 45:8 Ájén, bezán cha ájá addh butagén. Áj cha pillay dantánán dara kayt. ‡ 45:9 45:9 Ópir jágahé at ke teláhi báz at. § 45:12 45:12 Asligén Ebráni nebeshtánka gwasht: “Suray shahray jenek”. Sur bandené at o mardomi hastómand antant. * 46: 46:0 Alámutay máná “warnáén jenek” ent. Báwar esh ent ke Alámút muzikay yak gálé.

³ Toré áiy áy grumbán o kap o gajj bebant
o
kóh cha áyáni grumbagá belarzant.
Ósht...

⁴ Kawré hast ke jói Hodáay shahrá
shádmána kanant,
borzén arshay Hodáay pákén jágahá.

⁵ Hodá shahray nyámá ent o shahra nar-
sorit,
bámgwáhá Hodá madatia kant.

⁶ Kawm shóresha kanant o hokumat sar-
shakuna bant,
á wati tawará borza kant o zemin ápa
bit.

⁷ Lashkaráni Hodáwand gón má gón ent,
Ákubay Hodá may kalát ent. Ósht...

⁸ Byáét Hodáay kárán bechárét,
begendét ke áiyá zeminá chónén béráni
áwortag.

⁹ Zeminay chárén kondhán jangán halása
kant,
kamáná próshit, nayzahá hurt hurta
kant o
arrábahán ás mána dárit.

¹⁰ “Watá bedárét o bezánét ke man, Hodá
án,
kawmáni sará hokmrán o
jaháná hákem.”

¹¹ Lashkaráni Hodáwand gón má gón ent,
Ákubay Hodá may kalát ent. Ósht...

47

Hodá, sajjahén jahánay bádsháh

Pa sázger o washáwázáni sálará. Kórahay
chokkáni Zabur.

¹ Oo sajjahén kawmán! Cháp bejanét.
Gón shádmániay borzén sawtán dém
pa Hodáyá kukkár kanét.

² Chiá ke borzén arshay Hodáwand
bákamál ent,
sajjahén jahánay mazanén bádsháh.

³ Kawmán may chérdasta kant,
ráján may pádáni chérá.

⁴ May mirásá pa má gechéna kant,
wati dóstén Ákubay pahrá. Ósht...

⁵ Hodá shádmániay kukkáráni nyámá
borzád shotag,
Hodáwand sornáay tawáray nyámá.

⁶ Gón wati názénkán Hodáyá satá kanét,
názénk janét,
benázénét, may bádsháhá benázénét.

⁷ Chiá ke Hodá sajjahén jahánay bádsháh
ent,
áiyá gón shayré benázénét.

⁸ Hodá kawmáni sará bádsháhia kant,
á wati pákén tahtá neshtag.

⁹ Kawmáni sarók o master mocch buta-
gant,
gón Ebráhémay Hodáay kawmá
yakkáh,

chiá ke jahánay sajjahén sardár,* Hodáayg
ant,
á béhesáb mazanshán ent.

48

May Hodáay shahr

Kórahay chokkáni Zabur.

¹ Hodáwand mazan o satáay báz láhek ent,
may Hodáay shahray tahá.

Áiyá pákén kóh,
² Sahyunay kóh, zébá gón wati borziá,
sajjahén jahánay shádehi,
shomálay borzterén bolandi,
mazanshánén bádsháhay shahr ent.

³ Hodá áiy borján ent,
watá mohrén kaláté pajjáréntagi.

⁴ Bádsháh yakkáh butant o
hóriá démá shotant,

⁵ bale anchosh ke shahresh dist,
hayrán o habakkah mantant o torsána
jestant.

⁶ Larzagesh delá kapt,
dardé trondén chó ke janénéay chellag
o zanká.

⁷ Taw gón ródarátki gwátá
Tarshishay bandenay bójig*
próshtant.

⁸ Hamá dába ke eshкотag nun gón wati
chammána gendén,
lashkaráni Hodáwanday shahray
tahá,
may Hodáay shahrá
ke Hodá tán abad pádária kant.
Ósht...

⁹ Oo Hodáwand! Tai parasteshgáhay tahá
may johlánkén pegr o hayál gón tai
mehrá ent.

¹⁰ Oo Hodá! Tai námay paymá,
tai satá zeminay chárén kondhán sara
bit,
tai rástén dast adl o rástiá porr ent.

¹¹ Cha tai dadrasíá Yahudáay métag
shádmán bátant o
Sahyunay kóh shádán.

¹² Sahyuná zyárat kanét, áiyá chágérdá
begardét o
borján hesáb kanét,

¹³ áiyá mohrén diwáláni némagá sharriá
hayál gwar dayét o

* 47:9 47:9 Asligén Ebráni nebeshtánka gwashit: “espar”, ke pa sardár o hokmránán kár bandaga bit. * 48:7
48:7 Bójig, bezán lánch, yakdár, kashti.

sajjahén kalátáni bechárét,
tánke gón nókén naslá begwashét
14 ke Hodá hamesh ent, may Hodá, abad
tán abad,
hamá ent ke tán marká may rahshóna
bit.

49

Málay sará tawkal nádánié

Pa sázger o washáwázáni sálará, Kórahay
chokkáni Zabur.

- 1 Oo sajjahén kawmán! Beshkonét.
Oo jahánay drostigén jahmenendán!
Delgósh kanét.
- 2 Borz o jahlén mardom doén,
azgár o nézgár, shomá sajjahén.
- 3 Mani dap, hekmat bayána kant,
delay johlánkén pegr, pahm o zánta
bakshit.
- 4 Góshá dém pa nemunah o batalé
tarrénán,
wati delay cháchay granchá gón
changay sázá pacha kanán.
- 5 Baláh o sakkíáni róchán chiá betorsán,
á wahdá ke rad dayókáni badi maná
angerra kant?
- 6 Áyáni tawkal pa wati zarr o málá ent o
wati mazanén hastiay sará pahra
kanant.
- 7 Saddak án ke hechkas wati brátay zendá
móketa* nakant o
áiay hónbaháyá Hodáyá dáta nakant.
- 8 Chiá ke zenday mókag sakk grán ent o
hech kimmaté áiá porr korta nakant
- 9 tánke ensán namirán bemánit o
hechbar kabrá magendit.
- 10 Chiá ke gendagá én, dáná ham merant o
nádán o bésodd ham haláka bant o
wati mál o hastiá pa degarána kellant.
- 11 Kabr áyáni abadmánén lóga bit,
nasláni nasl, áyáni menendjáh,
harchont ke kallagáná wati námesh
per kort.
- 12 Ádami wati arzesh o hastómandiá
namánit,
chárpádáni paymá ent ke bérána bant.
- 13 Esh ent jáheláni ásar,
hamáyáni ákebat ke wati habaráni
mannók ant. Ósht...
- 14 Pasáni paymá dém pa mordagáni jaháná
ráh dayaga bant,
hamódá ke mark áyáni shopánka bit.

- Bámgwáhán, nékdel áyáni sará
hokmránia kanant o
áyáni jesm o ján kabrá pussit,
dur cha borzén márhián.
- 15 Bale Hodáwand mani arwáhá cha
mordagáni jaháná mókit o
maná wati dastá zurit. Ósht...
- 16 Wahdé shomá gendét kasé hastómandia
bit o
lógay shawkati géscha bit, matorsét.
- 17 Chiá ke markay wahdá chizé gón wata
nabárt o
shawkati gón áiá kabrá narawt.
- 18 Tán hastómand ent mardom áiá satá
dayant.
Harchont ke zendá watá bahtáwar
zántagi,
- 19 bale wati pet o pirénáni hamráha bit,
ke zenday rozhná hechbara nagen-
dant.
- 20 Ádami wati arzesh o hastómandiay tahá
nádán ent,
chárpádáni paymá ent ke bérána bant.

50

Hodá wat may dádras ent
Asápáy Zabur.

- 1 Hamá porwák, Hodáwandén Hodá
habara kant o zeminá gwánka jant,
cha ródarátká tán rónendá.
- 2 Hodá cha Sahyuná
ke zébáiay kamál ent, wati nurá drap-
shána kant.
- 3 May Hodá kayt o betawára nabit,
ér barókén áse démá enti o
trondén gwát o lurhé chágérdá.
- 4 Borzén ásmánán ham gwánka jant o
zeminá ham,
tánke wati mardománi dadrasíá
bekant.
- 5 "Hodádóstán mani gwará yakjáh kanét,
hamá ke gón korbánig kanagá, gón
man ahdesch bastag."
- 6 Ásmán áiy adl o rástiá jára janant,
chiá ke Hodá wat dádras ent. Ósht...
- 7 "Oo mani mardomán! Beshkonét ke
habara kanán.
Oo Esráil! Tai helápá gwáhia dayán.
Man Hodá án, shomay Hodá.
- 8 Pa korbánigi naent ke tará hakkala
dayán,
tai sóchagi korbánig modám mani
chammáni démá ant.
- 9 Na cha tai lógá gwaské zurán o
na pasé cha tai gwáshá.*

* 49:7 49:7 Mókag, bezán pa kaséay jánáy rakkénagá gránén kimmaté dayag, Pársiá "bázkharid". * 50:9 50:9
Gwásh, bezán wárh.

- 10 Chiá ke jangalay sajjahén haywán manig ant,
hazárán kóháni dalwat†.
- 11 Kóhestagáni sajjahén báli morgán jáha kárán o
har ché ke zeminá gardit manig ent.
- 12 Agan shodig atán tará sahigon nakortagat,
chiá ke jáhán o harché áia hast, manig ant.
- 13 Gókáni gósh tá warán?
Pasáni hóna nóshán?
- 14 Wati shogrgozáriay korbánigá Hodáyá pësh kan o
wati kawlá gón borzén arshay Hodáyá purah kan.
- 15 Sakki o sóriáni róchá maná belóth,
man tará nejáta dayán o
taw maná shán o shawkata dayay.”
- 16 Bale Hodá gón badkára chosha gwashit:
“Tará che hakk ent ke mani Sharyatay rahbandáni habará bekanay
yá mani ahd o paymánay bárawá chizé begwashay?
- 17 Chiá ke cha adab o tálimá bézár ay o
mani habará poshtá dawra dayay.
- 18 Dozzé ke genday, démet róshena bit o
gón zenákárán hamráha bay.
- 19 Dapay lagámá pa badiá yalaha kanay o
zobáná pa prébá.
- 20 Modám wati brátay helápá habara kanay,
wati mátay chokkay sará bohtáma janay.
- 21 Taw é kár kortagant o man hecch nagwasht,
hayálet kort ke man tai payméné án.
Bale nun tará malámata kanán o
tai mayár o gonáhán tai chammáni démá éra kanán.
- 22 “Oo Hodá shamoshtagénán!
É habará neshán kanét,
agan na, shomára chondh chondha kanán o kas shomára rakkénta nakant.
- 23 Á kas ke shogrgozáriay korbánigá pësha kant
hamá maná shán o shawkata dant,
pa wat ráhé tayára kant o
man áia hamá nejátá pësha dárán ke
cha mani némagá ent.”

51

Cha mani gonáhán sar gwaz

Pa sázger o washáwázáni sálará, Dáuday Zabur, wahdé Nátán Nabi, cha Dáud o

Batshebahay wapt o wábá rand, áia y kerrá átk.

- 1 Oo Hodá! Pa wati mehrá bechár o
mani sará rahm kan!
Cha wati békesásén rahmatán
náparmániánon gár kan.
- 2 Pa sarjami maná cha mayárbárián beshód o
cha gonáhánon pák kan!
- 3 Chiá ke wati náparmániána zánán o
mani gonáh modám chammáni démá ent.
- 4 Man tai helápá, tahná tai helápá gonáh kortag o
hamá káron kortag ke tai chammá bad ent.
Paméshká, taw ke habara kanay barhakk ay o
dádrcasiay wahdá béayb ay.
- 5 Pa rásti man mayárbár pédá butagán o
cha hamá wahdá ke mátay lápá kaptán, gonahkár.
- 6 Nun deljam án ke taw cha mani del o
jabiná* rástiyá lóthók ay o
chér o panáhé daruná maná hekmata bakshay.
- 7 Gón zupáay lambán† pákon kan ke
pákizaga bán,
maná beshód ke cha barpá espéterra bán.
- 8 Bell ke shádehi o shádmániá beshkonán,
bell á haddh ke taw droshtagant gal o bál bebant.
- 9 Cha mani gonáhán sar gwaz o
sajjahén mayárbáriánon gár kan.
- 10 Oo Hodá! Mani daruná pákén delé bejórhen o
mani del o jabiná padá mohrén ruhé byár.
- 11 Maná cha wati bárgáhá dur maperrén o
wati Pákén Ruhá cha man pach mager.
- 12 Wati dátagén rakkénagay shádehiá padá beday o
maná morádigén ruhé bebaksh.
- 13 Gorhá sarkashén mardomán tai ráhán tálima dayán o
gonahkár tai kerrá wátarra kanant.
- 14 Oo Hodá! Oo mani rakkénókén Hodá!
Maná cha hón o kóshay gonáhá be-rakkén o
zobánon tai adl o rástiá názénit.
- 15 Hodáwandá! Mani lonthán pach kan,
tánke mani dap tará satá bekant.
- 16 Tará pa korbánigá wáhagé nést,
agan na, mana áwort,

† 50:10 50:10 Dalwat, bezán haywán. * 51:6 51:6 Jabin, bezán wujud, darun, zamir, wejdán. † 51:7 51:7 Zupáay lamb Esráiliáni korbánigáni rasmán pa palgár kanagá kár bandaga butant. Zupá kasánén drachké.

sóchagi korbánig tará washnóda nakant.

- 17 Hodáay delpasondén korbánig, prosh-tagén arwáh ent.
Oo Hodá! Proshtag o tawbahkárén deléa taw jahla najanay.

- 18 Pa wati washnódiá bechár o gón Sahyuná mehrabán bay,
Urshalimay diwálán padá addh kan.

- 19 Gorhá cha rást o ádelén korbánigán shádána bay,
cha sóchagi korbánigá ke sarjamá sóchaga bit,
tai korbánjááh gwask pésh kanaga bant.

52

Tawkal pa Hodáay mehrá

Pa sázger o washáwázáni sálará, Dáuday shayri gwashtánk, á wahdá ke Edumi Duig, Sháulay kerrá shot o á sahig korti ke "Dáud, Ahimelekay lógá shotag."

- 1 Oo porzórén mard! Chiá badiay sará pahra kanay?
Hodáay mehr dáemi ent.

- 2 Oo prébkár! Tai zobán, tabáhi o barbádiay pandalána sázit,
almásén tégéay paymá.

- 3 Tará badi cha nékiá dóster ent o dróg cha rástiá. Ósht...

- 4 Oo prébkárén zobán! Har bérán kanókén habará dósta dáray.

- 5 Bale Hodá tará abadia próshit.
Tará chakápit o cha tai gedáná gwajit o
cha zendagénáni zeminá tai risshagá kasshit. Ósht...

- 6 Pahrézkára gendit o torsit,
badkáray sará kandit o gwashit:

- 7 "Haw! Esh ent á kas ke Hodái wati kalát nakort.

Tawkali wati bázén mál o dawlatay sará bast o
wati barbád kanagá twáná but."

- 8 Bale man zaytunay sabzén drachkéay paymá án,
ke Hodáay lógá sabza bit.

Mani tawkal Hodáay mehray sará ent abad tán abad.

- 9 Pa tai kortagén kárán modám tai shográ gerán o
Hodádóstáni démá
pa tai námá ométwár án,
chiá ke tai nám nék ent.

53

Nékkaré nést

Pa sázger o washáwázáni sálará. "Mahallátay"* tarzay sará. Dáuday shayri gwashtánk.

- 1 Nádán wati delá gwashit:
"Hodáé nést."

É palit ant o káresh bazhnák,
nékkaré nést.

- 2 Hodá cha ásmáná bani ádamá chárit tán begendit bárén dánáé hast
ke Hodáay shóházá ent.

- 3 Sajjahénán Hodáay ráh gár dátag,
hórigá palit butagant,
nékkaré nést,
yakké ham nést.

- 4 Badkár hech sarpada nabant?
É mani kawmá anchosha warant ke mardom nagana warant o
Hodáyá hech twára nakanant.

- 5 Ódá ke hech torsé nést
é sakka torsant,
chiá ke Hodá shomay angerr kanókáni haddhán sheng o shánga kant,
taw eshán sharmendaga kanay,
chiá ke Hodáyá á cha wat dawr dátagant.

- 6 Kasé cha Sahyuná byáyát o Esráilá berakkénát.
Wahdé Hodá washbahtiá pa wati kawmá pera tarrénit,
Ákub gal o bála bit o Esráil shádehia kant.

54

Gón wati námá maná berakkén

Pa sázger o washáwázáni sálará. Gón simmi sázán. Dáuday shayri gwashtánk, hamá wahdá ke Zépay mardom Sháulay kerrá shot o gwashtesh: "Bárén, Dáud watá may nyámá chér dayagá naent?"

- 1 Oo Hodá! Gón wati námá maná berakkén.

gón wati zórá gonáhay bohtámá cha mani sará bethagalén.

- 2 Hodáyá! Mani dwáyá gósh kan o dapay habarán beshkon.

- 3 Chiá ke bigánag, mani démá pa dozhmeni pád átkagant o setamger mani kóshay padá ant,
hamá ke Hodáyá wati chammáni démá nayárant. Ósht...

* 53: 53:0 Báwar esh ent ke Mahallát sázé yá muzikay yak gálé.

- 4 Bale haw! Hodá mani komak kanók ent,
Hodáwand mani zenday dárók ent.
- 5 Mani dozhmenáni badi áyáni jenday
chakká kapát,
wati wapádáriay sawabá, áyán gár
kan.
- 6 Oo Hodáwand! Wati delkashén ko-
rbánigán tará pésha kanán o
tai námay shográ gerán, chiá ke nék
ent.
- 7 Parchá ke taw maná cha har sakki o sóriá
rakkéntag,
mani chamm dozhmenay prósh wara-
gay sháhed butagant.

55

Cha dozhmenáni tawará hayrán án

Pa sázger o washáwázáni sálará. Gón
simmi sázán. Dáuday shayri gwashtánk.

- 1 Oo Hodá! Mani dwáyá beshkon o
watá cha mani zári o peryátán chér
maday.
- 2 Mani némagá delgósh kan o passaw day,
wati nálag o zangán paréshán án.
- 3 Cha dozhmenáni tawár o
cha badkáráni kukkárán bétágat o
hayrán án.
- Chiá ke náhakká maná ranjénant o
gón hezhmé mani dozhmeniá kanant.
- 4 Del mán sénagá azáb ent o
markay torson sará kaptag o
- 5 bimm o dehshatá maná chér tarréntag.
- 6 Gwashán: “Dréché kapóti balón per
butén,
tánke balón bekortén o áram
begepténán,
- 7 Haw! Dém pa durén jágahána shotán o
dasht o gyábánon wati hankéna kort.
Ósht...
- 8 Pa eshtápia shotán o jáhé chéra bután,
cha lurh o tuppánán dur.”
- 9 Hodáwandá! Áyáni zobáná anchosh
betarrén
ke yakdomiá sarpad mabant,
chiá ke shahrá jang o chópa gendán.
- 10 Róch o shap shahray chágérdá diwáláni
sará tarragá ant o
shahr cha náensápi o petnahá porr
ent,
- 11 cha harábi o bérániá sarréché ent o
setam o repk, cha áiy bazará dura
nabit.
- 12 É dozhmené naent ke maná shegána
jant,
agan na, mana sagget,

- badwáh naent ke gón pahré mani démá
óshtátag,
agan na, cha áiy chéra bután.
- 13 Ji, taw ay mani matth,
mani bráhondag o nazzikén dóst,
- 14 ke márá wasshén hamráhié hastat
hamá wahdá ke gón mazanén mocchié
Hodáay lógá gáména jat.
- 15 Mark áyáni chakká bekapát o
zendahgórr bátant,
chiá ke badi áyáni lóg o deláni tahá
ent.
- 16 Bale man Hodáyá gwánka janán o
Hodáwand maná rakkénit.
- 17 Bégáh o sabáh o némróchá
zanga janán o peryáta kanán o
á mani tawará eshkont.
- 18 Mani jesm o jáná cha hamá jangá ke
démá dar átkag
pa dráhi o salámátia rakkénit,
bell toré bázéné mani démá óshtátag.
- 19 Hodá ke cha azal wati bádsháhi tahtay
sará neshtag,
eshkont o sharmendagesha kant.
Ósht...
Chiá ke badala nabant o
Hodátorsiesh nést.
- 20 Mani bráhondagá wati dast dóstáni
helápá shahárt o
wati kawli próshat.
- 21 Zobáni chó thélá charp at
bale deli jangig,
dapay habari cha rógená narmter,
bale kasshetagén zahm atant.
- 22 Wati paréshánián pa Hodáyá bell,
ke á tai dárók ent,
á hechbar pahrézkárán kapagá naylit.
- 23 Bale taw, oo Hodá,
badkárán johlterén kallá dawra dayay,
hónwár o prébkárén mardom
wati rócháni némá ham zendaga
namánant,
bale man tai sará tawkala kanán.

56

Hodáay sará tawkala kanán

Pa sázger o washáwázáni sálará.
“Bétawár o durdastén kapótay” tarzay
sará. Dáuday shayr, hamá wahdá ke
Pilistián Dáud Gatay shahrá dagir kort.

- 1 Oo Hodá! Mani sará rahm kan,
ke dozhmen sakk mani randá ant,
sajjahén róchá, mani sará orosha
kanant.
- 2 Sajjahén róchá, dozhmen maná la-
gatmála kanant,

- chiá ke bázéné pa kebr mani sará oroshta kant.
- ³ Wahdé maná torsit tai sará tawkala kanán.
- ⁴ Hodáay sará, ke áiy habará satá kanán, Hodáay sará tawkala kanán o natórsán, hákién ensán maná ché korta kant?
- ⁵ Sajjahén róchá, mani habarán tába dayant o sajjahén honaresh pa mani ázár dayagá ent.
- ⁶ Pandalá sázant o kamina kanant, mani gámána chárant o mani koshagay randá ant.
- ⁷ Gón é sajjahén badián rakketa kanant? Oo Hodá! Wati hezhmay tahá kawmán sarshakun kan.
- ⁸ Taw mani darpadariay hesábána dáray, mani arsán wati arsdáná bekan, é tai ketáb o daptarán nebeshtah naant?
- ⁹ Gorhá á wahdá ke tará gwánka janán dozhmen pada kenzant. Eshíá zánán ke Hodá gón man ent.
- ¹⁰ Hamá Hodá ke áiy habará satá kanán, haw, hamá Hodáwand ke áiy habará satá kanán,
- ¹¹ Hamá Hodáay sará tawkala kanán o natórsán. Ensán maná ché korta kant?
- ¹² Oo Hodá! Báyard ent gón taw wati kortagén kawlán purah bekanán, pa taw shogrgozáriay korbánigán péshta kanán.
- ¹³ Chiá ke taw, oo Hodá, maná cha marká rakkénay o mani pádán cha lakoshagá dáray, ke zenday rozhná tai bárgáhá gám bejanán.

57

Tai bánzoláni sáhegá panáha zurán

Pa sázger o washáwázáni sálará. "Barbád makanay" tarzay sará. Dáuday shayr, hamá wahdá ke Dáud cha Sháulá tatá gáregá chér but.

- ¹ Mani sará rahm kan. Oo Hodá! Mani sará rahm kan, chiá ke mani arwáh tai mayár o báhóth ent. Tai bánzoláni sáhegá panáha zurán, tán hamá wahdá ke é baláh berawt o begwazit.
- ² Borzén arshay Hodáay gwará peryáta kanán,

- hamá Hodá ke gonáhay bohtámá cha mana thagalénit.
- ³ Cha ásmáná wati komaká ráha dant, maná rakkénit o áyán ke maná lapáshant, pa hakkal adaba kant. Ósht...
- Hodá wati mehr o wapádáriá rawána kant.
- ⁴ Mani arwáh shéráni nyámá ent, ás bon dayókáni nyámá wapsán, hamá mardománi nyámá ke dantánesh tir o nayzah ant o zobánesh tézén zahm.
- ⁵ Oo Hodá! Ásmánáni sará bátay, tai shawkat sajjahén zeminá sheng bát.
- ⁶ Mani pádáni démá dámesh chér kort o arwáhon sarshakun but. Ráhay sará chátesh kótk, bale wat ódá shakun butant. Ósht...

- ⁷ Oo Hodá! Mani del mohr ent. Mani del mohr ent o sawt o sáza janán.
- ⁸ Oo mani arwáh! Ágáh bay. Oo chang o soródán! Ágáh bét. Man bámgwáhá cha wábá páda kanán.
- ⁹ Oo Hodáwand! Tará kawmáni nyámá satá kanán o pa taigi kabilaháni nyámá sawta janán.
- ¹⁰ Chiá ke tai mehr báz ent, tán arshá rasit o tai wapádári tán jambarán.
- ¹¹ Oo Hodá! Ásmánáni sará bátay, tai shawkat sajjahén zeminá sheng bát.

58

Hodá zeminay dádras ent

Pa sázger o washáwázáni sálará. "Barbád makanay" tarzay sará. Dáuday shayr.

- ¹ Oo hákemán! Shomay bétawári náensápi naent? Mardománi nyámá pa ensáp dádrasia kanét?
- ² Enna, wati delá béadlia sázét o shomay dast zeminá petnah páda kanant.
- ³ Badkárán cha mátay lápá wati ráh gár dátag o cha pédáeshá gomráh o drógband ant.
- ⁴ Áyán zahré mán ent chosh ke máray zahrá,

syahmáréay dhawlá ant ke góshi
bastagant o
5 hech paymá wati démá pa márgeráni
áwázá natarrénit,
harchont ke ezm o honara kanant.

6 Oo Hodá! Esháni dantánán mán dapá
prósh.

Hodáwandá! É warnáén shéráni
néshén dantánán cha boná dar kan.

7 Tachókén ápáni paymá gár bátant,
wahdé kamána kasshant tiresh konth
bátant o pad o nesháne maylátant,

8 halazunay paymá ke gón rawagá ápa bit
o
eshkand butagén chokkay paymá ke
hechbar róchay rozhná nagendit.

9 Cha eshiá pésar ke shomay déz kon-
thagáni ásá bemárant, * tarr bebant
yá hoshk,
Hodáesh gár o gomsár kanát.

10 Pahrézkár, bérá ke gendit, shádehia
kant,
wati pádán mán badkáráni hóná
shódit.

11 Mardoma gwashant:
"Albat ke pa pahrézkára mozzé hast,
Hodáé hast ke zeminay sará dádrasia
kant."

59

Maná cha dozhmenán berakkén

Pa sázger o washáwázáni sálará. "Barbád
makanay" tarzay sará. Dáuday shayr,
hamá wahdá ke Sháulá pa Dáuday kóshá,
lahtén chárug áiyay lógá rawán dát.

1 Oo mani Hodá! Maná cha dozhmenán
berakkén o
cha áyán ke mani helápá jáha janant,
mani negahpániá bekan.

2 Maná cha badkárán berakkén o
cha hónigán neját beday.

3 Bechár ke che paymá pa mani kóshá
kaminesh kortag.
Oo Hodáwand! Zórákén mard mani
helápá yakjáh butagant,
maná hech gonáh o mayaré ham nést.

4 Man hech gonáh o mayaré nakortag,
bale é angat mani sará orosh kanagá
tayár ant.
Pa mani komaká pád á o mani hálá
bechár.

5 Oo Hodáwand, oo lashkaráni Hodá! Taw
Esráilay Hodá ay,

ágáh bay, sajjahén kawmán sezá be-
day o
badkárén dróhókáni* sará rahm
makan. Ósht...

6 Shapá pera tarrant,
kochekáni paymá garrant o
shahray chágerdá gardant.

7 Bechár ke cha dapá ché dara kanant,
zahmesh dapá ent,
gwashant: "Kass eshkonagá naent."

8 Bale taw, oo Hodáwand, áyáni sará
kanday,
sajjahén kawmáni sará rishkanda
kanay.

9 Oo mani wák o zór! Tai rahchár án,
chiá ke taw mani kalát ay, oo
Hodáwand!

10 Hodá pa man mehrabán ent o mani
komaká kayt,
dozhmenáni sará wati péróziá
gendán.

11 Oo Hodáwand ke may espar ay! Áyán
makosh,
chosh mabit ke mani kawm be-
shamóshit.

Gón wati zórakiá eshán sargardán kan o
ér byár.

12 Pa wati dapay gonáh o lontháni habarán
wati kebray tahá bandig bebant.

Esháni nálat o drógbandiay sawabá,

13 eshán wati hezhmay tahá gár o gomsár
kan,
gár o gomsár kan ke hech pasht maka-
pant,

tán zánag bebit
ke cha Ákubá beger tán zeminay
har kondhá Hodá bádsháhia kant.
Ósht...

14 Shapá pera tarrant,
kochekáni paymá garrant o
shahray chágerdá gardant.

15 Warákay shóházá sar sar janána bant o
agan sér mabant wába nakapant.

16 Bale man tai kodratay tawsipá sawt o
sáza janán,
sohbá tai mehray satáyá sawta janán
o shádehia kanán,

chiá ke taw mani borzén kalát ay o
sakkiáni wahdá mani panágháh.

17 Oo mani wák o twán! Tará názénán.
Hodá mani borzén kalát ent,
mani Hodá ke gón man mehra kant.

* 58:9 58:9 Márag, bezán mahsus kanag.

* 59:5 59:5 Dróhók, bezán mardomé ke pa repk rada dant. Pársiá
"khiánatkár", Orduá "dhukábáz".

60

Dozhmenáni démá mára madat kan
Pa sázger o washáwázáni sálará. "Susanay" tarzay sará. Gwáhié. Pa tálimá Dáuday shayr, hamá wahdá ke Dáudá gón Naharaymay Áramián o Sóbahay Áramián jang kort o hamá wahdá ke Yuáb per tarret o Wáday dashtá cha Edumián dwázdah hazár mardomi kosht.

- 1 Oo Hodá! Taw mára yalah kortag o may sangar próshtagant, hezhmnák butagay, bale nun gón má wasshán bay.
- 2 Zeminet jombéntag o tal dátag, taláni beger ke larzagá ent.
- 3 Wati kawmet gránén jáwarán perréntag, mára madhósh kanókén sharábet wárentag.
- 4 Bale angat bayraket pa Hodátorsán borzád kortag tánke yakjáh bebant o cha dozhmenay kamáná berakkant. Ósht...
- 5 Gón wati rástén dastá berakkén o passaw beday tán hamá ke tará dóst ant berakkant.
- 6 Hodáyá cha wati pákiá habar kort: "Shekémá gón shádehi bahra kanán o Sukkótay daragá kesása kanán.
- 7 Galyád manig ent o Manassi mani, Epráim mani jangi koláh ent, Yahudá bádsháhiay asá o
- 8 Muáb mani dasshódi trasht, Edumay sará wati swásá chagala dayán* o Pilstiahay sará wati péróziay gwánká janán."†
- 9 Kay maná choshén shahréa kárit ke sangarband ent? Kay maná dém pa Edumá rahshóna bit?
- 10 Oo Hodá! Taw mára yalah dátag. Oo Hodá! Padá may lashkaráni hamráha nabay.
- 11 Dozhmenáni démá mára madat kan, chiá ke ensánay madat békár o náhudag ent.
- 12 Gón Hodáyá sóbéna bén, hamá ent ke may dozhmenán pádmála kant.

61

Maná dém pa talára bar
Pa sázger o washáwázáni sálará. Gón simi sázán. Dáuday Zabur.

* 60:8 60:8 Swás chagal dayagay máná gerag o wati kanag ent. † 60:8 60:8 Band 6 tán 8 á bázén jágah o mardománi náma kayt. * 62: 62:0 Yedutun cha mazanén parasteshgáhay washáwázán yakké at.

- 1 Oo Hodá! Mani peryátá beshkon o mani dwáyá gósh dár.
- 2 Tará cha zemínay godhsará gwánka janán, wahdé delona drahit. Maná dém pa talaréa bar ke cha man borzter ent.
- 3 Chiá ke taw mani panáhgháh butagay o dozhmenáni démá mohrén borjé.
- 4 Bell ke tai tambuá tán abad bemánán o tai bánzoláni sáhegá panáh bezurán. Ósht...
- 5 Chiá ke taw, oo Hodá, mani dátagén kawli eshkotagant o wati námay torsetagénáni miráset maná bakshátag.
- 6 Bádsháhay omray róchán báz kan o áiy sálán, tán sajjahén naslán.
- 7 Hodáay bárgáhá tán abad sháhi tahtá benendát, wati mehr o wapádáriá áiy negahpán kan.
- 8 Nun tai námá modám názénán o wati kawlán har róch puraha kanán.

62

Arwáhon Hodáay rahchár ent
Pa sázger o washáwázáni sálará. "Yedutunay"* tarzay sará. Dáuday Zabur.

- 1 Mani arwáh pa émeni tahná Hodáay rahchár ent, chiá ke mani rakkénag cha hamáiy némagá ent.
- 2 Mani talár o mani rakkénók tahná hamá ent, mani kalát ent, hechbara nalarzán.
- 3 Tán kadén mardéay sará orosha kanét tánke sarjamiá bekoshéti, chosh ke proshtagén díwál o kaptagén shank o pallé?
- 4 Albat pandala sázant ke áiy cha borzád sarshakun bekanant. Cha dróg bandagá lezzata barant, gón wati dapá barkata dayant, bale delay tahá nálata kanant. Ósht...
- 5 Oo mani arwáh! Pa émeni tahná Hodáay rahchár bay, chiá ke mani omét gón hamáiy ent.
- 6 Mani talár o mani rakkénók tahná hamá ent, mani kalát ent, mana nalarzán.
- 7 Mani neját o ezzat gón Hodáyá ent,

hamá mani mohrén talár ent, mani panágháh ent.
 8 Oo mardomán! Hodáay sará tawkal kanét o delay hálán hamáiyay dé má darshán kanét, Hodá may panágháh ent. Ósht...
 9 Pa rásti ke ensán cha daméá géshter naent, bani ádam prébé, agan sháhémá tóresh bekanant hech naant. É sajjahén, yakjáh cha damé géshter naant.
 10 Pa zolm o zórá tawkal makanét o pa dozziá omét mabandét, harchont ke shomay má l géshtera bit, pa áia del mabandét.
 11 Hodáyá yak habaré gwashtag o man do eshkotag, ke zór o kodrat Hodáayg ent o
 12 mehr o rahm ham taig ent, oo Hodáwand!
 Taw harkasá áiy kortagén káráni hesábá, mozza dayay.

63

Arwáhon tai tonnig ent
 Dáuday Zabur, hamá wahdá ke Yahudáay gyábáná at.
 1 Oo Hodá! Mani Hodá taw ay, gón wati sajjahén del o jáná tai shóházá án, arwáhon tai tonnig ent o jesm o jánon tai hodónák, béáp o hoshkén zeminéá.
 2 Tai pákén jágháh, maná tai shobén butag, tai shán o kodraton distag,
 3 chiá ke tai mehr cha zendá sharter ent, mani lonth tará názénant.
 4 Tán zendag án tará názénán o pa tai námá dastán borza kanán.
 5 Arwáhon anchosh séra bit chó ke yakké wasshén waráké bwárt o dapon gón shádmánén lonthán tará názénit.
 6 Wati bestaray tahá ham tará yáta kanán o shapáni pásán tai hayálá bán.
 7 Tai bánzoláni sáhegá tará názénán, chiá ke taw mani madatkár ay.
 8 Arwáhon gón taw bandók ent o rástén dastet mani posht o panáh.
 9 Á ke mani koshtagay pad o randá ant gár o gomsára bant o zeminay johlánkián éra rawant.

10 Zahmání dapá tarrant o tólagáni waráka bant.
 11 Bale bádsháh Hodáay dargáhá shádehia kant o harkas ke gón Hodáyá sawgenda wárt pahra kant, chiá ke drógbandáni dap chopp o bandaga bit.

64

Maná cha badkárán chér day
 Pa sázger o washáwázáni sálará. Dáuday Zabur.
 1 Oo Hodá! Wahdé nálán o peryáta kanán, mani tawará beshkon o zendá cha torsnákén dozhmenán be-rakkén.
 2 Maná cha badkáráni pandalán chér day, cha radkáráni áshópá.
 3 Chiá ke wati zobáná zahmání paymá téza kanant o wati tahlén habarán tiray paymá kára bandant
 4 tánke cha wati sangarán bémayará neshánag bekanant. Anágat o bé torsá áia tira janant.
 5 Radén kára yakdomiá delbaddhia dayant, habar ke kanant, maksadesh wati dámáni chér kanag ent. Gwashant: "Kayesha gendit?"
 6 Náensápiá dalil o honara kanant o gwashant: "Má tamán o kamálén shawré kortag." Pa rásti ke ensánay del o hayál zánaga nabant.
 7 Bale Hodá áyán tira jant o anágat thappiga bant.
 8 Á wati jenday zobánay sawabá thagala warant. Harkas ke begenditesh pa áyán sará chandhénit.
 9 Sajjahén bani ádama torsant, Hodáay kára jára janant o áiy kára pa hósh o sára chárant.
 10 Pahrézkár Hodáwanday dargáhá shádehi kanát o áiy dargáhá panáh bezurát. Sajjahén nékdel pahr bekanátant.

65

Hodáay kawr sarréch ent
 Pa sázger o washáwázáni sálará. Dáuday Zabur. Sawté.
 1 Oo Hodá! Sahyuná satá o saná tai wadará ent, gón taw may kawl puraha bant.

2 Oo taw ke dwáyána eshkonay!
Sajjahén mardom dém pa taw káyant.

3 Á wahdá ke gonáh mani sará lombetant,
taw mára bakshet.

4 Bahtáwar hamá ent ke tawi gechéna
kanay o wati bárgáhá káray
tánke hamóda jahmenend bebit.
Cha tai dargáhay nékiá séráp bátén,
cha tai parasteshgáhay pákiá.

5 Gón wati bákamálén kárán, mára pa adl
o ensáp passawa dayay.
Oo may rakkénóken Hodá!
Zeminay chár kondh o durdassterén
daryáyáni omét gón taw ent.

6 Taw ay ke gón wati zór o wáká kóhet
jórhéntagant o
watá gón kodratá selahbandet kortag,
7 daryáyáni gorraget árám kortant,
mawjáni tawár o kawmáni áshóp.

8 Zeminay chár kondhá nendók cha tai
neshánián hayrán ant,
taw shagreb o magrebá parmáay ke
shádmániay kukkára bekanant.

9 Taw zeminay hayaldáriá kanay,
áiá ápa dayay o ábáda kanay.
Hodáay kawr sarréché ent
taw mardomán gandoma bakshay
chiá ke tai shawr hamé butag.

10 Taw zeminay palán* ápa dayay o
dhagárá hamdasta kanay,
gón gwáragá narmia kanay o
rost o rodómá barkata dayay.

11 Gón wati nékiá sálá tájé sará dayay,
tai pádráh ham cha barkatá sarréché
ant.

12 Gyábánáni charágáh ábáda bant o
kóhán wati srén pa shádmáni basta-
gant.

13 Dhagárán watá gón ramagán póshéntag
o
daragán gón gandomá,
shádmániay kukkára borza kanant o
sawta janant.

66

Tai kár bákamál ant

Pa sázger o washáwázáni sálará. Sawté.
Zaburé.

1 Oo zeminay sajjahén mardomán! Pa
Hodáyá shádehiay gwánká bejanét.

2 Áiay námay mazaniá názénét o
áiay shán o shawkatá satá kanét.

3 Hodáyá begwashét: “Tai kár chenkadár
bákamál ant.
Tai wák o kodratay mazaniay sawabá

dozhmen tai démá háká kapant.

4 Zeminay sajjahén mardom tará sojdaha
kanant o
tará názénant.
Haw! Tai námá sárháyant.” Ósht...

5 Byáét o bechárét ke Hodáyá ché kortag,
ajabén kár pa bani ádamá.

6 Daryái hoshk kort o
Hodáay kawm ódá pád payádaká cha
kawrá gwast,
áiay bárgáhá shádmáni bekanén.

7 Á gón wati kodratá tán abad
bádsáhia kant,
chammi gón kawmán ent.
Sarkesh áiay helápá pád mayáyant.
Ósht...

8 Oo kawmán! May Hodáyá satá kanét,
pa borztawári benázénéti.

9 May zendi rakkéntag o
pádi cha thagalagá dáshtagant.

10 Oo Hodá! Chiá ke taw mára
chakkásetag,
taw mára nograhay paymá palgártag.

11 Taw mára dámá dawr dátág o
may gardená mazanén béré eshtag.

12 Cha tai razáyá mardomán mára sar-
jamiá lagatmál kortag,
cha áp o ásá gwastagén,
bale mára sarsabzén jáhéá áwortaget.

13 Gón sóchagi korbánigán tai dargáhá
káyán o
gón taw wati kawlán puraha kanán,
14 hamá kawl ke lonthán wádah dátág o
dapá gwashtagant
sakki o sóriáni wahdá.

15 Pazzóren dalwatán sóchagi korbániga
kanán,
gón gwarándháni korbánigay duttán,
pa taw pas o gók nadra kanán. Ósht...

16 Oo sajjahén Hodátorsán! Byáét o
beshkonét,
hamá chizzána gwashán ke pa man
kortaganti.

17 Gón wati dapá áiay kerrá peryáton
kortag,
áiay satá o saná mani zobáná at.

18 Agan badié mani delá butén
Hodáwandá mani habar gósh
nadáshtagat.

19 Bale Hodáyá pa rásti eshкотag o
mani dwáay tawári gósh dáshtag.

20 Hodáyá satá bát ke cha mani dwáyá
nádelgósh nabutag o
wati mehri cha man dur nadáshtag.

* 65:10 65:10 Pal, bezán dhagáray nangár kanagá rand, hamá drájén borz o jahli ke áyáni tahá keshár keshaga bit.

67

Sajjahén kawm tará satá kanátant

Pa sázger o washáwázáni sálará. Pa simmi sázán. Zaburé. Sawté.

- 1 Hodá may sará mehrabán bát, mára barkat bedayát o wati démá pa má drapshán kanát, ósht...,
- 2 tánke tai ráh jaháná zánag bebit o tai dátagen rakkénag sajjahén kawmáni nyámá.
- 3 Oo Hodá! Kawm tará satá kanátant, sajjahén kawm tará satá kanátant.
- 4 Kawm shádehi kanátant o shádmániay gwánká bejanátant, chiá ke taw kawmáni sará pa ensáp dádrasia kanay o jahánay kawmáni rahshóna bay. Ósht...
- 5 Oo Hodá! Kawm tará satá kanátant, sajjahén kawm tará satá kanátant.
- 6 Zeminá wati bar o samar dátag, Hodá, may Hodá, mára barkat bedayát.
- 7 Hodá mára barkat bedayát tánke zeminay chár kondh áiay mazaniá sharap bedayant.

68

Hodá jáh janát

Pa sázger o washáwázáni sálará. Dáuday Zabur. Sawté.

- 1 Hodá jáh bejanát o áiay dozhmen sheng o sháng bátant, á ke cha áiá naprata kanant cha áiay dargáhá betachátant.
- 2 Anchosh ke dutt bála kant eshán betáchén, anchosh ke móm ásay démá ápa bit, badkár Hodáay dargáhá gár o gomsár bátant.
- 3 Bale pahrézkar shádmán o Hodáay dargáhá gal o bál bátant o cha wasshiá shádehi kanátant.
- 4 Pa Hodáyá sawt bejanét o áiay námá názénét, pa áiá ke jambarán swár ent satá o sanáay tawará borz kanét. Áiay nám Hodáwand ent, áiay bárgáhá shádehi kanét.
- 5 Hodá wati pákén bárgáhá

chórhawáni pet ent o janózámáni dádras.

- 6 Hodá békasán pa lóg o jáha kant o bandigán, ázát o ábád, bale sarkesh, hoshkén zeminéá nendóka bant.
- 7 Oo Hodá! Á wahdá ke wati kawmay rahshón atay, á wahdá ke gyábáná mallán atay, ósht...,
- 8 zemin larzet o ásmánán hawr gwart, Hodáay bárgáhá, Sináay kóhay yakdánagen Hodáay, Hodáay bárgáhá, Esráilay Hodáay.
- 9 Oo Hodá! Taw bázén hawré gwárent o tai mirás ke hoshk o wayrán butagat, taw séráp kort.
- 10 Tai ramag ódá jahmenend but. Cha wati nékiá, oo Hodá, taw béwas rózi dátant.
- 11 Hodáwand wati habará jára jant, bashárat árókén janén, mazanén lashkaré ant.
- 12 Bádsháh gón wati lashkarána jehant o tachant, janén wati lógá áwarán* bahra kanant.
- 13 Toré gwásh o áhorráni tahá wáb bebay kapódaráni bál nograhpósha bant o potthesh teláhrang.
- 14 Wahdé Porwákén Zórá bádsháh sheng o sháng kortant, barpá Salmunay kóhay sará gwart.
- 15 Oo mazankóh! Oo Báshánay kóh! Oo bázhollén† kóh! Oo Báshánay kóh!
- 16 Oo bázhollén kóh! Pa ché hamá kóhá gón hasaddé chárágá ay ke Hodáyá pa wati lóggáhá gechén kortag, hamódá ke Hodáwand tán abad jahmenenda bit?
- 17 Hodáay arrábah hazáráni hazár o lakkáni lakk ant, Hodáwand cha Sináay kóhá wati pákén jágáhá átkag.
- 18 Á wahdá ke arshá borz butay bázén bandigé zortet, cha mardomán thékiet zort, tantaná cha sarkashán ham, tánke taw, oo Hodáwandén Hodá, ódá jahmenend bebay.
- 19 Hodáwandá satá bát, may rakkénókéen Hodáyá

* 68:12 68:12 Áwár, bezán jangá dast áwortagen mál, zarr o mardom. † 68:15 68:15 Tholl, bezán kóhay tuskén borzi. Bázhollén kóhéá bázén borzié hast.

- ke har róch may bárána saggit. Ósht...
 20 May Hodá rakkénókén Hodá ent,
 cha marká rakkénag Hodáwunday
 dastá ent, tahná Hodáwunday.
- 21 Bale Hodá dozhmenáni sará próshit,
 hamáyáni pormudén saray gobbahá
 próshit ke wati gonáháni tahá gáma
 janant.
- 22 Hodáwandá gwashtag: “Áyán cha
 Básháná pera tarrénán,
 áyán cha daryáay johlánkián pera
 tarrénán,
- 23 tánke tai pád áyáni hóná lagatmál
 bekanant o
 tai kočekáni zobán ham wati bahrá
 cha dozhmenán begerant.”
- 24 Oo Hodá! Tai jashnay kárwán gendaga
 bit
 mani Hodá o mani bádsháhay kárwán
 mán pákén jágahá.
- 25 Démá sháer o poshtá sázger o
 nyámá jenek tamburag janagá ant.
- 26 Hodáyá mán mazanén diwánán
 benázénét.
 Oo Esráilay óbádagan! Hodáwandá
 benázénét.
- 27 Benyáminay kasánén kabilah hamódá
 ent,
 Yahudáay kamásh áyáni hákem ant,
 Zebulunay kamásh o Naptáliay
 kamásh, mazanén rombé ant.
- 28 Tai Hodáay parmán ent ke taw zóráwar
 bebay.
 Oo Hodá! Anchosh ke pésará kortaget,
 wati zór o wáká mára pésh bedár.
- 29 Pa tai parasteshgáhay háterá ke Urshal-
 imá ent
 bádsháh pa taw thékia kárant.
- 30 Kalam o kásháni nyámay rastará‡
 hakkal day o
 kawmáni gwaskáni nyámá gókáni
 góromá. §
- Rastar érdasta bit o nograha kárit.
 Jangdóstén kawmán sheng o sháng
 kan.
- 31 Kásed cha Mesrá káyant
 Habashah eshtápiá wati dastán dém
 pa Hodáyá borzáda kant.
- 32 Oo jahánay molkán! Pa Hodáyá sawt
 bejanét,
 Hodáwandá gón sawtá benázénét,
 ósht...,
- 33 hamáia ke ásmánán shahswária kant,
 kwahnén ásmánán,

- hamáia ke wati áwázá borza kant,
 trond o porwákén áwázá.
- 34 Hodáay kodratá jár bejanét,
 ke shán o shawkati Esráilay sará ent o
 kodratí, ásmánáni sará.
- 35 Oo Hodá! Taw wati pákén jágahá
 bákamál ay,
 Esráilay Hodá wati kawmá zór o wáka
 bakshit.
 Hodáyá satá o saná bát.

69

Oo Hodá! Maná berakkén

Pa sázger o washáwázáni sálará. “Su-
 sanáni” tarzay sará. Dáuday Zabur.

- 1 Oo Hodá! Maná berakkén
 ke áp tán mani gardená ent.
- 2 Johlánkén pujgelán mén butagán,
 jágahé ke páda naóshtit.
 Johlánkén ápáni tahá kaptagán o
 hár o lahrhán maná angerr kortag.
- 3 Cha bázén peryátán damon bortag,
 mani nokk hoshk ent o
 chamm wati Hodáay wadará tahár
 butagant.
- 4 Á ke besawab cha man naprata kanant
 cha mani saray mudán géshter ant.
 Bázéné mani gár kanagay randá ent
 dozhmen mani sará drógén bohtáma
 janant.
 Cha man lóthant hamá chizzán per
 betarrénán
 ke man nadozzetagant.
- 5 Oo Hodá! Taw zánay ke man ahmaki
 kortag,
 mani gonáh cha taw chér naant.
- 6 Oo Hodáwand, oo lashkaráni Hodáwand!
 Hamá ke tai wadárig ant mani sawabá
 sharmendag mabátant.
 Oo Esráilay Hodá!
 Hamá ke tai shóházá ant mani sawabá
 roswá mabátant.
- 7 Chiá ke pa taigi maná sobakka kanant o
 mani dém cha sharmá póshénag bu-
 tag.
- 8 Brátáni chammá bigánag butagán o
 wati mátay chokkáni démá darámadé.
- 9 Á gayrat ke maná pa Hodáay lógá has-
 tent,
 maná jánsócha kant o báhénit o
 tai rad o bad kanókáni rad o bad,
 mani sará kaptagant.
- 10 Á wahdá ke arson rétkag o róchagon
 dáshthag
 sobakk kanag butagán.
- 11 Á wahdá ke sugi god o póshákon gwará
 kortagant,

‡ 68:30 68:30 Rastar, bezán derrókéén jánwaré chó ke shér o polang. § 68:30 68:30 Górom, bezán gókáni romb.

esháni kerrá batalé butagán.
 12 Shahray masteráni gwará nám o dap án
 o
 sharábiáni sawt.
 13 Bale man, oo Hodáwand, tai rahmay
 wahdá,
 tai dargáhá dwá kanán.
 Oo Hodá! Cha wati bázén mehr o
 wapádáriá,
 gón deljamén rakkénagé passaw be-
 day.
 14 Maná cha pujgelán dar kan,
 tánke ér mabodhdhán.
 Cha naprat kanókáni panjagá maná be-
 rakkén o
 cha johlánkén ápán dar kan.
 15 Mayl ke hár maná angerr kanant,
 yánke johlánki maná ér barant,
 yá mani sará kall wati dapá bebándit.
 16 Oo Hodáwand! Mani passawá beday ke
 tai rahmat báz ant,
 wati rahmatáni kesás o hesábá, wati
 démá gón man betarrén.
 17 Démá cha wati hezmatkárá mapóshén,
 pa mani madatá eshtáp kan
 ke sakk tang átkagán.
 18 Nazzik byá o maná berakkén,
 dozhmenáni sawabá maná bemók.
 19 Taw á sobakkían wata zánay ke mani
 sará ant o
 mani sharmsári o roswáián,
 mani sajjahén dozhmen tai démá ant.
 20 Sobakki o béezatián mani del prósttag
 o dar mantagán,
 rahmay wadará atán o dastá nakapt,
 gamwáreyay shóhazá atán o naraset.
 21 Warákay badalá, maná jawresh dát o
 wahdé tonnig bután trophshén
 sharábesh nóshént.
 22 Parzónagesh dámé bát o
 sohl o émeniesh talké.
 23 Chammesh tahár bát o magendátant o
 srénesh draha g o larzagá bát.
 24 Wati hezhmá áyáni sará begwáren,
 gazabay ácheshá pa áyán berasén.
 25 Lóg o jágahesh haráb o wayrán bát,
 áyáni gedánán hechkas jahmenend
 mabát.
 26 Chiá ke hamáiá azára rasénant ke taw
 jatag o
 hamáiay ranjáni habará kanant ke
 taw thappig kortag.
 27 Mayár pa mayáresh beladdh,
 cha tai adlá bébahr bátant.
 28 Cha zendagénáni daptará gár bátant,
 gón pahrézkarán yakjáh nebisag
 mabátant.
 29 Bale nun man, setam distag o padard án.

Oo Hodá! Tai neját maná émen
 bedárát.
 30 Hodáay námá gón sawta názénán o
 gón bázén shogrgozáriá shán o
 shawkatia dayán.
 31 É chizz Hodáyá cha gwaskéá géshter
 pasonda bit,
 cha mazankánth o mazansrombén
 gókéá.
 32 Békebr o darbésh é chizzá ke begendant
 gal o shádána bant.
 Oo Hodáay shóhaz kanókán! Zen-
 dahdel bátét.
 33 Hodáwand nyázmandáni dwáyán gósha
 dárít o
 wati bandigén mardomán bazzag o
 wára nakant.
 34 Ásmán o zemin áíay benázénant,
 daryá o áíay tahay sajjahén sahdár.
 35 Chiá ke Hodá Sahyuná nejáta dant o
 Yahudáay shahrán nóksará addha
 kant.
 Kawm ódá jahmenenda bit o
 molkay hakkén wáresa bit.
 36 Molk áíay hezmatkáráni poshtpaday
 mirása bit o
 áíay námay dóst dárók ódá jahme-
 nenda bant.

70

Pa mani madatá eshtáp kan

Pa sázger o washáwázáni sálará. Dáuday
 Zabur. Dazbandié.

1 Oo Hodá! Zutt kan o maná berakkén.
 Oo Hodáwand! Pa mani madatá es-
 htáp kan.
 2 Á ke mani kóshay randá ant,
 sarjahl o sharmsár bátant,
 á ke mani barbádiá gala bant,
 pad bekenzát o roswá bátant.
 3 Á ke mani sará "hah, haha" kanant,
 cha pashaliá poshtoká kenzátant.
 4 Bale á ke tai shóhazá ant,
 sajjahén tai dargáhá shádehi kanát o
 gal o bál bátant,
 á ke tai dátágén nejátesh dósta bit,
 modám begwashátant:
 "Hodáwand mazanshán ent."
 5 Bale man setam distagén mohtájé án.
 Oo Hodá! Dém pa man eshtáp kan,
 taw mani rakkénók o madatkar ay.
 Oo Hodáwand! Dér makan.

71

Oo Hodáwand! Maná yalah makan

- 1 Oo Hodáwand! Man tai mayár o báhóth án,
maná sharmsár makan.
- 2 Pa wati adlá maná berakkén o bechot-thén,
delgóshá gón man kan o maná berakkén.
- 3 Mani panáh dayagay talár bay,
ke modám dém pa áiá byáyán.
Taw pa mani rakkénagá hokm kortag,
chiá ke mani talár o kalát taw ay.
- 4 Oo mani Hodá maná cha badkáráni dastá berakkén,
cha setamger o bérahmáni panjangá.
- 5 Chiá ke taw, oo Hodáwand, mani omét ay o
cha kasániá, oo Hodáwand, óst o ométon tai sará butag.
- 6 Cha pédáeshá mani komak kanók butagay,
é taw butagay ke maná cha mátá pédá kortag,
mani satá o sárháyagáni dém modám gón taw ent.
- 7 Pa bázénéá neshánié butagán,
chiá ke taw mani mohrén panáhgáh ay.
- 8 Dapon cha tai tawsipá porr ent,
cha tai shán o shawkatá sajjahén róchá.
- 9 Piriá maná cha watá dur makan,
á wahdá ke twánona kotthit, yalahon makan.
- 10 Chiá ke dozhmen mani helápá habará ant,
á ke mani koshagay randá ant horigá pandala sázant.
- 11 Gwashant: “Hodáyá yalah kortag,
berawén begeréni,
kassia narakkénit.”
- 12 Oo Hodá! Cha man dur mabay.
Oo mani Hodá! Mani madatá eshtáp kan.
- 13 Mani bohtám janók sharmsár o tabáh bátant o
á ke mani ázaray padá ant pashal o sharmendag bátant.
- 14 Bale man modám tai komakay ométwár án o
tará gésh o géshter satá kanán.
- 15 Tai ádelén káráni habará kanán,
sajjahén róchá tai dátágén nejátay járá janán,
harchont ke áyáni hesáb cha mani zánagá dhann ent.

- 16 Mana káyán o Hodáwanday porwákén káráni járá janán, tahná Hodáwanday,
tai adlay járá janán, tahná tai.
- 17 Oo Hodá! Taw maná cha kasániá sój dátág,
modám tai ajabén káráni járá janán.
- 18 Oo Hodá! Nun ke pir án o mud espét ant,
maná yalah makan,
tán nókén padréchay nyámá tai zóray járá bejanán o
sajjahén áyókén naslán cha tai wák o twáná sahig bekanán.
- 19 Oo Hodá! Tai adl tán borzén arshá ent,
taw ay ke mazanén káret kortag.
Oo Hodá! Tai matth kay ent?
- 20 Harchont taw maná bázén sakki o sóri pésh dáshtag,
bale padá mani zendá bódénay*,
Haw, nóksará maná cha zeminay johlánkiá borzáda káray.
- 21 Mani ezzatá borztera baray maná padá ásudaga kanay.
- 22 Man tará gón chang o soróda názénán,
chiá ke taw wapádár ay, oo mani Hodá!
Gón rabábay sázá tará názénán,
oo Esráilay Pákén!
- 23 Mani lonth shádmániay kukkárá kanant,
man tará názénán,
ke taw maná móketag.
- 24 Sajjahén róchá tai ádelén káráni zegrá kanán
chiá ke á ke mani ázar rasénagay lóthók atant,
sarjahl o sharmsár butagant.

72

Wati adlá bádsháhá baksh

Solaymánay Zabur.

- 1 Oo Hodá! Wati adlá bádsháhá bebaksh,
wati ensápá bádsháhay chokká,
- 2 tánke á pa ensáp tai kawmay sará dádrasi bekant,
setam distagénáni sará pa adl.
- 3 Kóh pa kawmá ábádi byárátant,
jomp o tomp, pahrézkáriay samará.
- 4 Bádsháh kawmay setam distagénáni hakká bedayát,
mohtájáni chokkán berakkénát o setamgerán tabáh kanát.
- 5 Nasláni nasl tai sharap o ezzatá bedárátant,
tánke rócha drapshit,

* 71:20 71:20 Bódénag, bezán zendá nókén shádábi o napas mán kanag.

tánke máh nura dant.
 6 Bádsháhay hákemi hamá hawráni
 paymá bát ke rotagén sabzagáni
 sará gwárant,
 hamá hawráni paymá ke zeminá
 sérápa kanant.
 7 Áiay ahdá pahrézkár shádáb bátant,
 tán hamá wahdá ke máh nura dant
 ábádi bát.
 8 Daryá tán daryá áiay bádsháhi barjáh
 bát o
 cha kawrá* tán zeminay goddhi sim-
 sarán.
 9 Áiay dargáhá gyábánay nendók sará jahl
 bekanátant,
 áiay dozhmen hák bechatthátant.
 10 Tarshish o tayábgwaráni† sardhagáray
 bádsháh hamáia song o máliát be-
 dayátant,
 Shéba o Sabáay bádsháh pa áia théki
 byárátant.
 11 Sajjahén bádsháh, áiay démá sará jahl
 bekanátant,
 sajjahén kawm áiay hezmatá
 bekanátant.
 12 Chiá ke á hájatmandán hamá wahdá
 rakkénit ke peryáta kanant,
 setam distagénán o hamáyán ke ma-
 datkáré néstesh.
 13 Nezór o hájatmandáni sará rahma kant
 o
 hájatmandáni zendá rakkénit.
 14 Áyáni zendá cha zolm o sheddatá nejáta
 dant,
 áyáni hóná gránkimmata zánt.
 15 Omri báz bát,
 Sabáay teláh áiay peshkash bátant.
 Mardom modám áiay dwágó bátant o
 sajjahén róchá pa áia barkat
 belóthátant.
 16 Gandom sajjahén molká anchosh báz
 bát ke
 jompáni sará chawl bejant o
 bar o samari anchosh báz bát ke Lobnáná
 ent.
 Shahrán mardom anchosh ábád bátant ke
 sabzag mán dhagáran.
 17 Bádsháhay nám namirán bát,
 tán rócha drapshit nám o tawári
 bemánát.
 Sajjahén kawm cha áia barkat begerátant
 o
 áia mobáarak begwashátant.
 18 Hodáwandén Hodáyá satá bát, Esráilay
 Hodáyá,
 ajabén káráni kanók tahná hamá ent.

19 Áiay porshawkatén námá tán abad satá
 bát,
 áiay shán o shawkat sajjahén zeminá
 begerát.
 Anchosh bát. Ámin.

20 Dáude Yassiy dwá hamedá kotthant.

Zaburay sayomi ketáb

73

Zabur 73—89

Á ke cha taw dur ant gár o gomsára
 bant

Asápay Zabur.

1 Pa rásti Hodá pa Esráilá mehrabán ent,
 pa hamáyán ke delesh sáp ent.
 2 Bale kammé mantagat bethagalán,
 nazzik at pád belakoshant.
 3 Chiá ke pa porkebrán hasaddi bután,
 hamá wahdá ke man badkár ábádi o
 ásudagiá distant.
 4 Chiá ke áyán tán marká dardé per nést o
 wassh o sérláp ant.
 5 Á degaráni paymá ranj o zahmatá naant
 o
 mardomi baláháni tahá nakapant.
 6 Paméshká kebr áyáni gwaray hár ent o
 hezhm o gazab áyáni póshák.
 7 Chammesh cha pazzóriá dar átkagant o
 delay hayálánesh haddé nést.
 8 Pa maskará o badwáhi habara kanant,
 pa kebr zolm o setamá wati zobáná
 kárant.
 9 Dapá ásmánay helápá pacha kanant o
 zobánesh sajjahén zeminá gipt.
 10 Paméshká kawm dém pa áyána rawt o
 pa galé hamáyáni dastay ápána wárt.
 11 Gwashant: “Hodá che paymá zánt?
 Borzén arshay Hodáyá é dhawlén
 zántkári hast?”
 12 Haw, badkár chosh ant,
 modám ásudag ant o mál o melkatesh
 démá rawán ent.
 13 Pa rásti man wati del mopt o náhudagá
 pák dáshtag o
 dast mán bégonáhiá shoshtagant.
 14 Har róch ázárán kaptagán o
 har sohbá hakkala warán.
 15 Agan begwashténon: “É habarána
 kanán,”
 man tai chokkáni nasl dróhetagat.
 16 Wahdé é sajjahén chizzáni zánagay
 johdon kort,
 pa man grán at,
 17 tán hamá wahdá ke Hodáay pákén
 jághá shotán.

* 72:8 72:8 Bezán cha Parátay kawrá. † 72:10 72:10 Tayáb, bezán daryáay kerr, sáhel.

- Nun é mardománi ákebaton dist.
- 18 Pa rásti áyán lakoshánkén jáhána perrénay,
gár o gomsáriay chátá dawra dayay.
- 19 Anágat gár o zawála bant,
cha torsá sarjamá bérána bant.
- 20 Wábéay dhawlá ant ke wahdé chamm pacha bant gára bit,
á wahdá ke taw páda káay, oo Hodáwand,
eshán wahméay paymá mána nayáray.
- 21 Á wahdá ke mani arwáh zahr o tahl at o del résh,
- 22 Bépahm o nazántkár atán,
tai dargáhá haywánéay paymá,
cha pahm o póhá dhann.
- 23 Angat ham modám gón taw án,
taw mani rástén dastá geray.
- 24 Gón wati sar o sóján maná rahshónia kanay o
randá gón shán o shawkaté zuray.
- 25 Ásmáná, abéd cha taw maná kay hast?!
Zeminá ham, abéd cha taw hech chizzé nalóthán.
- 26 Mani jesm o ján o del balkén zawál bebant,
bale Hodá mani delay kalát ent,
tán abad mani gisshetagén bahrwandh.
- 27 Pa rásti á ke cha taw dur ant gár o gomsára bant o
hamáyán bérána kanay ke gón taw béwapá ant.
- 28 Bale pa man wasshi hamesh ent ke Hodáay nazziká bebán,
Hodáwandon wati panáhgáh kortag,
tán tai sajjahén kárán jár bejanán, oo Hodáwand!

74

Oo Hodá! Chiá mára yalah dátaget?
Asápay shayri gwashtánk.

- 1 Oo Hodá! Chiá mára tán abad yalah dátaget?
Pa ché tai hezhmay ás pa tai charágáhay pasán rók ent?
- 2 Wati kawmay yátá bekap,
ke taw cha dérén zamánagán pa bahá zortagatant,
ke taw móketagant tán tai kawm o mirás bebant.
Sahyunay kóhay hayalá bekap ke ódá jahmenend butagay.

- 3 Wati gámán dém pa wati hamé modámigén wayránagán betarrén,
chiá ke dozhmená har chizz bérán kortag ke tai pákén jágahá butag.
- 4 Dozhmenán tai didárjáhay tahá gorret o wati bayrak* pa neshániá mekk kortant.
- 5 Hamáyáni paymá atant ke wati taparán jangalay drachkáni sará borza barant.
- 6 Áyán, tai pákén jágahay sajjahén ájetagén dár
gón wati tapar o téshagán próshet o hurt kortant.
- 7 Tai pákén jágahesh ás kasshet o hák o por kort,
tai námay menendjáhesh palit kort.
- 8 Wati delá gwashtesh: “Áyán sarjamiá wati panjagay chérá kárén,”
gorhá Hodáay sajjahén didárjáhesh é sardhagará sótkant.
- 9 Nun hech neshánié nagendagá én,
hech nabíé pasht nakaptag o cha má kass ham nazánt ke tán kadén é paymá bit.
- 10 Oo Hodá! Tán kadén dozhmen tai sará bekanidit?
Dozhmen tán abad tai námá bad o rad bekanit?
- 11 Chiá wati dastá poshtá dáray,
wati rástén dastá?
Dastá pach kan o pa áyán gári o tabáhié byár.
- 12 Bale Hodá cha dérén zamánagán mani bádsháh ent,
ke zeminay sará nejátbakshén kára kant.
- 13 É taw atay ke daryáet gón wati zór o wáká do ném kort o
daryáay baláháni saret ápáni nyámá próshtant,
- 14 Liwyátánay† saret próshtant o gyábánay sahdáráni waráket kort.
- 15 Jó o sarchammag, taw rombént o rawán kortant,
modámigén kawr, taw hoshk kortant.
- 16 Róch taig ent o shap ham tai máh o róch taw barjáh dáshtagant.
- 17 É taw atay ke zeminay hand o simsaret gisshtëtant,
garmág o zemestánay addh kanók taw ay.
- 18 Oo Hodáwand! Yátá bekap ke dozhmen che paymá maskará kanant o názántén mardom tai námá che paymá bad o rada gwashant.

* 74:4 74:4 Bayrak, bezán parcham. † 74:14 74:14 Liwyátán mazanén ápi rastaré butag.

- 19 Wati kapótá rastaráni warák makan o setam distagén kawmay zendá tán abad mashamósh.
- 20 Wati bastagén ahdá bedár, chiá ke é sardhagáray taháren jágah cha zolm o zóray kodóh o kodámá porr ant.
- 21 Mayl ke pádmálén mardom gón roswái pad bekenzant, setam distag o hájatmand tai námá satá bekanátant.
- 22 Oo Hodá! Jáh jan o wati hakkay démpániá bekan, yátá bekap ke názánt sajjahén róchá che paymá tai sará kandant.
- 23 Wati dozhmenáni kukkárán mashamósh, dozhmenáni shóreshá ke modám borzád ent.

75

Hodá ádel ent

Pa sázger o washáwázáni sálará. "Barbád makanay" tarzay sará. Asápáy Zabur. Sawté.

- 1 Oo Hodá! Tai shográ gerén, tai shográ gerén ke tai nám nazzik ent o mardom tai ajabén káráni habará kanant.
- 2 Taw gwashay: "Wati gisshéntagén wahdá pa ensáp dádrasia kanán.
- 3 Hamá wahdá ke zemin o áiy sajjahén nendóka larzant, é man án ke áiy pádagán mohra dárán. Ósht...
- 4 Gón porkebrán gwashán: 'Pahr ma-bandét,' o gón badkárán: 'Wati kánthán borz makanét.
- 5 Wati kánthán enkadar borz makanét o pa kebr o gorunáki habar makanét.' "
- 6 Chiá ke sarperázi na cha ródarátká kayt, na cha rónendá o na cha gyábáná.
- 7 É Hodá ent ke dádrasia kant, yakkéá éra jant o yakkéá sarborza kant.
- 8 Chiá ke Hodáay dastá jámé, cha porjóshén sharáb o tahlagá porr ent.
- Sharábá réchit o zeminay sajjahén badkár áia tán goddhi trampá warant.
- 9 Bale man modám Hodáay káráni habará kanán,

* 76:2 76:2 Shalim hamá Urshalim ent.

Ákubay Hodáyá názénán.

- 10 "Sajjahén badkáráni kánthána próshán, bale pahrézkaráni kánth borz dáragá bant."

76

Hodáay démá kay óshtáta kant?

Pa sázger o washáwázáni sálará. Gón simmi sázán. Asápáy zabur. Sawté.

- 1 Yahudiahá Hodá zánag o pajjáh áragá bit, Esráilá áiy nám mazan ent.
- 2 Áiy tambu Shalimá* ent o menendjáh, Sahyuná.
- 3 Ásgwáren tiri hamódá próshant, zahm o espar ham, ke jangi seláh ant. Ósht...
- 4 Taw drapshán ay o shawkat o shánét, cha á kóhestagán zébáter ent ke shekárá porr ant.
- 5 Delér áwár janag butant, wati goddhi wábá ant, cha jangáwarán yakké ham namant ke dasté besorénit.
- 6 Oo Ákubay Hodá! Cha tai neherrán, áyáni arrábah o aspán sar pa markay wábá dát.
- 7 Taw bákamál ay, wahdé hezhma geray, kay tai démá óshtáta kant?
- 8-9 Taw cha ásmáná dádrasia kanay o wahdé taw, oo Hodá, pa dadrasia jáha janay ke zeminay sajjahén setam distagénán neját bedayay, zemin cha torsá chopp o bétawára bit. Ósht...
- 10 Pa ensáná tai hezhm ham tai satáay sawaba bit o pasht kaptagén hezhmá taw wati lánká banday.
- 11 Gón wati Hodáwandén Hodáyá kawl bekanét o wati zobánay sará bóshtét, á sajjahén ke kerr o gwarán ant pa hamáia théki byárant ke bákamál ent.
- 12 Á hákemáni gorurána próshit, zeminay bádsháh cha áia torsant.

77

Sakki o sóriáni róchá Hodáay shóházá án

Pa sázger o washáwázáni sálará. Pa Jedutuná. Asápáy Zabur.

- 1 Man Hodáyá tawára kanán o pa komaká hamáia gwánka janán,
mani peryát gón Hodáyá ent o á mani áwázá gósha dárit.
- 2 Sakki o sóriáni róchá Hodáwunday shóházá án,
sajjahén shapá mani dast dráj ant o dama nabarán,
mani arwáh árám geraga nalóthit.
- 3 Hodáyá yáta kanán o nálán,
pegra kanán o delprósha bán. Ósht...
- 4 Taw mani chammán nazz bayagá naylay,
paréshán án o habar korta nakanán.
- 5 Gwastagén wahdáni hayalá kapán,
kwahnén ahd o bárigáni.
- 6 Shapán, wati sawtay hayalá kapán,
delá báz pegriga bán o arwáhon josta kant:
- 7 "Hodáwand tán abad yalaha kant o padá hechbar mehrabána nabit?
- 8 Áiay mehr pa modámi halás butag o kawli pa sajjahén naslán zawál?
- 9 Hodáyá mehrabán bayag shamoshtag o wati rahmati hezhmay tahá band kortag?" Ósht...
- 10 Mana gwashán: "É shakk o sawál maná ranjénant.
Nun hamá ahd o bárigáni hayalá kapán
ke borzén arshay Hodáyá wati rástén dast shahártag."
- 11 Oo Hodáwand! Tai kárán yáta kanán,
tai ajabén kárán ke taw péshi zamánagán kortagant.
- 12 Tai kortagén sajjahén káráni bárawá pegra kanán o
tai kerdáni hayalá bán.
- 13 Oo Hodá! Tai ráh pák ent.
Kojám hodá may Hodáay paymá mazan buta kant?
- 14 Taw hamá Hodá ay ke ajabén kára kant.
Taw wati zór o wák sajjahén kawmáni nyámá pésh dáshtag,
- 15 gón wati básk o kodratá wati kawm rakkéntag,
Ákub o Issopay chokk. Ósht...
- 16 Ápán tará dist, oo Hodá!
Ápán tará dist o larzetant,
johlánki drahága laggetant.
- 17 Jambarán ápa gwart o
ásmánán grandet,
tai grókay tir har némagá retkant.
- 18 Tai granday tawár danz o gwátáni tahá at,
tai nurá jahán róshná kort,

zemin larzet o jombet.

- 19 Tai ráh cha mazanén daryáyá gwast o tai keshk cha mazanén ápán,
bale tai pádáni pad gendag nabutant.
- 20 Taw wati kawm Mussá o Hárunay dastá rahshóni kort,
ramagéay paymá.

78

Eshíá pa démi naslán sar kanét
Asápay shayri gwashtánk.

- 1 Oo mani kawm! Mani sóján gósh dár o delgóshá gón mani habarán kan.
- 2 Wati dapá pa batal pacha kanán o kwahnén chách o chistánán maná kanán,
- 3 hamá ke má eshкотag o zántagant,
hamá ke may pirénán mára gwashtagant.
- 4 Eshán cha áyáni chokk o nomásagán chéra nadayén,
gón áyókén naslá Hodáwunday porshawkatén káráni kessahá kárén,
Hodáwunday zór o twánay kessahá kárén o
áiy kortagén ajabén mójezaháni kessahá.
- 5 Áiá gwáhié pa Ákubá esht,
Sharyati pa Esráilá áwort o may pet o piréni parmán dátant
ke eshán wati chokk o nomásagán sarpad bekanét,
- 6 tán démi naslesh bezánant o hamá chokk ham ke angat pedá nabu-tagant,
wati wahdá, gón wati chokk o nomásagán esháni kessahá bekanant,
- 7 tánke á ham Hodáay sará tawkal bekanant o
Hodáay kárán mashamóshant o áiy hokmán bemannant.
- 8 Wati pet o pirénáni paymá mabant,
sarkash o mánmayátk*
ke delesh gón Hodáyá nabast o arwáhesh gón Hodáyá wapádár naat.
- 9 Epráimi, harchont ke gón kamánán se-lahband atant,
bale janagay róchá tatkant.
- 10 Áyán Hodáay ahd nadásht o wati delá shawresh kort ke "áiy Sharyatay sará zenda nagwázénén."
- 11 Áiy kortagén káresh shamoshtant,
hamá ajabén kár ke áyáná péshi dáshtagant,

* 78:8 78:8 Mánmayátk, bezán hamá ke kassá namannit.

- 12 Hamá kár ke áyáni pet o pirénáni démá kortagatanti,
Mesray molká, Zohánay gyábáná.
- 13 Áyáni démay daryái ném kort o ái gwázéant,
ápi, doén démán chó diwálá mekk kort.
- 14 Róchá, gón jambará rashónii dátant o shapá gón ásay rozhná.
- 15 Gyábáná, talári tal kortant o áyaná, johlén zeréay kesásá ápi dát.
- 16 Cha talárán chammagi bótkant o ápi chó kawrá rombént.
- 17 Bale áyan angat géshter gonáh kort o gyábáná borzén arshay Hodáay helápá shóreshesh kort.
- 18 Hodáesh pa zánt hamá warákáni sará chakkáset
ke áyáni delá lóthet.
- 19 Hodáay helápá habaresh kort o gwashtesh:
“Hodá é gyábáná parzónagé pach korta kant?”
- 20 Talári wa jat o cha áiá áp rawán but o kawr sar rechán butant,
bale wati mardomán nán ham dáta kant?
Yá pa wati kawmá gósht ham tayár korta kant?”
- 21 Hodáyá ke eshкот, zahr gept,
ásé pa Ákubá róki kort,
hezhmi pa Esráilá chest but.
- 22 Chiá ke Hodáay sará imánesh néstat o báwaresch nabut ke Hodáesha rakkénit.
- 23 Ásmáni pa pach bayagá parmán dát o arshay darwázagi pach kortant.
- 24 Manni[†] pa áyan chó hawrá gwart ke bwarant,
ásmáni gandomi bakshátant.
- 25 Mardomán préshtagi warák wárt,
pa áyan békesás waráki rawán dát.
- 26 Cha ásmáná ródarátki gwáti sar dát o gón wati zórá jonubi gwáti chest kort.
- 27 Danzáni paymá pa áyan góshti gwárent,
daryáay rékáni kesásá, báli morg,
- 28 áyáni ordgáhá[‡] éri áwortant,
áyáni gedánáni kerr o gwarán.
- 29 Wárt o séresh kort,
pa har chizzá ke áyan hers at, dátanti.
- 30 Bale cha áyáni hersay purah bayagá pésar,
ke warákesh angat dapá at,
- 31 Hodáay hezhm áyáni sará pád átk,
áyáni zórmandterén mardomi koshtant o
Esráilay warnái jökkéntant.
- 32 É sajjahén káresh distant o angat ham gonáhesha kort o áiay ajabén káráni sará báwaresha nakort.
- 33 Gorhá áyáni róchi pa náhudagi halás kortant o sál pa tors.
- 34 Hodáyá ke áyáni koshag bendát kort,
nun áiay shóházá dar kaptant.
Dém pa Hodáyá per tarretant o pa setk o del Hodáay shóházá butant.
- 35 Hayálá kaptant ke Hodá áyáni talár ent,
hamá borzén arshay Hodá, áyáni posht o panáh.
- 36 Bale gón wati dapá, gón áiá charp-zobániesha kort o gón zobáná drógesha bast.
- 37 Delesh gón áiá wapádár naat o áiay bastagén ahdesch nadásht.
- 38 Bale á angat mehrabán at o áyáni gonáhi bakshetant o sajjahéni nakoshtant.
Rand pa randá wati hezhmia dásht o wati sajjahén gazabi darshána nakort.
- 39 Zánti ke é hákién ensán ant,
rawókén gwáté ke padá pera natarrit.
- 40 Gyábáná chinchok randá cha Hodáyá sarkashesh kort,
ódá áesh gamig kort.
- 41 Rand pa randá Hodáesh chakkáset,
Esráilay pákénesch ázár dát.
- 42 Áiay dastay zóresh yát nakort
ke á róchá chón cha dozhmenáni dastá rakkéntanti,
- 43 hamá wahdá ke Mesrá wati neshánii paddar kortant o Zohánay gyábáná ajabén kári kort.
- 44 Áyáni kawri hóná badal kortant
ke kassá cha wati jóán áp wárta nakort.
- 45 Makeskáni rombi áyáni nyámá ráh dátant ke makeskesh bwarant o pogoláni romb, ke barbádesch bekanant.
- 46 Áyáni keshári madagáná dátant o bar o samar kathagán[§] wártant.
- 47 Áyáni anguri gón tróngalá zawál kortant o enjiráni drachk, gón hár o tuppánán.
- 48 Áyáni ramagi pa tróngal koshtant o dalwat, pa grand o grók.
- 49 Wati sóchókéni kahr o gazabi áyáni sará rawán dát,
kahr o gazab o azáb,
gár o gomsár kanókéni préshtagáni thólie áyáni sará.

[†] 78:24 78:24 Mann hamá ásmáni nagan ent ke Mussáay zamánagé, Hodáyá pa Bani Esráilán hamá wahdá ér áwort ke á barr o gyábánán sápará atant. [‡] 78:28 78:28 Ordgáh hamá jágah ent ke mardom pa kasánén wahdeá gedána bandant o nendant. [§] 78:46 78:46 Kathag madagay záté.

- 50 Ráhi pa wati hezhmá rást o tachk kort, cha marká narakkéntanti, wabáyáni dapái dátant.
- 51 Mesray sajjahén awali chokki jatant, Mesray* gedánnendáni mardánagiay awali bar o samar.
- 52 Bale wati mardomi ramagay paymá sar dát o bortant, pasáni dhwálá gyábánán rashónii kortant.
- 53 Ái pa émeni rahshóni kortant ke mator-sant bale áyáni dozhmen daryáyá mán patátant.
- 54 Gorhá ái wati pákén zeminá sar kortant, hamá kóhestagéen molká ke gón wati rástén dastá geptagati.
- 55 Áyáni démá kawmi cha ódá dar kortant, kawmáni zemini áyáni mirás kortant o Esráilay kabilahi gedánáni tahá jahmenend kortant.
- 56 Bale angat áyán borzén arshay Hodá chakkáset o áiy helápá sarkashiesha kort, áiy hokmeshá namannet.
- 57 Wati pirénáni paymá rástén ráhesh yalaha dát o béwapá butant, chó sost o nábáwarén kamáná mantant.
- 58 Borzén jáhán bothánahesha bast o Hodáesh zahra baráént, botesha jórhént o Hodáesh hasaddiga kort.
- 59 Hodáyá ke dist,† sakk hezhm gept o Esráili sarjamiá yalah kort.
- 60 Wati Shiluhay menendjáhi yalah kort, hamá tambu ke Hodá ódá mardománi nyámá jahmenend at.
- 61 Wati zór o wákay pétií‡ bandig kanáént, wati shán o shawkatay neshánii dozhmenáni dastá dát.
- 62 Wati kawmi zahmáni dapá dát, wati mirásay sará sakk hezhmnák but.
- 63 Warnáén bachak, ásá wártant o jenek, pa suri názenkán sar nabutant.
- 64 Dini péshwá zahmáni dapá kaptant o janózámán gréta nakort.
- 65 Nun Hodáyá anchosh jáh jat ke yakké cha wábá bosta kant, chó ke jangólé cha sharábay béhóshíá jáh bejant.
- 66 Wati dozhmeni jat o poshtá kenzént o abadi roswáieá dawr dátant.
- 67 Bale Issopay tambui nádóst kort o Epráimay kabilahi nazort,
- 68 Yahudáay kabilahi gechén kort,

- Sahyunay kóh, ke dóst ati.
- 69 Wati pákén jágahi, borzagáni paymá addh kort, zemina paymá namirán, jórhi kort.
- 70 Wati hezmatkárén Dáudi gechén kort o cha pasáni gwáshá dari kort,
- 71 cha edá o rand, ái cha mésháni shopánkiá dar kort o wati kawm, Ákubay shopánki kort, wati mirás, Esráilay.
- 72 Dáudá gón sápen delé áyáni shopánki kort o gón honarmandén dasté áyáni rahshón but.

79

Bandigáni peryát tará sar bátant
Asápáy Zabur.

- 1 Oo Hodá! Kawmán tai mirás geptag, tai pákén parasteshgáheshe palit kortag o Urshalim, wayrán.
- 2 Tai hezmatkáráni jóneshe báli morgáni warák kortag o tai wapádaráni jánay gósht, rastaráni.
- 3 Esháni hónesh ápay paymá sajjahén Urshalimá rétkag, kass namant ke mordagán kabr bekant.
- 4 Hamsáhegáni démá roswá butagéen o kash o kerray mardománi kalági.
- 5 Oo Hodáwánd! Tán kadén zahra bay? Tán abad? Tán kadén tai hasadd ásay paymá róka bit?
- 6 Wati gazabá hamá kawmáni sará begwár ke tará pajjáha nayárant o hamá molkáni sará ke tai námá nagerant,
- 7 ke Ákubesh wártag o ér bortag o áiy molkesh wayrán kortag.
- 8 Gwastagéen nasláni gonáhán may sará maladdh, tai rahmat zutt may sará byáyátant ke sakk wár o bazzag én.
- 9 Oo may rakkénókén Hodá! Mára madat kan, wati námay shán o shawkatay sawabá, pa wati námaygi márá berakkén o may gonáhán bebaksh.
- 10 Chiá darkawm begwashant: “Esháni Hodá kojá ent?” May chammání démá kawm begendátant ke

* 78:51 78:51 Asligén Ebráni syáhaga gwashit “Hámáy”, ke pa Mesrá eshárahé. † 78:59 78:59 Asligén Ebráni nebeshtánka gwashit: “Hodáyá ke eshkot...” ‡ 78:61 78:61 Péti, bezán sanduk.

taw wati hezmatkáráni retkagén
hónáni bérá geray.

¹¹ Bandigáni áh o peryát pa taw sar bátant,
gón wati báskay zórá
hamáyán berakkén ke koshag bayagá
ant.

¹² Oo Hodáwand! Cha may hamsáhegán
hamá sobakkiáni bérá
hapt sari géshter beger ke tai sháná
kortagantesh.

¹³ Gorhá má, tai kawm
ke tai charágáhay pas én,
tán abad tai shográ gerén,
nasláni nasl tará satá kanén.

80

Hodá! Wasshán bay

Pa sázger o washáwázáni sálará, “Su-
sanáni” tarzay sará. Gwáhié. Asápay
Zabur.

¹ Oo Esráilay shopánk! Gósh dár,
taw ke shopánkéay paymá Issopay
ramagay rahshón ay.

Oo Hodá! Taw ke karrubiáni* nyámá
bádsáhi tahtá neshtagay,
wati nurá tálán kan.

² Epráim, Benyámin o Manassiy démá,
wati wák o tágatá borz kan o
pa may rakkénagá byá.

³ Oo Hodá! Gón má wasshán bay
wati démá gón má rozhná kan
ke má berakkén.

⁴ Oo Hodáwand! Lashkaráni Hodá! Tán
kadén
hezhmay ásá wati kawmay dwáyáni
sará gwárána bay?

⁵ Taw áyáná arsay nagan o
arsáni sarréchéh jám wárent.

⁶ Taw mára hamsáhegáni démá bannám
kortag o
dozhmen mára kalága bandant.

⁷ Oo lashkaráni Hodá! Gón má wasshán
bay
wati démá gón má rozhná kan
ke má berakkén.

⁸ Taw anguray drachké cha Mesrá gwatk,
taw kawm dhanná dar kortant o é
drachk kesht.

⁹ Taw zemin pa áia práh kort,
gorhá risshagí jat o zemini porr kort.

¹⁰ Áiay sáhegá kóh póshetant o
áiy sháharhán, rostagén gazz.

¹¹ Sháharhi tán Myánzerá† o
tháli tán Parátay kawrá sar butant.

¹² Gorhá taw chiá áiy pall próshnt o dawr
dát
ke hamok rahgwaz áiy barán
bechent?

¹³ Jangali hukkk áia éra barant o
dashtay jánwaria warant o séra
kanant.

¹⁴ Oo lashkaráni Hodá! May gwará per
tarr,
cha ásmáná delgósh kan o bechár,
é anguray delgóshá bedár,

¹⁵ hamé anguray ke tai rástén dastá kesht,
hamé chokkay ke taw pa wat ródént o
zórmand kort.

¹⁶ Dozhmenán angur goddhet o ásá dawr
dát,
é gón tai hakkaléa gár o gomsár
bátant.

¹⁷ Tai dast hamá marday sará bát ke tai
rástén némagá ent,
hamá ensánay chokkay sará ke taw pa
wat ródént o zórmand kort.

¹⁸ Gorhá má wati démá cha taw
natarrénén,
mára zend bebaksh ke tai námá
begerén.

¹⁹ Oo Hodáwand, lashkaráni Hodá! Gón
má wasshán bay,
wati démá gón má rozhná kan
ke má berakkén.

81

*Drégatá mani kawmá mani habar gósh
bedáshtén*

Pa sázger o washáwázáni sálará. “Gitti-
tay”* tarzay sará. Asápay Zabur.

¹ Hodáyá pa shádehi benázénét ke may zór
o wák ent,
pa Ákubay Hodáyá shádmániay
kukkárá borz kanét.

² Sáz o tamburagá bongéj kanét,
washtawáren chang o soródán.

³ Máhay nóká, gwarándhay kánthay†
tawará borz kanét,
máhay chárdahá, may pákén aidá.

⁴ É pa Esráilá hokmé,
rahbandé cha Ákubay Hodáyá
némagá.

⁵ Wahdé Mesray helápá dar átk
kánuné pa Issopá eshti.

* **80:1** 80:1 Karrubi, ásmáni mahluké ke bánzolesh per o Hodáay tahtay chapp o chágérdá ant. † **80:11** 80:11 Myánzer, hamá daryá ent ke Yurop o Áprikáay nyámá ent. Engréziá: Mediterranean Sea. * **81:** 81:0 Báwar esh ent ke Gittit muzikay yak gálé. † **81:3** 81:3 Gwarándhay kánth Esráiliáni kerrá sázé.

Man eshкот, náashnéén zobánéá
 gwasht:
 6 "Báron cha áiy kópagá dur kort o
 dast cha gránén saptá ázát kortant."
 7 Taw sakkíáni sáhatán peryát kort o man
 tará rakként,
 man grandán andém atán o tará pas-
 saw dát,
 Meribáay ápáni kerrá tará
 chakkáseton. Ósht...

8 Oo mani kawm! Beshkon ke tará dháha
 dayán,
 Oo Esráil! Drégatá[‡] taw mani habar
 gósh bedáshtén.
 9 Shomay nyámá darámadén hodáé mabát
 o
 bigánagén hodáéay démá sará jahl
 makanét.
 10 Man Hodáwand án, tai Hodá
 ke tará cha Mesrá dar kort o áwort.
 Wati dapá sarjamá pach kan,
 ke man porria kanán.

11 "Bale kawmá mani habar gósh nadásht
 o
 Esráil mani parmánbardár nabut.
 12 Gorhá man á yalah dátant ke wati
 sengén deláni randgiriá bekanant,
 wati jenday ráh o hayáláni.
 13 Drégatá mani kawmá mani habar gósh
 bedáshtén o
 Esráil, mani ráhá beshotén.
 14 Á wahdá man damáná áyáni dozhmen
 prósh dátagatant o
 mani dast áyáni dozhmenáni helápá
 chest butagat.
 15 Hamá ke cha Hodáwandá naprata
 kanant, dotal o sarjahl butagatant,
 tán abad anchosh butagat.
 16 Bale tará gehterén gandomay warákon
 dátagat o
 tará cha talára dar kortagén bénagá
 séron kortagat."

82

Nezóráni hakká begerét
 Asápay Zabur.

1 Hodá, wati Hodái bárgáhá barjam ent,
 "hodáyáni" diwáná dádrasia kant.
 2 Tán kadén pa náensápi shawra borret?
 Tán kadén badkáráni badalá bét?
 Ósht...

3 Nezór o chórhawáni dadrasíá bekanét o
 garib o setam distagénáni hakká
 begerét.

4 Nézgár o hájatmandán berakkénét o
 cha badkáráni dastá ázát kanét.
 5 É "hodá" heccha nazánant o sarpada
 nabant,
 taháriá sargardán ant o
 zeminay sajjahén bonyád larzagá ant.
 6 Gwashton: "Shomá 'hodá' ét o
 shomá sajjahén, borzén arshay
 Hodáay chokk ét,
 7 Bale mardománi paymá merét o
 shahzádagáni paymá sarshakuna
 bét."
 8 Oo Hodá! Jáh jan o zeminay dadrasíá
 bekan,
 ke sajjahén kawm tai mirás ant.

83

Oo Hodáwand! Bétawár mabay
 Asápay Zabur. Sawté.

1 Oo Hodá! Bétawár mabay,
 hámósh mabay o hoshká manend, oo
 Hodá!
 2 Bechár ke tai dozhmen che paymá gor-
 rant o
 cha taw naprat kanókáni sar chón
 borz ent.
 3 Tai kawmay helápá pa cháláki pandala
 sázant o
 tai gránkadrénáni helápá shawr o
 saláha kanant.
 4 Gwashtant: "Byáét gár o gomsáresha
 kanén ke kawmé mamánant o
 Esráilay nám pa yatéá ham pasht
 makapit."
 5 Pa hamdeli shawresh kortag o
 tai helápá ahdé bastagesh.
 6 Edumi o Esmáili,
 Muábi o Hágári,
 7 Gébáli, Ammuni o Amáliki,
 Pílisti o Suray nendók,
 8 Áshuri ham gón áyán hamráh ant o
 pa Lutay chokkán báské butagant.
 Ósht...

9 Gón áyán hamá paymá bekan ke taw gón
 Midyáná kort,
 gón Siserá o Yábiná, Kishunay kawray
 kerrá,
 10 ke Endórá tabáh butant o
 zeminay kad o samát* butant.
 11 Esháni sardarán Óréb o Zehébay paymá
 kan,
 shahzádagánesh Zebah o Zal-
 munnáay dhawlá,

[‡] 81:8 81:8 Drégatá, bezán drécha, Pársiá "káshki".
 "khád" o Pársiá "kud" gwashaga bit.

* 83:10 83:10 Kad o samát, sakan o ólém ent ke Orduá

12 ke gwashtagatesh: “Byáét Hodáay charágáhán pa zóra gerén.”

13 Oo mani Hodá! Eshán danzéay paymá bál day,
chó ke palaré, gwátay démá.

14 Anchosh ke ás jangalá sóchit o kóhán mána dárit,

15 gón wati tuppánán randáesh kap o gón syahgwátán betorsénesh,

16 démáesh cha sharmá syáh kan tánke tai námay shóházá bebant, oo Hodáwand!

17 Sharmsár bát o abadi torséá kapátant, roswá bát o bemerátant.

18 Bell bezánant ke tai nám Hodáwand ent o
tahná taw, oo borzén arshay Hodá, sajjahén zeminay sará hákemía kanay.

84

Pa Hodáwanday parasteshgáhá hodónák án

Pa sázger o washáwázáni sálará. Kórahay chokkáni Zabur. “Gittitay”^{*} tarzay sará.

1 Oo lashkaráni Hodá!

Tai bárgáh chón dóstnák ent.

2 Mani arwáh pa Hodáwanday parasteshgáhay péshjáhán[†] shaydá o hodók ent,

mani del o ján pa zendagén Hodáyá pa shádehi kukkára kant.

3 Jengolá ham pa wat lógé dar gétk o pistáná[‡] pa wat kodóhé ke wati chureg o chippokán ódá beródénit,

tai korbánjáhay nazziká, oo lashkaráni Hodáwand,

mani bádsháh o mani Hodá!

4 Bahtáwar ant hamá ke tai bárgáhá jahmenend ant,

á modám tará názénant. Ósht...

5 Chón bahtáwar ant hamá ke wák o zóresh cha tai némagá ent o delesh tai ráhán ent.

6 Á, wahdé cha arsáni[§] daragá gwazant, daragá cha chammagá porra kanant o tákchandhay mósomay hawr ham áiá rahmata póshénit.

7 Cha mohrá mohrter bayána bant tán hamá wahdá ke Sahyuná Hodáay bárgáhá rasant.

8 Oo Hodáwand, lashkaráni Hodá! Mani dwáyá gósh dár,
beshkon, oo Ákubay Hodá! Ósht...

9 May bádsháhá^{*} delgósh kan, oo Hodá! Wati rógen per moshtagéná[†] delgósh kan.

10 Tai bárgáhay yak róché gehter ent cha dega jágahéay hazárán róchá,

cha badkáráni tambuáni tahá áramén zendéay gwázenagá maná wati Hodáay dargáhay dapá óshtag dóstera bit,

11 ke Hodáwandén Hodá róch o esparé, Hodáwand rahmata bakshit o ezzata dant.

Hamá ke zendá pa bémayária gwázénit, Hodáwand sharrén chizzán cha áiá dura nadárit.

12 Oo lashkaráni Hodáwand!

Bahtáwar ent hamá ke tai sará tawkala kant.

85

Zenda nabakshay?

Pa sázger o washáwázáni sálará. Kórahay chokkáni Zabur.

1 Oo Hodáwand! Taw wati sardhagára rahmat gwart o

Ákubay gwastagén washbahti padá per tarrént.

2 Taw wati kawmay mayárbári bakshetant o

áyáni sajjahén gonáh póshetant. Ósht...

3 Taw wati sajjahén gazab poshtá dawr dát o wati hezhmay ás tóst.

4 Oo may rakkénókén Hodá!

Gón má wasshán bay o wati gazabá cha má dur kan.

5 Tán abad gón má zahra bay?

Wati hezhmá nasláni nasl drájkassha kanay?

6 Mára padá zenda nabakshay ke tai kawm tai bárgáhá shádehi bekant?

7 Oo Hodáwand! Wati mehrá mára pésh bedár o mára hamá rakkénagá bebaksh ke cha tai némagá ent.

8 Har chizz ke Hodáwandén Hodá gwashit, man gósha dárán,

^{*} 84: 84:0 Báwar esh ent ke Gittit muzikay yak gálé.

[†] 84:2 84:2 Péshjáh, bezán péshgáh, lógay chárdiwál,

sahn. [‡] 84:3 84:3 Pistán kasánén morgé. [§] 84:6 84:6 Bakáay darag, ke manái arsáni darag ent. ^{*} 84:9 84:9

Asligén Ebráni syáhaga gwashit: may espará. [†] 84:9 84:9 Rógen per moshag, bezán pa bádsháhíá gechéen kanag.

- chiá ke pa wati kawmá émeniay kawlá dant, pa wati wapádárán, chó mabit ke á ahmakiay ráh per betarrant.
- ⁹ Bëshakk, á mardománi rakkénag nazzik ent ke cha Hodáyá torsant, tán may sardhagár cha áiy shán o shawkatá sarréch bebit.
- ¹⁰ Mehr o wapádári yakdegará dochára kapant, adl o émeni yakdomiá chokkant.
- ¹¹ Wapádári cha zemíná rodit o adl cha ásmáná jahláda chárit.
- ¹² Bëshakk, Hodáwand nékén chizza bakshít o may zemín áiy bar o samará kárit.
- ¹³ Adl, áiy demá rawána bit o pa áiy gámán ráhé tayára kant.

86

Wati móleday chokká berakkén
Dáuday dwá.

- ¹ Oo Hodáwand! Wati delgóshá gón man kan o maná passaw day, ke garib o mohtájé án.
- ² Mani zenday negahpániá bekan ke tai dóstdár án, wati hezmatkára berakkén ke tai sará tawkala kant.
- ³ Oo Hodáwand! Mani sará rahm kan, ke sajjahén róchá tará tawára kanán.
- ⁴ Wati hezmatkáráy delá shádmán kan, oo Hodáwand, ke man cha taw dwá lóthán.
- ⁵ Taw, oo Hodáwand, nék o bakshendah ay o pa áyán cha mehrá sarréch ay ke gón taw peryáta kanant.
- ⁶ Oo Hodáwand! Mani dwáyán gósh dár, mani peryát o zárián delgósh kan.
- ⁷ Sakkiáni róchá tará tawára kanán, ke taw passawa dayay.
- ⁸ Oo Hodáwand! Hodáyáni nyámá kass tai mattha nabít o tai kár bématth ant.
- ⁹ Oo Hodáwand! Tai jórh kortagén sajjahén kawma káyant o tará sojdaha kanant, tai námá shán o shawkata dayant,
- ¹⁰ ke taw mazan ay o ajabén kára kanay, Hodá tahná taw ay.
- ¹¹ Wati ráhá maná sój day, oo Hodáwand, ke tai rástén ráhá berawán, mani delá sarjamá gón wat kan ke cha tai námá betorsán.

- ¹² Gón tamánén delé tai shográ gerán, oo Hodáwand, mani Hodá! Tai námá tán abad shán o shawkata dayán
- ¹³ ke pa man tai mehr sakk mazan ent, taw maná cha johlánkián rakkéntag, cha mordagáni jaháná.
- ¹⁴ Oo Hodá! Gorunákén mardom mani helápá pád átkagant, zórakáni rombé mani koshagay johdá ent o tará hech mána nayárit.
- ¹⁵ Bale taw, oo Hodáwand, rahm kanók o mehrabánén Hodáé ay, hezhm geragá déra kanay o mehr o wapáyá sarréch ay.
- ¹⁶ Demá gón man tarrén o mani sará rahm kan, wati hezmatkára zór o wák bebaksh o wati móleday chokká berakkén.
- ¹⁷ Maná wati rahmatáni neshánié beday, tán hamá ke gón man naprat kanant begendant o sharmendag bebant, chiá ke taw, oo Hodáwand, maná madat kortag o tasallá dátay.

87

É hamódá pédá butag
Kórahay chokkáni Zabur. Sawté.

- ¹ Áiá, pákén kóhay sará shahré addh kort.
- ² Hodáwandá Sahyunay darwázag dóster ant cha á dega hamá sajjahén jágahán ke Ákub jahmenend butag.
- ³ Oo Hodáay shahr!
Tai bárawá porshánén habar kanaga bit. Ósht...
- ⁴ Mesr* o Bábelá gón hamáyán hór hesába káran ke maná zánant, Pilistiah o Surá ham, gón Kushá hawár.
Esháni bárawá gwashaga bit: "É hamódá pédá butag".
- ⁵ Sahyunay bárawá gwashaga bit:
"É mardom o á mardom hamódá pédá butagant, borzén arshay Hodá wat Urshalimá pádára kant."
- ⁶ Wahdé Hodáwand kawmáni námán nebeshtaha kant, nebisit:
"É hamódá pédá butag." Ósht...
- ⁷ Á ke sawta janant o á ke nácha kanant gwashant:
"Mani sajjahén chammag cha taw bo-jant."

* 87:4 87:4 Asligén Ebráni syáhaga gwashit: Raháb. Raháb pa Mesrá pernámé.

88

Róch o shap gón taw zári o peryáta kanán

Pa sázger o washáwázáni sálará. Kórahay chokkáni Zabur. "Mahallat Léhanutay"* tarzay sará. Hémán Ezráhiay shayri gwashtánk. Sawté.

1 Oo Hodáwand! Oo mani rakkénókén Hodá!

Shap o róch tai bárgáhá dwá o peryáta kanán.

2 Mani dwá tai dargáhá berasát, wati delgóshá gón mani peryáta kan.

3 Man janjálán kaptagán o

mani zend pa marká sar butag.

4 Hamá mardománi paymá hesáb áraga bán ke johlén kandhá kaptagant, anchén mardoméay paymá ke nezór o nátwán ent.

5 Mordagáni nyámá yalah dayag butagán, chó mordagéa ke kabrá waptag,

ke taw áyáni yátá naay o cha tai dastá jetá butagant.

6 Taw maná johlterén kandhá dawr dátag, tahárén johlánkiá.

7 Tai hezhm mani chakká kaptag, chawlán maná mán patátag. Ósht...

8 Taw mani hamdelén sangat cha man dur bortag o

cha man bészár kortagant.

Bandig án o dar átka nakanán.

9 Mani chamm cha andóhá tahár butagant.

Oo Hodáwand! Har róch tará tawára kanán o

dastán pa taw shahárán.

10 Wati ajabén kárán mordagán pésha dáray?

Mordagáni arwáh páda káyant o tará satá kanant? Ósht...

11 Mordag, kabrá tai mehray járá janant? Mordagáni jaháná tai wapádáriay kessahána kárant?

12 Taháriá, tai ajabén kár zánaga bant o tai adl, shamóshkáriay molká?

13 Bale man gón taw madatay peryátá kanán, oo Hodáwand!

Hamok sabáhá mani dwá tai bárgáhá rasant.

14 Oo Hodáwand! Chiá maná yalaha kanay o wati démá cha man chéra dayay?

15 Cha warnáíá sakkíáni ámách o markig butagán,
tai torsá maná bazzag kortag o béwas án.

16 Tai hezhmá maná patátag o tai bimmá maná prósttag.

17 Sajjahén róchá ápay paymá maná chapp o chágerdá geptag o cha har némagá angerresh kortag.

18 Taw mani dóst o sangat cha man dur kortagant,
tahná tahári ent ke mani hamráh ent.

89

Adl o ensáp tai bádsháhiay bonyád ant Itán Ezráhiay shayri gwashtánk.

1 Hodáwanday mehrá tán abada názénán cha wati zobáná, tai wapádáriay kessahé sajjahén naslán sara kanán.

2 Man gwasht ke "tai mehr abadmán ent o taw wati wapádári, ásmáná káhem kortag."

3 Taw gwasht: "Man gón wati gechén kortagéná ahd o karáre bastag o gón wati hezmatkár Dáudá pa sawgend kawl kortag:

4 "Tai padréchá tán abad barjáha dárán o tai bádsháhi tahtá nasláni nasl.'" Ósht...

5 Oo Hodáwand! Ásmán tai ajabén kárán satá kant o

tai wapádáriá ham, pákénáni diwáná.

6 Ásmánán, kay Hodáwanay matth buta kant?

Choshén ásmáni hastié hast ke Hodáwanday paymá bebit?

7 Hodáay tors ásmáni hastiáni nyámá sakk mazan ent,

á cha wati chapp o chágerday sajjahénán bákamálter ent.

8 Oo Hodáwand, lashkaráni Hodá! Kay tai matth o darwar ent?

Taw zórak ay, oo Hodáwand, o tai wapádáriá tará chapp o chágerd kortag.

9 Taw mastén daryáyáni sará hokmrániá kanay o

wahdé chawlesh chesta bant, taw éresha káray.

10 Taw Raháb,* láchéay paymá drosht o gón wati zórmandén báská wati dozhmen sheng o sháng kortant.

11 Ásmán taig ent o zemín ham, jahán o eshiay tahá harché ke hast, taw addh kortagant.

* 88: 88:0 "Mahallat Léhanutay" máná "paréshániay dard" ent. Báwar esh ent ke edá muzikay yak gálé.

* 89:10

89:10 Raháb, bezán gorunák. Edá balkén pa Shaytáni tágatán gwashag butag.

- 12 Shomál o jonub taw addh kortagant,
Tábór o Hermónay kóh tai námá
názénant.
- 13 Tai básk zórmand ent,
tai dast zóráwar ent,
tai rástén dast porwák o sóbén ent.
- 14 Adl o ensáp tai bádsháhiay bonyád ant,
mehr o wapádári tai hamráhiá, démá
gám janán ant.
- 15 Oo Hodáwand! Bahtáwar hamá ant ke
shádmániay áwázá pajjáha kárant o
tai bárgáhay nurá gáma janant.
- 16 Sajjahén róchá tai námay sará shádehia
kanant o
cha tai adlá sarboland ant.
- 17 Chiá ke taw áyáni shán o shawkat o
áyáni wák o twán ay o
cha wati mehrabániá may kánthá†
sarperáza kanay.
- 18 Béschakk, may bádsháh Hodáwandayg
ent,
may espar Esráilay pákénay.
- 19 Yak wahdé taw, shobéná gón wati
wapádárán habar kort o gwasht:
“Man jangólé madat kortag o
cha kawmá gechéni warnáe ródéntag.
- 20 Man wati hezmatkár, Dáud shóház ko-
rtag o
wati pákén, rógen per moshtag‡.
- 21 Mani dast gón áiá góna bit o
mani báski zórmanda kant.
- 22 Dozhmen cha áiá bája nabárt o
badkár áiy sará sarzóra nabit.
- 23 Dozhmenán áiy démá prósha dayán o
harkas ke cha áiá naprata kant,
prósháni.
- 24 Mani mehr o wapádári áiy hamráha
bant o
mani námá áiy kánth borzáda bit.
- 25 Áiy dastá tán daryáyá sara kanán,
áiy rástén dastá tán kawrán.
- 26 Á maná gwánka jant o gwashit: ‘Taw
mani Pet ay,
mani Hodá o mani nejátay talár.’
- 27 Man ham áiá wati masterén chokka
kanán,
jahánay masterén bádsháh.
- 28 Wati mehrá tán abad áiy hamráha
kanán o
gón áiá wati ahd o karará mohra
dárán.
- 29 Tán abad áiy naslá barjáha dárán,
áiy bádsháhiay tahtá ásmánay
rócháni hesábá.
- 30 “Agan áiy chokk mani Sharyatá yalah
bekanant o
- mani parmánáni randgiriá makanant,
31 agan mani rahbandán bepróshant o
mani hokmán mamannant,
32 áyáni gonáhán pa latth sezá dayán,
náparmánián pa hayzarán,
33 bale áiy dóst dáragá bassa nakanán o
gón áiá wati kortagén kawlá
napróshán.
- 34 Wati ahd o paymáná napróshán o
á habar ke cha mani dapá dar átkag,
badalia nakanán.
- 35 Man yak baré mán wati pákiá sawgendé
wártag o
gón Dáudá dróga nabandán,
36 ke áiy nasl tán abad barjáha mánit o
áiy taht mani dargáhá chó róchá
abadi ent,
37 chó máhá tán abad barjáha mánit,
ke jambaráni tahá tachk o rástén
sháhedé.” Ósht...
- 38 Bale annun taw wati dém tarréntag o á
yalah kortag,
wati rógen per moshtagénay sará
hezhm geptagay.
- 39 Taw gón wati hezmatkára bastagén ahd
o paymán pad tarréntag o
áiy táj, zeminá dawr dátag.
- 40 Taw áiy sajjahén diwál karótkagant o
áiy mohrén kalát próshtag.
- 41 Harkas ke cha ráhá gwazit, áiá pol o
páncha§ kant o
á wati hamsáhegáni kalági jórh butag.
- 42 Taw áiy dozhmenáni rástén dast
borzád bortag o
sajjahén badwáh shádmán kortagant.
- 43 Taw áiy zahm konth kortag o
jangá madat nadátag.
- 44 Taw áiy shán bortag o
taht hákán dawr dátag.
- 45 Taw áiy warnáiy róch kamm korta-
gant o
sharmendagiay kabáhéá póshéntag.
Ósht...
- 46 Tán kadén, oo Hodáwand! Watá tán
abad chéra dayay?
Tán kadén tai hezhm chó ásá róka
mánit?
- 47 Hayalá bekap ke mani omray róch chón
kamm ant,
taw bani ádam nákarén chizzé jórh
kortag.
- 48 Kojám ensán ent ke marka nagendit,
kay cha kabray zóra rakketa kant?
Ósht...

† 89:17 89:17 Kánthay máná edá zór o kodrat ent. ‡ 89:20 Rógen per moshag, bezán pa bádsháhiá gechéni kanag. § 89:41 89:41 Pol o pánch, bezán zórbord, lotth o pol.

- 49 Oo Hodáwand! Tai á pésarigén mehr kojá ent
ke taw gón Dáudá sawgend wárt o kawl kort.
- 50 Oo Hodáwand! Hayálá bekap ke tai hezmatkárá chón shegána janant, sajjahén kawmáni rishkandán wati delá dárán.
- 51 Oo Hodáwand! Tai dozhmenán mani sará rishkand kortag o hamok gámá tai rógen per mosh-tagénesch kalág bastag.

52 Hodáwandá tán abad satá bát.
Anchosh bát. Ámin.

Zaburay cháromi ketáb

90

Zabur 90—106

May dastáni kárán barkat beday

Hodáay hezmatkár Mussáay dwá.

- 1 Oo Hodáwand! Nasláni nasl taw may menendjáh butagay.
- 2 Cha kóhání pédá bayag o zemín o jahánay addh kanagá pésar, cha azal tán abad, Hodá taw ay.
- 3 Ensáná padá hákay chérá baray o gwashay: “Oo ensánay chokk! Háká per tarr.”
- 4 Hazár sál pa taw chó gwastagén yak róchéá ent, chó shapi yak páséá.
- 5 Ensán wábé o chó háréá áiá rópána kanay.
Sohbá chó káhá tázag ent,
- 6 sabáhá rodít o sabzit,
bégháá gimmorit o hoshka tarrit.
- 7 Cha tai hezhmá halása bén,
cha tai gazabá paréshán.
- 8 Taw may mayár wati demá kortagant o chérén gonáh wati bárgáhay rozhnáá.
- 9 May sajjahén zend tai hezhmay chérá gwazít o wati sálán pa nálagá halása kanén.
- 10 May omray róch haptád sál ant yá hashtád sál, agan sakk zreng bebén,
bale sharterén róch ham zahmat o janjálá porr ant,
sakk zutta gwazant o má bála kanén.
- 11 Kay tai hezhmay trondiá zánt?
tai gazab delá torsa nádénit.
- 12 Gorhá mará é zántá beday ke may róchání hesáb kamm ent,
tán may del aglmand bebít.

- 13 Dém pa má per tarr, oo Hodáwand! Tán kadén chosha bit?
Wati hezmatkáráni sará rahm kan.
- 14 Bámgwáhán, mará gón wati mehrá sér kan,
tánke sajjahén omrá sawt bejanén o shádehi bekanén.
- 15 Haminchok róchá ke taw mará azáb dátag,
haminchok róchá mará shádmán kan,
haminchok sálá ke sakkíán dochár butagén.
- 16 Tai kár tai hezmatkáráni demá paddar bátant o tai mazani pa áyáni óbádagán.

- 17 May Hodáwandén Hodáay mehrabáni pa má sar bát,
may dastáni kárán barkat beday,
haw, may dastáni kárán barkat beday.

91

Hodáay bánzoláni chérá panáha bay

- 1 Hamá ke borzén arshay Hodáay panágháhá neshtag,
zórakay sáhegá áráma gipt.
- 2 Hodáwanday bárawá gwashán: “Hamá mani panáh o kalát ent,
mani Hodá, ke hamáiy sará tawkala kanán.”
- 3 Deljam án ke hamá tará cha shekáriáni dámá rakkénit,
cha koshókén wabáyán.
- 4 Á tará gón wati poth o bálán póshénit o áiy bánzoláni chérá panáha bay,
áiy wapádári espar o diwálé.
- 5 Cha shapay bimmá natorsay,
na cha á tirá ke róchá srapit,
- 6 na cha wabáyá ke taháriá gardit,
na cha á hawpá* ke némróchá béránia kárit.
- 7 Hazárán kas tai kerrá kapit,
dahán hazár tai rástén némagá,
bale é tabáhi tai nazziká átka nakanant.
- 8 Tahná gón wati chammáni shánk dayagá badkáráni sezáyána genday.
- 9 Agan Hodáyá wati panáh bekanay,
borzén arshay Hodáyá wati menendjáh,
- 10 hech kazá tai sará sarzóra nabit o hech baláh tai gedánay nazziká nayayt.
- 11 Tai bárawá préshtagán hokma kant ke tai sajjahén ráhán, tai negahpániá bekanant.
- 12 Á tará wati dastáni delá dárant

* 91:6 91:6 Hawp, bezán wabá.

- tán tai pád dhókéá malaggit.
 13 Shér o márání sará garday,
 rostagén shér o syahmárání saragán
 pádmála kanay.
 14 Hodáwanda gwashit: “Á ke maná dósta
 dârit
 áiá nejáta dayán o
 hamáiy posht o panáha bán ke mani
 námá zánt.
 15 Á maná tawára kant o man passawia
 dayán,
 sakkíán áiy hamráha bán,
 áiá nejáta dayán o ezzata bakshán.
 16 Áiá cha drájén omré sérápa kanán o
 Hodá nejátá áiá pésha dárán.”

92

Tai wapádáriay járá janán
 Pa Shabbatay róchá sawté. Zaburé.

- 1 Hodáay satá kanag wassh ent o
 tai námay nâzenag, oo borzén arshay
 Hodá!
 2 Bámgwáhán tai mehr o
 shapán tai wapádáriay járay janag,
 3 gón dahtárén tamburag o
 changay zémelá wassh ent.
 4 Chiá ke taw, oo Hodáwand,
 maná gón wati dastay kárán shádmán
 kortag,
 tai tawspíá shádmániay sawta janán.
 5 Oo Hodáwand! Tai kár chón mazan ant
 o
 pegr chenkadár johlánk.
 6 Ahmaka nazánt o
 nádán sarpada nabit.
 7 Harchont ke badkár chó káhá berodant o
 radkár besabzant,
 bale tán abad tabáha bant.
 8 Bale taw, oo Hodáwand,
 tán abad borzén arshay Hodá ay.
 9 Tai dozhmen, oo Hodáwand,
 allam gár o gomsára bant o
 sajjahén badkár, sheng o sháng.
 10 Bale taw mani kánth, wahshién gókay
 kánthay paymá borz dáshtag o
 maná sapáén rógen per moshtag*.
 11 Mani chammán dozhmenáni shekast
 distag o
 góshán badkárání sarshakuniay
 habar eshkotag.
 12 Pahrézkár macchay paymá sabzant o
 Lobnánay gazzáni paymá rodant.
 13 Á Hodáwanday lógá keshag butagant o
 may Hodáay bárgáhá sabzant.
 14-15 Piriá ham bar o samara dayant o

pa é járay janagá tarr o tázag o sabza
 mánant
 ke Hodáwand rást o ádel ent,
 hamá mani talár ent o
 áiá hech náensápi o badi mán nést.

93

Tai bádsháhi pák o palgár ent

- 1 Hodáwand bádsháhia kant
 áiá watá pa shán o shawkat árastag,
 Hodáwand porshawkat ent o
 zór o wáká selahband.
 Donyá mohr óshtátag o nalarzit.
 2 Tai bádsháhi taht cha azal barjam ent o
 taw cha azal hastay.
 3 Oo Hodáwand! Kawr chest butagant,
 kawrán wati tawár chest kortag,
 kawrán wati gorragáni tawár chest
 kortag.
 4 Hodáwand cha mazanén ápáni tawárán,
 cha daryáay chawláni proshagá
 mazanshánter ent, borzén arshá.
 5 Oo Hodáwand! Tai hokm modám
 barjáha mánant,
 tai bádsháhi pák o palgár ent,
 modám, tán abad.

94

Pád á, oo zeminay dádras!

- 1 Oo bérgirén Hodá! Oo Hodáwand!
 Oo bérgirén Hodá! Wati shán o
 shawkatá záher kan.
 2 Pád á, oo zeminay dádras!
 Porkebr o gorunákán sezá day.
 3 Tán kadén, oo Hodáwand!
 Badkár tán kadén sarzór bebant?
 4 É mardom gón kebré habara kanant,
 sajjahén badkár batháka janant.
 5 Oo Hodáwand! Tai kawmá pádmála
 kanant o
 tai mirásá ázára dayant.
 6 Janózham o darámadán koshant o
 chórhawán haláka kanant.
 7 Gwashant: “Hodáwanda nagendit,
 Ákubay Hodá sarpada nabit”.
 8 Sarpad bét, oo kawmay názántán!
 Oo jáhelán! Kadén ákela bét?
 9 Á ke góshi addh kortag, naeshkont?
 O á ke chammi addh kortag, nagendit?
 10 Á kas ke kawmán sezá dant, áyán adaba
 nakant?
 O á kas ke bani ádamá zánta bakshit,
 watá zánt o zánagi nést?

* 92:10 92:10 Rógen per moshag, bezán pa bádsháhiá gechén kanag.

- 11 Hodáwand ensánay sajjahén pegrána zánt,
á zánt ke náhudag o nákar ant.
- 12 Oo Hodáwand! Bahtáwar ent hamá ke taw áia adaba kanay,
hamá ke taw gón wati Sharyatá áia tálima dayay.
- 13 Taw áia cha sakkén róchána rakkénay,
tán hamá wahdá ke pa badkárán kallé kóchag bebit.
- 14 Chiá ke Hodáwand wati kawmá yalaha nakant o
wati mirásá dawra nadant.
- 15 Dádrasi padá pa ensápa bit,
sajjahén nékdel ensápay randgiriá kanant.
- 16 Kay ent ke pa manigi badkáráni demá pád byayt?
Kay ent ke pa manigi radkáráni demá bóshítit?
- 17 Agan Hodáwand mani komak mabutén,
man zutt markay bétawariá bokketa-gatán.
- 18 Wahdé gwashton: “Mani pád thagalagá ent”,
tai mehrá, oo Hodáwand, maná cha kapagá dásht.
- 19 Wahdé sargardána bán,
tai dátagén delbaddhi maná shádmána kant.
- 20 Choshén béensápén hákemé gón taw yak o tepák buta kant ke
gón wati hokm o kánunán náensápia kárit?
- 21 Áyáni thóli pahrézkáráni helápá ham-dast o hamkára bant o
bégonáhán markay sezá dayant.
- 22 Bale Hodáwand mani kalát ent,
mani Hodá, mani talár, mani panáhgáh.
- 23 Hodá, áyáni gonáhán hamáyáni jenday sará pera tarrénit o
áyán, áyáni jenday badén káráni tahá gár o gomsára kant.
Haw, may Hodáwand áyán gár o tabáha kant.

95

Má Hodáay dastay ramag én

- 1 Byáét Hodáwandá pa galé názénén,
pa wati nejátay talára pa shádehi kukkára kanén.
- 2 Byáét pa shogrgozári áiy bárgáhá rawén,
pa shádehi kukkára kanén, sawta janén o áia satá kanén,

- 3 ke Hodáwand mazanshánén Hodá ent,
sajjahén “hodáyáni” masterén bádsháh.
- 4 Zemínay johli hamáiy dastá ant o kóháni borzi ham hamáiyg ant.
- 5 Daryá Hodáwandayg ent ke wat addhi kortag,
hoshkén zemin ham hamáiy dastán jórh kortag.
- 6 Byáét, sará jahla kanén o sojdaha kanén,
wati addh kanókén Hodáwanday bárgáhá kóndhána kapén,
- 7 ke hamá may Hodá ent o má, áiy charágáhay mardom,
hamáiy dastay ramag én.

Drégatá shomá maróchi áiy tawár beshkotén:

- 8 “Wati delán á paymá sarkash makanét ke kawmá Meribáyá kort,
ke kawmá á róchi Massahay gyábáná kort.*
- 9 Ódá shomay pirénán maná chakkáset o ázmáesh kort,
bell ke mani kortagén káresh dista-gatant.
- 10 Tán chel sálá cha á naslá bézár atán,
gwashton: ‘É anchén mardom ant ke delesh gomráh ant o
mani ráhána nazánant,’
- 11 Gorhá man wati hezhmá sawgend wárt ke
‘é hechbar mani ásudagiá sara na-bant.’ ”

96

Ásmán shádehi bekanát o zemin gal bát

- 1 Pa Hodáwandá nókén sawté bejanét.
Oo sajjahén zemin! Hodáwandá benázén.
- 2 Hodáwandá benázénét, áiy námá satá kanét.
Har róch hamá nejátay járá bejanét ke cha áiy némagá ent.
- 3 Kawmáni nyámá áiy shán o shawkatay járá bejanét,
sajjahén kawmáni nyámá áiy ajabén káráni.
- 4 Ke Hodáwand mazan ent o satáyáni láhek,
cha sajjahén “hodáyán” bákamálter ent.
- 5 Kawmáni sajjahén “hodá” náudagén bot ant,
bale Hodáwandá ásmán jórh kortant.

* 95:8 95:8 Bechár Dargwaz 17:7. Meribá o Massah yakkén jághay nám ant ke Esráilián ódá Hodáay náshogri kort.

6 Ezzat o shán hamáiy chapp o chágerdá ent o kodrat o zébái áiy pákén bárgáhá.

7 Oo kawmáni kabilahán! Hodáwandá benázénét, Hodáwanday shán o kodratá benázénét.

8 Hodáwanday námay mazaniá benázénét, korbánig byáret o áiy bárgáhá byáét.

9 Cha Hodáwanday pákiay zébáiá, áiy démá kóndhán bekapét.

Oo sajjahén zemin! Áiy dargáhá belarz.

10 Sajjahén kawmáni nyámá begwashét: “Hodáwand bádsháh ent.”

Jahán pa mohkami jórh kanag butag o nasorit,

á, kawmáni dadrasiá pa ensápa kant.

11 Ásmán shádehi bekanát o zemin gal bát, daryá o harché ke daryáyá mán, pa borztawári áiy benázénátant.

12 Dhagár o harché ke dhagará hast gal bátant, jangalay sajjahén drachk pa shádmáni áiy benázénátant.

13 Hodáwandá benázénátant, chiá ke á kayt, haw, pa zeminay dadrasiá kayt. Jahánay dadrasiá pa adl o ensápa kant o kawmáni dadrasiá wati rásti o tachkiay hesábá.

97

Nur pa pahrézkárán keshaga bit

1 Hodáwand bádsháhia kant, zemin shádehi bekanát o sajjahén tayábi sardhagár gal bátant.

2 Jambar o tahári áiy chapp o chágerdá ant, adl o onsáp, áiy tahtay bonhesht o bonyád ant.

3 Ás áiy démá rawán ent o cha har némagá áiy dozhmenán éra bárt.

4 Áiy grók jaháná róshná kant, zemina gendit o larzit.

5 Hodáwanday démá kóh chó mómá ápa bant, sajjahén jahánay Hodáwanday démá.

6 Ásmán áiy adlay járá janant o sajjahén kawm áiy shán o shawkatá gendant.

7 Á sajjahén mardom sharmsára bant ke bot sojdaha kanant, hamá ke náhudagén botáni poshtá pahra bandant.

Oo sajjahén “hodáyán”! Áiyá sojdah kanét.

8 Sahyun eshkont o shádehia kant o

Yahudiahay jenek* gal ant cha tai dadrasiá, oo Hodáwand!

9 Chiá ke á Hodádóstáni zenday negahpán ent o

Hodáwand, sajjahén zeminay sará mazanshán ay, taw sajjahén “hodáyáni” sará báládest ay.

10 Shomá ke Hodáwandá dósta dárét,

cha badiá naprat kanét, chiá ke á Hodádóstáni zenday negahpán ent o

áyán cha badkáráni dastá nejáta dant.

11 Nur pa pahrézkárán keshaga bit o shádehi pa nékdelán.

12 Oo pahrézkárán! Hodáwanday bárgáhá shádehi kanét o áiy pákén námá benázénét.

98

Nókén sawté bejanét
Zaburé.

1 Pa Hodáwandá nókén sawté bejanét, ke ajabén kári kortag, áiy rástén dast o pákén báská sób o pérózi katthetag.

2 Hodáwandá hamá neját pésh dáshtag ke cha áiy némagá ent, wati adli kawmáni chammán paddar kortag.

3 Áiy pa Esráilay óbádagán wati mehr o wapa yátá áwortag, zeminay sajjahén goddhi hadd o sim-sarán, may Hodáay dátagén neját distag.

4 Oo sajjahén zemin! Pa Hodáwandá shádmániay kukkára borz kan. Kukkar kanét, pa shádehi sawt bejanét, benázénét.

5 Pa Hodáwandá chang o sáz bejanét, gón sázá sawt bejanét.

6 Gón sorná o gwarándhay kánthá* bádsháhén Hodáwanday bárgáhá, shádehiay kukkára chest kanét.

7 Daryá o daryáay tahay sajjahén chizz grandátant, jahán o áiy sajjahén jahmenend.

8 Kawr cháp bejanátant o

* 97:8 97:8 Yahudiahay jenek, bezán Yahudiahay sajjahén mardom. kerrá sázé.

* 98:6 98:6 Gwarándhay kánth Esráiliáni

kóh pa shádmáni sawt,
 9 Hodáwanday bárgáhá sawt bejanátant,
 ke á pa zeminay dadrasiá kayt.
 Á jaháná pa adl dádrasia kant o
 kawmán pa ensáp.

99

*Áiay pádáni padagay démá sojdah
 kanét*

- 1 Hodáwand bádsháhia kant,
 kawm belarzátant,
 á, karrubiáni* nyamá, wati bádsháhi tahtá
 neshtag,
 zemin belarzát.
 2 Sahyuná, Hodáwand mazan ent,
 borzén arshay Hodá, sajjahén
 kawmáni sará hákem.
 3 Tai mazan o bákamálén námá satá
 kanátant,
 Hodáwand pák ent.
 4 Bádsháh zóráwar ent, adli dósta bit.
 Taw, oo Hodá, ensáp barjáh dáshtag,
 sajjahén Esráilá† taw hamá kár kortag
 ke
 pa adl o ensáp ant.
 5 May Hodáwandén Hodáyá shán o
 shawkat dayét o
 áiay pádáni padagay démá parastesh
 kanét,
 ke á pák ent.
 6 Mussá o Hárún cha hamáiy dini
 péshwáyán atant o
 Samuíl ham cha hamáyán at ke
 Hodáwanday námesh gept.
 Hodáwandesh tawár kort o
 áiá passaw dátant.
 7 Cha jambaray sotuná gón áyán habari
 kort o
 áyán ham hamá hokm o Sharyat
 barjáh dásht ke dátagati.
 8 Oo Hodáwand, may Hodá! Taw á passaw
 dátant,
 taw pa Esráilá pahell kanókén Hodáé atay,
 harchont ke áyáni gonáháni sezáet
 ham dát.
 9 May Hodáwandén Hodáyá shán o
 shawkat bedayét,
 áiay pákén kóhay sará áiá parastesh
 kanét,
 ke Hodáwand, may Hodá pák ent.

100

*Hodáwand nék ent o mehri abadmán
 Shogrgozáriay Zaburé.*

* 99:1 99:1 Karrubi, ásmáni mahluké ke bánzolesh per o Hodáay tahtay chapp o chágerdá ant. † 99:4 99:4
 Asligén syáhaga gwashit: Ákubá.

- 1 Oo sajjahén zemin!
 Pa Hodáwandá shádmániay gwánká
 bejan.
 2 Hodáwandá pa shádehi parastesh kanét,
 gón shádmániay sawtán áiay bárgáhá
 byáét.
 3 Bezánét ke Hodáwand, Hodá ent,
 hamáii mára addh kortag o má
 hamáiyg én,
 má áiay kawm, áiay charágáhay ra-
 mag én.
 4 Áiay darwázagán gón shogrgozári be-
 potrét o
 áiay bárgáhá gón satá o saná.
 Áiay shográ begerét o áiay námá
 besárháét,
 5 ke Hodáwand nék ent o mehri abadmán,
 áiay wapádári nasláni nasl barjáha
 mánit.

**Pákén Enjil cha
Mattáay
kalamá
Mattáay Enjilay pajjár**

É ketábay nebisók, Mattá, ke domi námi Láwi at, Hodáwandén Issáay moridé at. Á, Bani Esráilié at o cha Issáay moridiá pésar máliátgiré at (Mattá 9:9). Mattá, é ketábay tahá cha pésarigén paygambaráni péshgóián pésha dárit ke Issá Hodáay dém dátagén rakkénók ent.

Mattá pésha dárit ke Issá Ebráhém o Dáuday padréch ent, bale tahná Yahudiáni rakkénók naent, sajjahén donyáay rakkénók ent. Wati wánókán sarpada kant ke Issá Masihay pant o tálimáni sarhá “ásmáni bádsháhi” ent o sajjahén mardom, agan cha wati gonáhán pashómán bebant o Issáay sará báwar bekanant, ásmáni bádsháhi rawant o abadmánén zenday wáhonda bant.

Mattáay Enjilay tahá, Issáay pédaesh o kasáni, pa Hodái kárán áiy tayár bayag, Jalilay damagá áiy tálim o kár, áiy dém pa Urshalimá rawag, Urshalimá áiy dátagén sar o sój, salib kasshag o cha marká rand zendag bayag pa red o band nebisag butagant.

*Issáay béh o bonyád
(Luká 3:23-38)*

¹ Issá Masih, Dáud o Ebráhémay chokk ent. Áiy béh o bonyáday daptar é dhawlá ent:

² Esháke Ebráhém, Ákubé Eshák, Yahudá o áiy brát ke Ákubay chokk atant. ³ Páres o Zárahe Yahudá ke áyáni mátay nám Támár at. Hesruné Páres, Arame Hesrun, ⁴ Aminádábe Aram, Nahshune Aminádáb, Salmune Nahshun, ⁵ Buáze Salmun ke áiy mátay nám Raháb at, Óbayde Buáz ke mátay námi Rut at, Yassie Óbayd, ⁶ bádsháh Dáude Yassi.

Solaymáne Dáud, ke máti pésará Uriáay lógi butagat, ⁷ Rehobáme Solaymán, Abiáé Rehobám, Ásáé Abiá, ⁸ Yehushápáte Ásá, Yuráme Yehushápát, Ozziáé Yurám, ⁹ Yutáme Ozziá, Áháze Yutám, Hezekiáé Áház, ¹⁰ Manassie Hezekiá, Ámune Manassi, Yusiáé Ámun, ¹¹ Yekuniáé Yusiá o áiy sajjahén brát, ke é wahdá Yahudi Bábélá darándhéh* butant.

¹² Cha Bábelay darándhéhiá rand, Shiáltiále Yekuniá, Zerubábele Shiáltiál, ¹³ Abihude Zerubábel, Elyákime Abihud, Ázure Elyákim, ¹⁴ Saduke Ázur, Ákime Saduk, Elihude Ákim, ¹⁵ Eliázare Elihud, Mattáne Eliázar, Ákubé Mattán, ¹⁶ Issope Ákub ke Maryamay mard at. Cha Maryamá Issá pédá but ke Masih zánaga bit.

¹⁷ É dhawlá, cha Ebráhémá beger tán Dáudá chárdah posht o cha Dáudá beger tán Yahudiáni Bábelay darándhéhiá dega chárdah posht o cha á darándhéhiá beger tán Issá Masihá ham chárdah posht ant.

*Issá Masihay pédaesh
(Luká 1:26-38; 2:21)*

¹⁸ Issá Masihay pédaesh é dhawlá at: Issáay mát Maryam, Issopá sáng kortagat bale cha áyáni sur o árosá pésar, zántesh ke cha Hodáay Pákén Ruhá,† áiy láp porr butag. ¹⁹ Maryamay lógwájah Issop, rást o pahrézkáren mardomé at, nalótheti Maryamá bannám bekant, paméshká wati delá shawri kort: “Pa bétawári é sángá bepróshán.” ²⁰ É bárawá angat pegr kanagá at ke áiy wábá anágat‡ Hodáwanday préshtagé átk o gwashti: “Issop, oo Dáud bádsháhay chokk! Cha wati deshtár Maryamay zurag o lógá baragá mators, chiá ke áiy é lápporri, cha Pákén Ruhá rasetag. ²¹ Á, mardénchokkéay sará chellaga bit o áiy námá Issá§ bekan, chiá ke á wati kawmá cha áyáni gonáhána rakkénit.”* ²² É sajjahén kár paméshká chosh butant tán Hodáwanday hamá habar rást o paddar† bebant ke áiy cha nabiy zobáná gwashtagant: ²³ *Neshtagén janénchokkéay láp porra bit o mardénchokkéay sará chellaga bit o áiy námá Emánuil pera bandant,*‡ ke eshiay máná “Hodá gón má” ent. ²⁴ Wahdé Issop cha wábá ágáh but, hamá dhawlá ke Hodáwanday préshtagé hokm dátagat, wati jani zort, ²⁵ bale tán á wahdá ke chokk pédá nabutagat, gón áiy wapt o wábi nakort o chokkay námi Issá per bast.

2

Issáay cháragá nojumiáni áyag

¹ Bádsháh Hirudisay ahd o bárigá, wahdé Issá Yahudiahay damagay shahr Bayt-Lahemá pédá butagat, gorhá cha ródarátká* lahtén nojumi Urshalimay shahrá átk. ² Jostesh gept: “Hamá

* **1:11** 1:11 Darándhéh, bezán jaláwatan. † **1:18** 1:18 Hodáay Pákén Ruh, bezán Ruholkodos. ‡ **1:20** 1:20 Anágat, bezán yak anágat, achának, nághahán. § **1:21** 1:21 Issáay máná “Hodáwanda rakkénit” ent. * **1:21** 1:21 Rakkénag, bezán neját dayag, bacchérag. † **1:22** 1:22 Paddar, bezán záher, áshkár. ‡ **1:23** 1:23 Eshayá Nabiy Ketáb 7:14. * **2:1** 2:1 Ródarátka, bezán hamá némag ke róch dara kayt, mashrek.

nonnok ke pa Yahudiáni bádsháhiá pédá butag, kojá ent? Má áiy estár dar áyagá distag o pa áiy parastesh kanagá átkagén.”³ Cha é habaray eshkonagá, Hirudis bádsháh o Urshalimay sajjahén mardom báz paréshán o deltaparkah† butant. ⁴ Hirudisá kawmay sajjahén dini péshwá o Sharyatay zánóger‡ lóthet o jost geptant ke “Masihay pédaesh kojá bayagi ent?”⁵ Áyán passaw§ dát: “Yahudiahay shahr Bayt-Lahemá pédá bit, chiá ke nabiy ketábá nebeshtah ent:

⁶ *Oo Yahudáay shahr Bayt-Lahem!*

*Taw Yahudáay hákemáni nyámá kasterén naay,
chiá ke cha taw yak hákemén sardáré pédá bit
ke á mani kawm Bani Esráilay shopánkiá kant.’* **

⁷ Gorphá Hirudisá nojumi chérandari lóthetant o á estáray dar áyag o záher bayagay allamén wahdi jost kort ke kadén at. ⁸ Randá áiy nojumi pa hamá nonnokay shóház o dar géjagá Bayt-Lahemá ráh dátant o gwashti: “Berawét o é chokkay bárawá sharr patth o pól bekanét, wahdé shomá dar gétk, maná sahig bekanét tán man ham pa áiy parastesh kanagá berawán.”⁹ Bádsháhay habaráni eshkonagá rand, nojumi sar geptant. Ráhá rawán, hamá estár ke áyán dar áyagá distagat, áyáni demá pésh kapán, hamá jágahay sarborá óshtát, ke nonnok ódá at. ¹⁰ Cha é estáray gendagá, sakk báz washdel butant. ¹¹ Lógá shotant o nonnokesh áiy mát Maryamay gwarán dist. Gorphá kóndhán kaptant o chokkesh parastesh kort, wati tohpa o thékiáni hokkah† o zabáddánesh pach kortant o sohr o sóchoki o morresh pa nonnoká sawgát kortant. ¹² Randá, Hodáyá wábá á hozzhár kortant ke Hirudisay kerrá per matarrant. Gorphá cha dega ráhé, wati molká shotant.

Dém pa Mesrá

¹³ Nojumiáni per tarragá rand, Hodáwanday préshtagé Issopay wábá átk o gwashti: “Chokk o chokkay mátá bezur o Mesrá betach, tán man tará nagwashán hamódá bedár, chiá ke Hirudis chokkay dar géjag o kosghá delmánag ent.”¹⁴ Gorphá, Issop anchosh ke cha wábá ágáh but, chokk o chokkay máti zort o shapi shap dém pa Mesrá shot. ¹⁵ Tán Hirudisay

marká hamódá mantant tán Hodáwanday hamá habar rást o paddar bebit ke cha nabiy kawlá gwashag butagat: *Man wati bacch cha Mesrá lóthet o áwort.*‡

Hirudis chokkána kósháréint

¹⁶ Wahdé Hirudis sahig but ke nojumiáni á rad dátag, báz zahr gept. Parmáni dát: “Bayt-Lahem o kerr o gwaray do sálig yá kasterén sajjahén mardénchokk kosghabebant.” Anchosh ke áiy pésará nojumi jost o pors kortagatant, hamá hesábá é wahdi gisshént. ¹⁷ É dhawlá Eremiá Nabiy Ketábá Hodáay hamá habar sarjam butant ke gwashtagati:

¹⁸ *Cha Rámahay shahrá kukkáré góshán kapt,
mótk o zárié mazanén,
Ráhilá pa wati chokkán grét,
kaséay tasallái nazort,
chiá ke á namantagatant.*§

Dém pa Náserahá

¹⁹ Hirudisay marká rand, Mesrá Hodáwanday préshtagé Issopay wábá átk. ²⁰ Préshtagá gwasht: “Pád á, chokk o chokkay mátá bezur o padá wati molk, Esráilá per betarr. Chiá ke chokkay kosghagay shawr borrok* mortagant.”²¹ Nun Issop pád átk o chokk o chokkay máti zortant o padá Esráilay molká átk. ²² Bale wahdé sahig but ke Hirudisay jáhá áiy chokk ArkeláusYahudiahay damagay bádsháh ent, gorphá óday rawagi torset. Wahdé cha wábéá dháhé† raseti, watá pa Jalilay damagá rasénti. ²³ Ódá, Náserahay shahrá jahmenend‡ but tán é paymá nabiyáni habar rást o paddar bebit ke á Náseri gwashaga bit.

3

Pákshódókén Yahyáay kolaw (Markás 1:1-8; Luká 3:1-17)

¹ Á róchán, pákshódókén Yahyá átk o Yahudiahay gyábáná jári perrént: ² “Cha wati gonáhán pashómán bebét,* chiá ke ásmáni bádsháhi nazzik ent.”³ Yahyá hamá ent ke Eshayá nabi áiy bárawá gwashtit:

Gyábáná, kasé gwánka†jant:

*Hodáwanday ráhá tayár o,
áiy keshká rást o tachk bekanét.*‡

† 2:3 2:3 Deltaparkah, bezán paréshán, deltrakk. ‡ 2:4 2:4 Sharyatay zánóger, bezán dini álem o Mussáay

Sharyatay zántkár. § 2:5 2:5 Passaw, bezán jwáb. * 2:6 2:6 Miká Nabiy Ketáb 5:2; Samuil Dádgaray Domi

Ketáb 5:2. † 2:11 2:11 Hokkah, bezán gwandhén sanduké ke saht o zéwari mána kanant. ‡ 2:15 2:15 Hushah

Nabiy Ketáb 11:1. § 2:18 2:18 Eremiá Nabiy Ketáb 31:15. * 2:20 2:20 Shawr borrok, bezán paysalah kanók.

† 2:22 2:22 Dháh, bezán hoshdár, wáring. ‡ 2:23 2:23 Jahmenend, bezán jágahéay neshtagén mardom, sáken,

ábád. * 3:2 3:2 Pashómán bayag, bezán tawbah kanag. † 3:3 3:3 Gwánk, bezán borzén tawár. ‡ 3:3 3:3

Eshayá Nabiy Ketáb 40:3.

4 Yahyáyá cha oshteray potán gwap-tagén póshák gwará at o póstén kamarbandé lánká bastagat. Áiay ward o warák, madag o gyábáni bénag[§] at. ⁵ Urshalimay nendók, Yahudiahay sajjahén damagay mardom o Ordonay kawray kerr o gwaray jahmenend áiay kerrá shotant. ⁶ Wati gonáháni pashómániesh záher kort o Yahyáyá Ordonay kawrá pákshódi dátant.*

⁷ Wahdé Yahyáyá dist ke Parisi o Saduki rombay bázén mardom pákshódi geragá áiay kerrá áyagá ant, gón áyán gwashti: “Oo syahmárzádagán! Kayá shomará dháh dátag ke cha Hodáay áyókéñ kahr o gazabá rakketa kanét?! ⁸ Anchén kár bekanét cha áyán paddar bebit ke shomá pa del cha wati gonáhán pashómán butagét. ⁹ Cha wati delá é habará dar bekanét ke ‘má Ebráhémay nasl o óbádag én.’ Man shomará gwashán ke Hodá cha é seng o dhókán ham, pa Ebráhémá chokk o óbádag pedá korta kant. ¹⁰ Nun tapar tayár ent ke drachkán cha boná begoddhit o har drachké ke sharrén bara nayárit, goddhag o ásá dawr dayaga bit.

¹¹ “Man pa shomay gonáháni pashómániá, shomará gón ápá pákshódia dayán, bale hamá ke cha man o rand áyagi ent, cha man zórákter ent o man áiay kawsháni dast geragay láhek ham naán. Á shomará gón Pákén Ruh o ásá pákshódia dant. ¹² Áiá cha buchh o pogán dánay jetá kanag o gishshénagá, hanshóné[†] dastá ent. Jóháná[‡] pák o sallaha kant o dánán ambará éra kant, bale pog o paláran anchosha sóchit ke áseshechbara namerit.”

Issáy pákshódi

(Markás 1:9-11; Luká 3:21-22;

Yuhanná 1:31-34)

¹³ Gorhá Issá cha Jalilay damagá dar átk o Yahyáyá dastá pákshódi geragá Ordonay kawrá shot. ¹⁴ Bale Yahyáyá johd kort áiá pa é kára maylit o gwashti: “Báyad man cha tai dastá pákshódi begerán, taw chón mani gwará káay?” ¹⁵ Issáyá gwasht: “Annun bell ke anchosh bebit, é paymá Hodáay razáyá sarjama kanén.” Gorhá áiá mannet o Issái pákshódi dát. ¹⁶ Wahdé Issáyá pákshódi gept o cha ápá dar átk, anágat ásmánay dap pach but o Hodáay Pákén Ruhi dist ke kapótéay dróshomá[§] átk o áiay sará ér nesht. ¹⁷ Cha ásmáná

tawaré átk: “É mani dóstén Bacch ent o man cha eshiá báz wassh o razá án.”

4

Shaytán Issáyá chakkásit

(Markás 1:12-13; Luká 4:1-13)

¹ Randá, cha Pákén Ruhay rahshóniá Issá gyábáná shot tán Shaytán áiá bechakkásit.* ² Chel shap o chel róch róchag dáragá rand Issá shodig but. ³ Gorhá Shaytán pa áiay chakkásagá átk o gwashti: “Agan taw Hodáay Chokk ay, é sengán begwash nagan bebant.” ⁴ Issáyá passaw dát: “Pákén Ketábá nebisag butag: ‘Mardom tahná pa nán zendaga nabit, cha Hodáay zobánay sajjahén habaráni manmagá zendaga bit.’”[†]

⁵ Padá Shaytáná Issá pákén shahrá bort o mazanén parasteshgáhay diwálay borzterén jágahá óstárent o ⁶ gwashti: “Agan taw Hodáay Chokk ay gorhá watá cha edá jahlád dawr beday chiá ke nebisag butag:

Hodá pa tai negahpániá wati préshtagán
hokma kant o

á, tará wati dastáni delá dárant

tán tai pád dhókéá malaggit.”[‡]

⁷ Issáyá gwasht: “Haw, bale chosh ham nebisag butag: *Wati Hodáwandén Hodáyá machakkás o ázmáesh makan.”[§]*

⁸ Nun Shaytáná yak sakkén borzén kóhéay sará bort o cha ódá donyáay sajjahén bádsháhi o áyáni shán o shawkati pésh dáshtant o ⁹ gwashti: “Agan taw mani demá kóndhán bekapay o maná parastesh bekanay, man é sajjahénán tará dayán.” ¹⁰ Gorhá Issáyá gwasht: “Oo Shaytán! Cha mani demá gom bay! Pákén Ketábá nebisag butag: *Wati Hodáwandén Hodáyá parastesh bekan o tahná hamáiy hezmatá bekan.”^{*}* ¹¹ Nun Shaytáná á yalah dát o shot. Préshtag átkant o Issáyá hezmatesh kort.

Issáy hezmatkáriay bongéj

(Markás 1:14-15; Luká 4:14-15;

Yuhanná 4:43-45)

¹² Wahdé Issá sahi but ke Yahyá dazgir kanag butag, gorhá Jalilá shot. ¹³ Náserahay shahri yalah dát o Kaparnáhumay shahrá jahmenend but. Kaparnáhum, Jalilay mazangwarmay[†] kerrá, Zebulun o Naptáliay kabilaháni sardhagará ent. ¹⁴ Paméshká é dhawl but ke Esháyá nabíay gwashten sarjam bebit:

§ 3:4 3:4 Bénag, bezán asal. * **3:6** 3:6 É Yahyá at ke pákshódia dátí. † **3:12** 3:12 Hanshón dáré ke pa dán o pogáni jetá kanagá kármarza bit. ‡ **3:12** 3:12 Jóhán, bezán kesháráni mocch kanagay jágah. **§ 3:16** 3:16

Dróshom, bezán shekl. * **4:1** 4:1 Chakkásag, bezán ázmáesh kanag, emtehan gerag. † **4:4** 4:4 Sharyatay Domi Rahband 8:3. ‡ **4:6** 4:6 Zabur 91:11-12. **§ 4:7** 4:7 Sharyatay Domi Rahband 6:16. * **4:10** 4:10 Sharyatay Domi Rahband 6:13. † **4:13** 4:13 Mazangwarm, bezán daryáchah.

15 *Zebulun o Naptáliay sardhagár, gwar-may mazarráhay sará,*
Ordonay kawray á dastá, Jalíláy hamá hand
o hankén ke darkawm jahmenend
ant,

16 *hamá kawmá ke zendi taháriá gwastagat,*
mazanén rozhnáié dist o
hamá molk o dhagár ke ódá mark sáhél at,
óday jahmenendáni sará rozhnáia sar jat.‡

17 Cha hamá wahdá, Issáyá é kolaw o paygámay rasénag bongéj kort. Gwashti: "Cha wati gonáhán pashómán bebét chiá ke ásmáni bádsháhi nazzik ent."

Issáy awali chárén morid
(Markás 1:16-20; Luká 5:2-11;
Yuhanná 1:35-42)

18 Wahdé Issá Jalíláy mazangwarmay lambá[§] gám janagá at, do bráti dist, yakké Shamun at ke pannámi Petros at o domi áiy brát Andriás at. Áyáni kár máhigiri at o á wahdá pa máhigiriá wati dám o máhórán gwarmá chér géjagá atant. 19 Issáyá gón áyán gwasht: "Byáét, mani randgiriá bekanét o man shomará anchosha kanán ke máhig ger-agay badalá, mardománi delá shekár bekanét."* 20 Áyán hamá damáná wati dám yalah dát o áiy hamráh butant. 21 Wahdé kammé demá shot, dega do brát, Ákub o Yuhannái distant ke Zebdiay chokk atant. Bójigay[†] tahá gón wati pet Zebdiá neshtagatant o wati máhórán sráchag o sharr kanagá atant. Issáyá á lóthetant. 22 Áyán ham wati pet gón bójigá yalah dát o áiy hamráh butant.

Jalíláy damagá, Issáyay hezmatkári
(Markás 1:35-39; Luká 4:42-44)

23 Issáyá sajjahén Jalilá tarr o garda kort. Áiá kanisaháni[‡] tahá mardom dars o sabaka dát, Hodáay bádsháhiaymestága[§] rasént o mardom cha nájórhi o nádráhián jórh o dráha kortant. 24 Sajjahén Suriáhá áiy nám o tawár prosho o mardomán har dhawléen nájórh o nádráh, jenni, mergiay nádráh,* lang o mondh Issáyay kerrá áwortant o áiá dráha kortant. 25 Jalil, Dekápolis, Urshalim, Yahudiah o Ordonay kawray á dastay hand o damagáni bázén mardomé átk o Issáyay hamráh but.

‡ 4:16 4:16 Eshayá Nabiay Ketáb 9:1-2. § 4:18 4:18 Lamb, bezán dámon, kerr. * 4:19 4:19 Delay shekár kanagay maksad mardomán Hodáay ráhá árag ent. † 4:21 4:21 Bójig, bezán lánch, yakdár, kashti. ‡ 4:23 4:23 Kanisah, bezán Yahudiáni parasteshgáh. § 4:23 4:23 Mestág, bezán wasshén hál, bashárat. * 4:24 4:24 Mergi anchén nádráhié ke mardomá béhósh o kap o gajja kant. Arabi o Pársiá "sar". * 5:4 5:4 Delbaddhi, bezán tasallá, ométwári. † 5:10 5:10 Bohtám, bezán malámat, tohmat. ‡ 5:13 5:13 Abéd cha, bezán gayr cha. § 5:15 5:15 Tagár, bezán mazanén johléen darp, hiran, lagan. * 5:16 5:16 Sárháyag, bezán satá kanag.

5

Bahtáwari
(Luká 6:20-23)

1 Mardománi mazanén mocchiay gendagá rand, Issá kóhéay sará sar kapt. Wahdé borzagá nesht, morid ham áiy kerrá átkant. 2 Gorhá é dhawlá áyáni tálim dayagá lagget:

3 "Bahtáwar ant hamá ke áyáni ruh wár o bazzag ent, chiá ke ásmáni bádsháhi hamáyánig ent.

4 "Bahtáwar ant hamá ke gamig o porsig ant, chiá ke áyán tasallá o delbaddhia* rasit.

5 "Bahtáwar ant hamá ke narmdel o mehrabán ant, chiá ke zeminay mirás barók hamá bant.

6 "Bahtáwar ant hamá ke hakk o ensápay shodig o tonnig ant, chiá ke á séra bant.

7 "Bahtáwar ant hamá ke pa degarán rahma kanant, chiá ke áyáni sará ham rahm kanaga bit.

8 "Bahtáwar ant hamá ke delesh pák o sáp ent, chiá ke á Hodáyá gendant.

9 "Bahtáwar ant hamá ke sohl o émenia kárant, chiá ke á Hodáay chokk náménaga bant.

10 "Bahtáwar ant hamá ke pa Hodáay ráhay geragá bohtám[†] janag o ázár dayaga bant, chiá ke ásmáni bádsháhi hamáyánig ent.

11 "Bahtáwar ét shomá ke pa manigi mardom shomará dozhmána dayant o ázára rasénant, shomay poshtá dróga bandant o bada gwashant. 12 Gal o washdel bebét o shádehi bekanét, chiá ke ásmáná shomay mozz sakk báz ent. Péсарigén nabiáni sará ham é dhawléen ázáresh raséntag.

Wád o rozhn

13 "Shomá jahánay wád ét, bale agan wáday tám berawt, gorhá chón padá wádók buta kant? Abéd cha[‡] dur réchag o mardománi pádmáliá nun dega hech kára nayayt.

14 "Shomá jahánay nur o rozhn ét, shahré ke kóhéay sará ent, chér o andém buta nakant. 15 Hechkas rókén cherágá tagaréay[§] chérá éra nakant, cherágdánay sará éria kant tán áiy rozhnái pa lógay sajjahén mardomán berasit. 16 Hamé dhawlá shomay rozhn, mardománi demá

shahm bedant tán shomay nékén kárán begdant o shomay ásmáni Petá satá bedayant o besárháyant.*

Sharyatay sarjami

¹⁷ “Gomán makanét ke man pa Tawrát o nabiáni habaráni kár nabandag o nákar kanagá átkagán. Man pa áyáni kár nabandag o nákar kanagá nayátkagán, pa áyáni sarjam kanagá átkagán. ¹⁸ Shomára rásténa gwashán, zemín o ásmánay gár o bérán bayagá pésar, Sharyatay yak áb† o thekké ham gára nabit tán sajjahén sarjam mabant. ¹⁹ Paméshká agan kasé cha Sharyatay parmánán gwandhteréné sost begipt o kár mabandit o degarán ham anchosh dars o sabak bedant, á, ásmáni bádsháhiá kasterén zánaga bit. Bale kasé ke é parmánáni sará kára kant o degarán ham sója dant, ásmáni bádsháhiá mazan zánaga bit. ²⁰ Paméshká shomára gwashán, agan shomay pahrézkári o sharkerdi cha Parisi o Sharyatay zánógeráni kerdá géshter mabit, hechbar ásmáni bádsháhiay darwázagá poterta nakanét.

Kosht o kósh

(Luká 12:58-59)

²¹ “Shomá eshкотag ke gón péshigén mardomán gwashag butag: ‘hón o kósh makan,‡ harkas hóna kant, áiyá dádrasi§ o dáwaria bit o mayárig kanaga bit.’ ²² Bale man shomára gwashán, harkas wati brátay sará zahra gipt, á ham hakdiwánay* démá mayárig kanaga bit. Kasé ke wati brátá zá o zakat bekant, hakdiwána mayárig kanaga bit, kasé ke wati brátá ‘hódh’ o ‘ahmaka’ gwashit, tahtarunay† ásay sezáwára bit. ²³ Paméshká agan korbánjáhá, korbánig kanagay wahdá yát o tránagá kaptay ke tai brátá gón taw gelagé hastent, ²⁴ wati korbánigá hamódá korbánjáhá bell o beraw pésará gón wati brátá sohl kan, gorhá byá korbánig bekan. ²⁵ Agan kaséá gón taw arh o dáwáé hast o tará hakdiwána bárt, gorhá rasagá pésar, ráhá gón áiyá wati arhá begishén o sohl bekan. Chosh mabit káziay démá barag bebay, á tará apsaray dastá bedant o apsar tará bandjáhá bebárt o jél bekant. ²⁶ Tará rásténa gwashán, tán zarráni goddhi pai o paysahá porra nakanay, cha ódá ázáta nabay.

Zená o talák

²⁷ “Shomá eshкотag ke gwashag butag: ‘zená makan’.‡ ²⁸ Bale man shomára gwashán, agan kasé pa badchammi o del-dozzi janénéá bechárit, bezán wati delá, gón hamá janéná zenái kort. ²⁹ Paméshká agan tai rástén chamm tará dém pa gonáhá bebárt, áiyá kassh o dawr beday, chiá ke cha sarjamén jányay tahtaruná kapagá pa taw sharter hamesh ent ke tai jesmay yak band o bógé cha taw jetá bebit. ³⁰ Hamé dhawlá, agan tai rástén dast tará dém pa gonáhá bebárt, gorhá áiyá borrh o dawr beday, chiá ke cha sarjamén jányay tahtaruná rawagá pa taw sharter esh ent ke tai jesmay yak band o bógé cha taw jetá bebit.

³¹ “É ham gwashag butag: ‘agan kasé wati janá yalah bekant, gorhá báyard áiyá taláknámahé bedant’.§ ³² Bale man shomára gwashán, agan janénéá zená nakortag o mard áiyay sawn o talákán bedant, bezán áiyay zenahkáriay sawaba bit o agan kasé hamá janózámén janéná sur o sáng bekant, gorhá bezán gón áiyá zená kant.

Sawgend

³³ “Shomá é ham eshкотag ke gón péshigén mardomán gwashag butag: ‘wati sawgendá maprósh, Hodáwanday démá wati sawgendá purah bekan’.* ³⁴ Bale man shomára gwashán, hechbar sawgend mawarét, na pa ásmána, chiá ke Hodáay taht ent, ³⁵ na pa zemíná, chiá ke Hodáay pádáni chéray padag o chárchóbah ent, na pa Urshalimá chiá ke ‘Mazanén Bádsháhay’ shahr ent. ³⁶ Pa wati sará ham sawgend mawar, chiá ke saray mudáni yak thaléá syáh o espét korta nakanay. ³⁷ Paméshká ódá ke ‘haw’ gwashagi ent, begwashét ‘haw’ o ódá ke ‘enna’ gwashagi ent, begwashét ‘enna’. Cha eshiá géshter Shaytánay kár ent.

Bérgiri

³⁸ “Shomá eshкотag ke gwashag butag: ‘pa chammá chamm o pa dantáná dantán’.† ³⁹ Bale man shomára gwashán, radkárén mardománi káráni démá maóshvét, agan kaséá tai rástén gobbá‡ shahmáté jat, domiá ham áiyay némagá betarrén. ⁴⁰ Agan kasé pa tai jámagay kasshagá tará hakdiwána bebárt, wati kabáhá§ ham áiyá beday. ⁴¹ Agan kasé tará

† 5:18 5:18 Áb, bezán harp, Engrézi: letter in the alphabet. ‡ 5:21 5:21 Dargwaz 20:13. § 5:21 5:21 Dádrasi, bezán hakkén paysalah, hamá shawr ke cha dádgáhána kayt, dáwari. * 5:22 5:22 Hakdiwán, bezán ámidges, dádgáh. † 5:22 5:22 Tahtarun, bezán jahannam, dózah. ‡ 5:27 5:27 Dargwaz 20:14. § 5:31 5:31 Sharyatay Domi Rahband 24:1. * 5:33 5:33 Bechár: Láwián 19:12; Sharyatay Domi Rahband 23:21. † 5:38 5:38 Dargwaz 21:24. ‡ 5:39 5:39 Gobb, bezán gónag. § 5:40 5:40 Kabáh, bezán jobbah. * 5:41 5:41 Asligén Yunáni nebeshtánka gwashit: “milión”, bezán kesás yak o ném kilomitar.

pa zór o bigári hazár gámay* pand janaga parmáit, do hazár gám áiy hamráhiá beraw. ⁴² Kasé ke cha taw lóthit, áíá beday o agan yakké wáma lóthit, chak o pad mabay.

Masihi mehr
(Luká 6:27-36)

⁴³ “Shomá eshкотag ke gwashag butag: ‘Gón wati hamsáhegá mehr bekan† o gón wati dozhmená naprat’. ⁴⁴ Bale man shomará gwashán, gón wati dozhmená mehr bekané o pa hamáyán ke shomará ázára dayant nékén dwá belóthét, ⁴⁵ tán wati ásmáni Petay chokk bebét, chiá ke á wati róchá pa nék o badána drapshénit‡ o wati hawrá pa pahrézkar o radkárána gwárenit. ⁴⁶ Agan tahná gón hamá mardomán mehr kanét ke gón shomá mehra kanant, gorhá shomára chónén mozzé rasit? Songi§ o máliátgir* hamé dhawlá nakanant? ⁴⁷ Agan éwáká wati brátán drud o drahbát† begwashét, gorhá cha degarán shomay sharteri chi ent? Záná, á Hodánábáwarén darkawm ham anchosha nakanant? ⁴⁸ Paméshká shomá býad tamán o béayb bebét, anchosh ke shomay ásmáni Pet wati jáhá tamán o béayb ent.

6

Delsetkén hayrát

¹ “Hozzhár bét! Wati nékén kárán pa mardománi pesh dáragá makanét, chiá ke é dhawlá shomára cha ásmáni Petay némagá hech mozzé narasit. ² Wahdé chizzé hayráta kanay, gorhá jár majan o dhandhór makan. Doru o dopóstén mardom, kanisah o kuchah o damkáni tahá é dhawlá kanant tánke mardom áyan satá bekanant o besárháyant. Shomára rásténa gwashán, mozzé ke áyan rasagi at, rasetesh. ³ Wahdé hayráté cha rástén dastá dayay, chappén dast sahig mabit, ⁴ tánke tai dátágén hayrát sarpósh o chérándari bebit. Gorhá tai ásmáni Pet, ke chérénána gendit, tai mozzá dant.

Dwá
(Luká 11:2-4)

⁵ “Wahdé dwá kanét, gorhá doru o dopóstén mardománi dhawlá makanét, chiá ke áyan kanisaháni tahá o chárráháni sará óshtag o dwá kanag dósta bit, tánke mardom áyan begdant. Shomára

rásténa gwashán, mozzé ke áyan rasagi at, rasetesh. ⁶ Bale harwahd dwá kanay, wati lógá beraw, lógay dapá beband o cha wati ásmáni Petá, ke cha chammán chér o andém ent, dwá belóth, gorhá tai Pet, ke chérénána gendit, tai mozzá dant. ⁷ Wahdé dwá kanét, gorhá darkawmén mardománi dhawlá mopt o náhudagén habarán lés o pellés* makanét, á hayála kanant ke cha lés o pellésá áyani dwá gósh dáragá bit. ⁸ Áyani paymá mabét, chiá ke shomay ásmáni Pet cha lóthagá pésar wata zánt ke shomára ché garaz ent.

⁹ “Shomá é dhawlá dwá belóthét:

‘Oo may Pet, ke borzén ásmána ay!

Tai nám sharapdár bát.

¹⁰ Tai bádsháhi býayát.

Tai wáhag o erádah zeminay sará ham hamá dhawlá sarjam bát ke ásmána sarjama bit.

¹¹ May maróchigén rezk o róziga maróchi mára beday.

¹² May gonáh o radián bebaksh, anchosh ke má wati sajjahén daynkar bakshetagant.

¹³ Mára ázmáesh o chakkásá dawr maday o cha Shaytáná† berakkén.*

¹⁴ “Chiá ke agan shomá mardománi gonáh o mayarán bebakshét, gorhá shomay ásmáni Pet shomay gonáh o mayarán ham bakshit, ¹⁵ bale agan shomá mardománi gonáh o mayarán mabakshét, gorhá shomay ásmáni Pet ham shomay gonáh o mayarána nabakshit.

Róchag

¹⁶ “Wahdé róchaga bét, doru o dopóstén mardománi dhawlá wati demá tábán o gamnák makanét. Á wati ruá gimmorenant o munjá kanant tán mardom bezánant róchag ant. Shomára rásténa gwashán, mozzé ke áyan rasagi at, rasetesh. ¹⁷ Bale wahdé róchaga bay, gorhá wati dém o ruá beshód o sará charp kan, ¹⁸ tánke mardom mazánant taw róchag ay, tahná tai ásmáni Pet ke chérándém ent, hamá bezánt. Á wahdi tai ásmáni Pet ke chérándaria gendit tai mozzá dant.

Áyókén jahánay tóshag

¹⁹ “É jahána pa wat mál o maddhi§ mocch makanét, ke edá áyan warók o raméza* wárt o zanga gipt o dozzesha

† 5:43 5:43 Láwián 19:18. ‡ 5:45 5:45 Drapshénag, bezán shahm dayag, rozhná kanag, jalashkénag. § 5:46

5:46 Song, bezán máliát, thayks. * 5:46 5:46 Bani Esráilián, songi o máliátgíren mardom nádóšt atant, chiá ke á Rumay hokumatay kárendah atant o bázénéa pa wati nap o suttá cha mardomán geshén song o bája sept. † 5:47

5:47 Drud o drahbát, bezán salám o alayk. * 6:7 6:7 Lés o pellés, bezán bázén takrá. † 6:13 6:13 Yá: “cha sherrá.” ‡ 6:13 6:13 Lahtén daznebeshtá átkag: “Chiá ke abadmánén bádsháhi o wák o zór o shán o shawkat taig ant. Ámin. Anchosh bát.”

§ 6:19 6:19 Maddhi, bezán ganj o hasti. * 6:19 6:19 Warók o raméz, bezán gwandhén kerm o lulok ke dár o poccha wárt.

polant o barant. ²⁰ Pa wat ásmáná ganj o hazánag ambár bekanét ke ódá na áyán warók o raméza wárt, na zanga gipt o na dozza polant o barant. ²¹ Tai del hamá jáhá rawt ke mál hamódá ent.

Jesm o jánay cherág
(Luká 11:34-36)

²² “Chamm, jesm o jánay cherág ent. Agan tai chamm wassh o dráh ent, gorhá tai sajjahén jesm o ján rozhnága bit. ²³ Bale agan tai chamm nájórh ent, gorhá tai sajjahén jesm o ján tahára bit. Nun agan tai jesm o jánay rozhn wat tahárié bebit, gorhá á tahári chónén mazanén tahárié bit.

Ásudagén zend
(Luká 12:22-31)

²⁴ “Hechkas pa do wájahá golámi korta nakant, yá gón yakkéá dozhmenia kant o domigi dósta bit, yá gón awaligá wapádára bit o cha á degará badia kayt. Shomá yakwahd o yakjáh Hodá o zarray golámiá korta nakanét. ²⁵ Paméshká shomará gwashán ke pa wati zendá paréshán o deltaparkah mabét ke ‘ché bwarén o ché benóshén?’, na pa wati jesm o jáná ke ‘ché bepóshén?’. Zend cha waráká o jesm o ján cha pósháká géshtera nakarzit? ²⁶ Ásmánay báli morgán bechárét, na keshant o na ronan t o na ambára kanant, bale angat shomay ásmáni Pet áyán warák o róziga dant. Shomay arzesh o kimmat cha áyán géshter naent? ²⁷ Kay gón pegr o hayáláni zórá wati zenday róchán yak sáhaté ham gésht korta kant? ²⁸ Pa pocch o pósháká chiá paréshán ét? Gyábánay gol o polláni némagá delgósh kanét, chón rost o rodóma kanant. Na zahmaté kasshant o na résant o gwapant, ²⁹ bale shomará gwashán ke Solaymán bádsháhá gón wati mazanén shán o shawkatá é polláni ham-dróshomén póshák gwará nabutag. ³⁰ Oo kambáwarán! Wahdé Hodá gyábánay káhán é dhawlá zébá o brahdára kant ke maróchi hasant o bándá taruná sóchaga bant, gorhá shomará che paymá sharterén pósháká nadant?

³¹ “Paméshká paréshán o deltaparkah mabét o magwashét ke ‘bárén ché bwarén o ché benóshén?’ yá ‘ché bepóshén?’. ³² Donyáay sajjahén Hodánábáwarén mardom é chizzáni randá tachant, bale shomay ásmáni Peta zánt ke shomará é chizz pakár ant. ³³ Cha har chizzá pésar, Hodáay bádsháhi o áyay rástén ráhay shóhazá bebét, é sajjahén wat shomará

dayaga bant. ³⁴ Pa bándátigén róchá paréshán o pegrig mabét, chiá ke bándát, wati pegrá wata kant. Maróchigén janjál, pa maróchigá bass ant.†

7

Ér janag o irázgiri
(Luká 6:41-42)

¹ “Degarán ér majanét o iráz magerét, tánke shomá ér janag mabét. ² Anchosh ke shomá degarán éra janét, hamé paymá shomá ér janaga bét o gón har kayl o paymánahéa ke bedayét, gón hamá kaylá shomará dayaga bit. ³ Chiá wati brátay chammay pilláshká* genday, bale wati chammay bondhá nagenday? ⁴ Tará ke bondhé chammá ent, chón wati brátá gwashta kanay: ‘Bell ke tai chammay pilláshká dara kanán?’ ⁵ Oo dopóstén shatalkár! Pésará wati chammay bondhá dar kan, randá tai chamm pacha bit o wati brátay chammay pilláshká kassheta kanay.

Kochek o teláhén tawk

⁶ “Pák o palgáren chizzán kochekán madayét o wati morwáredán hukkáni déma maperrénét. Chó mabit ke áyán lagatmál bekanant o per betarrant o shomay jendá derr o drásh bekanant.

Lóthóká rasit
(Luká 11:9-13)

⁷ “Belóthét, shomará dayaga bit. Shóház bekanét, dara géjét. Darwázagá bethokkét, pacha bit. ⁸ Chiá ke harkas belóthit, áiá rasit. Harkas shóház bekanant, dara géjit. Harkas darwázagá bethokkit, pa áiá pacha bit. ⁹ Shomay nyámá choshén peté hast ke agan áyay chokk nán belóthit dhóké bedanti? ¹⁰ Yá agan máhig belóthit máré bedanti? ¹¹ Shomá ke radkár ét, angat wati chokkán sharrén chizzáni dayagá zánét. Gorhá shomay ásmáni Pet chenkadar shartera zánt ke wati lóthóken chokkán wasshén chizz bedant.

Teláhén parmán
(Luká 6:31)

¹² “Paméshká, har kará gón degarán hamá dhawlá néki bekanét ke lóthét á dega ham gón shomá bekanant. Sharyat o nabiáni gapp o habar hamesh ent.

Tankén darwázag
(Luká 13:24)

¹³ “Cha tankén darwázagá bepoterét. Chiá ke práhén darwázag o práhén ráh, gári o bégwáhiay némagá bárt o bázéné hamá ráhá zurit. ¹⁴ Bale tank ent á

† 6:27 6:27 Yá: “wati baláda yak dasté borzter korta kant.” ‡ 6:34 6:34 Asligén Yunáni nebeshtánka gwashit: “Har róchay janjál pa hamá róchá bass ent.” * 7:3 7:3 Pilláshk, bezán buchok, prishk, bákasay dhullay kasterén chondh.

darwázag o grán ent á ráh ke zenday némagá bárt o é ráhay rawók ham kamm ant.

Drachk o bar
(Luká 6:43-45)

¹⁵ “Cha drógén paygambarán hozzhár bebét. Á, méshay pósta gwará kanant o shomay Kerrá káyant bale cha bon o béhá derrókén gork ant. ¹⁶ Shomá cha áyáni kerdá áyán pajjáha kárét. Cha dhangarán† angur o cha dhóloká‡ enjir chenaga bit? ¹⁷ Sharrén drachk, sharrén bar o nibaga kárit o sellén drachk sellén bar o nibaga kárit. ¹⁸ Sharrén drachk, sellén bar áworta nakant o sellén drachk sharrén bar dáta nakant. ¹⁹ Drachké ke sharrén bara nayárit, goddhag o sóchaga bit. ²⁰ Paméshká áyán cha barán pajjáha kárét.

²¹ “Hamá ke maná ‘Hodáwand, Hodáwanda’ gwashant, pa á sajjahénán ásmáni bádsháhiay darwázag pacha nabit, tahná hamá shota kant ke mani ásmáni Petay wáhag o razáay sará kára kant. ²² Wahdé á rócha kayt bázéné maná gwashtit: ‘Hodáwand, oo Hodáwand! Má gón tai námá paygambari nakortag? Gón tai námá cha mardomán jenn nakasshetagant o gón tai námá bázén ajabén kár pésh nadáshtag?’ ²³ Gorhá man áyán rásténa gwashán: ‘Oo badkárán! Man hechbar shomára pajjáh nayáwortag, cha mani demá dur bebét.’

Zántkári o názánti
(Luká 6:47-49)

²⁴ “Paméshká, harkas ke mani é habarána eshkont o áyáni sará kára kant, hamá zántkár o hóshmandén mardomay paymá ent ke wati lógi taláray sará bast. ²⁵ Hawr but, hár o hirróp átk, purr o syahgwátán gón á lógá dhikk wárt, bale lóg nakapt, chiá ke áiy bonred§ taláray sará ér kanag butagat. ²⁶ Bale kasé ke mani habarán gósha dárit o áyáni sará kára nakant, hamá hódh o kámzántén mardomay dhawlá ent ke wati lógi rékáni sará bast. ²⁷ Hawr but, hár o hirróp átk, purr o syahgwátán gón á lógá dhikk wárt, lóg kapt o pahk wayrán but.”

²⁸ Wahdé Issáyá é habar halás kortant, mardománi mocchi cha áiy dars o sabakán hayrán but o bah mantant,* ²⁹ chiá ke áia Sharyatay zánógeráni paymá

darsa nadát, gón wák o ehtiáre dars o tálimia dát.

8

*Garriéay drahbakshi**
(Markás 1:40-44; Luká 5:12-14)

¹ Wahdé Issá cha kóhá ér kapt, mardománi mazanén mocchié áiy randá gón kapt. ² Yak mardé ke áia syahgarray† nádráhiá geptagat Issáyá Kerrá átk, áiy pádán kapt o gwashtit: “Oo wájah! Agan taw belóthay, maná wassh o palgár korta kanay.” ³ Issáyá dast shahárt, dasti per mosht o gwashtit: “Mana lóthán, wassh o palgár bay.” Hamá damáná mard cha syahgarray palgár but. ⁴ Gorhá Issáyá gón áia gwashtit: “Hozzhár bay! Hechkasá cha é habar o hálá sahig makan, bale beraw, watá dini péshwáyá pésh bedár o hamá korbánigá bekan ke Mussáay Sharyatá nebisag butag, tánke pa áyán gwáh o sháhedie bebít.”

Pawji apsaray báwar
(Luká 7:1-10)

⁵ Wahdé Issá Kaparnáhumay shahrá raset, yak Rumi pawji apsaré áiy Kerrá átk, mennatgiri kort o gwashtit: ⁶ “Oo wájah! Mani hezmatkárén bachak lógá lang o mondhi ent o kaptag, sakkén dard o dórán dochár ent.” ⁷ Issáyá gwashtit: “Gorhá mana káyán, áia dráha kanán.” ⁸ Pawji apsará passaw dát: “Oo wájah! Mana nakarzáen ke taw mani lógá byáay, taw tahná hokm bekan, mani hezmatkár dráha bit. ⁹ Chiá ke man ham wati masteráni hokmay chérá án o mani dastay chérá ham sepáhig hast. Agan kaséá hokm bekanán: ‘Beraw,’ á rawt o agan kaséá begwashán: ‘Byá,’ á kayt. Agan wati hezmatkára begwashán: ‘É kára bekan,’ á kant.” ¹⁰ Wahdé Issáyá é habar eshkont, hayrán but o gón wati hamráhán gwashtit: “Shomará rásténa gwashán ke Esráiliáni nyámá ham man choshén mohrén setk o báwar nadistag. ¹¹ Bezánét ke cha ródarátk o rónend‡ bázén mardoma káyant o gón Ebráhém, Eshák o Ákubá ásmáni bádsháhiay mehmániá yakkén parzónagay§ chapp o chágérdá nendant, ¹² bale é bádsháhiay chokk o óbádag* dhanná taháriá dawr dayaga bant. Ódá gréwant o dantán pa dantána droshant.” ¹³ Gorhá Issáyá gón pawji apsará gwashtit:

† **7:16** 7:16 Dhangar, bezán bébarén konthagi drachk o dár. ‡ **7:16** 7:16 Dhólok, bezán gyábáni konthagi jarré ke polli espét ant. § **7:25** 7:25 Bonred, bezán lóg yá diwáleyaw awali o johlterén red. * **7:28** 7:28 Bah mánag, bezán sakk hayrán bayag, boh bayag. * **8:** 8:0 Drahbakshi, bezán dráhi o salámatiay bakshag, Arabi o Pársiá “shafá”. † **8:2** 8:2 Asligén Yunáni zobánay labz, pa syahgarr o bag, bezán jozám o pa dega tahr tahrén garrán ham kár bandaga bit. ‡ **8:11** 8:11 Rónend, bezán hamá némag ke rócha nendit, magreb. § **8:11** 8:11 Parzónag, bezán soprah. * **8:12** 8:12 É bádsháhiay chokk o óbádag, bezán Esráiliáni chokk o chokkzátk.

“Beraw, anchosh ke tai báwar ent, gón taw hamá dhawlá bit.” Áiay hezmatkárén bachak hamá damáná dráh but.

Nádráháni drahbakshi
(Markás 1:29–34; Luká 4:38–41)

¹⁴ Wahdé Issá Petrosay lógá shot, disti Petrosay wassig tapig ent o nepáday sará waptag. ¹⁵ Issáyá wati dast áiay dastay sará per mosht, tapi sest, á pád átk o Issáy hezmat kanagá lagget.

¹⁶ Bégáhá mardomán bázén jenni ganók Issáyá kerrá áwort, áiá gón wati yakkén habará jenn cha áyán kasshetant o sajjahén nádráh wassh o dráh kortant. ¹⁷ É dhawlá Eshayá nabiyá péshgói purah o sarjam but: *áíá may nezóri dur kortant o nádráhi bortant.*[†]

Kay Issáyá morid buta kant?
(Luká 9:57–60)

¹⁸ Wahdé Issáyá wati chapp o chágerdá mardománi mocchi dist, parmán dát o gwashti: “Byáét, gwarmay domi némagá rawén.” ¹⁹ Sharyatay zánógeré áiay kerrá átk o gwashti: “Oo ostád! Har jáh ke taw raway man tai hamráha bán.” ²⁰ Issáyá gwasht: “Róbáhán hóndh o jágah hast o báli morgán kodóh o kodám, bale maná ke Ensánay Chokk[‡] án pa saray ér kanagá hech jágah nést.” ²¹ Dega yak moridéá gón áiá gwasht: “Oo wájah! Maná mókal beday pésará rawán wati petá kabra kanán.” ²² Issáyá gwasht: “Byá, mani randgiriá bekan, bell ke mordag wati mordagán wat kabr o kapona kanant.”

Tuppánay érmósh kanag
(Markás 4:36–41; Luká 8:22–25)

²³ Issá bójigá swár but, morid ham swár butant. ²⁴ Yak anágat[§] trondén tuppáné but o chawl o mawján bójig man ropt, bale Issá wáb at. ²⁵ Morid áiay kerrá átkant, ágáhesh kort o gwashtesh: “Oo Hodáwand! Mára berakkén, ke ér bokkagi* o meragi én.” ²⁶ Gón áyán gwashti: “Oo kambáwarán! Shomára chá torsit?” Randá pád átk, gwát o gwarmi hakkal dátant o tuppán pahk érmósh but. ²⁷ Á sajjahén bah mantant o gwashagá laggetant: “É chónén mardomé ke gwát o chawl ham eshiay hokmá mannant.”

Do jenni ganókay drahbakshi
(Markás 5:1–17; Luká 8:26–37)

[†] 8:17 8:17 Eshayá Nabiy Ketáb 53:4. [‡] 8:20 8:20 Dányál nabíá é pernám pa yak hastiéá kár bastag ke á cha ásmáná kayt. Issá Masihá é pernám pa wat zortag tán mardom bezánant ke á cha ásmáná átkag o hamá wádah dátagén Masih ent. [§] 8:24 8:24 Anágat, bezán yak anágat, achának, nágahán. * 8:25 8:25 Bokkag, bezán ápá ér rawag, bodhdag, gark bayag. [†] 8:28 8:28 Lahtén daznebeshtá átkag: “Gerásiáni” yá “Gergesiáni”. [‡] 8:28 8:28 Dochár kapag, bezán dhikk warag, yakdegará gendag. [§] 8:29 8:29 Edá gisshéntagén wahday máná áheratay róch ent. * 8:30 8:30 Gestá, bezán dur, yak kerr, jetá.

²⁸ Wahdé Issá mazangwarmay domi pahnátá, Gadáriáni[†] sardhagará raset, gorhá do mardom ke cha kabrestáná dar átkagat, gón áiá dochár kaptant.[‡] Áyán jenn per at o haminchok wahshi o torsnák atant ke kasséá cha á ráhá gwasta nakort. ²⁹ Áyán kukkár kort o gwasht: “Oo Hodáay Chokk! Tará gón má che kár ent? Cha gisshéntagén wahdá[§] péсар, pa may azáb dayagá átkagay?”

³⁰ Cha áyán kammé gestá* o á kashter, hukkáni ramagé charagá at. ³¹ Gorhá palitén ruhán cha Issáyá dazbandi kort o gwasht: “Agan taw mára cha é mardomán dara kanay, gorhá ráh day ke hukkáni jesmá poterén.” ³² Issáyá gón áyán gwasht: “Bepoterét!” Nun á dar átk o hukkáni jesmá potertant o hukkáni sajjahén ramag cha jompá jahlagá ér kapáná gwarmá bokket o mortant. ³³ Gorhá hukkáni shwánag shahrá tatkant o é sajjahén hál o jenni ganókáni sargwastesh pa mardomán rasént. ³⁴ Gorhá shahray sajjahén mardom Issáyá charagá átkant o gón áiá dazbandiesh kort ke áyáni sardhagará yalah bedant o berawt.

9

Lang o mondhén mardéay drahbakshi
(Markás 2:3–12; Luká 5:18–26)

¹ Issá yak bójigéá swár but, mazangwarmi gwázént o wati jenday shahrá átk. ² Hamé wahdá lahtén mardomá, tahtéay sará waptagén lang o mondhén mardé áiay kerrá áwort. Wahdé Issáyá áyáni setk o báwar dist, gón langá gwashti: “Oo mani chokk! Delá mazan kan, tai gonáh bakshag butant.” ³ Bale Sharyatay lahtén zánógerá wati delá gwasht: “É mard kopr kanagá ent.” ⁴ Issáyá áyáni delay hál o habar zántant o gwashti: “Shomá chíá wati delá palitén hayála kárét?” ⁵ Kojám habaray gwashag ásánter ent: “Tai gonáh bakshag butagant,” yá: “Pád á, beraw?” ⁶ Bale man paméshká é habar kort tán shomá bezánét, man ke Ensánay Chokk án, maná é donyáyá gonáháni pahell kanagay wák o ehtiár hast.” Padá gón á langá gwashti: “Pád á, wati taht o nepádán bezur o lógá beraw.” ⁷ Gorhá mard pád átk o lógá shot. ⁸ Wahdé mardomán é kár dist, torsetesh o Hodáesh satá kort o sárhát ke mardomi inchok wák o ehtiár dátagant.

*Mattáay lóthag**(Markás 2:14-17; Luká 5:27-32)*

⁹ Anchosh ke Issá ráhá rawagá at, Mattá námén mardé disti ke song o máliát ger-agay jághá neshtagat. Gón áia gwashti: "Byá, mani randgírái bekan!" Mattá pád átk o áia hamráh but. ¹⁰ Wahdé Issá Mattáay lógá parzónagay sará neshtagat o warák waragá at, bázén songi o máliátgir o radkár ham átk o waragá gón Issá o áia moridán hamwán butant.* ¹¹ Wahdé Parisián é dist gón Issáay moridán gwashtesh: "Chiá shomay wájah gón songi o gonahkárán waráka wát?" ¹² Issáyá eshкот o gwashti: "Dráh o sálámátén mardomán dáktar pakár naent, nádráhán dáktar pakár ent." ¹³ Bale berawét o é habaray mánáyá dar begéjét ke *man hayrát o korbánig kanagay lóthók naán, mehr o rahmatay lóthók án.*† Man pa pahrézkarán nayátkagán, gonahkáráni lóthag o gwánk janagá átkagán.

*Róchagay bárawá**(Markás 2:18-28; Luká 5:33-39)*

¹⁴ Randá, Yahyáay morid Issáyá kerrá átkant o jostesh kort: "Má o Parisi róchaga dárén, bale tai morid chiá róchaga nadárant?" ¹⁵ Issáyá passaw dát: "Sálónk ke neshtag, sur o árosay mehmán sugia bant o porsa dárant? Bale anchén wahdé kayt ke sálónk cha áyán jetá kanaga bit, hamá wahdá róchaga dárant. ¹⁶ Hechkas cha nókén godéá chondhé naderrit o kwahnén pashká pacch o pinaga najant, chiá ke nókén goday pacch nazza kayt o kwahnén pashká géshtera derrit. ¹⁷ Hamé dhawlá, kwahnén zekkání‡ tahá nókén sharáb mána nakanant, agan chosh bekanant zekka derant o sharába rechant o zekk ham zawála bant. Nókén sharábá nókén zekkán mána kanant, tán sharáb o zekk, har doén bemánant."

*Janénéay drahbakshi o jenekéay zendag kanag**(Markás 5:22-43; Luká 8:41-56)*

¹⁸ Issá angat gón áyán habar kanagá at ke parasteshgáhay yak masteré átk o áia pádán kapt o gwashti: "Mani jenek hamé annun mortag, bale byá wati dastá áia sará per mosh, á padá zendaga bit." ¹⁹ Issá pád átk o gón wati moridán áia hamráh but.

²⁰ Hamódá yak janéné hastat ke dwázdah sál at áia hón band nabutagat. Á cha poshti némagá átk o Issáyá kabáhay lambi dast jat. ²¹ Wati delá gwashagá at: "Agan Issáyá kabáhá ham dast per

bekanán, dráha bán." ²² Issáyá chakk tarrént o gwashti: "Oo mani jenek! Delá mazan kan, tai setk o báwará tará rakkéntag." Hamá damáná janén dráh but.

²³ Wahdé Issá parasteshgáhay masteray lógá raset, lahtén mótk ároki dist o bázéné porsay sará zár o puhár ham kanagá at. ²⁴ Issáyá gwasht: "Dhanná berawét, jenek namortag, bass wáb ent." Bale mardom áia habaráni sará kalág geragá atant. ²⁵ Wahdé Issáyá mardom cha lógá dhanná dar kortant, jenekay dasti gept o jenek pád átk. ²⁶ É hál, sajjahén damagá tálán but.

Do kóray drahbakshi

²⁷ Issá cha ódá ráh gept, ráhá do kór gwánk janán áia randá kapt o gwashtesh: "Oo Dáud bádsháhay chokk! Tará may sará bazzag bát." ²⁸ Anchosh ke Issá lógá raset, doén kór áia kerrá átkant. Issáyá gón áyán gwasht: "Shomará báwar ent ke man é kára korta kanán?" Áyán jwáb dát: "Haw, oo Hodáwand!" ²⁹ Gorhá Issáyá wati dast áyáni chammáni sará per mosht o gwashti: "Hamá dhawlá ke shomá báwar kortag, gón shomá hamá dhawlá bebit." ³⁰ Nun áyáni chamm rozhná butant. Issáyá kaddhan§ kort o gwashtant ke gón hechkasá é bárawá habar makanant. ³¹ Bale á shotant o Issáyá námesh sajjahén damagá tálán kort.

*Gongéay drahbakshi**(Luká 11:14-15)*

³² Áyáni rawagá rand, yak mardé Issáyá kerrá áwortesh ke jennéá geptagat o gong at. ³³ Anchosh ke Issáyá jenn kasshet, gong habar kanagá lagget. Sajjahén mardom hayrán butant o gwashtesh: "Choshén kár hechbar Esráilá gendag nabutag." ³⁴ Bale Parisián gwasht: "É, gón jennáni sardáray sarókiá jennána kasshit."

Keshár o ronók

³⁵ Issá sajjahén shahr o métagána shot o kanisaháni tahá mardomi dars o sabaka dátant, Hodáay bádsháhiaymestági sheng o tálána kort o har paymén nádráhi o nezórián dur kanán at. ³⁶ Áia ke mardománi mocchi distant áyáni sará bazzagi but, chiá ke á bëshopánkén pasáni dhawlá, paréshán o béwas atant. ³⁷ Gón wati moridán gwashti: "Keshár báz ent bale ronók kamm. ³⁸ Paméshká gón kesháray wáhondá dazbandi bekanét o belóthét ke pa wati kesharán ronók dém bedant."

* 9:10 9:10 Hamwán bayag, bezán yakjáh warák warag.

† 9:13 9:13 Hushah Nabiay Ketáb 6:6. ‡ 9:17 9:17

Zekk, bezán cha pasay pósta addh kortagén darpé ke cha mashká bazter ent. § 9:30 9:30 Kaddhan, bezán mohrén tákid, hokm.

10

Issáy dwázdahén háсэн kásed

(Markás 3:16-19; 6:8-11; Luká 6:14-16; 9:3-5; 10:4-12)

¹ Randá Issáyá wati dwázdahén háсэн kásed lóthetant o jennáni dar kanag o har dhawlén nádráh o nezórén mardománi dráh kanagay wák o ehtiári dátant. ² Á dwázdahén kásedáni nám esh ant: pésará, Shamun ke Petros ham gwashaga bit o áiy brát Andriás, randá Zebdiay chokk, Ákub o áiy brát Yuhanná, ³ Pilipos, Bartulumá, Tumá o máliátgirén Mattá, Halpiay chokk Ákub, Taddá, ⁴ sarmacháren Shamun* o Yahudá Eskaryuti, hamá ke randá Issái dróhagi† o dozhenáni dastá dayagi at.

⁵ Issáyá wati é dwázdahén kásed rawán dát, kaddhan kort o gwashtant: “Darkawmáni gwará marawét, á shahrán ham marawét ke ódá Sámeri jahmenend ant, ⁶ bale Bani Esráiliáni kerrá berawét ke á gáren mésháni dhawlá ant.” ⁷ Gwashti: “Har jáh ke rawét, é mestágá sar bekanét ke ásmáni bádsháhi nazzik ent. ⁸ Nádráhán dráh, mordagán zendag, garián pák o sallah bekanét o cha mardomán jennán dar bekanét. Shomará moptá rasetag, moptá ham bedayét. ⁹ Wati lánkbandáni tahá sohr o nograh o ród mán makanét. ¹⁰ Pa wati sát o saporá turag o pélek‡ mazurét o na do jámag, na chawath o swás o na asá o dazlatth, chiá ke kár kanók wati mozzay hakdár ent. ¹¹ Wahdé shahr yá métagéá rawét, gorhá anchén mardomé shóház bekanét ke shomay mehmán kanagay láhek bebit o tán roksata nabét hamáiy kerrá bedárét. ¹² Wahdé lógéá rawét, drud o drahbát begwashét o pa á lógá sohl o émeni belóthét. ¹³ Agan á lóga karzit, gorhá shomay émeniy wáhag pa áiy rasit o agan nakarzit, shomay é wáhag padá pa shomá pera tarrit. ¹⁴ Agan kasé shomará wasshátka nakant yá shomay habarán gósha nadárit, á lóg yá shahrá bellét o yalah kanagay wahdá, wati pádáni danz o hákán hamódá bechandhét o betakénét. ¹⁵ Shomará rásténa gwashán, jost o porsay róchá, Sodum o Gomurahay mardománi sezá cha á shahray mardománi sezá o azábá ásánter o kamtera bit.”

Á ke sakkíana saggit, rakkít

(Markás 13:11-13; Luká 21:12-17)

¹⁶ “Gósh dárét! Man shomará rawána kanán, bale shomá anchosha bét ke gorkáni nyámá pas. Paméshká márání dhawlá hozzhár o kapódaráni dhawlá sádah bebét. ¹⁷ Cha mardomán hozzhár bét, á shomará geráenant o hakdiwánána barant, wati kanisaháni tahá shomará shallák o hayzarána janant. ¹⁸ Pa manigi hákem o bádsháháni démá pésh kanaga bét, gorhá shomará sharrén móhé rasit ke áyáni o darkawmáni démá pa man gwáhi bedayét. ¹⁹ Á wahdán ke shomá ódá baraga bét, delá paréshán mabét ke ‘ché begwashén’ yá ‘chón passaw bedayén,’ chiá ke harché ódá shomará gwashagia bit, hamá wahdá shomará rasit. ²⁰ Á wahdá habar kanók shomá nabét, shomay ásmáni Petay Ruh shomay zobáná habara kant.

²¹ “Brát wati brátá dróhit o kóshárénit o pet wati chokká, chokk cha wati pet o mátá yágia bant o áyána kóshárénant. ²² Sajjahén mardom, pa mani námay sawabá cha shomá naprata kanant. Bale hamá ke tán áherá sakkíana saggit, á rakkít. ²³ Wahdé shomará yak shahréá ázara rasénant gorhá betachét o dega shahréá berawét. Shomará rásténa gwashán, tánke shomá Esráilay sajjahén shahrán sar bebét, man ke Ensánay Chokk án, pésará káyan.

²⁴ “Na shágerd cha wati ostádá mastera bit o na golám cha wati hodábondá. ²⁵ Shágerdá haminchok bass ent ke wati ostáday paymá bebit o golám wati hodábonday paymá. Wahdé lógay hodábondesh Belzabul* gwashtag, gorhá lógay é dega mardomán allam badterén nám pera bandant.

Rásti chér dayaga nabít

(Luká 12:2-9)

²⁶ “Shomá cha á mardomán matorsét, chiá ke hech choshén chérén chizzé nést ke záher o paddar mabit o hech choshén rázé nést ke áshkár o démdará mabit. ²⁷ Hamá habarán ke man gón shomá shapay taháriá gwashán, shomá á habarán róchay rozhnáiy begwashét, hamá habar ke halwatá shomay góshán gwashaga bant, á habarán lóg o bánáni sará begwashét o jár janét. ²⁸ Cha áyán matorsét ke jesm o jáná koshta kanant, bale sáh o arwáhá koshta nakanant, cha hamáiy betorsét ke jesm o ján o sáh o arwáh, doénán tahtaruná dawr dát o bérán korta

* **10:4** 10:4 Bázéné gomána kanant ke sarmacháray máná esh ent: Shamun Yahudiáni yak dini syási párthiéay básk bezán owz butag ke Rumiáni démá óshátátag. † **10:4** 10:4 Dróhag, bezán pa repk rad dayag. Arabi o Pársiá “khiánat”. ‡ **10:10** 10:10 Pélek, bezán turag, lót, pélag. § **10:24** 10:24 Hodábond, bezán wáyah, wáhond, málek, sáheb. * **10:25** 10:25 Belzabul, bezán jennáni bádsháh. † **10:29** 10:29 Asligén Yunáni nebeshtánk gwashtit: do “asariun.” Asariun, á zamánagay kasterén zarr at.

kant. ²⁹ Do jenjeshk pa yak paysahá[‡] bahá nabít? Bale angat cha áyan yakké ham bé shomay ásmáni Petay zána^{gá} zeminá nakapít. ³⁰ Hodáyá shomay saray mudáni hesáb ham gón ent. ³¹ Paméshká matorset, shomay kadr o arzesh cha sajjahén jenjeshkán[‡] géshter ent. ³² Harkas mardománi demá maná bemannít, man ham wati ásmáni Petay demá áia mannán, ³³ bale harkas mardománi demá maná mamannít, man ham wati ásmáni Petay demá áia namannán.

Hakk o náhakkay gishshénagá átkagán (Luká 12:51-53; 14:26-27; 17:33)

³⁴ “Gomán makanét ke man donyáyá tepáki o sohlay áragá átkagán, pa sohl o tepákiá nayátkagán, gón zahméá átkagán. ³⁵ Chiá ke man átkagán tán pet o chokkay nyámá, mát o jenekay nyámá, neshár o wassigay nyámá nátepáki byarán, ³⁶ bezán harkasay dozhmen áiy wati mardoma bant. ³⁷ Kaséá ke wati pet o mát cha man dóstera bant, á maná nakarzit o kaséá ke wati bachak o jenek cha man dóstera bant, á ham maná nakarzit. ³⁸ Kasé ke wati salibá baddhá makant o mani hamráh mabit, á ham maná nakarzit. ³⁹ Chiá ke, agan kasé wati sáhay dáragay johdá bekant, áia báhénit, § bale kasé ke pa manigi wati sáhá báhénit, áia rakkénit.

⁴⁰ “Harkas shomará wasshát^k begwashit o sharap bedant, maná sharapa dant o hamá ke maná sharapa dant, á hamáia sharapa dant ke maná ráhi dátá^g. ⁴¹ Agan kasé paygambaréá paméshká wasshátka kant o sharapa dant ke á Hodáay ráh dátá^gén ent, áia paygambaréay mozza rasit. Hamé dhawlá, kasé ke pahrézkár o rástén mardoméá pa áiy pahrézkáriá sharap bedant, áia ham pahrézkárén mardoméay mozza rasit. ⁴² Agan kasé cha é kasánokén moridán yakkéá paméshká tásé ápa dant ke mani morid ent, allam bezánét ke áia wati mozza rasit.”

11

¹ Wati dwázdahén moridáni tálim dayagá rand, Issá cha ódá dar átk o pa dars o sabak dayag o wáz kanagá áyani shahrán shot.

Issá o pákshódókén Yahyá (Luká 7:18-23)

² Wahdé pákshódókén Yahyá, bandijahá cha Issá Masihay kárán sahig but, wati moridi ráh dátant ³ ke cha áia jost bekanant: “Bárén, taw hamá ay ke áyagi at, yá pa degaréá rahchár bebén?”

⁴ Issáyá passaw dátant: “Harché ke shomá eshkonag o gendagá ét, berawét Yahyáyá sahig kanét: ⁵ kór gendag o maym kanagá ant, lang tarrag o ráh rawagá ant, garri pák o palgár bayagá ant, karr eshkonagá ant, mordag zendag bayagá ant o bazzag o nézgarán wasshén mestág sar bayagá ent. ⁶ Bahtáwar hamá ent ke mani káráni gendagá thagal mawárt o malakoshit.”

Yahyáyá bárawá (Luká 7:24-35)

⁷ Wahdé Yahyáyá kásed dar kapt o shotant, Issá gón mardomán Yahyáyá bárawá gapp o tran kanagá lagget: “Chónén chizzéay chárágá gyabáná shotagét? Kalam o káshay dhilléay chárágá ke gón gwátay kasshagá é dém o á dém shikka wárt? ⁸ Agan na, gorhá chónén chizzéay chárágá shotagét? Anchén mardéay chárágá shotagét ke narm o názorkén pósháki gwará at? Á mardom ke názorkén póshák gwará kanant, bádsháhi kalát o márhián nendók ant. ⁹ Gorhá ódá shomá chónén chizzéay chárágá shotagét? Paygambaréay chárágá? Haw, shomára gwashán ke Yahyá cha paygambaréá ham master ent. ¹⁰ Á hamá ent ke áiy bárawá nebisag butag:

*Bechár, man wati kásedá cha taw pésar ráha dayán ke á, tai ráhá tachk o tayára kant.**

¹¹ “Shomará rásténa gwashán ke hech mátá pákshódókén Yahyáyá warhén bématthén chokké nayáwortag. Bale ásmáni bádsháhiá, hamá ke cha sajjahénán kaster ent, á cha Yahyáyá ham master ent. ¹² Cha pákshódókén Yahyáyá wahdá beger tán annun, Hodáay ásmáni bádsháhi gón zóráki demá rawán ent o zórmand áia pa zóré watigia kanant. ¹³ Sajjahén nabián o Tawrátá, tán Yahyáyá zamánagá wati péshgói kortagant. ¹⁴ Agan shomá pa mannagá tayár ét, bezánét Yahyá hamá Elyás nabi ent ke áyagi at. ¹⁵ Harkasá gósh per, beshkont.

¹⁶ “É zamánagay mardomán kai hamdarwar bekanán ke á, kai dhawlá ant? Á, hamá chokkáni paymá ant ke bázará nesh-tagant o á dega chokkán gwánka janant o gwashant: ¹⁷ ‘Má pa shomá nal o kalam sáz kort, bale shomá nách o sohbat nagept, má pa shomá mótk áwort, bale shomá arsé narétk.’ ¹⁸ Yahyá átkag, na nána wárt o na sharába nóshít, gwashant: ‘Jenni per ent,’ ¹⁹ bale Ensánay Chokk átkag, wárt o nóshít, gwashant: ‘Lápi o sharábié,

[‡] 10:31 10:31 Asligén Yunáni nebeshtánk gwashit: “bázén jenjeshkán”. § 10:39 10:39 Báhénag, bezán gár dayag,

cha dast dayag. * 11:10 11:10 Maláki Nabiy Ketáb 3:1.

máliatgír o gonahkáráni sangat ent.' Bale hekmat o zánt cha kár o kerdá záhera bit."

Issáy bazhn
(Luká 10:13-15)

²⁰ Gorhá Issá hamá shahr o mardománi mayárig kanagá lagget ke wati géshterén ajabén kári hamá shahrán kortagatant, chiá ke áyán cha wati badén kárán pashómáni darshán nakortagat. ²¹ "Bazhn o apsoz pa shomá, oo Korázinay mardomán! Bazhn o apsoz pa shomá, oo Bayt-Saydáay mardomán! Hamá mójezah o ajekkái[†] ke man shomay nyámá pesh dáshtagant, agan Sur o Saydunay shahrán pesh bedáshténant, gorhá óday mardomán hamá wahdá wati gonáháni pashómániay póshák gwará kortagat o poráni sará neshtagatant. ²² Báwar kanét, jost o porsay róchá Sur o Saydunay mardománi sezá cha shomay sezá o azábá ásánter o kamtera bit. ²³ Oo Kaparnáhumay mardomán! Shomá chest kanag o ásmáná baraga bét? Hechbar! Tahtarunay johlánkián sarshakuna bét. Chiá ke hamá mójezah o ajekkái ke pa taw pesh dárag butant, agan Sodumay shahrá bebuténant, á shahr tán róch maróchigá mantagat. ²⁴ Báwar kanét, jost o porsay róchá Sodumay mardománi sezá cha shomay sezá o azábá ásánter o kamtera bit."

Issáy jog
(Luká 10:21-22)

²⁵ Á wahdá Issáy gwasht: "Oo mani Pet, zemin o ásmánay Hodábond! Tará satá kanán o sárháyán ke taw é ráz o habar cha zántkár o hóshmandán chér dátant o kódkáni sará paddar kortant. ²⁶ Oo mani Pet! Taw cha wati razá o wáhagá é dhawlá kort. ²⁷ Sajjahén chizz, Petá mani dastá dátagant. Abéd cha Petá, hechkas Chokká nazánt. Hamé dhawlá, dega hechkas Petá nazánt, abéd cha Chokká o hamá mardomán ke Chokk belóthit Petá pa áyán paddar bekant.

²⁸ "Oo srénproshagén zahmatkashán! Dém pa man byáét, man wat shomará áram o ásudagía bakshán. ²⁹ Mani jogá[‡] baddhá kanét, cha man hél begerét, ke man narmdel o békebr án. Gorhá shomará áram o ásudagía rásit. ³⁰ Chiá ke mani jog ásán o mani bár sobakk ent."

12

Issá Shabbatay wájah o wáhond ent
(Markás 2:23-28; Luká 6:1-5)

¹ Yak randé, Shabbatay róchá* Issá cha gandomi kesharán gwazagá at. Áiy morid shodig atant o kesharay hóshagán sendag o waragá laggetant. ² Parisián ke dist gón Issáy gwashtesh: "Bechár! Tai morid anchéen kára kanant ke Shabbatay róchá rawá naent." ³ Passawí dát: "Záná, shomá nawántag, wahdé Dáud o áiy hamráh shodig butant, Dáudá ché kort?" ⁴ Hodáay Pákén lógá shot, Hodáay námá hayráti o pákwandhén náni wártant ke áyáni warag na pa áiy rawá at o na pa áiy hamráhán, tahná pa díní peshwáyán rawá at. ⁵ Sharyatá é ham nawántagó ke mazanén parasteshgáhay tahá, díní peshwá Shabbatay béhormatiá kanant bale angat bémayár zánag o lékaga[†] bant? ⁶ Man gón shomá gwashtén ke edá cha mazanén parasteshgáhá ham masteréné hastent. ⁷ Agan shomá é habaray máná bezántén ke gwashit: *Man hayrát o ko-rbániq kanagay lóthók naán, mehr o rahmatay lóthók án,*[‡] gorhá shomá á mardom mayárig nakortagatant ke bémayár ant. ⁸ Bezánét man ke Ensánay Chokk án, Shabbatay róchay wáhond án.

Mondhén mardéay drahbakshi
(Markás 3:1-6; Luká 6:6-11)

⁹ Cha ódá demá rawán, Issá áyáni kanisahá shot. ¹⁰ Ódá mardé hastat ke dasti hoshk o mondth at. Lahténá pa beddh o bohtám janagay nimmóná cha Issáyá jost kort: "Shabbatay róchá kaséay dráh kanag rawá ent yá na?" ¹¹ Gón áyán gwashti: "Agan cha shomá kaséá méshé hast o Shabbatay róchá chátéá bekapit, hamá damáná méshá cha chátá dara nakant?" ¹² Ensánay arzesh cha méshá báz géshter ent. Paméshká Shabbatay róchá néki kanag rawá ent." ¹³ Nun gón á mardá gwashti: "Dastá shahár day." Áiy dast shahár dát o domi dastay dhawlá wassh o dráh but. ¹⁴ Bale Parisi dhanná shotant o pa Issáy kósharénagá shawr o saláhesh kort.

Hodáay gechén kortagén

¹⁵ Wahdé Issáyá áyáni delay é habar zánt, cha ódá dar kapt. Bázéné áiy padá rawán but o áyáni nyámá harkas ke nádráh at, sajjahéni dráh kortant. ¹⁶ Kaddhani kortant o gwashti: "Gón kassá magwashét man kay án." ¹⁷ É dhawl paméshká but ke Eshayá nabiay gwash-tagén habar sarjam bebit:

¹⁸ *É mani hezmatkár ent ke man gechén kortag,*

[†] 11:21 11:21 Ajekkái, bezán mójezah, hayrán kanókén kár. [‡] 11:29 11:29 Jog dáré ke pa zeminay shóm kanagá do gókyag gardená bandanti. * 12:1 12:1 Shabbatay róch hamá Shambéh ent, bezán Yahudiáni kár nakanagay róch. [†] 12:5 12:5 Lékaq, bezán hesáb árag. [‡] 12:7 12:7 Hushah Nabiay Ketáb 6:6.

maná sakk dóst ent o man cha eshiá
báz wassh o razá án,
man wati Ruhá eshiay sará éra géján,
darkawmáni nyámá é hezmatkár mani
ensáp o dádrasiay járá perrénit.

¹⁹ Na jang o merha kant o na ják o
kukkár o
na kasé damk o bázarán áiy tawará
eshkont,

²⁰ na ke nezór o nawahkén kalam o
káshá próshit o
na mermeránkén cherágá koshit,
tán hamá wahdá ke ensáp o dádrasiá
sóbén[§]o kámyáb bekant.

²¹ Pa donyáay kawmán áiy nám
mazanén omété bit.*

Issá o Belzabul

(Markás 3:20-30; Luká 11:14-23;
12:10)

²² Hamá wahdá mardomán Issáay gwará
yak jenni ganóké áwort. Á, kór o gong
at. Issáay dráh kort o á gendag o habar
kanagá lagget. ²³ Sajjahén mardom pa
hayrání o bah mánagi gwashagá laggetant:
“Chosh buta kant ke é Dáud bádsháhay
chokk o óbádag ent?” ²⁴ Bale wahdé
Parisián é habar eshokt, gwashtesh: “É,
gón jennáni sardár Belzabulay sarókiá
jennána kasshit.” ²⁵ Issáay áyáni é hayál
zánt o gón áyán gwashti: “Har molkéá
ke nátepáki bekapit, á molk gár o zawála
bit o har shahré yá lógé bahr o báng
bebit, barjáha namánit. ²⁶ Agan Shaytán
wat Shaytána dar bekant, bezán gón wati
jendá jang ent. Gorrhá áiy bádsháhi
chón barjáha mánit? ²⁷ Agan man gón
Belzabulay sarókiá jennán dara kanán,
gorhá shomay jenday chokk o morid gón
kai zór o wáká jennán dara kanant?
É paymá, shomay morid wat shomará
mayáriga kanant. ²⁸ Bale agan man gón
Hodáay Ruhá jennán dara kanán, bezánét
ke Hodáay bádsháhi shomay nyámá rase-
tag. ²⁹ Yá chón buta kant, kasé zóráwarén
mardoméay lógá bepoterit o áiy mál o
melkatá pol o pánych[†] bekant, tán pésaró
á zóráwarén mardá magipt o mabandit?
Gorrhá áiy lógá pol o pánych korta kant.
³⁰ Kasé ke mani hamráh o dózwáh naent, á
mani badwáh ent, kasé ke mocch o yakjáh
kanagá gón man hór naent, á, sheng o
sháng o tak o parka kant.

³¹ “Paméshká shomará gwashán ke har
gonáh o kopr, bakshag o pahell kanaga
bit, bale Hodáay Pákén Ruhay bárawá
sellén habar o kopr, pahell kanaga nabit.

³² Harkas Ensánay Chokkay bárawá sellén
habaré bekant bakshaga bit, bale á ke
Pákén Ruhay bárawá sellén habaré beg-
washit, na é donyáay pahell kanaga bit o
na áyókén donyáay.

Drachk o bar

(Mattá 7:17-18; Luká 6:43-45)

³³ “Agan sharrén bar o nibaga lóthét,
báyad ent drachk sharréné bebit, badén
drachk badén bar o nibaga dant,[‡] har
drachk cha áiy bará zánaga bit. ³⁴ Oo
syahmáarzadágan! Shomá ke wat sell
o radkár ét, chón sharrén habar korta
kanét? Chiá ke harché mardomay delá
bebit, hamá cha áiy dapá dara kayt.
³⁵ Sharrén mardom cha sharrén ganj o
hazánagá sharrén chizz dara kant o sellén
mardom cha sellén hazánagá, sellén chizz.
³⁶ Shomará gwashán ke jost o porsay róchá
mardomán wati har mopt o náhudagén
habaray hesáb dayagi ent. ³⁷ Chiá ke tai
habar ant ke tará bémayára kanant o tai
habar ant ke tará mayárbára kanant.”

Neshániay lóthag

(Markás 8:11-12; Luká 11:29-32)

³⁸ Gorrhá lahtén Parisi o Sharyatay
zánógerá gón áiy gwasht: “Oo ostád!
Má cha taw neshánié gendaga lóthén.”
³⁹ Issáay áyáni passawá gwasht: “Sherr
o zenahkárén nasl o padréch, neshánia
lóthit, bale Yunes nabíay neshániá abéd,
dega hech neshánié áyán dayaga nabit.
⁴⁰ Anchosh ke Yunes tán say róch o say
shapá thuhén máhigay lápá at, hamé
paymá Ensánay Chokk tán say róch o
say shapá zeminay lápá bit. ⁴¹ Jost o
porsay róchá, Naynawáay mardom gón
é zamánagay mardomán hórígá páda
káyant o áyán mayáriga kanant, chiá ke á
Yunesay dháh o hozzhárbáshay sará cha
wati gonáhán pashómán butant. Bale nun
cha Yunesá masteréné edá ent. ⁴² Jost
o porsay róchá, Sabáay malakah[§] gón é
zamánagay mardomán hórígá páda kayt
o áyán mayáriga kant, chiá ke Sabáay
malakah cha donyáay á dastá atk tán
Solaymánay hekmatá beshkont. Bale nun
cha Solaymáná masteréné edá ent.

Wayránén kalát

(Luká 11:24-26)

⁴³ “Wahdé jenné cha kaséá dara kayt,
gorhá gyábánána rawt tán pa wati árámi
o ásudagiá, jáhé shóház bekant, bale
choshén jágahé narasiti. ⁴⁴ Gorrhá gwasht:
‘Cha ódá ke dar átkágán, padá hamódá
rawán.’ Wahdé pera tarrit o gendit ke á

§ 12:20 12:20 Sóbén, bezán péróz, kámyáb. * 12:21 12:21 Eshayá Nabíay Ketáb 42:1-4. † 12:29 12:29 Pol o pánych, bezán zórbord, loth o pol. ‡ 12:33 12:33 Asligén Yunáni nebeshtánka gwasht: “yá drachká sharr bekanét o nibag sharr, yá drachká bad bekanét o nibag bad”. § 12:42 12:42 Asligén Yunáni nebeshtánka gwasht: “jonubay malakah”.

lóg hórk o hálig, roptag o sáp o sallah ent, ⁴⁵ gorhá rawt o cha watá dega hapt selterén jenn gón wata kárit. Á sajjahén, hórígá ódá rawant o ord o bonaga kanant. É dhawlá, á mardomay ásar o ákebat cha pésarígéná angat badtera bit. É badkárén naslay hál ham hamé paymá bit.”

Issáy má t o brát

(*Markás 3:31-35; Luká 8:19-21*)

⁴⁶ Issá angat gón mardomán habará at ke áiy má t o brát átk o dhanná óshtátant. Áyán gón Issáy habar kanagi at. ⁴⁷ Gorhá yakkéá Issá sahig kort ke “tai má t o brát dhanná óshtátant, gón taw habar kanaga lóthant.” ⁴⁸ Issáyá passaw dát: “Mani má t kay ent o mani brát kay?” ⁴⁹ Padá áiy wati moridáni némagá dast shahár dát o gwasht: “Esh ant mani má t o brát. ⁵⁰ Harkas ke mani ásmáni Petay wáhag o razáay sará kára kant, mani brát, mani má t o gohár hamá ent.”

13

Tohm chandhagay mesál

(*Markás 4:1-9; Luká 8:4-8*)

¹ Hamá róchá, Issá cha lógá dar átk o mazangwarmay Kerrá shot o nesh. ² Bale mardománi anchén mazanén mocchié áiy gwará átk ke á bójjigéá swár but. Sajjahén mardom gwarmay tayába* óshtátant. ³ Gorhá áiy mardom gón darwar o mesálán bázén dars o sabaké dátant. Gwashti: “Yak dehkáné pa tohmay chandhagá shot, ⁴ tohmáni chandhagay wahdá kammoké tohm ráhay sará retk o báli morgán chet o wártant. ⁵ Kammé tohm dhal o dhókáni sará retk ke ódá hák kamm at, paméshká zutt rost o sabz butant, chiá ke dhagár talag at. ⁶ Bale cha róchay trondén garmíá gimmort† o hoshk butant, chiá ke áyáni rishshag o wandhál‡ zeminá johl nashotagatant. ⁷ Kammé tohm shezz o cherekkáni§ tahá ham retk o shezzán áyáni rost o rodóm dásht. ⁸ Dega kammé tohm, sharrén zeminá retk, rost o baresh kort, jáhé sad sari, jáhé shast sari o jáhé si sari. ⁹ Harkasá gósh per, beshkont.”

Hodáay bádsháhiay ráz

(*Markás 4:10-12; Luká 8:9-10*)

¹⁰ Nun morid áiy Kerrá átkant o jostesh kort: “Chiá taw gón mardomán pa darwar o mesál habara kanay?” ¹¹ Áyáni passawá gwashti: “Hodáyá é zánt shomará dátag ke ásmáni bádsháhiay rázán sarpad bebét, bale á dega mardománá nadátagi.

¹² Hamáiy ke chizzé hast, géshter dayaga bit, tánke áiy báz bebit, bale kaséa ke nést, hamá ke hastenti ham pach geraga bit. ¹³ Paméshká man pa darwar o mesál gón áyán habara kanán ke áyáni chammán maym hast bale nagendant, góshesh pach ant bale naeshkonant o sarkech ham nawarant. ¹⁴ Eshayá nabiay péshgói é mardománi bárawá rást o sarjama bit ke gwasht:

gón góshána eshkonét, bale sarkecha nawarét,

gón chammána charét, bale nagendét,

¹⁵ *chiá ke é kawm sengdel butag,*

góshesh grán ant,

áyán wati chamm bastagant

chó mabit áyáni chamm begendant,

áyáni del beshkonant,

áyáni del bezánant o sarpad bebant o

mani némagá per betarrant

*ke man áyán dráh bekanán.**

¹⁶ “Bale shomay chamm bahtáwar ant ke gendant o shomay gósha eshkonant. ¹⁷ Shomará rásténa gwashán, bázén paygambar o pahrézkárén mardománi wáhag butag ke harché shomá gendagé ét áyán ham bedistén, bale nadistesh o harché ke shomá eshkonagá ét áyán ham beshkotén bale naeshkotesh.

Tohm chandhagay mesálay maksad

(*Markás 4:13-20; Luká 8:11-15*)

¹⁸ “Nun tohm chandhagay mesálay maksad o mánáyá gósh bedaré. ¹⁹ Wahdé kasé Hodáay bádsháhiay habará eshkont, bale sarkecha nawárt, gorhá Shaytána kayt o harché ke áiy delá keshag butag dara kant o bárt. Esh at ráhay sará retkagén tohmáni mesálay máná. ²⁰ Á tohm ke dhal o dhókáni sará retkant, hamá mardomay mesál ent ke Hodáay habará eshkont o hamá damáná pa gal o shádehia mannit, ²¹ bale pa é sawabá ke rishshag o wandháli najatag, Hodáay habar áiy delá, tán dérá namánit o jágaha nakant. Wahdé Hodáay gal o habaráni sawabá sakkí o ázáré berasiti, hamá damáná cha ráhá thagalit o kapit. ²² Á tohm ke shezz o dhangaráni tahá retkant, hamá mardomay mesál ent ke Hodáay habará gósha dárít, bale donyái parésháni o mál o zarray hers o jópah,† áiy rada dayant o naylant Hodáay habar sabz betarrít o bar o barward bedant. ²³ Á tohm ke sharrén zeminá retkant hamá mardomay mesál ent ke Hodáay habará gósha dárít o

* **13:2** 13:2 Tayáb, bezán daryáay Kerr, sáhel. † **13:6** 13:6 Gimmorag, bezán hoshk tarrag, napasgir bayag.

‡ **13:6** 13:6 Wandhál, bezán rishshag o rótag. § **13:7** 13:7 Shezz, yá shenz, o dhangar bébarkatén sabzagé ke asligén kesharáy tahá rodít o áyáni rost o rodómá dárít.

13:22 Jópah, bezán lálech o tamah.

* **13:15** 13:15 Eshayá Nabiay Ketáb 6:9-10. † **13:22**

sarpada bit o bar o barwarda dant, bázéné sad sari, bázéné shast sari o bázéné si sari."

Zahríckay mesál

²⁴ Issáyá pa áyán dega mesalé áwort o gwasht: "Ásmáni bádsháhi, hamá mardomay paymá ent ke wati dhagará sharrén tohmi keshtagat, ²⁵ bale wahdé mardom waptag o wáb atant, áiy dozhmené átk o gandomay keshtagén dhagará zahríck o barri káhay tohmi rétk o shot. ²⁶ Wahdé gandom rostant o hóshagesh áwort, káh o zahríck ham rost o mazan butant. ²⁷ Nun nawkar átkant o gón wati hodábondá gwashtesh: 'Oo wájah! Taw wati dhagará sharrén tohm nakeshtagat? Gorhá é zahríck o barri káh cha kojá átkant?' ²⁸ Gwashti: 'Dozhmenéá é kár kortag.' Nawkarán jost kort: 'Taw lóthay má berawén áyán begwájén?' ²⁹ Passawi dát: 'Na, chó mabit ke káh o zahríckáni gwajagay wahdá gandom ham dar kanag bebant. ³⁰ Tán ronagay wahdá belli hórígá rodant, ronagay wahdá gón rónkárána gwashán: "Pésará zahríckán yakráh o pa sóchagá grámband bekanét, randá gandomán mani ambará bellét.'" "

Kasterén tohmay mesál

(*Markás 4:30-32; Luká 13:18-19*)

³¹ Issáyá gón áyán dega mesalé jat o gwasht: "Ásmáni bádsháhi, thélkáhay[‡] tohmay dhawlá ent, ke kaséá zort o wati dhagará kesht. ³² Toré belli áiy dánag cha é dega tohmán kaster ent, bale wahdé rodit cha é dega sabzagán borzter, drachkéay dhawlá bit o báli morg áiy ták o tháláni chérá kodóh o kodáma bandant."

Homíray mesál

(*Luká 13:20-21*)

³³ Randá dega mesalé áworti: "Ásmáni bádsháhi, hamá homíray paymá ent ke janénéá zort o gón bázén ártéá[§] hawár kort o kam kammá sajjahén árt gwát gept o homir but."

³⁴ Issáyá pa mardomán sajjahén habar, mesál o darwaráni tahá gwashtant, bé darwar o mesalán hech habaria nakort, ³⁵ tán paygambaray é habar sarjam bebit ke gwasht: "man gón mesál o darwarán wati zobáná pacha kanán o gón áyán anchén habara kanán ke cha donyáay pédáeshá beger tán angat, chér o andém butagant."*

Zahríckay mesálay máná

³⁶ Randá Issáyá mardom eshtant o lógá shot, ódá morid áiy gwará átkant

o gwashtesh: "Mará dhagáray barri káh o zahríckay mesálay mánáyá sarpad kan." ³⁷ Gwashti: "Hamá ke sharrén tohma kesht, Ensánay Chokk ent. ³⁸ Dhagár donyá ent, sharrén tohm ásmáni bádsháhiay chokk ant, zahríckay tohm Shaytánay chokk ant, ³⁹ hamá dozhmen ke tohmi dhagará rétkant, Shaytán ent, kesháray rónay wahd, áheratay róch ent o kesháray ronók,†préshtag ant. ⁴⁰ Anchosh ke zahríck mocch kanag o ásá sóchaga bant, áheratay róchá ham hamé dhawlá bit. ⁴¹ Ensánay Chokk, wati préshtagán ráha dant tán sajjahén badkárán o áyán ke degarán rada dayant yakjáh bekanant o cha áiy bádsháhiá dar bekanant. ⁴² Áyán ásay kurahá dawra dayant ke ódá gréwag o dantán pa dantán droshaga bit. ⁴³ Á wahdá nék o pahrézkáren mardom, wati Petay bádsháhiá róchay paymá drapshant.‡ Harkasá gósh per, beshkont."

Ásmáni bádsháhiay dega say mesál

⁴⁴ "Ásmáni bádsháhi, hamá ganj o hazánagay paymá ent ke dhagaréá chér dayag butag. Wahdé anágat kaséá dar gétk, áia chéra dant o padá pa gal o shádehia rawt o wati sajjahén mál o madhíá bahá kant o hamá dhagará pa bahá zurit.

⁴⁵ "Hamé dhawlá, ásmáni bádsháhi, sawdageréay paymá ent ke dhawldáren morwáred shóháza kant. ⁴⁶ Wahdé áia sakkén gránkimmatén morwáredé dastá kapit, gorhá rawt o wati sajjahén hast o néstá bahá kant o hamá morwáredá gipt.

⁴⁷ "Hamé dhawlá ásmáni bádsháhi, yak dám o máhóréay dhawlá ent ke gwarmá dawria dayant o har paymén máhiga gerant. ⁴⁸ Wahdé dám cha máhiga porra bit, cha gwarmá dhann daria kanant o máhigán dara chenant, sharrén máhigána zurant o saptáni tahá kanant o é dega harábénán dawra dayant. ⁴⁹ Áheratay róchá ham anchosha bit. Préshtaga káyant o badkárán cha nék o pahrézkáren mardomána gisshénant o jetá kanant. ⁵⁰ Badkárán ásay kurahá dawra dayant ke ódá gréwag o dantán pa dantán droshaga bit. ⁵¹ Bárén, shomá é sajjahén habarén sarpad butét?" Áyán passaw dát: "Ji haw." ⁵² Gón áyán gwashti: "Paméshká Sharyatay har zánóger ke ásmáni bádsháhiay moridé bit, hamá marday dhawlá ent ke cha wati hazánagá har paymén nók o kwahnén chizz dara kant."

‡ **13:31** 13:31 Thélkáh, bezán hardal. § **13:33** 13:33 Asligén Yunáni nebeshtánka gwasht: "say sátá", bezán 15 kiluá gésh. * **13:35** 13:35 Zabur 78:2. † **13:39** 13:39 Ronók, bezán hamá ke keshará borrit o moccha kant.

‡ **13:43** 13:43 Drapshag, shahm janag, jalashkag.

*Issá padá Náserahá pera tarrit
(Markás 6:1-6; Luká 4:16-30)*

⁵³ Wahdé Issáyá é mesál o darwar sarjam kortant, cha ódá dar kapt. ⁵⁴ Wati jenday shahrá átk, óday kanisahá mardománi tálím dayagi bongé§ kort. Mardom pa hayráni gwashagá laggetant: "Eshíá é zánt o zánag o é dhawlén ajabén kár kanagay wák o twán cha kojá rasetag?" ⁵⁵ É hamá dártráshay chokk naent? Maryam eshiay mát o Ákub, Issop, Shamun o Yahudá eshiay brát naant? ⁵⁶ Eshiyaj sajjahén gohár hamedá may kerrá jahmenend naant? Gorrhá é sajjahén chizzi cha kojá áwortagant? ⁵⁷ Áyán bad átk o Issáesh namannet, bale Issáyá gón áyán gwasht: "Hech nabieá wati shahr o hankéná o wati lógá sharap nést." ⁵⁸ Paméshká áia ódá bázén mójezah pésh nadásht, chiá ke mardomán áiy sará báwar néstat.

14

*Pákhódókén Yahyáay koshag
(Markás 6:14-29; Luká 9:7-9)*

¹ Á wahdá Jalilay hákem Hirudis, Issáyá nám o tawará sahig but. ² Áia gón wati hezmatkárán gwasht: "É hamá pákhódókén Yahyá ent ke cha mordagán zendag butag, paméshká choshén ajekkái o mójezahána kant." ³ Chosh at ke Hirudisá Hirudiáay sawabá ke péсарá áiy brát Piliposay jan at, Yahyá geráéntag o bandijáhá band kortagat. ⁴ Chiá ke Yahyáyá gón Hirudisá gwashtagat: "Hirudiáay wati lógi kanag Sharyatá pa taw rawá naent." ⁵ Hirudisá pa Yahyáay kóshárénagá shawr kortagat bale torseti, chiá ke mardománi báwar at Yahyá paygambaré.

⁶ Hirudisay sálgerah but o Hirudiáay jeneká mehmánáni démá nách o sohbat gept. Hirudis báz washdel but, ⁷ sawgendi wárt o labzi kort ke "harché lóthay belóth, pa taw bakshaga bit." ⁸ Jeneká wati mátay shawr o saláhay sará gwasht: "Pákhódókén Yahyáay sará hamedá tabakéay tahá bekan o maná beday." ⁹ Hirudis báz paréshán o delta-parkah but bale mehmánáni démá sawgendi wártagat o jeneki labz dátagat, paméshká parmáni kort áiy é wáhagá barjáh bekanant. ¹⁰ É dhawlá, Yahyáay sari bandijáhá borráént. ¹¹ Gorrhá áiy sar tabakéay tahá árag o jeneká dayag but, áia wati mátay kerrá bort. ¹² Yahyáay morid átkant o áiy jónesh bort, kabr o kaponá rand, shot o Issáesh sahig kort.

*Panch hazár mardomá warák dayag
(Markás 6:32-44; Luká 9:10-17;
Yuhanná 6:1-13)*

¹³ É habaray eshkonagá rand, Issá bójigéá swár but o dur o gestáén jáhéá tahnaká shot. Wahdé mardom sahig butant, cha shahrán payádaká áiy randá gón kaptant. ¹⁴ Issá ke cha bójigá ér kapt o mardománi mazanén mocchi dist, áyáni sará bazzagi but o sajjahén nádráhi dráh kortant. ¹⁵ Bégáhá, morid áiy kerrá átkant o gwashtesh: "É, dur o gestáén jágahé o béwahd ham butag, paméshká mardomán bell ke métag o bázáren berawant o pa wat ward o waráké bahá begerant." ¹⁶ Bale Issáyá gwasht: "Áyán rawagay zalurat nést, shomá wat áyán warák bedayét." ¹⁷ Gwashtesh: "Edá may kerrá tahná panch nán o do máhig hast." ¹⁸ Gwashti: "Harché shomará gón, mani kerrá byárét." ¹⁹ Gorrhá áia mardom sabzagén káháni sará nendagay parmán dátant, randá panchén nán o doén máhigi zortant, ásmánay némagá cháreti o Hodáay shogri gept, gorrhá náni chondh chondh kort o moridáni dastá dátant. Moridán nán mardománi sará bahr kortant. ²⁰ Sajjahén mardomán tán sérá wárt o moridán angat cha sar átkagén chondhán, dwázdah sapt porr kort. ²¹ Janén o chokkán o abéd, kesás panch hazár mardén atant. Sajjahénán sérá wárt.

*Issá ápay sarborá gáma jant
(Markás 6:45-52; Yuhanná 6:15-21)*

²² Issáyá hamá damáná morid parmán dát o gwashtant: "Tánke man é mardomán roksata kanán, shomá bójigá swár bét o cha man péсар gwarmay domi némagá berawét." ²³ Mardománi rahádag kanagá rand, pa dwá kanagá tahná kóhay sará sar kapt. Rónend at o á wat tahná at. ²⁴ Á wahdá, bójig cha tayábá dur rasetagat, trond o tézén gwát o mastén mawj o chawláni ámach* at. ²⁵ Shapay cháromi pásá, Issá ápay sará gám janán dém pa áyán pédák at. ²⁶ Wahdé moridán Issá ápay sará gám janán dist, sakk torset o gwashtesh balkén ruhé, paméshká cha torsá kukkáresh kort. ²⁷ Bale Issáyá hamá damáná gón áyán gwasht: "Matorsét, é man án."

²⁸ Petrosá gwasht: "Oo Hodáwand! Agan é taw ay, gorrhá bell ke man ham ápay sará tai kerrá káyán." ²⁹ Issáyá gwasht: "Byá!" Gorrhá Petros cha bójigá gwarmá ér átk o ápay sará Issáyá némagá rawagá lagget. ³⁰ Bale cha gwátay trondiá torseti o ér boddhagá lagget, gorrhá kukkári

kort: "Oo Hodáwand! Maná berakkén." ³¹ Hamá damáná Issáyá dast shahár dát, á gept o gwashti: "Oo kambáwar! Chiá shakket kort?" ³² Bójigá sar kaptant o gwát kapt o áram but. ³³ Hamá ke bójigá neshtagant, Issáesh satá o saná kanáná gwasht: "Béshakk taw Hodáay Chokk ay."

Nádráháni drahbakshi
(Markás 6:53-56)

³⁴ Wahdé áyán gwarm gwázént Genisáretay shahrá ér átkant. ³⁵ Óday mardomán Issá pajjáw áwort, sajjahén hard o damağay á dega mardomesh saħig kortant o sajjahén nádráhesh áiy Kerrá áwortant. ³⁶ Dazbandiesha kort: "Bell má tai kabáhay lambá dast bejanén o bass." Áyán ke dasta jat, sajjahén wassh o dráha butant.

15

Delpáki
(Markás 7:1-23)

¹ Randá, cha Urshalimá átkagén lahtén Parisi o Sharyatay zánoger Issáy Kerrá átk o gwashtesh: ² "Tai morid chia may pet o piroki rahbandá próshant o cha waragá pésar dasta nashódant?" ³ Áyáni pasawá gwashti: "Shomá chiá pa wati dód o rahbandáni dárágá Hodáay hokmána próshét?! ⁴ Hodáyá gwashtag: *Wati pet o mátá sharap o ezat beday o harkas ke wati pet o mátá zá o dwá bedant, báyard ent koshag bebít.*" ⁵ Bale shomá gwashét: "Ágan kasé wati pet yá mátá begwashit: "Hamá komak ke man báyard ent shomára bedátén, á man Hodáay ráh korbánig kortag." ⁶ nun zalurat naent á wati pet o mátá sharap bedant." Shomá pa wati dód o rahbandáni dárágá Hodáay habará próshét. ⁷ Oo doru o dopóstén mardomán! Eshayá nabíá cha Hodáay némagá shomay bárawá sharr gwashtag: ⁸ *É mardom dapá maná satá dayant, bale delesh cha man báz dur ent.* ⁹ *Á moptá maná parastesha kanant o mardománi jórhéntagén ráh o rahbandán sója dayant.*"[†]

¹⁰ Issáyá mardom wati Kerrá lóthet o gwashtant: "Gósh bedarét o sarpad bebét. ¹¹ Á chizzé ke dapá rawt mardomá nápáka nakant, bale hamá chizz ke cha dapá dara kayt mardomá nápáka kant." ¹² Nun morid áiy Kerrá átkant o gwashtesh: "Zánay ke tai é habarán Parisi tawréntagant?" ¹³ Issáyá passaw dát: "Har nehálé[‡] ke mani ásmáni Petá nakeshtag, allamá gwajaga bit. ¹⁴ Shomá áyán

bay makanét, á kóráni kórén rahshón ant, wahdé yak kóre domi kórá ráhá shóna dant gorhá doén chátá kapant."

¹⁵ Petrosá gwasht: "É mesálay mánáyá márá sarpad kan." ¹⁶ Issáyá gwasht: "Shomá angat haminkadar násarpad ét? ¹⁷ Nazánét harché ke dapá rawt, lápá mána bit o padá cha rótán dara kayt. ¹⁸ Bale harché ke cha dapá dara kayt, béhá cha delá páda kayt o hamé chizz ensaná nápáka kant. ¹⁹ Chiá ke badén pegr o hayál, hón o kósh, zená, bérangi, dozzi, drógén sháhedi o kopr, cha delá chesta bant. ²⁰ É sajjahén, mardomá nápák o palita kanant, bale agan kasé gón nashoshtagén dastán warag bwárt, sell o nápáka nabít."

Darkawmén janénéay báwar
(Markás 7:24-30)

²¹ Issáyá á jágah yalah dát o Sur o Saydunay sardhagára shot. ²² Kanáni janéné ke hamóday mardomé at átk o kukkári kort: "Oo Hodáwand, oo Dáud bádsháhay chokk! Tará mani sará bazzag bát. Palitén ruhé mani jeneká sakk ázára dant." ²³ Bale Issáyá jwábé nadát. Nun moridán dazbandi kort: "Eshiá yal kan, galléni, may randá kaptag o báz kukkár kanagá ent." ²⁴ Issáyá darráént: "Man bass pa Bani Esráilay gárén méshán ráh dayag butagán." ²⁵ Gorhá janén áiy pádán kapt o gwashti: "Oo Hodáwand! Maná komak kan." ²⁶ Gwashti: "Cha chokkáni dastá nánay pach gerag o kochekáni demá dawr dayag sharr naent." [§] ²⁷ Janéna gwasht: "Oo Hodáwand! Bale kochek wati wáhonáni parzónagay sarárokén naganay thokkorána warant." ²⁸ Gorhá Issáyá áiy passawá gwasht: "Oo bánok! Tai báwar mohr o rédag* ent, paméshká hamá dhawl ke taw lóthay anchosha bit." Hamá damáná áiy jenek dráh but.

Bázén mardománi drahbakshi

²⁹ Issáyá á jágah esht o shot, cha Jalilay mazangwarmay tayáb gwast o yak kóhéay sará sar kapt o nesh. ³⁰ Bázén mardomé áiy Kerrá átk, lang, kór, mond, lell o dega har paymén nádráhesh, Issáyá demá áwortant o Issáyá dráh kortant. ³¹ Wahdé mardomán dist ke gong habar kanagá ant, mondhrá bayagá ant, lang tarragá ant o kór gendagá ant, gorhá Esráili hayrán butant o wati Hodáesh satá o saná kort.

Chár hazár mardomá warák dayag
(Markás 8:1-10)

* 15:4 15:4 Dargwaz 20:12; 21:17. † 15:9 15:9 Eshayá Nabíay Ketáb 29:13. ‡ 15:13 15:13 Nehál, bezán nók keshtagén drachk. § 15:26 15:26 Issáyá maksad esh naat ke é janén nápák ent. Áiy maksad esh at ke janénya báwar cha Yahudiáni báwará gésh ent. * 15:28 15:28 Rédag, bezán mohkam.

³² Issáyá wati morid lóthet o gwashtant: “Maná é mardománi sará bazzaga bit, say róch ent mani kerrá ant o nun pa waragá hecchesh nést. Gón shodigén lápá eshán roksat kanaga nalóthán, chó mabit ke ráhá betosant o bekapant.” ³³ Moridán darráént: “É barr o gyábáná pa inchok mardomay waráká, nán cha kojá byáren?” ³⁴ Gorná Issáyá cha moridán jost kort: “Shomára chont nán gón?” Gwashtesh: “Hapt nán o lahtén hordén máhig.” ³⁵ Áiá mardom zeminay sará nendagay hokm dátant. ³⁶ Gorná haptén nán o máhigi zortant, Hodáay shogri gept, náni chondh chondh kort o moridáni dastá dátant o moridán mardománi sará bahr kortant. ³⁷ Sajjahénán sérá wárt o randá cha sar átkagén nánáni chondhán, moridán hapt sapt porr kort. ³⁸ Chár hazár mardéna warák wárt, áyán janén o chokk ham gón at. ³⁹ Mardománi roksat kanagá rand, Issá bójigá nesht o Magadanay sardhagará shot.

16

Ásmáni neshániay lóthag

(Markás 8:11–13; Luká 12:54–56)

¹ Parisi o Sadukiáni lahtén mardom Issáyá kerrá pa áiy chakkásagá átk o ásmáni neshánié lóthetesh. ² Bale Issáyá passaw dát: “Wahdé begáha bit shomá gwashét: ‘Bóm o hawá wassha bit chiá ke ásmánay rang sohr ent.’” ³ Sabáhá gwashét: ‘Maróchi tuppána bit chiá ke ásmánay rang moj o hónchak ent.’ É paymá ásmánay rang o neshániáni kesás kanagá zánét, bale zamánag o wahday neshániáni kesás kanagá nazánét. ⁴ Sherr o zenahkárén nasl o padréch neshániá lóthit, bale áyán Yunes nabiy neshániá abéd, dega hech neshánié dayaga nabit.” Randá Issáyá á yalah dátant o shot.

Parisi o Sadukiáni badén homir

(Markás 8:14–21)

⁵ Wahdé morid mazangwarmay domi pahnátá rasetant zántesh ke nánesh shamoshtag. ⁶ Issáyá gón áyán gwasht: “Hozhár bét! Cha Parisi o Sadukiáni homirá pahréz kanét.” ⁷ Gorná á watmánwat habar kanagá laggetant: “Wájah paméshká chosha gwashit ke má nán gón wat nayáwortag.” ⁸ Issáyá zánt ke ché gwashagá ant, paméshká gwashiti: “Oo kambáwarán! Chiá jérhagá ét ke ‘gón má nán nést,’” ⁹ angat hecch sarpad nabutagét?! Shomá á panchén nán shamoshtag, ke panch hazár mardomá

sérá wárt o cha sar átkagén naganán chont sapt porr kort? ¹⁰ Yá hamá haptén nán ke chár hazár mardomá wárt o sér kort o shomá cha sar átkagénán chont sapt porr kort? ¹¹ Gorná chón sarkecha nawarét ke man gón shomá nánáni bárawá habar nakortag? Cha Parisi o Sadukiáni homirá pahréz kanét.” ¹² Gorná morid sarpad butant ke áiá nagwashtag cha ártén homirá pahréz bekanant, cha Parisi o Sadukiáni dars o tálimá watá dur bedárant.

Petrosay mannag o gwáhi

(Markás 8:27–30; Luká 9:18–21)

¹³ Wahdé Issá Kaysariah Pilipiay sardhagará átk, cha wati moridán josti kort: “Mardom Ensánay Chokkay bárawá ché gwashant, man kay án?” ¹⁴ Áyán passaw dát: “Lahténa gwashit pákshódókén Yahyá ay, lahténa gwashit Elyás nabi ay, dega lahténa gwashit Eremiá nabi ay yá cha á dega nabián yakké.” ¹⁵ Gorná cha áyán josti kort: “Shomá wat mani bárawá ché gwashét, man kay án?” ¹⁶ Shamun Petrosá passaw dát: “Taw Masih ay, namiránén Hodáay Chokk.” ¹⁷ Issáyá darráént: “Oo Shamun, oo Yunáay chokk! Taw bahtáwaré ay, chiá ke é habar ensanéa* pa taw záher o paddar nakortag, mani Pet ke ásmáná ent, áiá paddar kortag. ¹⁸ Tará gwashán: Taw Petros† ay o é taláray sará man wati kelisáay bonyará éra kanán ke markay zór‡ áiá hechbar prósha nadant o áiy sará sóbena nabit. ¹⁹ Man ásmáni bádsháhiay kelitán tará dayán, zeminay sará harché ke taw makana kanay, ásmáná ham makan kanaga bit, harché ke zeminay sará taw rawá kanay ásmáná ham rawá kanaga bit.” ²⁰ Randá áiá wati morid parmán kortant: “Hechkasá magwashét ke man Masih án.”

Wati mark o jáh janagay§ bárawá,

Issáyá pëshgói

(Markás 8:31–33)

²¹ Cha hamá wahdá rand Issá gón wati moridán pa tachk o paddari habar kanagá lagget ke “allamá, býad ent Urshalimá berawán, cha kawmay kamásh, mazanén dini pëshwá o Sharyatay zánógeráni dastá sakkí o sóri besaggán o koshag bebán o saymi róchá zendag bebán o jáh bejanán.” ²² Petrosá á yak kerré kasshet o pa iráz gwashiti: “Oo Hodáwand! Hodá chosh makanát. Gón taw hechbar é paymá nabit.” ²³ Issáyá chak tarrént o gón Petrosá

* **16:17** 16:17 Asligén Yunáni nebeshtánka gwashit: “jesm o hón”. † **16:18** 16:18 Yunáni zobáná, “Petráay” máná “talár” ent. ‡ **16:18** 16:18 Asligén Yunáni nebeshtánka gwashit: “tahtarunay darwázag”. § **16:20** 16:20 Jáh janag, bezán cha wati jáhá anáगतén pád áyag, Arabi o Pársiá “qiám, rastákhiz”.

gwashti: “Oo Shaytán! Cha mani démá dur bay. Taw mani ráhá bandagá ay, tai hayál Hodái hayálé naent, ensáni hayálé.”

Issáay randgiri

(Markás 8:34—9:1; Luká 9:22–27)

²⁴ Randá Issáyá morid lóthetant o gwashti: “Agan kasé lóthit mani randgiriá bekant, báyard ent wati delay sajjahén lóth o wáhagán yalah bedant o pa sáhay nadr kanagá, wati jenday salibá baddhá bekant o mani ráhá gám bejant. ²⁵ Chiá ke, agan kasé wati sáhay rakkénagay johdá bekant, áiá báhénit, bale á ke wati sáhá pa manigia báhénit, áiá rakkénit. ²⁶ Agan kaséá sajjahén donyá berasit, bale wati sáhá bebáhénit, gorhá á chónén sóbé bárt o ché kattheta* kant? Mardom wati sáhá pa che kimmaté bahá zorta kant?”

²⁷ “Ensánay Chokk gón wati Petay mazanén shán o marháhá préshtagáni hamráhiá kayt, gorhá harkasá áiay kotragén káráni mozzá dant. ²⁸ Shomára rásténa gwashán, edá lahtén mardom ósháttag ke tán áyáni démá Ensánay Chokkay bádsháhi záher mabit, markay támá nachashant.”

17

Issáay dém o dróshomay drapshnáki

(Markás 9:2–13; Luká 9:28–36)

¹ Shash róchá rand, Issáyá Petros, Ákub o áiay brát Yuhanná, hamráh kortant o yak borzén kóhéay sará bortant ke ódá dega kass mabit. ² Ódá áyáni démá Issáay chehrag o dróshom badal but. Áiay dém róchay dhawlá drapshnák but o god o pósháki, espét espét butant. ³ Hamá wahdá áyáni démá Mussá o Elyás záher butant o gón Issáyá habar kanagá laggetant. ⁴ Petrosá gón Issáyá gwasht: “Oo Hodáwand! May edá bayag sakk sharr ent, agan tai razá bebit hamedá say sáheg o kápára* bandén, yakké pa taw, yakké pa Mussá o degaré pa Elyásá.” ⁵ Hamé wahdá ke angat á habará at, drapshókén jambaréá† áyáni sará sáheg kort o cha jambará tawaré átk o gwashti: “É mani dóstén Bacch ent, cha eshiá man báz wassh o razá án, eshiay habarán gósh bedaré.” ⁶ Wahdé moridán é tawár eshкот, sakk torsetesh o dém pa chér kaptant. ⁷ Bale Issá démá átk, dasti per kortant o gwashti: “Pád áét, matorsét!” ⁸ Wahdé áyán chamm pach kortant o cháret, abéd cha Issáyá dega hechkasesh nadist.

⁹ Cha kóhá ér kapagay wahdá Issáyá hokm kortant: “Tán hamá wahdá ke Ensánay Chokká cha mordagán jáh najatag, wati é distagénáni bárawá hechkasá hál madayét.” ¹⁰ Moridán jost kort: “Sharyatay zánóger chiá gwashant ke cha Masihay áyagá pésar, báyard ent Elyás nabi byayt?” ¹¹ Passawi dát: “Elyása kayt o sajjahén karán gwam o géga kant. ¹² Bale mana gwashán, Elyás wa átkag, áyán pajjáh nayáwort o harché ke áyáni delá lóthet, gón áiá hamá dhawlesh kort. Hamé dábá Ensánay Chokká ham cha áyáni dastá sakkí o sóri saggagi ent.” ¹³ Nun moridán zánt ke á pákshódókén Yahyáay bárawá habar kanagá ent.

Jenni bachakéay drahbakshi

(Markás 9:14–29; Luká 9:37–42)

¹⁴ Wahdé Issá o sayén morid mardománi mocchiay nazziká átkant, yak mardé Issáay démá átk, kóndhán kapt o gwashti: ¹⁵ “Oo wájah! Tará mani bachakay sará bazzag bát, áiá mergiay nádráhi gón ent o sakk azáb o bazzagia kant, bázén baré ásá kapit o báz bará ápá. ¹⁶ Man tai moridáni Kerrá áwort, bale áyán dráh kort nakort.” ¹⁷ Issáyá gwasht: “Oo bebáwar o gomráhén nasl o padréch! Man tán kadéna gón shomá bemánán? Tán chinchok wahdá shomára besaggán? Chokká edá mani Kerrá byaré.” ¹⁸ Issáyá jenn hakkal dát, jenn dar átk o bachak hamá damána dráh but.

¹⁹ Randá morid halwatá Issáay gwará átkant o cha áiá jostesh kort: “Má chiá á jenn kasshet nakort?” ²⁰ Issáyá passaw dát: “Shomay kambáwariay sawabá. Shomára rásténa gwashán, agan shomay báwar arzonéay kesásá[‡] ham bebit, shomá é kóhá gwashta kanét ke ‘cha edá bekenz o ódá beraw,’ kóha kenzit. Hech chizz pa shomá nabuteni naent. ²¹ Bale é dhawlén jenn, abéd cha dwá kanag o róchag dáragá dara nayáyant.”[§]

Issáay markay domi peshgói

(Markás 9:30–32; Luká 9:43–45)

²² Wahdé Jalilá yakjáh butant, Issáyá gón áyán gwasht: “Ensánay Chokk dróhaga bit o anchen mardománi dastá dayaga bit ²³ ke áiá koshant, bale saymi róchá á zendaga bit o jáha jant.” Cha é habarán, áiay morid báz paréshán o deltaparkah butant.

Mazanén parasteshgáhay song o máliát

* 16:26 16:26 Katthag, bezán nap o sutt kanag, dastá árag. * 17:4 17:4 Kápár, kápár, kapar. † 17:5 17:5 Jambar, bezán abr. ‡ 17:20 17:20 Asligén Yunáni nebeshtánka gwasht: “thélkáhay tohmay kesásá.” Thélká, bezán hardalay tohm báz gwandh ant. § 17:21 17:21 Lahtén daznebeshtá band 21 néstent.

²⁴ Wahdé Issá o áiy morid Kaparnáhumá rasetant, gorhá mazanén parasteshgáhay songi o máliátgír Petrosay kerrá átkant o jostesh kort: “Tai ostád mazanén parasteshgáhay songá nadant?”

²⁵ Passawi dát: “Haw, dant.” Wahdé Petros lógá átk, Issáyá cha áia pésar hamé jost kort ke “oo Shamun! *Donyáay bádsháh cha kayá song o máliáta gerant? Cha wati chokkán yá cha degarán?”

²⁶ Passawi tarrént: “Cha degarán.” Issáyá gwasht: “Gorhá chokk bakshaga bant. ²⁷ Bale pa áyani naranjénagá, mazangwarmay tayábá beraw o nahigé ápá dawr beday, hamá máhig ke pésará nahigá jant, áiy dapá pach kan, taw yak chárkaldári† zarré genday, hamáia bezur, manig o wati songá porr kan.”

18

Mazani chi ent?

(Markás 9:33–37; Luká 9:46–48)

¹ Hamá wahdá morid Issáyá kerrá átkant o jostesh kort: “Bárén, ásmáni bádsháhiá sajjahénáni master o kamásh kay ent?” ² Issáyá kasánén chokké tawár kort, áyani nyámá óshhárent o ³ gwashti: “Shomára rásténa gwashán, agan shomá watá badal makanét o kasánén chokkáni paymá mabét, hechbar ásmáni bádsháhiá pád ér korta nakanét. ⁴ Paméshká harkas watá é chokkay dhawlá békebr bekant, ásmáni bádsháhiá hamá cha sajjahénán mastera bit. ⁵ Harkas pa mani námá, gón washwáhagi é dhawlén chokké wati gwará bedárit, bezán áia maná dáshtag.

Radiáni sawabsáz

(Markás 9:42–48; Luká 17:1–2)

⁶ “Harkas, cha é kasánokénán ke mani sará báwarmand ant yakkéá dém pa gonáhá bebárt, pa áia gehter ent ke jenterí táé áiy gardená bebandant o daryáay johlánkián chagal bedayant. ⁷ Zár o wáwaylá pa é donyáyá ke gomráhiáni sawab ent. Nabit ke mardom rad majant o thagal mawárt, bale apsóz pa hamá kasá ke radiáni sáchók o sawabsáza bit.

⁸ “Agan tai dast yá pád tará dém pa gonáhá bebárt, áia borri o dawr day, chiá ke gón doén dast o pádán tahtarunay dáemi ásá kapagay badalá, pa taw sharter hamesh ent ke lang o mondh, namiránén zenday wáhond bebay. ⁹ Agan tai chamm tará dém pa gonáhá bebárt, áia ham dar kan o dawr day, chiá ke gón doén

chammán dózahay ásá kapagay badalá, pa taw sharter hamesh ent ke gón yak chamméá namiránén zenday wáhond bebay.

Gáren mész

(Luká 15:3–7)

¹⁰ “Hozzhár bét. Cha é kasánénán yakkéá ham kamarzesh mazánét o ér majanét. Man shomára gwashán ke ásmáná esháni préshtag, modám mani ásmáni Petay chehragá gendant. ¹¹ Ensánay chokk pa gonáhkár o gárenáni rakkénagá átkag. ¹² Shomá ché gwashét? Agan kaséá sad mész bebit o cha áyan yakké gár bebit, gorhá nawad o nohén mészán kóhá yalaha nadant o gáren mészay shóháza narawt? ¹³ Shomára rásténa gwashán, agan gáren mészá dar begéjit, cha á nawad o nohén gár nabutagénán, pa eshiá géshter gal o shádehia kant. ¹⁴ Hamé paymá, shomay ásmáni pet cha é kasánénán yakkéay gár bayagá ham razá nabit.

Gón radkárén brátá

¹⁵ “Agan tai brát radié† bekant, beraw o mán halwatá cha á gonáhá sahigi bekan, agan tai habari gósh dásht, gorhá bezán tará wati brát raset. ¹⁶ Bale agan tai habari namannet, gorhá yak o cha áyan ramrah bekan, chiá ke *har chizzay rásti, gón do yá say mardomay sháhedíá paddar kanag bebit*.[‡] ¹⁷ Agan áyani habari namannet, gorhá kelisáyá hál beday, bale agan kelisáy habari ham gósh nadásht, gorhá áia nábawaráni dhawlá§ bezán. ¹⁸ Shomára rásténa gwashán, harché ke shomá zemínay sará makana kanét, ásmáná ham makan kanaga bit, harché ke shomá zemínay sará rawá kanét, ásmáná ham rawá kanaga bit. ¹⁹ Man shomára é ham gwashán, agan zemínay sará cha shomá do kas, pa hamdéli o tepák chizzé belóthit, har wáhagé ke bebit, cha mani ásmáni Petay némagá áyána rasit. ²⁰ Chiá ke har jáh do yá say kas mani námay sará hór bebit, man gón áyan góna bán.”

Námehrabánén hezmatkáray mesál

(Luká 17:3–4)

²¹ Hamá wahdá Petrosá cha Issáyá jost kort: “Oo Hodáwand! Agan mani brát gón man badí bekant, gorhá tán chont randá man áia pahell bekanán? Tán hapt randá?” ²² Issáyá passaw dát: “Man tará

* **17:25** 17:25 Petros hamá Shamun ent; bechár Mattá, bahr 10, band 2. † **17:27** 17:27 Asligén Yunáni nebeshtánka gwasht: “stater”, bezán chár derham. * **18:11** 18:11 Lahtén daznebeshtá band 11 néstent. † **18:15** 18:15 Lahtén daznebeshtá átkag: “gón taw badíé bekant”. ‡ **18:16** 18:16 Bechár: Sharyatay Domi Rahband, bahr 19, band 15.

§ **18:17** 18:17 Asligén Yunáni nebeshtánka gwasht: “darkawm o songiáni dhawlá”. * **18:22** 18:22 Yá “haptád o hapt randá”.

gwasrán, hapt randá na. Haptá, haptád randá* hesáb kan o bebakshi.

²³ “Chíá ke ásmáni bádsháhi, hamá bádsháhay dhawlá ent ke cha wati golámán hesáb geragi lóthet. ²⁴ Wahdé hesáb geragá lagget, yak mardé áiy demá áwortesh ke lakkáni lakk† wámdár at, ²⁵ bale áiy wám dát nakortant. Paméshká hodábondá parmán kort ke á wat gón jan o chokkán o dega harché ke áiy hastat, bahá kanag o wám gerag bebant. ²⁶ Golám áiy pádán kapt o mennat o zári kort o gwashti: ‘Maná móh beday, tai sajjahén wámána dayán.’ ²⁷ Hodábondá golámay sará bazzag but, cha á wámán sar gwast o ázáti kort.

²⁸ “Bale wahdé á golám dhanná dar átk, wati hamkárén golámi dist ke áiy sad dináray wámdár at, dasti gotthá sakk dátant o gwashti: ‘Mani wámán beday.’ ²⁹ Áiy pádán kapt o mennat o zári kort o gwashti: ‘Maná móh beday, tai sajjahén wámána dayán.’ ³⁰ Bale áiy namannet o tán wámáni dayagá jéla bandi kort. ³¹ É dega golám cha é sargwastay gendagá báz delranj butant o sajjahén hál o habaresh pa wati hodábondá sar kort. ³² Gorhá hodábondá á golám lóthet o gwashti: ‘Oo radkárén golám! Man wám tará paméshká bakshetant ke taw gón man báz mennat o zári kort. ³³ Anchosh ke maná tai sará bazzag butagat, tará ham báyard wati wámdáray sará bazzag butén.’ ³⁴ Hodábond zahr gept o á golámi tán sarjamén wámáni dayagá band kanaént. ³⁵ Nun agan shomá wati bráta pa del mabakshét, mani ásmáni pet ham gón shomá hamé dhawlá kant.”

19

Sur o sawnay bárawá
(Markás 10:1-12)

¹ Wahdé Issáyá é habar halás kortant, Jalilay damagi yalah dát o dém pa Yahudia-hay hamá hand o damagá shot ke Ordonay kawray domi pahnátá ent. ² Mardománi mazanén rombé áiy randá gón at o Issáyá ódá áyani nádráhén mardom dráh kortant.

³ Lahtén Parisi, Issáy chakkásagá áiy kerrá átk o jostesh kort: “Báren, pa mardá rawá ent ke wati janay talák o sawnán bedant, sawab toré harché bebit?”

⁴ Passawi tarrént: “Shomá nawántag ke Hodáyá jahánay jórhenagay wahdá ensán mardén o janén addh kortag* o ⁵ gwashtagi: *Paméshká, mard cha wati pet o mátá jetá o gón wati janá hór o*

yakjáha bit. Mard o jan, yak jesm o jána bant.† ⁶ É paymá, nun á do naant, yak jesm o jan ant. Paméshká, á ke Hodáyá yakk kortagant, ensán áyan jetá makant.” ⁷ Jostesh kort: “Gorhá parchá Mussáyá parmán dátag ke mard pa wati janay sawn dayagá, áiy taláknámahé bedant o begishéniti?” ⁸ Issáyá passaw dát: “Mussáyá shomay sengdeliay sawabá janénáni sawn dayag rawá kortag, cha bongéjá é dhawl nabutag. ⁹ Shomára gwasrán: Harkas cha zenahkária abéd, pa dega sawabéa wati janénay sawn o talákán bedant o gón dega janénéa sur o sáng bekant, bezán zená kanagá ent.”

¹⁰ Moridán gwasht: “Agan mard o janay nyámá jáwar é dhawlá ent gorhá sur nakanag sharter ent.” ¹¹ Gwashti: “É tálimá harkas zorta nakant, hamá kas zorta kant ke áiy é wák o twán bakshag butag. ¹² Lahtén sur korta nakant chíá ke cha máyap lápá é dhawlá pédá butag, lahtén cha mardománi dastá anchosh butag o lahtén pa ásmáni bádsháhiá cha sur o árosá sara gwazit. Agan kasé é habará saggít, hamé dhawlá bekant.”

Issá o kasánén chokk

(Markás 10:13-16; Luká 18:15-17)

¹³ Á wahdá kasánén chokkesh Issáy kerrá áwortant ke wati dastá áyani sará per bemoshit o dwá bekant, bale moridán neherr o hakkal dátant. ¹⁴ Issáyá gwasht: “Chokkán bellét mani kerrá byáyant, áyani demá madarét, chíá ke ásmáni bádsháhi anchén mardománig ent.” ¹⁵ Nun Issáyá áyani sará dast per mosht. Gorhá wati ráhi gept o shot.

Zardáren warná o namiránén zend

(Markás 10:17-31; Luká 18:18-30)

¹⁶ Padá yak mardé Issáy kerrá átk o josti kort: “Oo ostád! Man kojám nékén káran bekanán ke namiránén zenday wáhond bebán?” ¹⁷ Issáyá gwasht: “Taw chíá nékiay bárawá cha man josta kanay? ‘Nékén’ tahná yakké, á Hodáay jend ent, agan taw zendmána lóthay, gorhá Hodáay hokmáni sará kár kan.” ¹⁸ Josti kort: “Kojám hokmáni sará?” Issáyá gwasht: “Hón makan, zená makan, dozzi makan, drógén sháhedi maday, ¹⁹ wati pet o mátá ezzat beday, gón wati hamsáhegá wati jenday paymá mehr bekan.”‡ ²⁰ Warnáén mardá gón Issáyá gwasht: “É sajjahén man kortagant. Dega kojám kár pasht kap-tag?” ²¹ Issáyá passaw dát: “Agan lóthay tamánén ensáné bebay, beraw wati sajjahén mál o hastiá bahá kan o zarrán garib

† 18:24 18:24 Asligén Yunáni nebeshtánka gwasht: “dah hazár talánt”, bezán 60 milyun róchay pagár. * 19:4 19:4 Pédaesh 1:27. † 19:5 19:5 Pédaesh 2:24. ‡ 19:19 19:19 Láwián 19:18.

o nézgarén mardománi sará bahr kan, é paymá tará ásmáni ganjé rásit. Gorhá byá o mani randgiriá bekan.”²² Anchosh ke warnáyá é habar eshkot, báz gamig o paréshán but o shot, chiá ke á sér o azgárén mardé at.

²³ Issáyá gón moridán gwasht: “Shomará rásténa gwashán, pa azgár o máldarén mardomán ásmáni bádsháhiá pád ér kanag sakk grán ent.”²⁴ Haw, shomará gwashán: Suchenay domká oshteray gwazag wa báz grán ent, bale Hodáay bádsháhiá, zardáren mardomay rawag angat gránter ent.”²⁵ É habaray eshkonagá, morid sakk hayrán butant o watmánwatá gwashtesh: “Gorhá kay rakketa kant?”²⁶ Issáyá áyáni némagá cháret o gwashti: “Pa ensáná nabuteni ent, bale Hodáay dastá har chizz buta kant.”

²⁷ Gorhá Petrosá gwasht: “Má wati har chizz yalah dátag o tai randgiriá kanagá én, bárén márá ché rásit?”²⁸ Issáyá gón áyán gwasht: “Shomará rásténa gwashán, hamá nókén donyáyá wahdé Ensánay Chokk wati shán o shawkatay tahtay sará nendit, shomá ke mani hamráh ét, dwázdah tahtay sará nendét o Bani Esráilay dwázdahén kabilaháni dádrasiá kanét.”²⁹ Harkasá pa mani námaygi lóg, brát o gohár, pet o mát, chokk yá mál o dhagár yalah dátagant, áiá sad sari géshtera rásit o abadmánén zenday wáhonda bit.³⁰ Bale bázéné ke awali ent, áheria bit o hamá ke áheri ent awalia bit.

20

Kárendah o mozz

¹ “Ásmáni bádsháhi, bágéay hamá hodábonday paymá ent ke pa wati anguri bágá, kárendahay shóházá máhallah dar kapt.”² Áiá, róchmozz yak dinaré gishént o kárendah pa kará bágá rawán dátant.”³ Kesás say sáhatá rand* dar átk o disti lahtén kárendah bázará békár óshtátag.”⁴ Gwashti: ‘Shomá ham berawét mani bágá kár kanét. Harché ke shomay hakka bit, shomará dayán.’⁵ Gorhá á shotant. Padá némróchá† o dém pa bégáhá‡ dhanná dar átk o anchoshi kort.”⁶ Rónenday nazziká§ padá dar átk o disti dega lahtén mardom óshtátag, cha áyán josti kort: ‘Chiá shomá sajjahén róchá békárá óshtátagét?’⁷ Gwashtesh: ‘Márá hechkasá kár nadátag.’ Bágay hodábondá

gwasht: ‘Shomá ham berawét o bágá kár kanét.’

⁸ “Rónend but o hodábondá gón wati kármasterá gwasht: ‘Godhsari kárendahán beger tán awaligénán, sajjahénáni mozzá beday.’⁹ Hamáyán ke rónenday nazziká kár bongéj kortagat, harkasá yak dinaré mozz raset.”¹⁰ Randá hamáyáni bárig átk ke pésará káresh bongéj kortagat, áyáni hayál at ke géshtereshá rásit, bale áyán ham yak yak dinaré raset.”¹¹ Wati mozzesh zort o bágay hodábonday sará norondhagá laggetant o gwashtesh: “Cha sajjahénán o rand átkagén kárendahán yak sáhaté kár kortag o má sajjahén róchá garmi saggetag o kár kortag, bale taw mayg o áyáni mozz barábar kortant.”¹² Bágay hodábondá gón yakkéá gwasht: ‘Oo mani sangat! Man gón taw náhakkí nakortag. Taw wat gón man róché yak dinaréá namannetag?’¹³ Paméshká haminchok ke tai hakk ent bezur o beraw. É mani tab ent ke harché tará dayán, haminchok cha taw rand átkagén kárendahán ham bedayán.”¹⁴ Záná, man wati zarráni master wat naán, har dhawlá ke lóthán gón wati zarrán hamá dhawl bekanán? Yá ke tai chamm mani daspachiá dista nakant?’¹⁵ É dhawlá, á ke awali ant, áheria bant o hamá ke áheri ant, awalia bant.”

Issáy markay saymi péshgói

(Markás 10:32–34; Luká 18:31–34)

¹⁷ Urshalimay rawagay wahdá, ráhá, Issáyá dwázdahén morid yak kerré bortant o gwashti: “Nun má Urshalimá rawagá én, ódá Ensánay Chokká gerant o mazanén dini péshwá o Sharyatay zánógeráni dastá dayant. Áiay markay homká barrant o¹⁹ darkawmén mardománi dastá dayanti. Darkawmén mardom áiay sará rishkand o maskará kanant, gón hayzarán mána bandant o salibay sará dranjanti. Bale saymi róchá, á padá zendaga bit o jáha jant.”

Naráhén wáhag

(Markás 10:35–45)

²⁰ Hamé wahdá Zehdiay chokkáni mát, wati chokkáni hamráhiá Issáyá kerrá átk, áiay pádán kapt o lótheti ke pa mennatgiri chizzé begwashit.”²¹ Issáyá cha áiá jost kort: “Begwash, ché lóthay?” Gwashti: “Wahdé tai bádsháhia kayt, labz kan ke mani doén chokkán gón wata nendárenay, yakkéá wati rástén o domiá chappén némagá.”²² Issáyá passaw dát: “Shomá

* **20:3** 20:3 Asligén Yunáni nebeshtánka gwasht: “saymi sáhatá”, bezán sáhat nohá. Yahudiáni róchay hesáb, sáhat sohbay shashá bongéja but. † **20:5** 20:5 Asligén Yunáni nebeshtánka gwasht: “shashomi sáhatá”. ‡ **20:5** 20:5 Asligén Yunáni nebeshtánka gwasht: “nohomi sáhatá”, bezán sáhat sayá. § **20:6** 20:6 Asligén Yunáni nebeshtánka gwasht: “yázdahomi sáhatá”, bezán sáhat panchá.

nazánét ché lóthagá ét. Báren, á jámá ke mana nóshán shomá nósheta kanét?*" Gwashtesh: "Ji haw, má wártia kanén." 23 Issáyá gwasht: "Shomará mani jám nóshagi ent, bale é mani dastá naent ke kay mani rástén o kay chappén némagá benendit. É jágah hamáyánni ant ke mani Petá pa áyán gisshéntagant."

24 Wahdé á dega dahén moridán é habar eshkor, doén brátáni sará zahr geptant. 25 Gorhá Issáyá sajjahén morid lóthetant o gwashti: "Shomá zánét ke darkawmáni hákem mardománi sará hákemia kanant o kawmáni master wati chérdastén mardománi sará wati ehtiárá kára bandant. 26 Bale shomá chosh makanét. Cha shomá harkas ke mazania lóthit báyad ent sajjahénáni hezmatkár bebit o 27 cha shomá harkas ke masteria lóthit, shomay kaster o dazbój bebit. 28 Hamé dhawlá, Ensánay Chokk nayátkag ke mardom áiy hezmatá bekanant, átkag ke mardománi hezmatá bekanant o gón wati sáhay dayagá, bázénéá berakkénit."

Do kóray drahbakshi

(Markás 10:46-52; Luká 18:35-43)

29 Wahdé cha Ariháay shahrá dar áyagá atant, bázén mardomé Issáyá randá gón at. 30 Áyáni ráhay sará neshtagén do kórá eshkor ke Issá cha ódá gwazagá ent, kukkáresh kort o gwashtesh: "Oo Hodáwand, oo Dáud bádsháhay chokk! Tará may sará bazzag bát." 31 Mardomán á hakkal dátant o gwashtesh: "Bétawár bét," bale áyán géshter kukkár kort: "Oo Hodáwand, oo Dáud bádsháhay chokk! Tará may sará bazzag bát." 32 Issá óshítát o josti kort: "Shomá cha man ché lóthét? Pa shomá ché bekanán?" 33 Áyán passaw dát: "Oo Hodáwand! Mára biná kan." 34 Issáyá áyáni sará bazzag but, dasti chammán per moshtant o hamá damaná biná butant o Issáyá randá gón kapt o shotant.

21

Pa Issáyá wasshátka

(Markás 11:1-11; Luká 19:28-38; Yuhanná 12:12-15)

1 Wahdé Urshalimay nazziká átkant o Zaytunay kóhay dámoná Bayt-Pájiay métagá rasetant, Issáyá do morid rawán dát o 2 gwashtanti: "Démi métagá berawét, anchosh ke ódá rasét haré gendét ke bastag o korragi ham gón ent, áyán

bójét o pa man byáret. 3 Agan kaséá gón shomá chízzé gwasht, begwashét: 'Wájahá pakár ant o randá ráhesha dant.' 4 Paméshká é dhawlá but tán hamá chízz ke nabaiy zobáná péshgói kanag butag, rást o paddar bebit:

5 "Gón Sahyunay Jeneká begwashét:

'Nun tai bádsháh tai gwará békebr pédák ent o

haréá, bezán korragéá swár ent.' 6

6 Gorhá morid shotant o hamá paymá ke Issáyá gwashtagat, hamá dhawlá kortesh.

7 Áyán har o korrag áwortant, wati shál o cháderesh haráni poshtá ér kortant o Issá swár but. 8 Bázénéá wati shál o cháder ráhay sará chérgéján kortant, dega bázén mardoméá drachkáni thál o ták borret o ráhay sará ér kort. 9 Issáyá péshromb o padrombén mardom, kukkár kanána gwashagá atant:

"Hushiáná, † oo Dáud bádsháhay chokk!

Mobáarak bát hamá ke pa

Hodáwanday námá kayt,

Hushiáná, borzén arshá."

10 Wahdé Issá Urshalimá raset gorhá shór o walwalahé macchet. Shahray mardom jostá atant ke "é kay ent?"

11 Mocchiay mardomán passaw dát: "É hamá nabi ent, Issá ke Jalilay shahr Náserahay nendóké."

Cha mazanén parasteshgáhá sawdágeráni dar kanag

(Markás 11:15-18; Luká 19:45-48)

12 Issá mazanén parasteshgáhay péshjáhá§ shot o ódá sawdáger o grákáni* gallénag o dar kanagá goláesh but. Zarr badal kanókén sarrápáni mizz o barónki chappig kortant o kapót bahá kanókáni korsi o tahtagi dawr dátant. 13 Gwashti: "Hodáay Ketábá nebisag butag: *mani lóg, dwá o parasteshay jágah bebit*, bale shomá dozzbázaré kanéti."

14 Mazanén parasteshgáhay péshjáhá, bázén kór o lang Issáyá kerrá átkant o áiyá dráh kortant. 15 Wahdé mazanén dñi péshwá o Sharyatay zánógerán Issáyá mójegah o ajekkái distant o é ham distesh ke parasteshgáhá kasánén chokk pa kukkár "Hushiáná, oo Dáud bádsháhay chokk" gwashagá ant, báz nawassh butant o 16 cha Issáyá jostesh kort: "Eshkonagá ay é chokk ché gwashagá ant?" Gwashti:

"Haw! Eshkonagá án. Shomá hechbar nawántag ke:

* 20:22 20:22 Issáyá maksad cha jámá wati markay jám, bezán salibay sakkí o sóriáni saggag ent. * 21:3 21:3

Yá ke: Wájahá pakár ant. Gorhá wáhond dantesh. † 21:5 21:5 Zakaryá Nabaiy Ketáb, bahr 9, band 9. Sahyun yak kóhé, ke Urshalimay shahray bonred é kóhay sará ér kanag butag. Sahyunay Jenek, bezán Urshalimay jahmenendén mardom. ‡ 21:9 21:9 Hushiáná, bezán "mára annun berakkén". § 21:12 21:12 Péshjáhá, bezán péshgáh, lógay chárdiwal, sahn.

* 21:12 21:12 Grák, bezán á ke sawdá zurit. Arabi o Pársiá "moshtari, kharidár".

'Taw pa wat satá o saná, chokk o shirmechén nonmokáni dapá ham dátag

ke tará satá bekanant?"†

¹⁷ Gorhá Issáyá á yalah kortant o cha shahrá dhann dar átk o Bayt-Anyáay métagá wati shapi róch kort.

Enjiray drachkay hoshk bayag
(Markás 11:12-14, 20-24)

¹⁸ Wahdé Issá sabáhá máhallah per tarag o shahray némagá rawagá at, shodig but. ¹⁹ Ráhay sará enjiray drachké disti, áiy némagá shot bale abéd cha taká dega hecchi nadist. Gorhá gwashti: "Dega baré, hechbar burr o bar makanátay" o hamá damáná drachk gimmort o hoshk but. ²⁰ Eshiy gendagá morid hayrán butant. Jostesh kort: "Chón but ke yak anágat drachk gimmort?" ²¹ Issáyá passaw dát: "Shomará rásténa gwashán, agan shomará báwar ent o delá shakka nayáret, gorhá hamá dhawlá ke man gón enjiray drachká kortag, shomá ham an-chosh o angat géshter korta kanét. Agan shomá é kóhá begwashét ke 'watá cha edá chest kan o daryáay tahá dawr beday,' gorhá hamé dhawlá bit. ²² Agan shomá báwar kanét, harché ke wati dwayáni tahá lóthét, shomará dayaga bit."

Issáy ehtiár

(Markás 11:27-33; Luká 20:1-8)

²³ Hamá wahdá ke Issá mazanén parasteshgáhay péshjáhá shot o tálim dayagá lagget, mazanén dini péshwá o kawmay kamásh áiy kerrá átkant o jostesh kort: "'Taw gón kojám hakk o ehtiárá é kárána kanay? Kayá tará é káráni kanagay ehtiár dátag?" ²⁴ Issáyá passaw dát o gwashti: "Maná ham cha shomá josté hast, agan mani jostay passawá bedayét, gorhá shomará gwashán ke gón kojám hakk o ehtiárá é kárána kanán. ²⁵ Shomay hayálá, Yahyáyá cha kojá pákshódi dayagay ehtiár rasetagat, cha ásmáná yá cha ensánay némagá?" Áyán watmánwatá shawr o saláh kort o gwashtesh: "Agan begwashén cha ásmáná at, gorhá mára gwasht: 'pa ché áiy sará imánó nayáwort?' ²⁶ Agan begwashén ke cha ensánay némagá butag, gorhá mára cha mardomána torsit chiá ke sajjahén mardomán mannetag ke Yahyá nabí." ²⁷ Paméshká passawesh dát: "Má nazánén." Issáyá gwasht: "Gorhá man ham shomará nagwashán ke gón kojám hakk o ehtiárá é kárána kanán."

Do chokkay mesál

²⁸ "Nun shomá ché gwashét? Yak mardé hastat, áiy do bacch atant. Wati masterén bacchay kerrá shot o gwashti: 'Oo mani chokk! Maróchi beraw anguri bágá kár kan.' ²⁹ Áiá passaw dát: 'Mana narawán,' bale randá pashómán but o shot. ³⁰ Gorhá domi bacchay kerrá shot o hamé dhawlá gwashti. Bacchá passaw dát: 'Ji haw, mani wájah! Mana rawán,' bale nashot. ³¹ Cha é doénán kojám bacchá wati petay habar zort?" Áyán passaw dát: "Awaligá." Issáyá gón áyán gwasht: "Báwar kanét, songi o máliátgir o chalandhén janén cha shomá pésar Hodáay bádsháhiá rawant. ³² Chiá ke Yahyá pahrézkáriay ráh o rastahá shomay kerrá átk, bale shomá áiy sará báwar nakort, songi o chalandhén janénán áiy sará báwar kort o shomá é chizz gón wati chammán dist, angat pashómán nabuté o báwaró nakort.

Gandahén bágpanáni mesál

(Markás 12:1-12; Luká 20:9-19)

³³ "Dega yak mesalé gósh dorét: Zemináreá anguri bágé addh kort o áiy chapp o chágerdá pall o pasili bast, pa anguráni shiragay geragá, kall o kombé jórhi kort o pa negahpániá yak borjé ham basti. Randá bági pa konandahkári o zamán‡ lahtén bágpanay dastá dát o wat saporéa shot. ³⁴ Wahdé anguray mósom but, pa wati bahray geragá, hezmatkári zamánzurén bágpanáni kerrá ráh dátant. ³⁵ Bágpanán áiy hezmatkár gep-tant, yakké lathh o kotthesh kort, domi ham jat o kosht o saymiesh sengsár kort. ³⁶ Randá, cha pésarigénán géshter hezmatkári ráh dát, bale bágpanán gón áyán ham hamé dhawlá kort. ³⁷ Godhsará, wati chokki ráh dát, hayáli kort balkén áiy ruá bedárant. ³⁸ Bale wahdé bágpanán áiy chokk dist, watmánwatá gwashtesh: 'Bágay mirás barók hamesh ent, byáét bekoshéni tán eshiay melk o mirásay hodábond wat bebén.' ³⁹ Gorhá gept o cha bágá dhann bort o koshtesh. ⁴⁰ Nun wahdé anguray bágay hodábonda kayt, gón é bágpanán ché kant?" ⁴¹ Áyán passaw dát: "Á, é badkerdén bágpanán gár o bégwáha kant o bágá dega bágpanáni dastá dant ke áiy bahrá pa wahda dayant." ⁴² Issáyá cha áyán jost kort: "Shomá Hodáay Pákén Ketábán nawántag:

Á seng ke bánbandén ostáyán‡spasond nakort o nazort

hamá seng, bonhesht*but.

É Hodáwanday kár ent o

† 21:16 21:16 Zabur 8:2. ‡ 21:33 21:33 Konandahkári o zamán, bezán paymámkári, ejáray sará, thékah. § 21:42 21:42 Bánbandén ostá hamá ent ke lógay bandagá zántkár ent. * 21:42 21:42 Bonhesht, bezán lógay awali hesht yá seng. † 21:42 21:42 Zabur 118:22-23.

may chammán ajab ent."†

43 "Paméshká gón shomá gwashán ke Hodáay bádsháhi, cha shomá pach gerag o yak kawméa dayaga bit ke áiy bar o samará kárit. 44 Kasé ke hamé sengay sará kapit, thokkor thokkora bit o kasé ke seng áiy sará kapit, hurta bit."‡

45 Wahdé mazanén dini péshwá o Parisián Issáay mesál eshkotant, sarpad butant ke á hamáyáni bárawá habar kanagá at. 46 Lóthetesh Issáya dazgir bekanant, bale cha mardomána torsetesh, chiá ke mardománi chammá Issá paygam-baré at.

22

Bádsháhay chokkay áros
(Luká 14:15-24)

1 Issáya padá gón mardomán pa mesál o darwar habar kort o gwasht: 2 "Ásmáni bádsháhi, hamá bádsháhay paymá ent ke pa wati chokkay árosá mehmánié korti. 3 Golámi lóthetagéen mehmánáni randá ráh dátant, bale áyáni delá nalóthet byáyant. 4 Gorhá áia dega lahtén golám ráh dát o hokmi kort ke gón hamá lóthetagéen mardomán begwashant: 'Shámon tayár kortag, káigar* o pábondi† gwask‡ helár kanag butagant o har chizz tayár ent, byáét árosay mehmániá gón bebét.' 5 Bale parwáshesh nakort o harkas wati káray némagá shot, yakké dhagaráni némagá o yakké dém pa wati sawdágeriá. 6 Á degarán áiy golám gept o sobakk o béezzt kort o koshtant. 7 Bádsháh sakk zahr gept o pa hónigáni janag o áyáni shahray sóchagá sepáhigi ráh dátant. 8 Gorhá gón wati golámán gwashti: 'Árosay mehmáni tayár ent, bale hamá ke lóthag butagant, áyagay láhek naatant. 9 Paméshká berawét chárráháni sará harkasá ke gendét, áyán mani mehmániá byáret.' 10 Bádsháhay golám shotant o sharr o gandah, harkasesh ke dist, sajjahéness yakkj kort o áwortant o árosay tálár cha mehmáná porr but.

11 "Nun wahdé bádsháh mehmánáni chárágá átk, yak anchéen mardé disti ke suri godi gwará naat. 12 Bádsháhá cha áia jost kort: 'Hambal! Bé suri pósháká, taw chón tóká potertagay?' Bale áia hech passaw dát nakort. 13 Gorhá bádsháhá gón wati golámán gwasht: 'Eshiy dast o pádán bandét o dhanná taháriá dawr bedayét.' Ódá gréwant o dantán pa dantána

droshant. 14 Chiá ke lóthetagéen báz ant, bale gechéen kortagéen kamm."

Máliátay bárawá

(Markás 12:13-17; Luká 20:20-26)

15 Hamé wahdá Parisi shotant o anchéen pandal o repké kortesh ke Issáya chón cha áiy jenday habarán mán begishshéent o dámá dawr bedayant. 16 Nun lahtén shágerdesh gón Hirudiáni§ hamráhiá áiy kerrá rawán dát tán begwashant: "Oo ostád! Má zánén ke taw tachk o rástén mardomé ay o Hodáay ráhá pa rástia sója dayag o hechkaséay némagá nageray, chiá ke sajjahénán pa yak chamméa cháray. 17 Mára begwash, tai hayalá Rummy bádsháh Kaysará song o máliát dayag rawá ent yá na?" 18 Issáya áyáni gandahén pegr zánt o gwashti: "Oo dopóstén shatakáran! Chiá maná chakkásagá ét? 19 Cha hamá zarrán ke pa máliátá dayant, yakké maná pésh bedáret." Áyán yak dinaré pésh kort. 20 Issáya cha áyán jost kort: "Eshiy sará kai nám o naksh per ent?" 21 Gwashtesh: "Kaysaray." Nun Issáya darráent: "Gorhá Kaysaraygá Kaysará bedayét o Hodáaygá Hodáyá bedayét." 22 É habaráni eshkonagá á hayrán butant o Issáesh esht o shotant.

Áherat o sáng o sur

(Markás 12:18-27; Luká 20:27-40)

23 Randá, lahtén Saduki ke áheratay namannók ant, Issáay kerrá átk o jostesh kort: 24 "Oo ostád! Mussáya gwashtag: 'Agan kasé bé poshtpadá bemerit, báyd ent áiy brát gón áiy janózámá sur bekant, tán pa wati brátá rand o ráhé bellit.*' 25 May némagá hapt brát hastat. Awali brátá sur kort, bé chokká mort o wati jani pa á dega brátá esht. 26 Padá gón domi o saymi tám haptomiá anchosh but. 27 Godhsará, á janén ham mort. 28 Nun taw begwash, áheratay róchá é janén cha haptén brátán kojám brátayga bit? Chiá ke sajjahén brátán bárig bárigá gón áia sur kortagat."

29 Issáya passaw dát: "Shomá rad wártag, chiá ke na cha Páken Ketábán chizzé sarkecha waré o na Hodáay wák o zóra sarpada bét. 30 Áheratá, na kasé sura kant o na sur dayaga bit, ásmáni préshtagáni dhawlá bant. 31 Mordagáni padá zendag bayag o jáh janagay bárawá, záná shomá hamá habar nawántag ke Hodáyá shomára gwashtagat: 32 *Man án, Ebráhémay Hodá, Eshákay Hodá o Ákubay*

‡ 21:44 21:44 Lahtén daznebeshtá band 44 nést.

* 22:4 22:4 Káigar, bezán mazanén narén gók.

† 22:4 22:4 Pábondi, bezán hamá pas o gók ent ke pa helár kanagá lógay dapá dáranti.

‡ 22:4 22:4 Gwask, bezán góló, gókay chokk. § 22:16 22:16 Hirudi, bezán Hirudis bádsháhay dózwáh.

* 22:24 22:24 Sharyatay Domi Rahband 25:5 o rand. † 22:32 22:32 Dargwaz 3:6.

Hodá?[†] Bezán á, mordagáni Hodá naent, zendagénáni Hodá ent.”³³ Mardom cha Issáay é habaráni eshkonagá hayrán o habakkah butant.

Masterén hokm

(*Markás 12:28-34; Luká 10:25-28*)

³⁴ Wahdé Parisi sahig butant ke Issáyá chón gón wati passawá Sadukiáni dap bastag, gorhá hór but o átkant. ³⁵ Cha áyán yakkéá, ke Sharyatay kázié at, pa Issáyá chakkásagá cha áia jost kort: ³⁶ “O ostád! Sharyatay masterén hokm kojám ent?” ³⁷ Issáyá passaw dát:

“Wati *Hodáwanden Hodáyá pa del, gón sajjahén ján o sáh o gón sajjahén pahm o pegrá dóst bedár*.”[‡] ³⁸ Cha sajjahénán masterén o awali hokm hamesh ent. ³⁹ Domi hokm ham, hameshiay dhawlá ent: *Gón wati hamsáhegá wati jenday paymá mehr bekan*.[§] ⁴⁰ Hamé doén hokm, Mussáay Sharyat o sajjahén nabiáni parmánáni bonyád ant.”

Issá kai chokk ent?

(*Markás 12:35-37; Luká 20:41-44*)

⁴¹ Hamé wahdá ke Parisi yakjáh mocch atant, Issáyá cha áyán jost kort: ⁴² “Masihay bárawá shomá ché gwashét? Á kai chokk ent?” Áyán passaw dát: “Dáud bádsháhay chokk ent.” ⁴³ Nun gwashiti: “Gorhá chiá Dáud cha Pákén Ruhay shobén o elhámá, áia wati Hodáwanda zánt, wahdé gwashit:

⁴⁴ *Hodáwandá gón mani Hodáwandá* gwashit: ‘Mani rástén némagá benend*

tán hamá wahdá ke tai dozhenán tai pádáni chérá dawr bedayán.[†]

⁴⁵ “Nun agan Dáud, Masihá wati Hodáwanda gwashit, gorhá Masih chón áiy chokk buta kant?” ⁴⁶ Hechkasá áiy habaráni passaw dát nakort o cha á róchá o rand, kaséá ham cha áia jost kanagay del o joryat néstat.

23

Issá, Parisi o Sharyatay zánógerán páshka kant

(*Markás 12:38-40; Luká 11:37-52; 20:45-47*)

¹ Á wahdá Issáyá gón mocchiay mardomán o wati moridán habar kort o gwashit: ² “Sharyatay zánógerán o Parisi, Mussáay jáhá neshtagant. ³ Paméshká harché ke shomará tálima dayant, áyáni

habarán bemannét o á habaráni randgiriá bekanét, bale áyáni dhawlá mabét, parchá ke harché á tálima dayant, wat á dhawlá nakanant. ⁴ Anchén gránén bára bándant o mardománi kópagá laddhant ke chest kanagá nabant, bale wat pa áyáni chest kanagá lankok o mórdánagé* ham nasorénant. ⁵ Á harché ke kanant, pa mardománi pésh dárágá kanant o bass. Wati táitán[†] mazana kanant o kabáhay lambán drájkassh.[‡] ⁶ Mehmánián, awali reday nendagesh dóst ent o kanisaháni sharterén jáhán gechéna kanant. ⁷ Bázaráni tarr o garday wahdá lóthant ke mardom áyán wasshátk o drahbát begwashant o ‘rabbi’[§] tawár bekanant. ⁸ Bale maylét mardom shomará ‘ostád’ begwashant, chiá ke shomará tahná yak ostádé hast o sajjahén yakdomiay brát ét. ⁹ Shomá é donyáyá hechkasá ‘pet’ tawár makanét chiá ke shomará yak Peté hast, hamá ke ásmáná ent. ¹⁰ Shomará hechkas ‘tálim dayók’ magwashit, chiá ke shomará yak tálim dayóké hast o á Masih ent. ¹¹ Á ke shomay nyámá cha sajjahénán master ent, hamá á degaráni hezmatkár bebit. ¹² Chiá ke harkas watá mazana zánt o lékit, kamsharapa bit o harkas watá jahl o érdasta mannit, washnám o sharapdára bit.

¹³ “Bale bazhn o apsóz pa shomá, oo Sharyatay zánógerán o Parisián! Oo dopóstén shatalkarán! Shomá mardománi démá ásmáni bádsháhiay darwázagá banda kanét, na wata poterét o na degarána kellét. ¹⁴ Bale bazhn o apsóz pa shomá, oo Sharyatay zánógerán o Parisián! Oo dopóstén shatalkarán! Shomá janózámáni lógán gón málwáriá barét o pa pésh dárágá, wati dwá o sanáyán drájkassha kanét, shomará sakterén sezá o padmozza rasit.*

¹⁵ Bazhn o apsóz pa shomá, oo Sharyatay zánógerán o Parisián! Oo dopóstén shatalkarán! Shomá pa yak mardoméay Yahudi kanagá,[†] hoshki o daryáyán sát o sapara kanét, bale wahdé kasé shomay hambáwara bit, gorhá áia cha wati jendá do sari badter o dózahay chokka kanét.

¹⁶ “Oo kórén rahshónán! Bazhn o apsóz pa shomá ke mardomán sója dayét: ‘Agan kasé mazanén parasteshgáhay sawgendá bwárt parwáh nést, bale agan yakké parasteshgáhay teláh o tangawáni

‡ 22:37 22:37 Sharyatay Domi Rahband 6:4 o rand.

§ 22:39 22:39 Láwián 19:18.

* 22:44 22:44 “Mani

Hodáwand”, bezán Issá Masih. † 22:44 22:44 Zabur 110:1.

* 23:4 23:4 Mórdánag, bezán lankok, band o bóg.

† 23:5 23:5 É táit Tawráty nebeshtagén band ant ke póstén hokkahay tahá pósh kanag o básk o péshánigá bandaga bant. ‡ 23:5 23:5 Yahudi kabáhay lambáni sará bandikka bándant, ke Hodáay hokmáni yátá bebant. § 23:7

23:7 Rabbi, bezán ostád. * 23:14 23:14 Lahtén daznebeshtá band 14 néstant. † 23:15 23:15 Yahudi kanag,

bezán darkawmén mardoméá pa Yahudiáni báwaray mannága razá kanag.

sawgendá bwárt, gorhá báyard ent wati sawgendá purah bekant.’¹⁷ Oo kamzántén kórán! Kojám chizzay darajat borzter ent, tangaw o teláháni yá parasteshgáhay? Teláh o tangaw, paméshká pák o palgár ant ke parasteshgáhá ér ant.¹⁸ Shomá chosh ham gwashét ke ‘agan kasé korbánjáhay sawgendá bwárt hech parwáh nést, bale agan kasé korbánjáhay korbánigay sawgendá bwárt, gorhá báyard ent wati sawgendá purah bekant.’¹⁹ Oo kórén mardomán! Kojám chizzay darajat borzter ent, korbánigay yá korbánjáhay? Korbánig paméshká pák o palgár zánaga bit ke korbánjáhá korbánig kanaga bit.²⁰ Paméshká kasé ke korbánjáhay sawgendá wárt, bezán korbánjá o korbánig kortagén sajjahén chizzáni sawgendá wárt.²¹ Harkas ke mazanéen parasteshgáhay sawgendá wárt, bezán parasteshgáh o áiy jahmenenday sawgendá wárt.²² Harkas ke ásmánay sawgendá wárt, Hodáay taht o á taht nendókay sawgendá wárt.

²³ “Bazhn o apszó pa shomá, oo Sharyatay zánógerán o Parisián! Oo dopóstén shatalkarán! Shomá purchénk, gwátayag o zirragay dahyakká kasshét o Hodáay námá dayét bale cha Sharyatay dega masterén hokmán bezán dádrasi o ensáp, rahmdeli o wapádáriá béhayál o bétránag butagét. Dréगतá,‡ shomá é kár bekorténant o á ham yalah madáténant.²⁴ Oo kórén rahshónán! Shomá passhagá kamaká géchéet o dara kanét, bale oshterá era barét.²⁵ Bazhn o apszó pa shomá, oo Sharyatay zánógerán o Parisián! Oo dopóstén shatalkarán! Shomá wati pyálah o darpáni dhanni némagá sáp o sallaha kanét bale áyáni tal o tók sell ent. Shomay del o darun ham cha lálech o tamah o bépahréziá porr o sell ent.²⁶ Oo kórén Parisi! Pésará wati pyálahay tóká sapá kan, dhanni némagá á wat pák o sallaha bit.

²⁷ “Bazhn o apszó pa shomá, oo Sharyatay zánógerán o Parisián! Oo dopóstén shatalkarán! Shomá espétén gach jatagén kabráni paymá ét ke sarzáherá dhawldár ant, bale tóká, cha mordagáni haddh o har paymén gand o gasarhá porr ant.²⁸ Hamé dhawlá shomá ham sarzáherá mardománi chammá tachk o pahrézkárén mardom ét bale shomay del cha shatalkári o náshariá§ sarréché ent.

²⁹ “Bazhn o apszó pa shomá, oo Sharyatay zánógerán o Parisián! Oo dopóstén shatalkarán! Shomá nabíáni kabráni sará

gombod o addiraha bandét o pahrézkáráni kabrána sambahénét o dhawldára kanét.³⁰ Chosh ham gwashét ke ‘agan má wati pet o pirokáni wahd o báriag buténén, gorhá paygambaráni kosht o kóshá gón áyán hamráh nabutatagén.’³¹ É dhawlá wati bárawá sháhedia dayét o mannét hamáyáni nasl o óbádag ét ke paygam-baresh koshtagant.³² Bale hamá kár ke shomay pet o pirokán bongéj kortag, shomá áyán sarjam bekanét.³³ Oo márán, oo syahmárzádagán! Shomá chón cha tahtarunay sezáyá rakketa kanét?

³⁴ “Man, paygambar o zántkár o Sharyatay zánóger shomay Kerrá ráha dayán, shomá cha áyán lahténá koshét o salíba kasshét, dega lahténá wati kanisahán hayzarána janét o shahr pa shahra táchénet.³⁵ Gorhá cha Hábilá beger tán Barakiáay chokk Zakaryáyá, ke shomá mazanéen parasteshgáh o korbánjáhay nyámá kosht, é sajjahén pahrézkáráni hón ke jahána réchag butag, shomay gardená bit.³⁶ Shomará rásténa gwashán, é sajjahénáni kóshay sezá hamé zamánagay mardomána rasit.

Pa Urshalimá Issáy gam o andóh

(Luká 13:34–35)

³⁷ “Urshalim, oo Urshalim! Taw paygambarána koshay o Hodáay ráh dátageénán sengsára kanay. Báz randá man lóthetay tai chokkán wati Kerrá mocch o yakjáh bekanán, anchosh ke nekénkén morgé chureg o chippokán wati bál o bánzoláni chérá moccha kant, bale shomá nalóthet.³⁸ Nun shomay lóg wayrán, shomay wati dastá yalah dayaga bit.³⁹ Shomará gwashán, dega baré maná nagendét tán á wahdá ke wati zobáná begwashét: ‘Mobárák bát hamá ke pa Hodáwanday námá kayt.’”*

24

Mazanén parasteshgáhay wayráni

(Markás 13:1–2; Luká 21:5–6)

¹ Issá cha mazanéen parasteshgáhá dar áyagá at ke morid átkant tán áiy delgósh o chamshánká pa parasteshgáhay jágah o márhiáni nedáragá* betarrénant.² Issáyá gón áyán gwash: “É sajjahénán gendagá ét? Shomará rásténa gwashán, yak sengé ham domi sengay sará namánit, sajjahénána próshant o karóyant.”

Godghi zamánagay nesháni

(Markás 13:3–13; Luká 21:7–19)

‡ 23:23 23:23 Dréगतá, bezán dréchá, Pársiá “káshti”.

* 23:39 23:39 Zabur 118:26.

§ 23:28 23:28 Náshari, bezán Sharyatay hokmáni sará

† 24:3 24:3 Pa halwat

o ehwaté, bezán dega kasé mazánt.

³ Hamá wahdá ke Issá Zaytunay kóhay sará neshtagat, áiy morid pa halwat o ehwaté† átkant o jostesh kort: “Bewash bárén, é prosht o prósh kadéna bit o tai bádsháhiay áyag o donyáay halásiay nesháni, chí ent?” ⁴ Issáyá pasaw dátant: “Hozzhár bét kasé shomará gomráh makant. ⁵ Chiá ke bázéné mani námá kayt o gwashit: ‘Man hamá Masih án’ o bázénéá gomráha kant. ⁶ Jangáni kukkára eshkonét o áyáni hál o habar shomay góshána kapit bale matorsét o paréshán mabét. Allam é dhawlá bit, bale angat halásiay wahd nayátkag o pa sar narasetag. ⁷ Yak kawmé dega kawméay sará o yak hokumaté dega hokumatéay sará páda kayt. Bázén molk o jághán kahta kapit o zeminchandha‡ bit. ⁸ Bale é sajjahén, tahná zank o záyagay dardáni bendát ent.

⁹ “Á wahdá shomará gerant o sakkí o sóriáni ámácha kanant o koshant ham o donyáay sajjahén kawm, mani námay sawabá cha shomá naprata kanant. ¹⁰ Gorhá bázéné poshtá kenzit o cha ráhá thagalit, yakké domiá dróhit o kast o kénaga kant. ¹¹ Bázén drógén paygambar jáha janant o bázénéá gomráha kanant. ¹² Cha gomráhi o náshariá, bázén mardománi nyámá mehr o dósti kamma bit. ¹³ Bale hamá ke tán áherá sakkíána saggit, á rakkít. ¹⁴ Hodáay bádsháhiaymestágay jár, sajjahén donyáyá janaga bit, tán pa sajjahén kawmán sháhedí bebit, gorhá donyáyá halási sara rasit.

Torsnákén wahd o jáwar
(Markás 13:14–23; Luká 21:20–24)

¹⁵ “Wahdé shomá á ‘palit o bérán kanókén bazhnáká’§ gendét, hamá ke Dányál nabíá áiy bárawá habar kortag ke á pákén jághá óshátag,” wánók bezánt o sharr sarpad bebit, ¹⁶ “hamá ke Yahudiahá ant dém pa kóhán betachant. ¹⁷ Hamá ke bán o bádgiray sará ent, wati ord o poténkáni zuragá jahlá ér makapit o lógá marawt o ¹⁸ hamá mardom ke dhaqaráni sará kesht o keshará ent, wati kabáhay zuragá per matarrít. ¹⁹ Á róchán, apsóz pa lápporr o chokmátén janénán. ²⁰ Dwá bekanét ke shomay tachag o dar rawag, zemestán yá Shabatay róchá mabit. ²¹ Chiá ke hamá róchán, anchén gránén sakkí o sórié kapit ke áiy mesál cha jáhánay jórj bayagá tán é wahdá nayátkag o hechbar ham nayayt.

²² Agan á sakkíáni róch kamter kanag mabuténant, hech mardomé narakketagat, bale pa gechén kortagénáni háterá, á róch kamter kanaga bant.

²³ “Á wahdá, agan kasé shomará begwashit: ‘Bechár, Masih edá ent’ yá ‘Bechár, ódá ent,’ báwar makanét. ²⁴ Chiá ke drógén Masih o drógén nabi jáha janant o mazanén nesháni o ajekkái pésha dárant. Wati sajjahén zórá janant ke gechén kortagénán ham gomráh bekanant. ²⁵ Man cha é jáwaráni bayagá pésar shomará hál dátag. ²⁶ Gorhá, agan wahdé mardom shomára begwashant: ‘Bechárét, gyábána ent,’ ódá marawét, yá ke begwashant: ‘lógay tahá ent,’ báwar makanét. ²⁷ Chiá ke Ensánay Chokk anchén grókéay paymá kayt ke cha ródarátká beger tán rónéndá shahma dant o gendaga bit. ²⁸ Har jáh ke mortagén sahdaréay jóna bit, ódá gittó* o dhundhwáren morg moccha bant.

Issáy per tarrag
(Markás 13:24–31; Luká 21:25–33)

²⁹ “Á rócháni sakkí o sórián o rand, yak anágat róch tahára bit, máha nadrapshít o máhekánia nabit, estár ham cha ásmáná kapant o ásmáni zór o wák, larzénaga bant. ³⁰ Á wahdá, Ensánay Chokkay nesháni ásmáná paddara bit o donyáay sajjahén kawma gendant ke Ensánay Chokk, gón mazanén wák o twán o shán o shawkaté jamaráni sará kayt o paddara bit, nun gréwant o mótká kárant. ³¹ Gón karnáay† borzén tawará wati préshtagan ráha dant ke áiy gechén kortagén mardomán, cha donyáay chárén kondhán, bezán cha zeminay hand o damagán tán ásmánay goddhi marz o simsarán, mocch o yakjáh bekanant.

³² “Nun cha enjiray drachká dars o sabak begerét, anchosh ke áiy thál narma bant o táka trokkant, gorhá zánét ke garmágay mósom nazzik ent. ³³ Hamé dhawlá, wahdé é sajjahén chizzána gendét, wata zánét ke mani áyagay wahd nazzik ent o darwázagay dapá rasetagán. ³⁴ Shomará rásténa gwashán, tán é sajjahén jáwar mayáyant é nasl o padréch halása nabit. ³⁵ Zemin o ásmán gára bant, bale mani habar hechbar gár o zyána nabant.

Hozzhár o ágáh bebit
(Markás 13:32–37; Luká 12:42–46; 17:26–30, 34–36)

‡ 24:7 24:7 Zeminchandh, bezán zelzelah. § 24:15 24:15 “Palit o bérán kanókén bazhnák” yak chizzé ke nabáyad ent mazanén parasteshgáhá byayt. Dányál nabíay péshgói hamá wahdá sarjam but ke 167 Péshmiládá Suriahay hákemá mazanén parasteshgáhay tahá bot jághán dát o hukki korbánig kort. Issá edá gwashit ke padá ham anchén “palit o bérán kanókén bazhnáké” kayt. * 24:28 24:28 Gittó yak morgé ke dhundh, bezán gahetagén jóna wárt.

† 24:31 24:31 Karná, bezán sornáay dhawléen sázé.

³⁶ “Hechkasa nazánt ke á róch o á sáhat kadéna rasit, na ásmánay preshtaga zánant o na chokk, tahná Peta zánt o bass. ³⁷ Hamá dhawlá ke Nuhay bárigá butag, Ensánay Chokkay áyagay róch ham anchosha bit. ³⁸ Chiá ke cha hár o tuppáná pésar, tán hamá róchá ke Nuh bójigá swár but, mardomán wártag o nóshetag o sángo o sur kortag. ³⁹ Á hechh sahih naatant tán hár o tuppán átk o sajjahén mardomi gár o hármal kortant. Ensánay Chokkay áyagay wahdá ham hamé dhawlá bit. ⁴⁰ Á wahdá, do mardom kesharáni sará kára bit, yakké baraga bit o domi hamódá pasht géjaga bit. ⁴¹ Do janén jenteray sará dánay droshagá bit, yakké baraga bit o domi hamódá pasht géjaga bit. ⁴² Shomá nazánét ke shomay Hodáwáand kojám róchá kayt. Paméshká sár o hozzhár bét. ⁴³ Shomá sharra zánét, agan lógay hodábondá bezántén ke dozz shapay kojám wahd o pásá kayt, gorhá ágáh butagat o dozzi wati lógá pa dozziá naeshtagat. ⁴⁴ Hamé paymá tayár bét, chiá ke Ensánay Chokk anchén wahdéa kayt ke shomá áiy entezár o wadára nabét.

⁴⁵ “Kay ent hamá wapádár o shiwwáren hezmatkár ke hodábond áiyá wati é dega sajjahén hezmatkáráni master bekant tán áyán pa wahd ward o warák bedant. ⁴⁶ Bahtáwar ent hamá hezmatkár ke wahdé hodábonda kayt, áiyá hamá káráni sará gendit. ⁴⁷ Shomára rásténa gwashán, hodábond hamá hezmatkára wati sajjahén mál o hastiay kármastera kant. ⁴⁸ Bale agan hezmatkár gandah o radkáré bebit o wati delá begwashit ke ‘hodábond áyagá déra kant’ o ⁴⁹ paméshká wati hamkáráni latth o koth kanagá bongéj bekant o gón sharabián ward o nóshá bebit, ⁵⁰ áiyá hodábond anchén róch o sáhatéa kayt o rasit ke á nazánt o wadára naent. ⁵¹ Gorhá hodábond áiyá thokkor thokkora kant o shatalkáráni nyámá dawra dant. Ódá gréwant o dantán pa dantána droshant.

25

Dah neshtagén janénchokkay mesál

¹ “Á wahdá ásmáni bádsháhi, hamá dahén neshtagén janénchokkáni paymá bit ke wati cherágesh zortant o salónkay peshwázia dar kaptant. ² Cha áyán panch nádán atant o panch dáná. ³ Nádánén jenekán wati cherág zortant bale gón wat thélesh nabort gón. ⁴ Dánáén jenekán cherágán o abéd, théldánáni tahá ham gón wat thél bort gón. ⁵ Salónká áyagá dér kort, paméshká á sajjahén kóchandhán

wáb kaptant. ⁶ Shapnéma kukkár macchet ke ‘hayyá byaét, salónk pédák ent o wasshátki kanét.’ ⁷ Gorhá á sajjahén ágáh butant o wati cherágáni sharr kanagá laggetant. ⁸ Nádánén jenekán gón dánáén jenekán gwasht: ‘Cha wati thélán kammoké mára ham bedayét, chiá ke may cherág mermeránk ant.’ ⁹ Dánáén jenekán passaw dát: ‘Na, balkén pa máshomá sajjahénán bass mabant, shomá berawét cha dokkánán thél bezurét.’ ¹⁰ Bale wahdé á thélay geragá shotagatant, salónk átk o raset. Hamá jenek ke tayár o járhig atant, salónkay hamráhiá suray mehmániá shotant o mehmánjáhay darwázag band but. ¹¹ Randá é dega jenek ham átkant o gwashtesh: ‘Wájah, oo wájah! Darwázagá pa má pach kan.’ ¹² Bale salónká passaw tarrént: ‘Shomára rásténa gwashán ke man shomára nazánán.’

¹³ “Paméshká hósh o sár bebét chiá ke shomá á róch o sáhatá heccha nazánét.

Bádsháh o hezmatkáráni mesál (Luká 19:11–27)

¹⁴ “Hamé dhawlá Hodáay bádsháhi, mardéay paymá ent ke sát o separéa shot. Hezmatkári lóthetant o wati mál o maddhi hamáyáni dastá dát. ¹⁵ Har hezmatkári, áiyá buch o twány kesásá zarr dát, yakké panch tálánt,* domi do tálánt o saymi yak tálánté dáti o wati separá shot. ¹⁶ Á hezmatkár ke áiyá panch tálánt rasetagat, hamá damáná sawdágeriá shot o panch tálánti nap raset. ¹⁷ Hamé paymá, á domi ke do tálánti rasetagat, dega do tálánti nap raset. ¹⁸ Bale hamáiyá, ke yak tálánté rasetagati, wájahay zarri zort o yak jágahé zeminá kall kort o chéri dát.

¹⁹ “Bázén wahdéa rand, é hezmatkáráni hodábond per tarret o átk o cha áyán hesábi lóthet. ²⁰ Hamáiyá ke panch tálánt rasetagat, dega panch geshén tálánti áwort o gwashti: ‘Oo wájah! Taw maná panch tálánt dátagat, é panchén geshén ant ke man katthetagant.’ ²¹ Hodábondá gwasht: ‘Shábásh, oo wapádár o sharrén golám! Taw gón kammén bonmálá tachk o rást butagay, nun man tará géshterén káráni zemmah o dhobbahá† dayán, byá mani shádkámiáni sharikdár bay.’ ²² Hamá ke do tálánti rasetagat ham átk o gwashti: ‘Oo wájah! Taw maná do tálánt dátagat, esh ant do dega ke cha á doénán man katthetagant.’ ²³ Áiyá hodábondá gwasht: ‘Shábásh, oo wapádár o sharrén golám! Taw ham gón kammoká tachk o rást butagay, tará ham

‡ 24:40 24:40 Pasht géjag, bezán nazurag, yalah dayag, gechén nakanag. * 25:15 25:15 Tálánt yak dábén zarré at. Yak tálánt, pánzdah sáláy mozz butag. † 25:21 25:21 Dhobbah, bezán ogdah, zemmah, Arabi o Pársiá “wazifah”.

géshterén káráni dhobbahá dayán, byá mani shádkámiáni sharikdár bay.'

²⁴ "Nun hamá hezmatkár átk ke áia yak tálánté rasetagat, gwashti: 'Oo wájah! Man zántag ke taw tronend mardé ay, nakeshtagéna ronay o cha hamódá moccha kanay o baray ke tohmi dánagé nachandhetaget. ²⁵ Paméshká cha torsá man tai dátágen tálánt zeminá kall kort, esh ent tai zarr.' ²⁶ Áiay hodábondá passaw dát: 'Oo nábud o békáren golám! Wahdé taw zánt man nakeshtagéna ronán o ódá ke tohmi dánagé nachandhetagon, moccha kanán o barán, ²⁷ gorhá báyard ent taw mani dátágen zarr byáji o bápáriéay kerrá ér bekorténant tánke cha wati saparay per tarragá rand, man wati zarr gón sutt bepepténant. ²⁸ Paméshká tálántá cha eshiá pach gerét o hamáia bedayét ke áiay kerrá dah tálánt ant. ²⁹ Chiá ke harkasá chizzé hast, áia géshter dayaga bit tán sarréché bebit, bale harkasá ke nést, harché ke hasti ham pach geraga bit. ³⁰ É nábudén golámá dhanná taháriá dawr bedayét. Ódá gréwant o dantán pa dantána droshant.'

Ensánay Chokkay dádrasi

³¹ "Wahdé Ensánay Chokk gón wati mazanén shán o marháah préshtagáni hamráhiá kayt, gorhá wati porshawkatén tahtay sará nendit. ³² Á wahdá sajjahén kawmáni mardom árag o áiay démá mocch kanaga bant o á, áyan anchosha gishshénit o do bahra kant ke shwánag wati bozán cha méshán jetá kant. ³³ Méshán wati rástén némagá kant o bozán chappén némagá. ³⁴ Gorhá bádsháh gón áyan ke rástén némagá ant, gwashti: 'Oo bahtáwarán ke shomára cha mani Petá barkat rasetag! Byáét, é bádsháhiá wati mirás kanét, ke cha donyáay bongéjá pa shomá tayár kanag butag. ³⁵ Chiá ke wahdé man shodig atán, shomá maná warag dát. Tonnig atán, maná ápó dát. Dar pa dar atán, maná wati lógá jágahó dát. ³⁶ Jándar atán, maná póshákó dát. Nádráh atán, mani hálporsió kort. Bandig atán, mani gendagá átkét.' ³⁷ Gorhá hamá pahrézkáren mardom cha bádsháhá josta kanant: 'Oo wájah! Má kadi tará shodig distag o warag dátátag, tonnig distag o áp dátátag. ³⁸ Má kadi tará darpadar distag o wati lógán jágah dátátag, kadi tará jándar distag o póshák gwará dátátag, ³⁹ kadi tará nádráh yá bandig distag o tai gendagá átkagén?' ⁴⁰ Bádsháh passawa dant: 'Báwar kanét, wahdé shomá gón

mani yak kaster kasterén brátéa é paymén kár kortag, gorhá allam bezán gón manó ham kortag.'

⁴¹ "Randá gón hamáyán ke chappén némagá ant, gwashti: 'Oo shummán! Cha mani démá dur bét o hamá jamburén ásay némagá berawét ke hechbara namerit o pa Shaytán o áiay hamráhán[‡] addh kanag butag. ⁴² Chiá ke wahdé man shodig atán shomá maná warag nadát, tonnig atán ápó nadát. ⁴³ Dar pa dar atán lógá nabort, jándar atán póshák gwará nadát, nádráh yá bandig atán o manó hálporsi nakort.' ⁴⁴ Gorhá á ham josta kanant: 'Oo wájah! Má kadi tará shodig, tonnig, darpadar, jándar, nádráh yá bandig distag o tai hezmat nakortag?' ⁴⁵ Gorhá bádsháh áyan é dhawlá passawa dant: 'Báwar kanét, wahdé shomá gón mani hech kasterénéa é dhawlén kár nakortag, gorhá allam bezán gón manó ham nakortag.' ⁴⁶ Paméshká é mardom dém pa abadmánén sezáyá rawant, bale pahrézkáren mardomán namiránén zenda rasit."

26

Issáay koshaqay pandal o sázesh

(Markás 14:1-2; Luká 22:1-2; Yuhanná 11:45-53)

¹ Wahdé Issáyá é habar halás kortant, gón wati moridán gwashti: ² "Shomá wassha zánét ke do róchá rand Sargwazay aida* bit o Ensánay Chokk pa salib kasshagá geráénaga bit." ³ Hamé wahdá, mazanén dini péshwá o kawmay kamáshán, masterén dini péshwá Kiápáay márhiá diwán kort o ⁴ é pandal jórhént ke Issáyá pa yak repk o honaré begeréénant o bekóshárenant. ⁵ Bale gwashtesh: "Aiday rócháan na, chosh mabit ke mardom áshóp bekanant."

Janéné Issáyá atra moshit

(Markás 14:3-9; Yuhanná 12:1-8)

⁶ Wahdé Issá Bayt-Anyáyá hamá Shumunay lógá at ke cha jozámay nádráhiá dráh butagat, ⁷ yak janéné gón sengmarén atrdánéa ke gránbaháén atri mán at, Issáyá gwará átk. Issá parzónagay sará neshtagat o hamódá Issáyá sari atr per moshit. ⁸ Gón é káray gendagá, Issáyá morid delá nawassh butant ke "chiá é atr zawál kanag but? ⁹ Agan é bahá kanag butén, mazanén zarré rasetagat o garib o nézgáran dayag butagat." ¹⁰ Issáyá moridáni é nawasshi sarkech wárt, paméshká gwashti: "Chiá shomá é

[‡] **25:41** 25:41 Asligén Yunáni nebeshtánka gwashti: "Shaytán o áiay préshtagán". * **26:2** 26:2 Eshiá Sargwazay aid paméshká gwashtant ke, cha Mesriáni chérdastáia Yahudiáni ázátiay wahdá, markay préshtag cha Yahudi chokkáni koshaqá sar gwast.

janéná ranjénagá ét? Eshíá gón man nékié kortag. ¹¹ Garib o nézgar modám shomay Kerrá hast, bale man harwahd gón shomá gón naán. ¹² É janén pesh kaptag o pa mani kabr kanagay tayáriá, maná atri per moshtag. ¹³ Shomará rásténa gwashán, sajjahén donyáyá, har kondhé ke mani wasshén mestág jár janaga bit, é janén o eshiay kár ham yát kanaga bit.”

*Yahudá wahd o móhéay shóházá ent
(Markás 14:10–11; Luká 22:3–6)*

¹⁴ Randá cha dwázdahén moridán yakké, ke námi Yahudá Eskaryuti at, mazanén dini peshwáyáni Kerrá shot o ¹⁵ gwashti: “Agan man Issáyá shomay dastá bedayán, shomá maná ché dayét?” Áyán si nograhén korsh[†] hesáb kort o áiy dastá dát. ¹⁶ Cha hamá wahdá o rand, Yahudá pa Issáyá áyáni dastá dayagá gwam o gégén wahd o móhéay shóházá at.

*Sargwazay aiday tayári
(Markás 14:12–21; Luká 22:7–14;
Yuhanná 13:21–30)*

¹⁷ Béhomirén nánay aiday[‡] awali róchá, moridán cha Issáyá jost kort: “Ché lóthay, Sargwazay aiday shámay tayáriá kojá bekanén ke taw bwarayi?” ¹⁸ Áiá passaw dát: “Shahrá berawét o pelán mardomá begwashét ke ‘ostáda gwashit, mani wahd nazzik ent, mani dela lóthit gón wati moridán Sargwazay shámá tai lógá bwarán.’” ¹⁹ Gorhá moridán Issáyay gwashagay sará Sargwazay shám tayár kort.

²⁰ Bégáh ke but, Issá gón wati dwázdahén moridán parzónagay sará neshtagat. ²¹ Waragay wahdá áiá gón moridán gwasht: “Báwar kanét, cha shomá yakké maná dróhit o dozhmenáni dastá dant.” ²² Morid báz paréshán o deltaparkah butant o bárig bárigá cha áiá jost kanagá laggetant: “Oo Hodáwand! Man wa naán, na?” ²³ Áiá passaw tarrént: “Á ke annun gón man hamkásag but, hamá maná dróhit.” ²⁴ Hamá dhawlá ke nebisag butag, Ensánay Chokk cha é donyáyá rawagi ent, bale bazhn o apsóz pa hamáiá ke Ensánay Chokká dróhit. Pa áiá sharter at ke hechbar cha máta péda mabutén. ²⁵ Gorhá Yahudáyá, hamá ke Issái dróhagi at, gwasht: “Oo ostád! Man wa naán, na?” Issáyá passaw dát: “Taw wat gwasht.”

Goddhi shám

(Markás 14:22–26; Luká 22:15–20; Korentiáni Awali Kágad 11:23–25)

²⁶ Wahdé shám waragá atant Issáyá nagané zort, Hodáay shogri gept, chondh chondh kort o moridáná dáti. Gwashti: “Bezuré^t o bwarét, é mani jesm ent.” ²⁷ Padá jámé zorti, Hodáay shogri gept, moridáná dát o gwashti: “Shomá sajjahén cha eshiá benóshét. ²⁸ É mani ahd o karáray hón ent, ke pa bázénéay gonáháni bakshagá réchaga bit. ²⁹ Man shomará gwashán, nun dega baré anguray dahl o samará nanóshán, hamá róchá padá nósháni ke wati Petay bádsáhíá, gón shomá hóra bán.” ³⁰ Hodáay sepat o sanáyá[§] rand, dém pa Zaytunay kóhá ráh geptant.

*Petrosay enkáray peshgói
(Markás 14:27–31; Luká 22:31–34;
Yuhanná 13:36–38)*

³¹ Gorhá Issáyá gón moridán gwasht: “Shomá sajjahén, hamé enshapi thagala warét o maná yalaha kanét, chíá ke nebisag butag: *Man shopánká janán o ramagay pas sheng o shángá bant.*” ³² Bale zendag bayag o jáh janagá rand, cha shomá pésar Jalilá rawán.” ³³ Gorhá Petrosá darráent: “Agan sajjahén thagal bwarant o tará yalah bedayant, man hechbar thagala nawarán.” ³⁴ Issáyá gwasht: “Tará rásténa gwashán, hamé enshapi cha korósbángá pésar, mani pajjáh áragá say randá enkára kanay o namannay.” ³⁵ Bale Petrosá gwasht: “Agan gón taw mani sar ham berawt, cha tai pajjáh áragá hechbara nabajján.” É dega sajjahén moridán ham anchosh gwasht.

*Issáyá dwá
(Markás 14:32–42; Luká 22:39–46)*

³⁶ Randá Issá gón wati moridán Jet-simáni námén jágahéá shot o gón áyán gwashti: “Hamedá bedaré^t, man kammé démterá rawán o dwá kanán.” ³⁷ Zebdiay doén chokk o Petrosi wati hamráh kortant. Anágat yak mazanén andóh o bétáhirié[†] áiy jesm o jáná nesht. ³⁸ Gón áyán gwashti: “Sakk paréshán án, gam o andóhán maná markig kortag, shomá edá bedaré^t, mawapsét o mani hamráhiá ágáh o hozzhár bét.” ³⁹ Randá kammé démterá shot, dém pa chér kapt o dwá kanáná gwashti: “Oo mani Pet! Agan buta kant, cha man é sakkáni jám o pyáláh bethagalén, bale á dhawlá na ke mana lóthán, hamá dhawlá ke taw lóthay.”

[†] 26:15 26:15 Asligén Yunáni nebeshtánka gwashit: “si árguriá”. Korsh Balócháni kwahnén zarr ent. [‡] 26:17

26:17 Béhomirén nánay aid, Sargwazay aidá rand hapt róchay tahá geraga bit. [§] 26:30 26:30 Bezán Zabur 115–118.

* 26:31 26:31 Zakaryá Nabiyay Ketáb, bahr 13, band 7. [†] 26:37 26:37 Bétáhiri, bezán béarámi, békarári.

⁴⁰ Wahdé per tarret o wati moridáni kerrá átk, disti ke á wáb ant. Gón Petrosá gwashti: "Nabut yak sáhaté ham gón man ágáh bemánét?" ⁴¹ Hozzhár bét o dwá kanét tánke ázmáesh o chakkásá makapét. Ruh, tayár o morádig ent, bale jesm nezór o nátwán." ⁴² Domi bará pa dwá kanagá shot o dwái kort: "Oo mani Pet! Agan é pyáláh bé nóshagá cha man thagalénaga nabit, gorhá harché ke tai razá ent hamá dhawlá bebit." ⁴³ Wahdé per tarret, disti padá wáb ant. Áyáni chamm rohézag[‡] o wábénag atant. ⁴⁴ Yalahi dátant o saymi randá padá pa dwá kanagá shot o hamá dwái kort. ⁴⁵ Gorhá moridáni kerrá per tarret o gwashti: "Angat ham waptag o áram kanagá ét? Nun á wahd o sáhat nazzik ent ke Ensánay Chokk dróhag o gonahkáráni dastá dayaga bit. ⁴⁶ Pád áét berawén. Á ke maná dróhit, pédák ent."

Issáay dazgir kanag

(Markás 14:43-50; Luká 22:47-53; Yuhanná 18:3-12)

⁴⁷ Issá angat habará at ke cha dwázdahén moridán yakké, bezán Yahudá, átk o raset. Áiá mazanén rombé hamráh at ke zahm o latthesh gón at. É romb, cha mazanén dini péshwá o kawmay kamásháni némagá ráh dayag butagat. ⁴⁸ Issáay dróhóká[§] áyáná é nesháni dátogat: "Hamáiá ke mana chokkán, Issá hamá ent. Áiá dazgir kanét." ⁴⁹ Gorhá Yahudá tachkátachk Issáay kerrá átk o gwashti: "Oo ostád! Drud o drahbát!" Randá Issái chokket. ⁵⁰ Issáay gwasht, "Oo hambal! Pa hamá kará ke átkagay, bekani." Gorhá démá átkant, Issáesh gept o dazgir kort. ⁵¹ Hamá damáná, Issáay hamráhán yakkéá wati zahm kasshet o masterén dini péshwáay nawkaray góshi sest. ⁵² Issáay gón áiá gwasht: "Wati zahmá jotká* kan. Á kas ke zahma kasshit, cha zahmá merit. ⁵³ Záná, taw nazánay agan cha wati Petá belóthán, á pa mani komaká hamé annun dwázdah lashkará† géshter préshtag ráha dant. ⁵⁴ Bale gorhá Pákén Ketábáni nebeshtagén hamá habar ke býad ent sarjam bebant, chón pa sara rasant?" ⁵⁵ Nun démi mardománi mocchiay némagá tarrént o gwashti: "Záná man yági o rahzané án ke shomá gón zahm o latthán pa mani geragá átkagét? Man har róch mazanén parasteshgáhá neshtag o mardom dars o

sabak dátagant o shomá maná nageptag. ⁵⁶ Bale é paymá paméshká but ke Nabiáni Ketábáni péshgói, rást o paddar bebant." Gorhá sajjahén moridán á yalah dát o jestant.

Issá, sarókáni diwáná

(Markás 14:53-65; Luká 22:54-55, 63-71; Yuhanná 18:13-14, 19-24)

⁵⁷ Issáay dazgir kanókán, Issá zort o masterén dini péshwá Kiápáay kerrá bort ke ódá Sharyatay zánóger o kawmay kamásh moch antant. ⁵⁸ Petros ham dur durá, Issáay randá rawán at tán masterén dini péshwáay lógay péshjháh raset, tahá poter o gón hezmatkárán nesht tán bezánt ke chónén shawré borraga bit. ⁵⁹ Mazanén dini péshwá o sarókáni diwánay sajjahén básk,‡ pa Issáay markay sezá dayagá drógén sháhediy shóházá atant, ⁶⁰ chónáhá bázén drógén sháhed pa gwáhi dayagá pád átk, bale hecchesh dastá nakapt. Godhsará do mardom démá dar átk o ⁶¹ gwashtesh: "É mardá gwashtag ke 'man Hodáay parasteshgáhá próshta kanán o say róchá padá bandáni.'" ⁶² Gorhá masterén dini péshwá pád átk o cha Issáay josti kort: "Tai bárawá chónén sháhedí dayagá ant? Esháni hech passawa nadayay?" ⁶³ Bale Issáay passaw nadát. Masterén dini péshwáay padá gón áiá gwasht: "Man tará namiránén Hodáay sará sawgenda dayán, márá begwash, baren, taw hamá Masih, Hodáay Chokk ay?" ⁶⁴ Issáay darráent: "Taw wat gwasht. Bale shomá sajjahénán hála dayán, démterá gendét ke Ensánay Chokk zóráwarén Hodáay rástén némagá neshtag. Cha ásmánay jambaráni sará ham kayt." ⁶⁵ Gorhá masterén dini péshwáay wati gwaray jámag dert o gwashti: "Eshíá kopr kort, angat ham márá sháhed pakár ent? Shomá eshiay kopr wat eshkot. ⁶⁶ Nun shomay shawr o saláh chi ent?" Áyán passaw dát: "Eshiy sezá mark ent." ⁶⁷ Randá áyán Issáay dap o démá toh kort[§] o lahténá mosht o shahmát ham jat. ⁶⁸ Nun gwashtesh: "Oo Masih! Pa má paygambari kan o begwash tará kayá jat."

Petrosay enkár

(Markás 14:66-72; Luká 22:56-62; Yuhanná 18:15-18, 25-27)

⁶⁹ Á wahdá Petros dhanná péshjháh neshtagat, móledé áiay kerrá átk o gwashti: "Taw ham Jalili Issáay hamráh butagay." ⁷⁰ Bale áiá sajjahénáni démá namannet o gwashti: "Mana nazánán

‡ 26:43 26:43 Rohézag, bezán wábá porr. § 26:48 26:48 Dróhók, bezán hamá ke wati hamráhá rada dant o bahá kant. * 26:52 26:52 Jotk, bezán zahm yá kárchay jeld, pósh, nyám. † 26:53 26:53 Asligén Yunáni nebeshtánka gwasht: "dwázdah ligiun". Har ligiuná 6000 sepáhig hastat. ‡ 26:59 26:59 Básk, bezán ozw, membrar. § 26:67 26:67 Toh kanag, bezán tok kanag.

taw ché gwashagá ay.”⁷¹ Wahdé dém pa mazanén darwázagá rawagá at, dega móledéa dist o gón mardomán gwashti: “É mard Issá Náseriay hamráh butag.”⁷² Petrosá sawgend wárt o domi randá namannet o gwashti: “Man é mardá nazánán.”⁷³ Damánéa rand, ódá óshtátageén mardom Petrosay kerrá átkant o gwashtesh: “Allamá taw cha hamáyán ay, cha tai gálwára anchosh jáha kayt.”⁷⁴ Petrosá pa nálaté sawgend wárt o gwasht: “Man é mardá nazánán.” Hamá damáná korósá báng dát.⁷⁵ Gorhá Petros yát o tránagá kapt ke Issáyá gwashtagat: “Korósay bángá pésar, taw say randá mani pajjáh áragá enkára kanay.” Nun dhanná dar átk o sakk gréti.

27

Sarókáni shawr

(Markás 15:1; Luká 23:1-2; Yuhanná 18:28-32)

¹ Sabáhá máhallah, sajjahén mazanén dini péshwá o kawmay kamásh Issáyá kóshá hamshawr butant. ² Issáesh bast, gerrán kort o Rumi wáli Pilátusay dastá dát.

Yahudáay watkoshi

(Kásedáni Kár 1:18-19)

³ Wahdé Issáy geráénók Yahudáyá dist ke Issáesh mayárig kort, cha wati kotragén kárá pashómán but o sién nograhén korshi bort o mazanén dini péshwá o kawmay kamásháná wápas dátant. ⁴ Gwashti: “Man sakk mayárig án ke yak bégonáhén mardomé pa kóshárenagá geráéntag.” Bale áyán passaw dát: “Má chón kanén, taw bezánay o tai kár.” ⁵ Gorhá Yahudáyá hamá zarr mazanén parasteshgáhá dawr dátant o shot, watá gothlóp kort o koshti. ⁶ Mazanén dini péshwáyán zarr zortant o gwashtesh: “É palitén* zarr ant, parasteshgáhay hazánagá esháni ér kanag nárawá ent.” ⁷ Paméshká shawr o saláhá rand, cha á zarrán kombáreyá† dhagáresh bahá gept ke pa darámadán kabrestánéa bekananti. ⁸ Tán róch maróchigá á dhagáray nám “hónay dhagár” ent. ⁹ Paméshká chosh but tán hamá chizz ke Eremiá nabiay zobáná péshgói kanag butag, rást o pad-dar bebit: *Man sién nograhén korsh zortant ke é zarr Bani Esráilay chokkán áiy kimmat bastagat o¹⁰ cha é zarrán kombáray dhagáron bahá gept, anchosh ke Hodáwandá maná parmán kortagat.‡*

Issá Pilátusay démá

(Markás 15:2-5; Luká 23:3-5; Yuhanná 18:33-38)

¹¹ Nun Issá wáliay démá óshtárénag but o wálii cha áia jost kort: “Taw Yahudiáni bádsháh ay?” Issáyá passaw dát: “Taw wat gwashagá ay.”¹² Mazanén dini péshwá o kawmay kamásh Issáyá beddh o bohtám janagá atant, bale áia hech passaw nadát. ¹³ Pilátusá gwasht: “Taw naeshkonagá ay ke é tará chinchok bohtám janagá ant?”¹⁴ Bale Issáyá áyáni hech bohtámay passaw ham nadát o wáli sakk hayrán mant.

¹⁵ Wálii har sál aiday wahdá, cha Yahudi bandigán yakké, hamá ke mardomán belóthetén, ázáta kort. ¹⁶ Á wahdá yak námдарén bandigé jéla at ke námi Bárábás at. ¹⁷ Nun ke mardom mocch atant, Pilátusá cha áyán jost kort: “Shomá ché lóthét? Man kayá ázát bekanán? Bárábásá, yá Issáyá ke Masih ham gwashanti?”¹⁸ Áia zántagat ke Issáesh pa hasadd o konnat áiy dastá dátag. Paméshká chosh gwashti.

¹⁹ Wahdé Pilátus hakdiwáná neshtagat, áiy janá é kolaw ráh dát ke “gón é bégonáh o nékén mardá hechh makan, chiá ke dóshi man eshiay bárawá sakkén paréshánén wábé distag.”²⁰ Bale mazanén dini péshwá o kawmay kamáshán mardománi mocchi sakk shórént§ o áshopént* ke Issáy mark o Bárábásay ázátiá belóthant. ²¹ Wálii jost kort: “Ché lóthét, cha é doénán kojámiá pa shomá ázát bekanán?” Áyán gwasht: “Bárábásá.”²² Pilátusá cha áyán jost kort: “Gorhá gón Issáyá ke Masih ham gwashanti, ché bekanán?” Áyán pa hamtawári passaw dát o gwasht: “Salibi kassh!”²³ Pilátusá jost kort: “Chiá baren? Mayári chi ent?” Bale áyán géshter kukkár kort o gwashtesh: “Salibi kassh!”

²⁴ Wahdé Pilátusá dist ke hech karé korta nakant o mardom shóresh kanagá ant, gorhá áia áp zort, mocchiay démá wati dast shoshtant o gwashti: “Man cha é marday hóná bémayár án, shomá bezánét o shomay kár.”²⁵ Sajjahén mardomán gwasht: “Eshiy hón mayg o may chokkáni gardená bebit.”²⁶ Gorhá Pilátusá pa áyánigi, Bárábás ázát kort o Issá shallák janáent o dáti ke áia salibay sará bedran-jant.

Issáy sará kalág o rishkand

(Markás 15:16-20; Yuhanná 19:2-3)

* 27:6 27:6 Asligén Yunáni nebeshtánka gwasht: “hónigén zarr”. † 27:7 27:7 Kombár, bezán hamá ke komb o kunzag addha kant. ‡ 27:10 27:10 Zakaryá Nabiay Ketáb, bahr 11, band 12 o rand, Eremiá Nabiay Ketáb, bahr 32, band 6 o rand. § 27:20 27:20 Shóréng, bezán pád kanag, tahrik kanag. * 27:20 27:20 Áshopénag, bezán pád kanag, tahrik kanag.

²⁷ Wáliay sepáhigán Issá wáliay kóth o márhíay péshjáhá bort o sepáhigáni sajjahén lashkar áiy chapp o chágerdá mocch kort. ²⁸ Áyán, Issáay gwaray god kasshetant o bádsháháni paymén sohrchakén kabáhé gwará dát, ²⁹ cha dhangar o konthagán tájé jórhént o áiy sará ér kort, latthé rástén dastá dát o pa kalág o rishkand, áiy démá kóndhán kaptant o gwashtesh: “Drud o drabhát, oo Yahudiáni bádsháh!” ³⁰ Áiy démá tohesh kort o hamá latthesh sará jat. ³¹ Wahdé kalág o malandhesh hallént, gwaray kabáhesh kasshet o áiy jenday godesh padá gwará dátant. Randá dém pa salib kasshagá bortesh.

Issá o salib

(Markás 15:21-32; Luká 23:26-43; Yuhanná 19:17-27)

³² Wahdé rawagé laggetant, Shamun námén mardé distesh ke Keriniay shahray mardomé at. Sepáhigán á pa bigár gept ke Issáay salibá baddhá bekant. ³³ Wahdé “Joljotá” bezán hamá “Kámpól” námén jágahá rasent ³⁴ ódá Issáay morr mán retkagén sharáb dát, bale áiy chashagá rand nawárt. ³⁵ Nun salibay sará dratkesh, pocch o póshákesh wadmánwatá bahr kortant o áyáni sará pál[†] jatesh ke bárén kayá berasant. ³⁶ Randá hamódá neshtant o áiy negahpániesh kort. ³⁷ Issáay sarborá, salibay dáray sará, mayárnámagé dratkesh ke áiy sará nebeshtagat: “É Yahudiáni bádsháh, Issá ent.”

³⁸ Issáay hamráhiá do yági o dozzesh ham salibay sará dratk, yakké rástén o domi chappén némagá. ³⁹ Rahgwazán dozhmán dayán, wati sar chandhént o ⁴⁰ gwashtesh: “Oo mazanén parasteshgáhay karójók ke gwashtaget: ‘say róchá padá áiy addha kanán’. Agan taw Hodáay Chokk ay, gorhá cha salibá ér á o watá berakkén.” ⁴¹ Hamé dhawlá mazanén dini péshwá, Sharyatay zánóger o kawmay kamásh ham áiy sará rishkand o maskará kanagá atant. ⁴² Gwashtesh: “Á dega mardomi rakkéntant, bale watá rakkénta nakant, é wa Esráilay bádsháh ent, agan nun cha salibá ér bekapit, má áiy sará báwara kanén. ⁴³ Óst o ométi pa Hodá bastag, agan Hodáyá dóst ent, berakkéniti, chiá ke gwashtagati: ‘Man Hodáay Chokk án.’” ⁴⁴ Hamé paymá Issáay hamráhiá salib kasshetagén yági ham áiy bad o rad gwashagá atant.

Issáay mark

(Markás 15:33-41; Luká 23:44-49; Yuhanná 19:28-30)

⁴⁵ Némróchá beger tán bégáhay sayá,[‡] sajjahén molk anágat tahár but. ⁴⁶ Bégáhay sáhat sayá,[§] Issáay chihál^{*} jat: “Eli, Eli, lemá sabaktani?” Bezán: Oo mani Hodá, oo mani Hodá! Taw chiá maná tahná esht?[†] ⁴⁷ Ódá, lahtén óshtátagén mardomá wahdé eshкот, gwashtesh: “Elyásá tawár kanagá ent.” ⁴⁸ Cha áyán yakké tacháná shot, espanjé zorti o tropshén sharábá missénti, dáréay sará bast o pa chussagá Issáay némagá shahárti. ⁴⁹ Bale é dega mardomán gwasht: “Sabr kan, bechárén bárén Elyás eshiay rakkénagá kayt yá na?” ⁵⁰ Issáyá domi bará borzén tawaréá chihál kasshet o sáh dát. ⁵¹ Hamá wahdá mazanén parasteshgáhay pardah, borzadá beger tán jahlád, dert o do bahr but, zemin larzet o talár trakket o kap butant, ⁵² kabráni dap pach but o bázén pák o pahrézkárén mardom ke mortagatant, padá zendag butant. ⁵³ Issáay jáh janag o zendag bayagé rand, cha wati kabrán dar átkant, Urshalimay Pákén shahrá shotant o watá pa bázénéá záher o paddaresh kort. ⁵⁴ Hamá pawji apsar o áiy hamráhén sepáhig ke Issáay páneg atant, wahdé zeminchandh o é dega sargwastesh distant, sakk torset o gwashtesh: “Béshakk é mard Hodáay Chokk at.”

⁵⁵ Bázén janéné ham, ke cha Jalilá pa Issáay hezmat o cholópagá áiy hamráhiá átkagat, dur óshtátag o chárágá atant. ⁵⁶ Gón áyán Maryam Majdaliáh, Ákub o Issopay mát Maryam o Zebdiay chokkáni mát gón atant.

Issáay kabr o kapon

(Markás 15:42-47; Luká 23:50-56; Yuhanná 19:38-42)

⁵⁷ Rónendá, Arimatiáay shahray Issop námén zardáren mardé átk ke Issáay moridé at. ⁵⁸ Pilátusay kerrá shot o Issáay jónay baragay ejázati lóthet. Pilátusá parmán dát ke jóná áiy bedayant. ⁵⁹ Issopá jón zort o sápen lilomé[‡] godéá patát o ⁶⁰ hamá nókén kabray tahá ér dát ke pa wat cha talará tráshtagati. Mazanén dhóké léth dayáná kabray dapá éri kort o shot. ⁶¹ Bale Maryam Majdaliáh o á dega Maryam, hamódá kabray dém pa démá neshtant.

Kabray negahpáni

[†] 27:35 27:35 Pál, bezán láthari, bay o shartbandi. [‡] 27:45 27:45 Asligén Yunáni nebeshtánka gwasht: “shahomi sáhatá beger tán nohomi sáhatá”. [§] 27:46 27:46 Asligén Yunáni nebeshtánka gwasht: “nohomi sáhatá”. ^{*} 27:46 27:46 Chihál, bezán dardnákén kukkár. [†] 27:46 27:46 Zabur 22:1. [‡] 27:59 27:59 Lilom, goday tahré ke Engréziá “linen” gwashaga bit. [§] 27:62 27:62 Asligén Yunáni nebeshtánka gwasht: “Shabbatay tayáriay róchá rand”.

⁶² Domi róchá, bezán Shambehá, § mazanén dini péshwá o Parisi yakjáh but o Pilátusay kerrá shotant. ⁶³ Gwashtesh: “Oo wájah! Márá yát ent ke é drógbandá wati zendá gwashtagat ke ‘say róchá rand man padá zendaga bán o jáha janán.’ ⁶⁴ Paméshká parmán beday ke tán say róchá kabray sará negahpáni kanag bebit, chó mabit ke áiy morid jóná bedozzant o bebarant o gón mardomán begwashant ke á cha mordagán padá zendag butag o é goddhi repk o dróg, cha pésarigéná angat gandahter bebit.” ⁶⁵ Pilátusá darráént: “Negahpán wa esh ant, wati hamráhiá bebarét o haminchok ke gón shomá buta kant, kabray negahpániá bekanét.” ⁶⁶ Gorhá shotant o kabray dapay mazanén dhók mohr o mómband kort o sepáhigesh páneg kortant.

28

Issáay jáh janag

(Markás 16:1-8; Luká 24:1-12; Yuhanná 20:1-10)

¹ Shabbatay róchá rand, bezán Yaksham-behay* gwarbámá† Maryam Majdaliah o á dega Maryam kabray cháragá shotant. ² Yak anágat mazanén zeminchandhé but, chiá ke Hodáwanday préshtagé cha ásmáná ér átk, dhóki léthént o áiy sará nesht. ³ Rang o dróshomi grókay paymá drapshagá at o god o pósháki, barpay dhawlá espét atant. ⁴ Negahpánén sepáhig cha bimmá larzagá laggetant o mordagay dhawlá butant. ⁵ Préshtagá gón janénán gwasht: “Matorsét! Mana zánán shomá Issáay shóházá ét ke salib kasshag butag. ⁶ Á edá naent, anchosh ke wat gwashtagati zendag butag o jáhi jatag, byáét hamá jágahá bechárét ke ér kanag butagat. ⁷ Eshtápiá berawét o áiy moridán sahig kanét ke á cha mordagán zendag butag o cha shomá pésar Jalilá rawt, hamódá áiy gendét. Nun man shomará hál dát.” ⁸ Gorhá janén pa tors o ham gón wasshi cha kabray sará tachán but o shotant tán é hálá moridán sar bekanant. ⁹ Issá bé gat o gománá anágat wat gón á janénán dochár kapt o gwashti: “Drud o drahbát!” Á nazziká átkant, Issáay pádesht geptant o parasteshesh kort. ¹⁰ Issáay gón áyán gwasht: “Matorsét! Berawét mani brátán begwashét ke Jalilá berawant, hamódá maná gendant.”

Dini péshwá o sepáhigáni pandal

¹¹ Hamá wahdá ke janén per tarrag o rawagá atant, lahtén negahpánén sepáhig, dém pa shahrá shot tán dini péshwáyan

cha é sargwastán sahig bekanant. ¹² Dini péshwáyan, kawmay kamásháni gend o nend o shawr o saláhá rand, sepáhig mazanén zarré lálech dát o ¹³ gwashtant: “Gón mardomán begwashét: ‘Shapá má wáb butagén, áiy morid átkagant o jónesh dozzetag o bortag.’ ¹⁴ Agan wáli cha é hálán sahig but, shomá paréshán o deltaparkah mabét, má áiy sarpada kanén ke pa shomá janjálé mabit.” ¹⁵ Sepáhigán zarr zortant o anchosh ke sój dayag butagatant, hamá dábesht kort. É kessah tán róch maróchigá Yahudiáni nyamá sheng o tálán ent.

Jahán o Issáay mestág

(Markás 16:14-18; Luká 24:36-49; Yuhanná 20:19-23; Kásedáni Kár 1:6-8)

¹⁶ Gorhá yázdahén morid Jalilay hamá kóhay sará shotant ke Issáay gón áyán gwashtagat. ¹⁷ Wahdé áyán Issá dist parasteshesh kort, bale lahtén angat shakk at. ¹⁸ Issáay gón áyán gwasht: “Ásmán o zeminay sajjahén zór o wák mani dastá dayag butag. ¹⁹ Paméshká, berawét sajjahén kawmán mani morid bekanét, Pet o Chokk o Pákén Ruhay námá pákshódi bedayét o ²⁰ áyán dars o sabak bedayét ke mani sajjahén hokm o parmánáni sará kár bekanant. Deljam bebét, man tán donyáay halásiá, modám gón shomá gón án.”

* 28:1 28:1 Asligén Yunáni nebeshtánka gwasht: “haptagay awali róchay”. † 28:1 28:1 Gwarbám, bezán róthekk, róchay dar áyagay wahd.

Pákén Enjil cha Markásay kalamá Markásay Enjilay pajjár

É ketábay nebisók, Markás, Issá Masihay morid Shamun Petrosay sangat o cha bongéji kelisáay báwarmandán yakké at. Kásedáni Káray ketábá, lahtén jágahá Markásay nám átkag ke Petros o Pulosay sangat ent. Báwar esh ent, hamá wahdá ke Markás, Petros o Pulosay hamráhiá Rumay shahrá nendók butag, áia pa Rumay shahray jahmenendén darkawmán é ketáb nebeshtag. Lahtén zántkáráni hayál hamesh ent ke Markásá, Issáay bárawá bázén yáddáshté cha Petrosá zortag.

Chárén Enjiláni tahá, Markásay ketáb cha á degarán gwandhter ent. É ketábá, Issá Masihay Hodáwandi, cha áiaý mójézah o hayrán kanókén kárán pésh dáraga bit.

Markásay Enjilá, mardománi démá Issáay áyag, Jalilay damagá áiaý tálim o kár, dém pa Urshalimá rawagay wahdá áiaý dátágén sar o sój, Urshalimá áiaý goddhi rócháni sargwast, mark o padá zendag bayag nebisag butagant.

Pákshódókén Yahyáay kolaw

(Mattá 3:1-12; Luká 3:1-18; Yuhanná 1:19-28)

¹ Issá Masih, Hodáay Chokkay wasshén mestágay* bongéj† o shoruhát.

² Anchosh ke Eshayá Nabiay Ketábá nebeshtah ent:

*Bechár, man wati kásedá cha taw pésar ráha dayán
ke á, tai ráhá tachk o tayára kant.*

³ Gyábáná, kasé gwánka³jant:

Hodáwanday ráhá tayár o

áiaý keshká rást o tachk bekanét. §

⁴ Pákshódókén Yahyá gyábáná záher but o gwánki jat: “Cha wati gonáhán pashómán bebét* o pákshódi bekanét ke bakshaga bét.” ⁵ Mardom, cha Yahudi-ahay sajjahén métag o kallagán o cha Urshalimay shahrá áiaý kerrá shotant. Wati gonáháni pashómániesh záhera kort o Yahyáyá Ordonay kawrá pákshódia

dátant.† ⁶ Yahyáyá cha oshteray pothán gwaptágén póshák gwará at o póstén kamarbandé lánká bastagati. Áia, madag o gyábáni bénaga‡ wárt. ⁷ Yahyáyá jára jat o gwashti: “Cha man o rand, mardé kayt ke cha man báz zóráakter ent o maná é láheki ham nést ke kóndhán bekapán o áiaý kawshbandán bebóján. ⁸ Man shomará gón ápa pákshódia dayán, bale á shomará gón Hodáay Pákén Ruhá§ pákshódia dant.”

Issáay pákshódi o chakkás

(Mattá 3:13—4:11; Luká 3:21-22; 4:1-13)

⁹ Á róchán, Issá cha Jalilay damagay shahr Náserahá átk o Ordonay kawrá Yahyáyá dastá pákshódi dayag but. ¹⁰ Anchosh ke á cha ápa dar áyag at, disti ke ásmánay dap pach but o Hodáay Pákén Ruh kapótéay dróshomá* átk o áiaý sará ér nesht. ¹¹ Cha ásmáná é tawár átk: “Taw mani dóstén Bacch ay o man cha taw báz wassh o razá án.”

¹² Hamá wahdá Pákén Ruhá Issá gyábáná rawán dát.† ¹³ Á, tán chel róchá gyábáná mant o Shaytán áia báz chakkásagá‡ at. Ódá jangali jánwar ham gón áia hór atant o préshtagán áiaý hezmat kort.

Chár máhigiray lótháénag

(Mattá 4:12-22; Luká 4:14-15; 5:1-11)

¹⁴ Cha Yahyáay dazgir bayagá rand, Issá Jalilá shot o Hodáay bádsháhiay wasshén mestágay jári jat o ¹⁵ gwashti: “Wahd átkag o rasetag, Hodáay bádsháhi nazzik ent. Nun pa del cha wati gonáhán pashómán bebét o Hodáay wasshén mestágay sará báwar bekanét.” ¹⁶ Issá, Jalilay mazangwarmay§ lambá* rawagá at ke do máhigiri dist, Shamun o áiaý brát Andriás, ke pa máhigiriá wati dám o máhórán gwarmá chér géjagá atant. ¹⁷ Issáyá gón áyán gwasht: “Byáét, mani randgiriá bekanét o man shomará anchosha kanán ke máhig geragay badalá, mardománi delá shekar bekanét.”† ¹⁸ Áyán hamá damáná wati dám yalah dát o áiaý hamráh butant. ¹⁹ Issá ke kammé démá shot Zebdiay chokk, Ákub o áiaý brát Yuhannái distant, ke bójigá‡ neshtagatant o wati máhórán sráchag§ o

* **1:1** 1:1 Mestág, bezán wasshén hál, bashárat. † **1:1** 1:1 Bongéj, bezán bendát, shoru. ‡ **1:3** 1:3 Gwánk, bezán borzén tawár. § **1:3** 1:3 Band 2-3, bechár Maláki Nabiay Ketáb, bahr 3, band 1; Eshayá Nabiay Ketáb, bahr 40, band 3. *

1:4 1:4 Pashómán bayag, bezán tawbah kanag. † **1:5** 1:5 É Yahyá at ke pákshódia dátí. ‡ **1:6** 1:6 Bénag, bezán asal. § **1:8** 1:8 Hodáay Pákén Ruh, bezán Ruholkodos. * **1:10** 1:10 Dróshom, bezán shekl. † **1:12** 1:12 É Pákén Ruh at ke Issái rawán dát. ‡ **1:13** 1:13 Chakkásag, bezán ázmáesh kanag, emtehán gerag. § **1:16** 1:16 Mazangwarm, bezán daryáchah. * **1:16** 1:16 Lamb, bezán dámon, kerr. † **1:17** 1:17 Delay shekar kanag maksad mardomán Hodáay ráhá árag ent. ‡ **1:19** 1:19 Bójig, bezán lánch, yakdár, kashti. § **1:19** 1:19 Sráchag, bezán dámay dóchag o addh kanag.

sharr kanagá atant. ²⁰ Anchosh ke Issáyá á distant, gwánki jatant. Á doénán, wati pet Zebdi gón kárendahán bójigá yalah dát o Issáy hamráh butant.

Ganókéay jennay kasshag
(Luká 4:31-37)

²¹ Issá o áiy morid Kaparnáhumay shahrá shotant. Shabbatay róchá* Issá kanisahá† shot o mardomi tálim dátant. ²² Mardom cha áiy dars o sabakán hayrán atant, chiá ke áiy Sharyatay zánógeráni‡ paymá darsa nadát, gón wák o ehtiáré dars o tálima dát. ²³ Hamé wahdá, kanisahay tahá yak mardéa ke áiy jenné per at, kukkár kanáná gwasht: ²⁴ “Oo Issá Náseri! Tará gón má che kár ent? Átkagay ke mára gár o tabáh bekanay? Mana zánán taw kay ay, taw Hodáay gechén kortagén hamá Pákén ay.” ²⁵ Issáyá jenn hakkal dát o gwashti: “Wati dapá bedár o é mardá yalah day.” ²⁶ Jenná á mard sakk pretk o zhámbalént§ o kukkár kanán cha áiy dar átk. ²⁷ Mardomán pa hayráni watmánwatá gwasht: “É chónén habaré? Gwashay nókén tálimé, gón choshén wák o ehtiáré ke jennán ham hokma dant o jenn ham áiy habará mannant.” ²⁸ Dér nagwast ke Jalilay sajjahén kerr o gwarán, Issáyá nám dar áwort.

*Nádráhani drahbakshi**
(Mattá 8:14-17; Luká 4:38-41)

²⁹ Issá, anchosh ke cha kanisahá dar kapt, Ákub o Yuhannáay hamráhiá Shamun o Andriásay lógá shot. ³⁰ Ódá, Shamunay wassig tapig at o nepáday sará waptagat. Anchosh ke Issá lógá átk, nádráhay hálesh dát, ³¹ Issá nazziká shot, áiy dasti gept o pádi kort. Áiy tap kapt, á wassh but o áyáni hezmat kanagá lagget.

³² Bégáhá rónendá† rand, mardomán wati nádráh ke áyáni nyámá‡ ganók o jenni ham hastat, Issáyá kerrá áwortant. ³³ Shahrá sajjahén mardom, lógay dapá mocch butant. ³⁴ Issáyá bázéné dráh kort ke dhawl dhawlén nádráhián geptagatant o bázén ganókáni jenni kasshetant, áiy jenn pa habará naeshant, chiá ke jennán á pajjáha áwort. §

Enjilay wasshén mestágay jár
(Luká 4:42-44)

* **1:21** 1:21 Shabbatay róch, hamá Shambeh ent, bezán Yahudiáni kár nakanagay róch. † **1:21** 1:21 Kanisah, bezán Yahudiáni parasteshgáh. ‡ **1:22** 1:22 Sharyatay zánóger, bezán dini álem o Mussáay Sharyatay zántkár. § **1:26** 1:26 Zhámbalénag, bezán chizzéay gerag o pa trondi sorénag o larzénag. * **1:28** 1:28 Drahbakshi, bezán dráhi o salámatay bakshag, Arabi o Pársiá “shafá”. † **1:32** 1:32 Rónend, bezán hamá némag ke rócha nendit, magreb. ‡ **1:32** 1:32 Nyámá, bezán myáná, darnyámá, tahá, tóká. § **1:34** 1:34 É jenn atant ke Issáesh pajjáh áwort. * **1:35** 1:35 Gestá, bezán yak kerr; dur. † **1:40** 1:40 Asligén Yunáni zobánay labz, pa syahgarr o bag, bezán jozám o pa dega tahr tahrén garrán ham kár bandaga bit. ‡ **1:43** 1:43 Kaddhan, bezán mohrén tákid, hokm.

³⁵ Sabáhá máhallah ke angat tahár at, Issá pád átk, cha lógá dar kapt, yak gestá* o panáhén jágahéa shot o dwái kort. ³⁶ Shamun o áiy hamráh pa Issáy shóházá dar kaptant. ³⁷ Wahdé Issáesh dist, gón áiy gwashtesh: “Sajjahén mardom tará shóház kanagá ant.” ³⁸ Issáyá gwasht: “Byáét dega némagéa berawén, dém pa kerr o gwaray halk o hankénán, tánke man wasshén mestágá berasénán, chiá ke man pa hamé kára átkagán.” ³⁹ Gorhá, sajjahén Jalilá tarr o tábi kort, kanisaháni tahá wasshén mestágay jári jat o jenniáni jenni ham kasshet o dar kortant.

Garriéay drahbakshi
(Mattá 8:1-4; Luká 5:12-16)

⁴⁰ Yak mardé, ke áiy syahgarr† at Issáyá kerrá átk, kóndhán kapt, dazbandi kort o gwashti: “Agan taw belóthay, maná wassh o palgár korta kanay.” ⁴¹ Issáyá áiy sará sakk bazzag but, dasti shahárt o á mardí dast per mosht o gwashti: “Mana lóthán, wassh o palgár bay.” ⁴² Hamá damáná á mard cha syahgarrá dráh but. ⁴³ Roksat kanagay wahdá, Issáyá kaddhan‡ kort o gwasht: ⁴⁴ “Hozzhár bay. Hechkasá cha é habar o hálá sahig makan. Bale beraw, watá dini péshwáyá pésh bedár o pa wati pák o palgáriá, hamá korbánig ke Mussáay Sharyatá nebisag butag, hayráti bekan tánke pa áyán gwáh o sháhedié bebit.” ⁴⁵ Bale á mard ke cha ódá dar kapt, wati drahbakshiay habari har jáh sheng o tálán kort. É sawabá, nun Issáyá sarzáherá, hech shahréa shota nakort, dasht o gyábán o gestáén jágahána tarret. Bale angat mardom cha har némagá áiy kerrá átkant.

2

Lang o mondhen mardéay drahbakshi
(Mattá 9:1-8; Luká 5:17-26)

¹ Lahtén róchá o rand, Issá padá Kaparnáhumá átk o é habar sheng o tálán but ke á lógá ent. ² Gorhá, haminkadar mardom átk o mocch but ke lógay dapá óshtagay jágah ham néstat. Issá Hodáay habarán mahluká dars o sabak dayagá at. ³ Hamá damáná, chár mardom yak lang o mondhen mardé áiy kerrá áragá at, ⁴ bale cha mardománi bázén mocchiá, mondhesh Issáyá nazziká áwort

nakort. Paméshká, lógay sará sar kaptant, lógay saresh thong kort o mondesh gón nepádá, jahl ér dát. ⁵ Issáyá ke áyáni setk o báwar dist, gón langá gwashti: “Oo mani chokk! Tai gonáh bakshag butant.” ⁶ Bale Sharyatay lahtén zánóger ke ódá neshtagat, wati delá gwashtesh: ⁷ “Á pa ché chosha gwashtit? É kopré. Abéd cha* Hodáay jendá, dega kass gonáhán baksheta nakant.”

⁸ Harché ke áyáni delá at, Issáyá hamá damáná máret o gwashti: “Shomá pa ché wati delá choshén hayála kanét. ⁹ Wat begwashét, gón é langá kojám habar ásánter ent: ‘Tai gonáh bakshag butagant’ yá: ‘Pád á, wati nepádán bezur o beraw?’ ¹⁰ Bale man paméshká é habar kort tán shomá bezánét, man ke Ensánay Chokk án,† maná é donyáyá gonáháni pahell kanagay wák o ehtiár hast.” Pádá gón á langá gwashti: ¹¹ “Tará gwashán, pád á, wati nepádán bezur o lógá beraw.” ¹² Gorhá mard sajjahénáni demá pád átk, wati nepádi zortant o dhanná shot. Sajjahén mardom hayrán butant, Hodáesh satá kort o sárhát‡ o gwashtesh: “Má choshén kár hechbar nadistagat.”

Láwiy lótháénag

(Mattá 9:9-13; Luká 5:27-32)

¹³ Issá, padá gwarmay lambá shot. Mardománi mazané rombé áiy Kerrá átk, Issáyá á mardom tálim dátant. ¹⁴ Anchosh ke Issá ráhá rawagá at, Halpiay chokk Láwii dist ke song§ o máliát geragay jághá neshtagat. Gón áia gwashti: “Byá, mani randgiriá bekan.” Á pád átk o Issáay hamráh but.

¹⁵ Wahdé Issá Láwiy lógá pa waragá neshtagat, dega bázén songi o máliátgir o gonahkárén mardomé gón Issá o áiy moridán nán waragá at.* Chiá ke bázéné áiy mannók at. ¹⁶ SharyatayParisi zánógerán, wahdé Issá gón é dhawlén mardomán yakjáh waragá dist, gón Issáay moridán gwashtesh: “Á chiá gón songi o gonahkárán hór neshtag o waragá ent?” ¹⁷ É habaráni eshkonagá rand, Issáyá gwasht: “Dráh o salámatén mardomán, dáktar pakár naent, nádráhán dáktar pakár ent. Man pa pahrézkárán nayátkgán, gonahkáráni lóthag o gwánk janagá átkagán.”

* 2:7 2:7 Abéd cha, bezán gayr cha. † 2:10 2:10 Dányál nabíá é pernám pa yak hastiéá kár bastag ke á cha ásmáná kayt. Issá Masihá é pernám pa wat zortag tán mardom bezánant ke á cha ásmáná átkag o hamá wádah dátágén Masih ent. ‡ 2:12 2:12 Sárháyag, bezán satá kanag. § 2:14 2:14 Song, bezán máliát, thayks. * 2:15 2:15 Bani Esrálián, songi o máliátgírén mardom nádóst atant, chiá ke á Rumay hokumatay kárendah atant o bázénéá pa wati nap o suttá cha mardomán géshén song o bája gept. † 2:19 2:19 Passaw, bezán jwáb. ‡ 2:22 2:22 Zekk, bezán cha pasay pósta áddh kortagén darpé ke cha mashká bazter ent. * 3:2 3:2 Bohtám, bezán malámat, tohmat.

Róchagay bárawá

(Mattá 9:14-17; Luká 5:33-39)

¹⁸ Yahyáay morid o Parisi róchag atant. Nun mardom Issáyá Kerrá átkant o jostesh kort: “Chiá Yahyá o Parisiáni morid róchaga dárant, bale tai morid róchaga nabant?” ¹⁹ Issáyá gón mesaléá passaw† dát: “Sur o árosay mehmán, tán sálónk neshtag, róchag buta kanant? Na, tánke sálónk gón áyan gón ent, róchaga nabant. ²⁰ Bale á rócha kayt ke sálónk cha áyan jetá kanaga bit, gorhá á róchaga dárant. ²¹ Hechkas cha nókén godéá chondhé naderrit o kwahnén pashká pacch o pinaga najant, chiá ke nókén goday pacch nazza kayt o kwahnén pashká géshtera derrit. ²² Hechkas ham nókén sharábá, kwahnén zekkán‡ mána nakant, chiá ke nókén sharáb, zekkána trákénit o derrit. Zekk o sharáb, har do zawála bant. Nókén sharábá, nókén zekkán mána kanant.”

Issá Shabbatay wájah o wáhond ent

(Mattá 12:1-8; Luká 6:1-5)

²³ Shabbatay róchéá, Issá cha gandomi kesháráni tóká gwazagá at. Áiy moridán ráh rawájaká cha á keshárán lahtén hóshag sest. ²⁴ Parisián gón Issáyá gwasht: “Bechár, chiá tai morid Shabbatay róchá anchéen kára kanant ke rawá naent?” ²⁵ Issáyá gwasht: “Záná, shomá nawántag, wahdé Dáud o áiy hamráh shodig butant o áyan chizzé pa waragá néstat, gorhá Dáudá ché kort? ²⁶ Masterén dini péshwá Ábyátaray zamánagá, Dáud Hodáay Pákén Lógá shot o wat gón hamráhán Hodáay námá hamá hayráti o pákwandhén nánesh wárant ke, abéd cha dini péshwáyán dega hechkasá áyáni waragay hakk néstat.” ²⁷ Pádá, gón áyan gwashti: “Hodáyá Shabbatay róch pa mardomán pédá kortag, mardom pa Shabbatay róchá pédá nakortagant. ²⁸ Paméshká, man ke Ensánay Chokk án, maná Shabbatay róchay ehtiár ham hast.”

3

Dega mondhéay drahbakshi

(Mattá 12:9-14; Luká 6:6-11)

¹ Dega randé, Issá kanisahá shot. Ódá mardé hastat ke dasti hoshk o mond h at. ² Neshtagén mardom Issáay entezár o wadará atant ke “agan é marday dastá Shambehay róchá dráh bekant, gorhá má

áiy sará Shabbatay róchá kár kanagay bohtámá* jata kanén.”³ Issáyá gón mondhné mardá gwasht: “Byá démá bósht.”⁴ Randá gón á neshtagén mardomán gwashti: “Shabbatay róchá, néki kanag rawá ent yá badi? Ensánay zenday rakkénag† yá koshag o gár kanag?” Á bétawár butant.⁵ Issáyá pa zahr cháretant, chiá ke cha áyáni sengdeliá sakk padard but. Gón á mardá gwashti: “Dastá shahár day!” Áiá dast shahár dát o dasti wassh o dráh but.⁶ Gorhá Parisi dhanná shotant o pa Issáay kóshárenagá gón Hirudián‡ shawr o saláhesh bongéj kort.

Bázén mardomé Issáay randá ráha gípt (Luká 6:17-19)

⁷ Issá cha mardomán dur, gón wati moridán gwarmay lambá shot. Bázén Jalili mardomé áiy padá rawán but.⁸ Cha Yahudiah, Urshalim, Edumiah o Ordonay kaway á dastá ham bázén mardomé mocch but, Sur o Saydunay chapp o chágerday nendók ham átkant. Chiá ke áyán Issáay mójezaháni bárawá eshkotagat.⁹ Issáyá gón moridán gwasht, bójigé pa áiy tayár bekanant tánke cha bázén mardománi mocchiay angerr o áshópá dur bebit.¹⁰ Áiá bázén mardomé wassh o dráh kortagat, paméshká nádráhné mardom pa áiy dast per kanagá, télánk dayán, démá kenzán atant.¹¹ Hamáyán ke jenn per at, wahdé Issáesh dist áiy pádán kaptant, kukkáresh kort o gwashtesh: “Taw Hodáay Chokk ay.”¹² Issáyá hokm dátant: “Gón kassá magwashét man kay án.”

Dwázdah hásén káseday gechné kanag (Mattá 10:1-2; Luká 6:12-16)

¹³ Randá, Issá kóhay sará sar kapt o cha wati moridán lahténi hamódá lóthet o á Issáay kerrá átkant.¹⁴ Issáyá cha áyán dwázdah kas gechné kort o wati hásén kásed náméntant, tánke gón áiy hamráh bebant o áyán pa wasshén mestágay sheng kanagá rawán bekant.¹⁵ Jenn kasshagay ehtiári ham dátant.¹⁶ Á dwázdahénáni nám esh ant: Shamun ke Issáyá áiy domi nám, “Petros”§ per bast,¹⁷ Zebdiay chokk, Ákub o áiy brát Yuhanná ke Issáyá “grand o grókay chokk” nám per bastant,¹⁸ Andriás, Pilipos, Bartulumá, Mattá, Tumá, Halpiay chokk Ákub, Taddá, sarmacháren Shamun* o¹⁹ Yahudá Eskaryuti ke

randá Issái dróhagi† o dozhmenáni dastá dayagi at.

Issá o Belzabul

(Mattá 12:22-32; Luká 11:14-23)

²⁰ Randá, Issá lógá átk o ódá mardom haminchok báz at ke Issá o áiy moridán waragay móh ham naraset.²¹ Wahdé áiy syád o wáres sahig butant, áiy baragá átkant, chiá ke lahténa gwashtagat ke á sár naent.²² Cha Urshalimá átkagén Sharyatay zánógerán ham an-chosh gwashtagat ke Issáyá jenn per o gón jennáni sardár Belzabulay sarókiá, jennána kasshit.²³ Gorhá Issáyá á lóthetant, mesáli dát o gwashti: “Shaytán, chón Shaytán kasshet o dar korta kant?”²⁴ Agan yak molkéá nátepáki bebit, á molk barjáha namánit o²⁵ agan yak lógéay mardom watanwat nátepák bebant, á lóg ham pashta nakapit.²⁶ Hamé dhawlá, agan Shaytán wati jenday helápá bóshtit, gár o bégwáha bit. É áiy halási ent.²⁷ Yak zóráwarén mardoméay lógá hechkasa napoterit o áiy lógá pol o pánych‡ korta nakant, tán wahdé ke hamá zóráwarén mardomá magípt o mabandit. Randá áiy lógá pol o pánych korta kant.²⁸ Báwar kanét ke mardománi gonáh o kopr bakshag bant,²⁹ bale hamá ke Hodáay Pákén Ruhay helápá kopra kant, hechbar pahell kanaga nabit o abadi gonahkára mánit.”³⁰ Issáyá paméshká chosh gwasht ke á gwashagá atant, Issáyá jenné sará ent.

Issáay mát o brát

(Mattá 12:46-50; Luká 8:19-21)

³¹ Issáay mát o brát átk o dhanná óshtátant, kolaw o paygámesh rawán dát ke Issá áyáni kerrá byayt.³² Bázén mardomé áiy chapp o chágerdá neshtagat o hálesh dát: “Tai mát o brát dhanná óshtátat o tará lóthant.”³³ Issáyá áyáni passawá jost kort: “Mani mát o brát kay ant?”³⁴ Nun Issáyá neshtagén mardománi némagá cháret o gwashti: “Mani mát o brát esh ant!”³⁵ Á ke Hodáay wáhag o razáay sará kára kanant, hamá mani mát o brát o gohár ant.”

4

Tohm chandhagay mesál

(Mattá 13:1-17; Luká 8:4-10)

¹ Issá padá mazangwarmay kerrá, mardomán dars o sabak dayagá at. Áiy chapp o chágerdá haminchok mardom mocch

† 3:4 3:4 Rakkénag, bezán neját dayag, bachchéng. ‡ 3:6 3:6 Hirudi, bezán Hirudis bádsháhay dózwáh. § 3:16 3:16 Yunáni zobáná, “Petráay” máná “talár” ent. * 3:18 3:18 Bázéné gomána kanant ke sarmacháray máná esh ent: Shamun Yahudiáni yak dini syási párthiéay básk bezán ozw butag ke Rumiáni démá óshtátat. † 3:19 3:19 Dróhag, bezán pa repk rad dayag, Arabi o Pársiá “khiánat”. ‡ 3:27 3:27 Pol o pánych, bezán zórbord, loth o pol.

but ke á bójjigéá swár but o kammoké á kashter kenzet. Sajjahén mardom gwar-may tayábá* óshátatagatant. ² Gorhá áia mardom gón darwar o mesálán bázén dars o sabaké dátant. Gwashti: ³ “Gósh dárét. Yak dehkáné pa tohmay chandhagá shot, ⁴ tohmáni chandhagay wahdá kammoké tohm ráhay sará retk o báli morgán chet o wártant. ⁵ Kammé tohm dhal o dhókáni sará retk ke ódá hák kamm at, paméshká zutt rost o shabz butant, chiá ke dhagár talag at. ⁶ Bale cha róchay trondén garmíá gimmort† o hoshk butant, chiá ke áyáni risszag o wandhál,‡ zeminá johl nashotagatant. ⁷ Kammé tohm shezz o cherekkáni§ tahá ham retk, shezzán áyáni rost o rodóm dásht o á bébar o bésamar mantant. ⁸ Dega kammé tohm, sharrén zeminá retk, á sharr rost o mazan butant, jáhé si sari, jáhé shast sari o jáhé sad sari hóshag o baresh kort.” ⁹ Padá gwashti: “Harkasá pa eshkonagá gósh per, beshkont.”

¹⁰ Wahdé mardom shotant o Issá tahná mant, gorhá dwázdahén morid o é dega hamráhán, cha áia é mesáláni máná jost kort. ¹¹ Issáyá passaw dát: “Hodáay bádsháhiy ráz shomará bakshag butag, bale á ke mani ráhay randgiriá nakanant, é chizz pa áyan hoshkén mesál o darwar ant o bass, ¹² tánke:

*gón chammán bechárant, bale magendant
gón góshán beshkonant, bale sarkech
mawarant,*

*Hodáay némagá per matarrant o bakshag
mabant.”*

*Tohm chandhagay mesáláy maksad
(Mattá 13:18-23; Luká 8:11-15)*

¹³ Padá gwashti: “Agan shomá é mesálá sarkecha nawarét, gorhá á dega mesálán chón zánta kanét?” ¹⁴ Tohm chandhók hamá ent ke Hodáay habará keshit. ¹⁵ Lahtén mardom ráhay sará retkagén tohmay dhawlá ent. Hodáay gál o habar ke ódá keshaga bit, hamá damáná Shaytána kayt o cha áyáni delá keshtagén habará dara kant o bárt. ¹⁶ Hamé dhawlá, á tohm ke dhal o dhókáni sará retkant, hamá mardománi mesál ent ke Hodáay habará gósha dárant o hamá damáná pa gal o shádehia mannanti, ¹⁷ bale pa é sawabá ke risszag o wandhálesh najatag, Hodáay kolaw áyáni delá, tán dérá namánit o jágaha nakant. Wahdé pa Hodáay gál o habaránigi sakkí o ázáré berasitesay, hamá

damáná cha ráhá thagalant o kapant. ¹⁸ Á tohm ke shezz o dhangaráni nyámá réchag butant, hamá mardom ant ke Hodáay gál o habará gósha dárant ¹⁹ bale donyái parésháni o mál o zarray hers o jópah* o á dega chizzáni lóth o wáhag áyan rada dayant o naylant Hodáay habar sabz betarrít o bar o barward bedant. ²⁰ Á tohm ke sharrén zeminá retkant, hamá mardom ant ke Hodáay habará eshkonant o mannant, bar o barwarda dayant, lahtén si sari, lahtén shast sari o lahtén sad sari.”

*Cherágay mesál
(Luká 8:16-18)*

²¹ Issáyá mesál dayáná gwasht: “Kay rókén cherágá tagár,† yá tahtay chérá chéra dant? Cherágá cherágdánay sará éra nakanant? ²² Á chizz ke chér ent, záher o paddar‡ bayagi ent o á habar ke panáh o andém ent, áshkár o démdará bayagi ent. ²³ Harkasá pa eshkonagá gósh per, beshkont.”

²⁴ Padá gwashti: “Delgósh kanét ke shomá ché eshkonét. Gón har kayl o paymánahé ke bedayét, gón hamá kaylá shomará dayaga bit. Angat géshter ham shomará rasit. ²⁵ Kaséá ke chizzé hast, áia géshter dayaga bit o kaséá ke nést, cha áia hamá ke hastenti ham pach geraga bit.”

Tohmé ke bojít o sabza bit

²⁶ Issáyá gwasht: “Hodáay bádsháhi, anchosh ent ke kasé dhagará tohm bekeshit. ²⁷ Shapá bwapsit o róchá ágáh bebit. Bale tohm anchosha rodant o mazana bant ke dehkán wata nazánt che paymá o chónaká chosh but. ²⁸ Bé kaséay komaká, dhagár wat keshtagén tohmá pa bar o barwarda rasénit. É dhawlá: péсарá ták, padá hóshag o randá hóshagay tahá dánag. ²⁹ Wahdé kesháray bara rasit, dehkán dásá sóhána kant, chiá ke rón o móshay wahd átkag.”

Kasterén tohmay mesál

(Mattá 13:31-32; Luká 13:18-19)

³⁰ Padá Issáyá gwasht: “Pa Hodáay bádsháhi, chónén darwaré byarén o chónén mesalé pa áiy bayáná pésh bekanén? ³¹ Hodáay bádsháhi, thélkáhay§ tohmay dhawlá ent. Zeminá keshagi tohmáni tahá cha sajjahénán kasterén ent. ³² Bale keshag ke but, rodit o cha á dega sabzagán borztera bit, sháh o lambi anchosh mazana bant ke báli morg, áiy ták o tháláni sáhegá kodóh

* 4:1 4:1 Tayáb, bezán daryáay Kerr, sáhel. † 4:6 4:6 Gimmorag, bezán hoshk tarrag, napasgir bayag. ‡ 4:6 4:6 Wandhál, bezán risszag o rótag. § 4:7 4:7 Shezz, yá shenz, o cherekké bébarkatén sabzagé ke asligén kesháray tahá rodit o áyáni rost o rodómá dárít. * 4:19 4:19 Jópah, bezán lálech o tamah. † 4:21 4:21 Tagár, bezán mazzéni johléen darp, hirán, lagán. ‡ 4:22 4:22 Paddar, bezán záher, áshkár. § 4:31 4:31 Thélkáh, bezán hardal.

o kodáma bandant.”³³ Issáyá Hodáay habar anchen mesál o darwaráni tahá gón áyán darshána kortant ke á sarpad but bekanant.³⁴ Bé darwar o mesálán hech habaria nakort, bale wahdé gón wati moridán tahná but, gorhá sajjahén mesáli pa áyán maná kortant.

Tuppánay érmósh kanag*
(Mattá 8:23-27; Luká 8:22-25)

³⁵ Hamá róchá, bégáhá, Issáyá gón wati moridán gwasht: “Byáét gwarmay domi némagá rawén.”³⁶ Áyán cha mardomán roksat gept, hamá bójjigá ke Issá neshtagat swár butant o Issáesh gón wat bort. Dega lahtén bójjig ham áyáni hamráh at.³⁷ Dér nagwast ke mazanén syahgwátéa sar kort o mastén chawl o mawján bójjig cha ápá porr kort.³⁸ Issáyá, sarjáhé saray chérá at o bójjigay poshti némagá, wáb at. Gorhá moridán, cha wábá ágáh kort o gwashtesh: “Oo ostád! Tará may hayál hecch gwar naent ke má ér bokkagi† o meragi én?”³⁹ Á cha wábá ágáh but, gwáti hakkal dát o gón warmá gwashti: “Érmósh! Bass kan!” Gorhá gwát kapt o chawl o mawj áram geptant.⁴⁰ Padá gón wati moridán gwashti: “Shomará pa ché torsit? Angat báwara nakanét?”⁴¹ Áyán sakk torsot o watmánwatá gwashtesh: “É chónén mardomé ke gwát o chawl ham eshiay hokmá mannant?”

5

Jenni ganókéay drahbakshi
(Mattá 8:28-34; Luká 8:26-39)

¹ Issá o áiy morid, Jalílly mazangwarmay domi pahnátá Gerásiáni* sardhagará rasetant.² Wahdé Issá cha bójjigá ér átk, hamá damáná yak mardé ke jenné per ati, cha kabrestáná dar átk o gón áia dochár kapt.†³ Á, kabrestáná jahmenend at o haminchok zóri man at ke hechkasá áiy dast o pád gón zamzilá ham kayd korta nakortant.⁴ Pé sará báz randá mardomán kayd kortagat, bale áia zamzil próshtagatant o hechkasá áiy ger o dáray wák o twán néstat.⁵ Á, shap o róch kabrestán o kóhán neshtagat, kukkár o chihália jat o watá gón dhók o sengá thappigia kort.⁶ Anchosh ke Issái cha durá dist, tacháná áiy némagá átk o Issáay pádán kapt.⁷ Gón kukkár o chiháléa gwashti: “Issá, o mazanshánén Hodáay Chokk! Tará gón man che kár ent? Tará Hodáay sawgend ent, maná azáb maday.”

* 4:34 4:34 Érmósh, bezán áram, há mósh. † 4:38 4:38 Bokkag, bezán ápá ér rawag, boddhag, gark bayag.

* 5:1 5:1 Lahtén daznebeshtá átkag: “Gadíriáni”. † 5:2 5:2 Dochár kapag, bezán dhikk warag, yakdegará gendag. ‡ 5:20 5:20 Dekápolis, bezán dah shahr. Gerásá cha é shahrán yakké at. § 5:24 5:24 Angerr kanag, bezán chapp o chágérdá gerag, Arabi o Pársiá “moháserah”.

⁸ Chiá ke Issáyá gwashtagat: “Oo palitén ruh! É mardá yalah day.”⁹ Issáyá cha áia jost kort: “Tai nám kay ent?” Áia passaw dát: “Mani nám ‘Lashkar’ ent, chiá ke má báz én.”¹⁰ Padá áia gón Issáyá báz randá mennat o zári kort ke “mára cha é sardhagará dar makan.”

¹¹ Hamódá jompéay sará, hukkáni mazanén ramagé charagá at.¹² Jennán dazbandi kort o gwasht: “Mára ráh beday tánke hamé hukkáni jesmá poterén.”¹³ Issáyá ejázat dátant. Gorhá, jenn dar átkant o hukkáni jesmá potertant. Hukkáni ramag ke do hazáray kesásá at, cha jompá jahlagá ér kapáná gwarmá bokket.¹⁴ Gorhá, hukkáni shwánag shahr o métagán tatkant o mardomesh é bárawá hál dátant. Wahdé mardomán é habar eshkot, átkant tán gón wati jenday chammán é sargwastá begendant.¹⁵ Issáay gwará ke átkant distesh, hamá mard ke pé sará jennán ganók kortagat, hamedá neshtag, pocch o pósháki gwará o pa hósh o sár ent. Nun torsesh delá nesht.¹⁶ Á ke wat chamdistén sháhed atant, kessahesh kort ke jenni ganók chónaká hósh o sár butag o hukk ke paymá gwarmá bokketagat.¹⁷ Gorhá mardomán gón Issáyá dazbandi kort ke áyáni sardhagará yalah bedant o berawt.

¹⁸ Wahdé Issá bójjigá swár bayagá at, á mardá ke jenná yalah dátagat, dazbandi kort: “Maná wati hamráh kan.”¹⁹ Bale Issáyá ejázat nadát o gwashti: “Lógá beraw o wati mardomán hál beday ke Hodáwandá pa taw chónén káré kortag o tai sará chón bazzagi butag.”²⁰ Gorhá, á mard shot o har káré ke Issáyá pa áia kortagat, Dekápolisay‡ sardhagaráy mardomi hál dátant. Sajjahén mahluk, habakkah o hayrán but.

Issá janénéa dráh o jenekéa zendaga kant

(Mattá 9:18-26; Luká 8:40-56)

²¹ Wahdé Issá padá bójjigá swár but o gwarmay á dastá shot, tayábay Kerrá, mardománi mazanén rombé áiy chapp o chágérdá mocch but.²² Yáyrus námén mardé ke kanisahay master at, hamódá átk o gón Issáay gendagá, áiy pádán kapt.²³ Gón áia dazbandii kort ke “mani jenek markig ent. Byá o wati dastá áiy sará ér mosh, tánke dráh bebit o zendag bemánit.”²⁴ Issá áiy hamráh but o shot. Dega bázén rombé mardom ham, angerr kanán§ gón áia rawán but.

²⁵ Mardománi rombá janéné gón at ke dwázdah sál at áiy hón band nabutagat o ²⁶ cha bázén dáktarán pa wati elájá mazanén ranjé kasshetagati o sajjahén zarr o máli ham báhéntagatant,* bale dráh bayagay badalá najórhter butagat. ²⁷ Áiá pésará Issáay bárawá eshкотagat o nun cha mardománi nyámá Issáay poshtá átk o áiy kabáhi† dast jat. ²⁸ Chiá ke áiy setk o báwar esh at ke “agan Issáay pocchán ham dast per bekanán, dráha bán.” ²⁹ Anchoshi kort, hamá damáná hón band but o cha wati jesmay hálatá sarpad but ke dráh ent. ³⁰ Issáay zutt zánt ke yak wák o kodraté cha áiá dar átkag. Gorhá áiá mardománi némagá chakk tarrént o josti kort: “Kayá mani pocch dast jatant?” ³¹ Moridán gwasht: “Oo wájah! Wat gendagá ay ke mardomán tará chón angerr kortag, angat ham josta kanay: ‘Kayá mani pocch dast jatant?’ ” ³² Issá angat chárén némagán chárágá at ke kayá é kár kortag. ³³ Bale hamá janéná ke é kár kortagat, zánti ke áiá chón butag o pa tors o larz átk, Issáay pádán kapt o é káray rástén habar o háli dátant. ³⁴ Issáay gón áiá gwasht: “Oo mani jenek! Tai setk o báwará tará rakkéntag, pa wasshi o salámati beraw o cha wati najórhiá dráh bebay.”

³⁵ Issá angat habará at ke cha kanisahay masteray lógá, mardomé átk o Yáyrusi hál dát ke “tai jenek mortag, nun pa ché ostádá géshter delsyáha kanay?” ³⁶ Issáay áyáni habaráni némagá delgósh nakort o gón kanisahay masterá gwashti: “Maters, báwar kan.” ³⁷ Cha Petros, Ákub o áiy brát Yuhannáyá abéd, dega hechkasá hamráhiay ejázati nádát. ³⁸ Wahdé kanisahay masteray lógá átkant, distesh ke baláhén shór o walwalahé, mardom gréwag o mótk áragá ant. ³⁹ Lógá potert o gwashti: “Chiá shóra kanét o gréwét? Chokk namortag, bass wáb ent.” ⁴⁰ Mardomán gón é habaráni eshkonagá rishkandé jat, bale Issáay cha hamá báná‡ ke jenek ódá at, sajjahén mardom dar kortant o gón jenekay pet o mát o wati sayén moridán hamódá shot. ⁴¹ Issáay jenekay dast gept o gwashti: “*Talitá kom!*” Bezán: Oo jenekok! Pád á. ⁴² Jenek hamá damáná pád átk o tarragá lagget. Omri dwázdah sál at. Á mardom ke gón atant sakk hayrán butant. ⁴³ Issáay pa trondi hokm kortant: “É habará gón hechkasá magwashét” o gwashti: “Jeneká warák bedayét.”

* 5:26 5:26 Báhénag, bezán gár dayag, cha dast dayag. † 5:27 5:27 Kabáh, bezán jobbah. ‡ 5:40 5:40 Bán, bezán kóthi, kamrá, otág. * 6:14 6:14 Ajekkái, bezán mójezah, hayrán kanóké kár.

6

Issá padá Náserahá pera tarrit (Mattá 13:53-58; Luká 4:16-24)

¹ Randá, Issá cha ódá dar átk o moridáni hamráhiá wati jenday shahrá átk. ² Shabbatay róch ke but, kanisahá shot o mardománi tálim dayagi bongéj kort. Cha áiy dars o sabakán bázén mardomé hayrán but o gón yakdegará gwashtesh: “É habar eshiá cha kojá áwortagant o é zánt o zánag kayá dátag? É dhawlén ajabén káráni kanagay wák o twáni cha kojá rasetag? ³ É hamá dártrásh naent ke Maryamay bacch o Ákub, Yushá, Yahudá o Shamunay brát ent? Áiy gohár ham hamedá may shahrá jahmenend naant?” Gorhá áyán bad átk o Issáesh namanet. ⁴ Issáay gón áyán gwasht: “Hech nabieá wati shahr o hankéná, wati lógá o wati syád o wáresáni nyámá sharap nést.” ⁵ Áiá ódá bázén mójezah pesh dáshnt nakort, bass lahtén nádráhay sará dasti per mosht o dráhi kortant. ⁶ Issá, cha áyáni nabáwariá hayrán at.

Issá dwázdahén kásedán rawána dant (Mattá 10:5-15; Luká 9:1-6)

Randá, Issáay é dega métag o ábádián tarr o garda kort o mardomi sabaka dátant. ⁷ Dwázdahén kásedi lóthetant o do doá rawán kortant, jenn o palitén ruháni dar kanagay wák o ehtiári ham dátant o ⁸ gwashti: “Tarr o garday wahdá, gón wat abéd cha asá o dazlatthéa dega hecch mabarét, na nán o na turag o tóshag, na wati lánkbandáni tahá zarr. ⁹ Kawsh pádá kanét, bale cha gwaray jámagá abéd, dega géschén póshák mazurét. ¹⁰ Harkaséay lógá ke rawét, tán shomay kár halása nabít, hamá lógá bedarét. ¹¹ Har jáh ke mardom shomará wasshátká nakanant o shomay habarán gósha nadárant, cha ódá dar kapét o dar kapagay wahdá, wati pádáni danz o hákán bechandhét, tán áyáni helápá sháhedié behit ke shomá Hodáay kolaw pa áyán raséntag.” ¹² Gorhá, morid shotant o járesh jat ke mardom cha wati badén kárán pashómán bebant. ¹³ Áyán bázén jenni ganóké sár kort o bázén nádráhé thél per mosht o dráh kort.

Pákshódókén Yahyáay koshag (Mattá 14:1-12; Luká 9:7-9)

¹⁴ Issáay é káráni hál o habar Hirudis bádsháhay góshá raset, chiá ke Issáay nám nun portawár butagat. Lahténay gomán at, é hamá pákshódókén Yahyá

ent ke padá cha mordagán zendag butag, paméshká choshén ajekkái* o mójezahána kant. ¹⁵ Lahténá gwasht: “Elyás nabi ent ke padá átkag,” á degarána gwasht: “É, gwastagén paygambaráni dhawlá yak paygambaré.” ¹⁶ Gón é habaráni eshkonagá Hirudisá gwasht: “É hamá Yahyá ent ke man sar borretag, bale nun padá zendag butag.”

¹⁷ Yahyáay koshagay kessah chosh at ke Hirudisá, Yahyáay gerag o bandi kanagay hokm wat dátatag, chiá ke Hirudisá gón wati brát, Piliposay janá, ke námi Hirudiá at, sur kortagat. ¹⁸ Yahyáay é habaray sará Hirudis mayárig kortagat o gwashtagati ke Sharyatá rawá naent kasé gón wati zendagén brátay janá sáng o sur bekant. ¹⁹ Paméshká, Hirudiáay gón Yahyáay báz hasadd o kénag hastat o lótheti áia bekóshárénit, bale é kár cha áiy dazrasá dur at, ²⁰ chiá ke Hirudisá zántagat Yahyá pahrézkár o pákén mardomé o cha áia torseti. Paméshká gwashtagati kasé áia ázáré marasénit. Báz bará, á cha Yahyáay habaráni gósh dáragá negrán o paréshán butagat bale angat áia dósta but ke Yahyáay habaráni beshkont.

²¹ Áherá, Hirudiáay gwam o gégén wahd o móhé raset. Hirudisá pa wati sálgerahá, mazanén jashné gept o sajjahén darbári, pawji sarmaster o Jalilay mir o master lóthetagtant. ²² Hamá wahdá, Hirudiáay jenek majlesá átk, nách o sohbatí gept o Hirudis o áiy mehmáni washdel kortant. Bádsháhá cha galá gón jeneká gwasht: “Harché tai dela lóthit begwash, man tará dayán.” ²³ Sawgendi wárt o gwashti: “Harché lóthay, belóth, toré mani bádsháhiay némá.” ²⁴ Jenek dar átk, wati mátay kerrá shot o josti kort: “Ché belóthán?” Mátá gwasht: “Pákshódókén Yahyáay sará belóth.” ²⁵ Gorhá á zut zuttá per tarret, bádsháhay kerrá átk o gwashti: “Man pákshódókén Yahyáay sará tabakéay tahá lóthán, hamé annun.” ²⁶ Hirudis bádsháh sakk paréshán but, bale áia mehmánáni démá sawgend wártagat o jeneki labz dátatag. ²⁷ Paméshká jalládi hokm kort: “Zendáná beraw, Yahyáay sará borr, tabakéay tahá kan o byár.” Jallád, bandijáhá shot, Yahyáay sari borret o ²⁸ tabakéay tahá pa jeneká áwort o rasént. Jeneká sar bort o wati mátará dát. ²⁹ Wahdé Yahyáay morid sahig butant, átkant, jónesh bort o kabr kort.

Panch hazár mardomá warák dayag
(Mattá 14:13-21; Luká 9:10-17;
Yuhanná 6:1-13)

³⁰ Issáay kásed, áiy gwará per tarretant o wati sajjahén kortagén kár o dátatagén tálimay bárawá Issáesh hál dát. ³¹ Áia gwasht: “Byáét yak gestáén jágahé rawén tánke tahná behén o shomá kammé áram bekanét.” Chiá ke á wahdá mardománi raw o á, haminchok báz at ke áyan pa waragá ham móh naraset. ³² Á, bójigéa neshtant o yak gestáén jágahé shotant tánke tahná bebant. ³³ Rawagay wahdá, bázén mardoméá á distant o pajjáshesh áwortant o mardom cha sajjahén shahrán payádaká hamá jágahá shotant o cha Issá o moridán pésar ódá sar butant. ³⁴ Wahdé Issá cha bójigá ér kapt o mardománi mazanén mocchi dist, áyani sará bazzagí but, chiá ke á bëshopánkén pasáni dhawlá atant. Gorhá áyan bázén chizzéay tálim dayagá lagget. ³⁵ Rónendá, morid átkant o gwashtesh: “Nun béwahd ent o é gestáén jágahé. ³⁶ Mardomán begwash tán é kerr o gwaráni métag o bázarán berawant o pa wat ward o warák begerant.” ³⁷ Bale Issáyá gwasht: “Shomá wat áyan warák bedayét.” Moridán darráént: “Gorhá má berawén o dosad dináray nagan† begerén o eshán bedayén ke bwarant?” ³⁸ Áia jost gept: “Gón shomá chont nán gón? Berawét bechárét.” Áyan patthet o padá átk o gwashtesh: “May kerrá panch nagan o do máhig hast.”

³⁹ Áia hokm kort: “Mardomán sabzagén káháni patthay sará benendárénét.” ⁴⁰ Mardom panjáh panjáh o sad saday romb o thóliá neshtant. ⁴¹ Issáyá panchén nagan o doén máhig dastá kortant, ásmáni cháret o Hodáay shogri gept. Randá naganí chondh chondh kort o moridáni dastá dátant tánke mardománi sará bahresh bekanant. Doén máhigi ham sajjahénáni sará bahr kortant. ⁴² Sajjahén mardomán tán sérá wárt. ⁴³ Moridán cha sar átkagén nán o máhigán dwázdah sapt porr kort. ⁴⁴ Nán waróken mardománi tahá panch hazár mardén atant.

Issá ápay sarborá gáma jant
(Mattá 14:22-33; Yuhanná 6:16-21)

⁴⁵ Issáyá hamá damáná morid parmán dát o gwashtant: “Tánke man é mardomán roksata kanán, shomá bójigá swár bét o cha man pésar gwarmay domi pahnátá, Bayt-Saydáay shahrá berawét.” ⁴⁶ Mardománi yalah kanagá rand, Issá pa dwá kanagá kóhay sará sar kapt. ⁴⁷ Rónendá, morid bójigay tahá gwarmay nyámá atant o Issá hoshkiá tahná at. ⁴⁸ Disti ke trondén gwáté áyani dém pa démá kasshagá ent o morid pa zahmat o hillaté hulig‡ janagá ant. Gorhá shapay

† 6:37 6:37 Yak dinár, yak róchay mozz at. ‡ 6:48 6:48 Hulig, bezán páru.

cháromi pásá, Issá ápay sará gám janán, dém pa áyan átk o lótheti cha áyáni kash o kerrá begwazit. ⁴⁹ Wahdé áyan Issá ápay sará gám janán dist, gománesh kort balkén ruhé o ják o salwátesh kort. ⁵⁰ Chiá ke sajjahénán gón áiy gendagá báz torset. Bale Issáyá hamá damáná gón áyan gwasht: “Matorsét, é man án.” ⁵¹ Gorhá gón áyan yakjáh but o bójigá nesht, gwát ham kapt o áram but. Morid hayrán o habakkah mantant, ⁵² chiá ke áyan angat naganay mójezah sarkech nawártagat, delesh sakk o seng at.

Nádráháni drahbakshi
(Mattá 14:34–36)

⁵³ Issá o moridán gwarm gwázént o domi pahnáta Genisáretay shahrá rasetant o bójigesh nangar kort. ⁵⁴ Anchosh ke cha bójigá ér kaptant, mardomán Issá pajjááh áwort. ⁵⁵ Mardom pa drekk o maydán har némagá shotant, wati nádráh o nájórshesh tahtáni sará kortant o har jáh ke áyan eshkot Issá ódá ent, hamódá bortant. ⁵⁶ Issá har shahr o kallagéá ke shot, mardomán wati nádráh chárráháni sará áwortant o dazbandiesha kort ejázat bedant ke bimmár áiy kabáhay lambá dast bejanant. Harkasá ke dast pera kort, wassh o dráha but.

7

Delpáki
(Mattá 15:1–20)

¹ Cha Urshalímé átkagén lahtén Parisi o Sharyatay zánóger Issáay kerrá mocch but. ² Distesh ke Issáay lahtén morid gón nashoshtagén, bezán gón sell o nápákén dastán waráka wárt. ³ Chiá ke Parisi o sajjahén Yahudi, tánke wati pet o piroki dini rahbanday sará dast mashódant, waráka nawarant. ⁴ Wahdé cha bázará káyant, tán shosht o shód makanant heccha nawarant o dega bázén hamé dhawlén dód o dáb hastant chosh ke, tán waráki darp o hiránán pésará mashódant kármarza nakanant. ⁵ Paméshká, Parisi o Sharyatay zánógerán cha áiy jost kort: “Chiá tai morid pet o piroki rahbandáni randgiriá nakanant o gón sell o nápákén dastán waráka warant?” ⁶ Áiy gwasht: “Oo doru o dopóstén mardomán! Eshayá nabíá cha Hodáay némagá shomay bárawá sharr nebeshtag: *É mardom dapá maná satá dayant, bale delesh cha man báz dur ent.* ⁷ *Á moptá maná parastesha kanant o mardománi jórhéntagén ráh o rahbandán sója*

*dayant.** ⁸ Shomá Hodáay hokm yalah dátagant o mardománi ráh o rahband geptagant.”

⁹ Randá gwashti: “Shomá pa wati dód o rahbandáni kár bandagá Hodáay hokmáni yalah dayagay sharrén ráhé dar gétkag. ¹⁰ Chiá ke Tawrátay tahá Mussáyá gwashtag: *Wati pet o mátá sharap o ezzat beday. Harkas ke wati pet o mátá zá o dwá bedant, báyard ent koshag bebít.†* ¹¹ Bale shomá mardomán chosh sója dayé ke yakké wati pet o mátá komak makant o begwashit: ‘Pahell kanét, á komak ke man báyard ent shomará bedátén, Hodáay ráhá korbánig kortag.’ ¹² Shomá á mardomá gón é sar o sójá, cha wati pet o mátay komak kanagá makan o manaha kanét. ¹³ Shomá gón wati dód o rahbandáni barjááh dárágá, Hodáay habarán nákára kanét o dega bázén hamé dhawlén kára kanét.”

¹⁴ Padá áiy rombé mardom wati kerrá lóthet o gwashti: “Shomá mani habarán gósh bedaré o sarpad bebét. ¹⁵ Chizzé ke mardomay lápá rawt áiy sell o nápáka nakant, bale chizzé ke cha delá dara kayt, mardomá nápáka kant. ¹⁶ Harkasá pa eshkonagá gósh per, beshkont.” ¹⁷ Wahdé mardomi yalah dátant o lógá átk, moridán gwasht: “Mará é mesálay maksadá sarpad kan.” ¹⁸ Issáyá gwasht: “Shomá haminkadar násarpad ét? Hech warákay warag mardomá sell o nápáka nakant, ¹⁹ chiá ke delá narawt, lápá rawt o cha rótán dara kayt.” Gón é mesálá, áiy gísshént ke sajjahén waragi chizz, helár o pák ant. ²⁰ Padá gésh kanáná gwashti: “Á chizz ke mardomá sell o nápáka kant, cha áiy del o daruná chesta bit o áiy nápáka kant, ²¹ chosh ke badén pegr o hayál, bénangi, dozzi, hón o kósh, zená, ²² lálech o tamah, badwáhi, mandr;‡ wayláнки,§ hasadd, kopr, takabbor o ah-maki. ²³ É sajjahén badi, cha mardomay daruná sarchammaga gerant o mardomá sell o nápáka kanant.”

Darkawmén janénéay báwar
(Mattá 15:21–28)

²⁴ Issá cha ódá dar átk o Suray* sard-hagará shot. Ódá lógéá shot o nalótheti ke kasé áiy áyagá sahig bebít, bale watá chér dát nakort. ²⁵ Janéné ke áiy kasánén jeneká jenné per at, wahdé Issáyá áyagay háli eshkot, hamá damáná átk o áiy pádán kapt. ²⁶ É janén Yunánié at o Suriyahay damag Pinikiahá pédá butagat. Áiy Issá mennat o dazbandi kort ke jenná

§ 6:53 6:53 Nangar kanag, bezán bójigay óshatárénag. * 7:7 7:7 Eshayá Nabíay Ketáb, bahr 29, band 13. † 7:10

7:10 Dargwaz, bahr 20, band 12; bahr 21, band 17. ‡ 7:22 7:22 Mandr, bezán repk, sázesh, pachali. § 7:22 7:22

Wayláнки, bezán badkári, kahbagi. * 7:24 7:24 Sur yak shahré.

cha jeneká dar bekant. ²⁷ Issáyá gwasht: “Awalá báyd ent chokk warag bwarant o sér bekanant, chiá ke cha chokkáni dastá nánay pach gerag o kochekáni demá dawr dayag sharr naent.”[†] ²⁸ Janená gwasht: “Oo Hodáwand! Bale kochek ham chokkáni parzónagay[‡] sarárokén naganay thokkorána warant.” ²⁹ Issáyá gwasht: “Taw sharrén passawé dát, beraw, tai jenekay jenn dar átkag.” ³⁰ Wahdé janén lógá per tarret, disti ke jenek tahtay sará waptag o jenná yalah dátag.

Karr o lellén mardéay drahbakshi

³¹ Issá, cha Suray sardhagará per tarret, Sayduni gwázént, dém pa Jalilay mazangwarm o Dekápolisay sardhagará átk o raset. ³² Mardomán yak karrén mardé ke zobáni ham lell o chech at, Issáyá kerrá áwort o dazbandiesh kort ke wati dastá áiy sará per bemoshit. ³³ Issáyá á mard cha mardománi mocchiá yak kerré bort o lankoki áiy góshán mán kortant. Randá áiy zobánay sará lebzi per mosht. ³⁴ Ásmánay némagá cháreti, áh o ginsárté kasshet o gwashti: “*Effatah!*” (Bezán “pach bay!”) ³⁵ Hamá damáná, marday gósh pach butant, zobáni ham pach but o pa sharri habar kanagá lagget. ³⁶ Issáyá, mardom báz kad-dhan kortant ke gón hechkasá é bárawá hecch magwashant, bale haminchok ke áiy pa habar nakanagá kaddhan kort, mardomán habar haminkadar géshter tálán kort. ³⁷ Mardom báz hayrán atant o gón yakdomiá gwashtesh: “É chónén ajabhén nekén kára kant, karráni góshán pacha kant o lelláni zobána ham bójit.”

8

Chár hazár mardomá warák dayag
(Mattá 15:32-39)

¹ Hamá róchán, yak baré padá Issáyá gwará mardománi mazanén rombé yakjáh but. Áyán ward o warák gón naat. Paméshká, áiy wati morid lóthetant o gwashti: ² “Maná é mardománi sará baz-zaga bit. Say róch ent mani kerrá ant o nun pa waragá hecchesh nést.” ³ Agan eshán gón shodigén lápá roksat bekanán, ráhá tosant o kapant, chiá ke lahtén cha durén jágahán átkag.” ⁴ Moridán passaw dát: “É barr o gyábáná pa in-chok mardomay waráká, nán cha kojá byáren?” ⁵ Áiy cha moridán jost kort: “Shomará chont nán gón?” Gwashtesh: “Hapt.” ⁶ Áiy mardom zemi-nay sará nendagay hokm dátant, haptén

náni zortant, Hodáay shogri gept, chondh chondhi kort o moridáni dastá dátanti, tánke mardománi demá éresh bekanant. Moridán anchosh kort. ⁷ Áyáni kerrá lahtén hordén máhig ham hastat. Issáyá máhigáni sará ham Hodáay shogri gept o gón moridán gwashti ke “mardománi demá éresh kanét.” ⁸ Sajjahénán sérá wárt o randá cha sar átkagén chondhán, moridán hapt sapt porr kort. ⁹ Á mardom chár hazáray kesásá atant. Randá áiy mardom roksat kortant o ¹⁰ randá gón wati moridán bójigá nesht o Dalmánutahay sardhagará shot.

Ásmáni neshániay lóthag
(Mattá 16:1-4)

¹¹ Lahtén Parisi Issáyá kerrá átk o gón áiy gapp o tráná nesht, tán áiy bechakkásant o dámá dawr bedayant. Gwashtesh: “Mará ásmáni neshánié pésh kan tán báwar bekanén ke tará Hodáya rawán dátag.” ¹² Issáyá cha delá áh o ginsárté kasshet o gwashti: “É zamánagay mardom, chiá ásmáni neshánia lóthant? Báwar kanét ke áyán hech neshánié dayaga nabit.” ¹³ Gorhá Issáyá á eshtant, bójigá swár but o dém pa gwarmay domi némagá shot.

Hirudis o Parisiáni badén homir
(Mattá 16:5-12)

¹⁴ Moridán shamoshtagat gón wat nán bezurant. Bójigá gón áyán yak náné hastat o bass. ¹⁵ Issáyá hokm kort o gwashtant: “Hozzhár bét! Cha Parisi o Hirudis bádsháhay homirá pahréz kanét.” ¹⁶ Á watmánwatá habar kanagá laggetant ke “wájah é habará paméshká gwashtit ke má gón wat nán nayáwortag.” ¹⁷ Issáyá zánt o gwashti: “Chiá jérhagá ét ke ‘gón má nán nést’? Angata nazánét o sarpad nabutagét, shomay del inkadar sakk o seng ant? ¹⁸ Shomará chamm per, gorhá pa ché nagendét, gósh per, bale góshán pacha nakanét ke beshkonét? Shomá shamoshtag ¹⁹ man che paymá gón panch naganá panch hazár mardom sér kort o shomá cha sar átkagén naganán, chont sapt porr kort?” Moridán passaw dát: “Dwázdah.” ²⁰ Shomá nadist ke man hapt nán chondh chondh kort o chár hazár mardomá wárt o shomá cha sar átkagén naganáni chondhán, chont sapt porr kort? Áyán passaw dát: “Hapt.” ²¹ Issáyá gwasht: “Gorhá pa ché angat mani habarán sarkecha nawarét?”

Issá kóréá biná kant

[†] 7:27 7:27 Issáyá maksad esh naat ke é janén nápák ent. Áiy maksad esh at ke janénay báwar cha Yahudiáni báwará gésh ent. [‡] 7:28 7:28 Parzónag, bezán soprah.

²² Wahdé Issá gón wati moridán Bayt-Saydayá sar but, yak kórén mardé áiy kerrá áwortesh o dazbandiesh kort ke “wati dastá eshiay sará per mosh.”
²³ Issáyá kóray dast gept, cha métagá dur bort o áiy chammáni sará lebzi per mosht. Randá wati dasti áiy chammáni sará ér kort o josti gept: “Taw chizzé genday?”
²⁴ Á mardá sar borz kort o gwashti: “Mardomán gendagá án, gwashay drachk ant ke soragá ant.”
²⁵ Issáyá padá wati dast áiy chammáni sará per moshtant, é randá, áiy chamm pakká sharr butant o sajjahén chizzi sharriá distant.
²⁶ Nun Issáyá gwasht: “Tachkátachk wati lógá beraw o métagá mán matarr.”

Petrosay mannag o gwáhi
 (Mattá 16:13-20; Luká 9:18-21)

²⁷ Issá gón wati moridán dém pa Kaysariah Pilipiay kallagán shot. Ráhá, cha wati moridán josti kort: “Mani bárawá mardom ché gwashant, man kay án?”
²⁸ Áyan passaw dát: “Lahténa gwashit taw pákshódókén Yahyá ay, lahténa gwashit taw Elyás nabi ay. Dega lahténa gwashit cha á dega nabián yakké ay.”
²⁹ Gorhá áiy jost kort: “Shomá wat mani bárawá ché gwashét, man kay án?” Petrosá passaw dát: “Taw Masih ay.”
³⁰ Bale áiy hokm dátant: “É habará páshk makanét ke man Masih án.”

Wati markay bárawá, Issáy awali péshgói

(Mattá 16:21-23; Luká 9:22)

³¹ Randá, Issá moridán tálim dayagá lagget o gwashti: “Ensánay Chokk báyard ent bázén sakkí o sóri besaggit. Kawmay kamásh, mazanén dini péshwá o Sharyatay zánóger allamá áiy mamanan o bekóshárenant o say róchá rand á padá zendag bebit.”
³² Wahdé Issáyá tachkátachk é habar kortant, Petrosá á yak kerré bort o gwashti: “Oo wájah! Dega baré choshén habar makan.”
³³ Bale Issáyá chakk tarrént, moridáni némagá cháret o Petrosi hakkal dát o gwashti: “Oo Shaytán! Cha mani démá dur bay. Tai hayál Hodái hayálé naent, ensáni hayálé.”

Issáy randgiri

(Mattá 16:24-28; Luká 9:23-27)

³⁴ Issáyá, sajjahén mahluk o morid lóthetant o gwashti: “Agan kasé lóthit mani randgiriá bekant, báyard ent wati delay sajjahén lóth o wáhagán yalah bedant o pa sáhay nadr kanagá, wati jenday

salibá baddhá bekant o mani ráhá gám bejant.
³⁵ Chiá ke, agan kasé wati sáhay rakkénagá johd bekant, áiy báhénit, bale harkas pa man o mani wasshén mestágá wati sáhá báhénit, áiy rakkénit.
³⁶ Agan yakkéá sajjahén donyá berasit bale wati sáhá bebáhénit, gorhá á chónén sóbé bárt o ché kattheta* kant?
³⁷ Mardom wati sáhá pa che kimmaté bahá zorta kant?
³⁸ Agan kasé é béwapá o radkárén ahd o zamánagá cha man o mani habarán lajj† bekant, gorhá Ensánay Chokk ham, wahdé Hodáay pákén préshtagáni hamráhiá gón Petay mazanén shán o marháhá padá kayt, cha áiy lajja kant.”

9

¹ Issáyá gón áyan gwasht: “Báwar kanét, cha shomá lahtén ke annun edá óshtátag, tán Hodáay bádsháhiá gón sajjahén wák o kodratá nagendit, markay támá nachashit.”

Issáy dém o dróshomay drapshnáki
 (Mattá 17:1-13; Luká 9:27-36)

² Cha é habarán shak róchá rand, Issáyá Petros o Ákub o Yuhanná wati hamráh kort o yak borzén kóhéay sará pa halwat o ehwaté bortant ke ódá dega kass mabit. Áyani démá, Issáyá rang o dróshom badal but o ³ áiy póshák, anchosh espét butant ke jahánay hech godshódé godán é dhawlá espét o drapshnák korta nakant.
⁴ Á wahdi, Elyás o Mussá záher butant o gón Issáyá gapp o habaresh kort.
⁵ Petrosá gón Issáyá gwasht: “Wájah! May edá bayag sakk sharr ent, bell ke má say sáheg o kápára* bandén, yakké pa taw, yakké pa Mussáyá o degaré pa Elyásá.”
⁶ Petrosá nazánt ché begwashit, chiá ke sakk torsagá atant.
⁷ Bale hamá damáná jambaréá† áyani sará sáheg kort o tawaré rost: “É mani dóstén Bacch ent, eshiay habarán gósh bedaré!”
⁸ Anágat,‡ moridán chapp o chágerdá cháret, bale abéd cha Issáyá dega hechkasesh nadist.

⁹ Cha kóhá ér kapagay wahdá, Issáyá hokm kortant: “Tán á wahdá ke Ensánay Chokká cha mordagán jáh najatag, wati é distagénáni bárawá hechkasá hál madayét.”
¹⁰ Á, é habaray sará bah mant§ o watmánwat jérhagá atant ke cha mordagán jáh janag o zendag bayagay máná chi ent?
¹¹ Gorhá jostesh kort: “Sharyatay zánóger chiá gwashant ke cha Masihay áyagá pésar, báyard ent Elyás nabi byayt?”
¹² Issáyá passaw dát:

* 8:36 8:36 Katthag, bezán nap o sudd kanag, dastá árag.

† 8:38 8:38 Lajj, bezán sharm, hájalat.

* 9:5 9:5

Kápár, kápár, kapar.

† 9:7 9:7 Jambar, bezán abr.

‡ 9:8 9:8 Anágat, bezán yak anágat, achának, nághán.

§ 9:10 9:10 Bah mánag, bezán sakk hayrán bayag, boh bayag.

“Sharyatay zánógeráni habar rást ent ke Masihay áyagá pésar, Elyás nabi padá kayt o sajjahén káran gwam o géga kant. Bale ásmáni ketábán pa ché chosh átkag ke Ensánay Chokk báyad ent báz sakki o sóri besaggit o mardom áia mamananant? ¹³ Elyás nabaiy bárawá shomará begwashán ke á padá átk o anchosh ke Hodáay ketábán péshgói kanag butag, har dhawl áyáni delá lóthet, gón áia hamá dhawlesh kort.”

Jenni bachakéay drahbakshi
(Mattá 17:14–21; Luká 9:37–43)

¹⁴ Wahdé Issá o sayén morid per tarret o é dega moridáni kerrá átkant, mardománi mazanén rombé distesh. Lahtén Sharyatay zánóger ham hamódá at o gón moridán dapjáká at. ¹⁵ Anchosh ke mahluká Issá dist, báz hayrán butant o tachán tachána áiy némagá átkant o wasshátkesh kort. ¹⁶ Áia jost kort: “Shomá gón eshán ché bárawá dapják kanagá ét?” ¹⁷ Cha rombaw nyámá, mardéa passaw dát: “Ostád! Man wati bachak tai gwará áwortag. Á habar korta nakant, chiá ke yak gongén ruhéay asir o bandig ent. ¹⁸ Wahdé jenn áia gipt, zeminá dawria dant, dapi kap o gajja bit, dantána droshit o konth o hoshka bit. Man gón tai moridán gwasht ke eshiay jenná bekasshét, bale áyán dar kort nakort.” ¹⁹ Issáyá gwasht: “Oo bebáwarén nasl o padréch! Man tán kadéna gón shomá bemanán o besaggán? Chokká mani kerrá byáret!” ²⁰ Gorhá bachakesh áwort, bale anchosh ke jennay chamm pa Issáyá kaptant, bachaki pretk o zhámbalént o zeminrá dawr dát. Á, léth waráná kap o gajj but. ²¹ Issáyá cha áiy petá jost kort: “Chont wahd ent ke é dhawlá ent?” Petá passaw dát: “Cha kasániá. ²² Báz randá, jenn áia pa koshagá ás o ápa dawra dant. Agan tai dastá buta kant, má bazzag én, madat kan.” ²³ Issáyá gwasht: “Agan mani dastá buta kant? Á ke báwara kant, pa áia har chizz buta kant.” ²⁴ Bachakay petá hamá damáná kukkár kort o gwashti: “Maná báwar ent, agan mani báwar nezór ent, komak bekan tán porzórter bebit.” ²⁵ Wahdé Issáyá dist mahluk cha har némagá tachán áiy kerrá pédák ent, jenni hakkal dát o gwashti: “Oo karr o lellén jenn! É bachaká yalah day o padá hechbar eshiay jesm o jáná mapoter.” ²⁶ Gorhá jenná krinzhagé jat o bachaki zhámbalént o yalah dát. Bachak mordagay dhawlá kapt. Bázéné gwashagá at ke bachak mortag. ²⁷ Bale Issáyá áiy dast gept o pádi kort. Á pád átk o óstát.

²⁸ Wahdé Issá lógá raset, moridán halwatá cha áia jost kort: “Má chiá é bachakay jenn kasshet nakort?” ²⁹ Áia passaw dát: “É dhawlén jenn, bé dwá kanagá* dara nayáyant.”

Issáy markay domi péshgói
(Mattá 17:22–23; Luká 9:43–45)

³⁰ Issá o áiy moridán á jágah yalah dát o cha Jalilá gwastant, bale Issáyá nalóthet kasé bezánt ke á kojá ent, ³¹ chiá ke wati moridáni tálim dayagá goláesh at. Gwashti: “Ensánay Chokk dróhaga bit o anchen mardománi dastá dayaga bit ke koshanti, bale say róchá rand, padá zendaga bit o jáha jant.”[†] ³² Bale morid áiy é habará sarpad nabutant o cha áia jost kanagesh ham torset.

Mazani chi ent?
(Mattá 18:1–5; Luká 9:46–48)

³³ Padá Kaparnáhumá átkant. Wahdé Issá lógá at, cha moridán josti kort: “Shomá ráhá ché gwashagá atét?” ³⁴ Bale áyán passaw nadát o bétawár butant chiá ke ráhá, watmánwat é habará atant ke “báren, may nyámá sajjahénáni master o kamásh kay ent.” ³⁵ Gorhá Issá nesht, dwázdahén moridi lóthetant o gwashti: “Á kas ke masteria lóthit, báyad ent watá cha sajjahénán kaster bezánt o sajjahénáni hezmatkár bebit.” ³⁶ Gorhá, yak kasánén chokké áyáni nyámá óstárénti, baddhá kort o gwashti: ³⁷ “Harkas pa mani námá, gón washwáhagi é dhawlén chokké wati gwará bedárit, bezán áia maná dáshtag. Harkas maná bedárit, bezán hamá ásmáni Peti dáshtag ke maná ráhi dátag.”

Á ke may badwáh naent, gón má ent
(Luká 9:49–50)

³⁸ Yuhannáyá gón Issáyá gwasht: “Ostád! Má yak mardé dist ke gón tai námay geragá, cha mardomán palitén ruh dara kant, bale má á makan o manah kort, chiá ke á cha má naat.” ³⁹ Issáyá gwasht: “Na, é kára makanét, chiá ke harkas gón mani námá mójezah o ajekkáié kant, á wat padá maná bad gwashta nakant o ⁴⁰ á ke may badwáh naent gón má ent. ⁴¹ Agan kasé é námay sawabá shomará tásé áp bedant ke shomá Masihayg ét, allam bezánét ke áia wati mozza rasit.

Chakkás o hatáay bárawá
(Mattá 18:6–10; Luká 17:1–2)

⁴² “Harkas, cha é kasánokénán ke mani sará báwarmand ant yakkéá dém pa gonáhá bebárt, pa áia gehter ent ke jenteritáé áiy gardená bebandant o daryáyá chagali bedayant. ⁴³ Agan tai dasté tará

* 9:29 9:29 Lahtén daznebshtá átkag: abéd cha dwá kanag o róchag geragá. † 9:31 9:31 Jáha jant, bezán zendaga bit o páda kayt.

dém pa gonáhá bebárt, áiá borrh. Chiá ke gón doén dastán tahtarunay[‡] dáemi ásá kapagay badalá, sharter hamesh ent ke gón yak dasté, namiránén zenday wáhond bebay. ⁴⁴ § ⁴⁵ Agan tai páde tará dém pa gonáhá bebárt, áiá borrh. Chiá ke gón doén pádán tahtaruná kapagay badalá, sharter hamesh ent ke gón yak páde namiránén zenday wáhond bebay. ⁴⁷ Agan tai chammé tará dém pa gonáhá bebárt, áiá dar kan. Chiá ke gón doén chammán tahtaruná kapagay badalá, sharter hamesh ent ke gón yak chammé Hodáay bádsháhiá bepoteray, ⁴⁸ hamá tahtarun, ke ódá warókén kerm hechbara namerant o ás hechbar sárt o érmósha nabit. ⁴⁹ Chiá ke harkas cha ásá wádók kanaga bit. ⁵⁰ Wád sharr ent, bale agan áiy tám gár bebit, shomá chón áiá padá wádóka kanét. Shomá ham watá wádók o támdár bekanét o gón yakdegará pa sohl o émeni zend begwázénét.”

10

Sur o sawnay bárawá

(Mattá 19:1–12; Luká 16:18)

¹ Issá, cha ódá dar átk o dém pa Yahudiahay damag o Ordonay kawray domi pahnátá shot. Ódá, padá mardománi bázén rombé átk o áiy Kerrá mocch but. Á, wati hél o ádatay sará, mardománi tálím dayagá goláesh but. ² Lahtén Parisi átk o pa áiy chakkásagá jostesh kort: “Báren, rawá ent ke mard wati janay talák o sawnán bedant?” ³ Issáyá passaw dát: “Mussáyá shomará ché hokm kortag?” ⁴ Áyan passaw dát: “Mussáyá razá dátag ke mard pa wati janay sawn dayagá, taláknámahé benebisit o áiá begishénit.” ⁵ Nun Issáyá gwasht: “Mussáyá pa shomay sengdeliay sawabá é dhawlá hokm dátag. ⁶ Bale jahánay jórhénagay wahdá, *Hodáyá ensán mardén o janén addh kortag.* ⁷ *Paméshká, mard cha wati pet o mátá jetá o gón wati janá hór o yakjáha bit.* ⁸ *Mard o jan, yak jesm o jána bant,** é paymá, nun á do naant, yak jesm o jáné ant. ⁹ Paméshká, á ke Hodáyá yakk kortagant, ensán áyan jetá makant.” ¹⁰ Lógá ke shotant, moridán cha áiá é bárawá jost kort. ¹¹ Gwashti: “Kasé ke wati janénay sawn o talákána dant o gón dega janénéa sur o sanga kant bezán ke á, gón wati nókén janá zená kanagá ent. ¹² Hamé dhawlá, agan janéné cha wati mardá sawn begipt o gón dega mardéa

sáng o sur bekant, á ham zená kanagá ent.”

Issá o kasánén chokk

(Mattá 19:13–15; Luká 18:15–17)

¹³ Yak róché, mardomán wati kasánén chokk, Issáyá Kerrá áwortant ke wati dastá áyani sará bemoshit, bale moridán neherr o hakkal dátant. ¹⁴ Issáyá ke chosh dist nárazá but o gón moridán gwashti: “Chokkán bellét mani Kerrá byáyant, áyani demá madárét, chiá ke Hodáay bádsháhi anchen mardománig ent. ¹⁵ Shomará rásténa gwashán, á ke Hodáay bádsháhiá chokkání paymá mamannit, hechbar ódá pad é korta nakant.” ¹⁶ Randá Issáyá chokk wati kotthá nendáréntant, dasti per mosht o barkati dátant.

Zardáren warná o namiránén zend

(Mattá 19:16–30; Luká 18:18–30)

¹⁷ Wahdé Issáyá wati ráh gept o shot, yak mardé tacháná átk, kóndhán kapt o josti kort: “Oo nékén ostád! Man chón bekanán ke namiránén zenday wáhond bebán?”

¹⁸ Issáyá gwasht: “Taw maná ‘nékén’ pa ché gwashtay? Abéd cha Hodáyá, kass nék naent. ¹⁹ Hodáay hokmán ham taw zánay: *Hón makan, zená makan, dozzi makan, drogén sháhedi maday, degaray málá mawar; wati pet o mátá ezzat beday.*”[†] ²⁰ Mardá passaw dát: “Oo ostád! Hodáay é hokm o parmánán, man cha kasániá kárband kanagá án.” ²¹ Gorhá, Issáyá pa mehré áiy némagá cháret o gwashti: “Tará angat yak karé kanagi ent, beraw wati sajjáhén mál o hastiá bahá kan o zarrán garib o nézgáren mardománi sará bahr kan, é paymá tará ásmáni ganjé rasit. Gorhá byá o mani randgiriá bekan.” ²² Cha é habará, démi pazhmordah, gamig o paréshán but o shot. Chiá ke á sér o azgáren mardé at.

²³ Issáyá cháren némagán cháret o gón wati moridán gwashti: “Pa máldáren mardomán, Hodáay bádsháhiá pád ér kanag sakk grán ent.” ²⁴ Áiy morid cha é habarán hayrán butant. Issáyá padá gwasht: “Oo mani chokkán! Hodáay bádsháhiá pád ér kanag,[‡] sakk grán ent. ²⁵ Cha suchenay domká oshteray gwazag wa báz grán ent, bale Hodáay bádsháhiá, zardáren mardomay rawag angat gránter ent.” ²⁶ Morid, geshter hayrán butant o gón yakdomiá gwashtesh: “Gorhá kay rakketa kant?” ²⁷ Issáyá padá á cháretant o gwashti: “Pa ensáná nabuteni ent, bale

‡ **9:43** 9:43 Tahtarun, bezán jahannam, dózah. § **9:44** 9:44 Lahtén daznebeshtá band 44 o 46 hastant, lahténá néstant. É doén band gón chel o hashtomi bandá yakk ant. * **10:8** 10:8 Pédáesh, bahr 1, band 27; bahr 2, band 24. † **10:19** 10:19 Dargwaz, bahr 20, band 12 o rand. ‡ **10:24** 10:24 Lahtén daznebeshtá gesh kanag butag: pa áyan ke zarr o málay sará ehtebára kanant.

pa Hodáyá chosh naent, chiá ke Hodáay dastá har chizz buta kant.”

²⁸ Gorhá Petros gwashagá lagget: “Má wati har chizz yalah dátag o tai randgiriá kanagá én.” ²⁹ Issáyá passaw dát: “Báwar kanét, agan kaséa pa man o pa mani wasshén mestágá wati lóg, brát o gohár, mát o pet, chokk yá mál o dhagár yalah dátagant o mani randgirii kortag, ³⁰ Hodá áyáni badalá sad barábar géshtera dant. Hamé jaháná, gón sakki o sóriáni hamráhiá, lóg, brát o gohár, mát, chokk, mál o dhagár áia rasit o á dega jaháná ham abadmánén zenday wáhonda bit. ³¹ Bale bázéné ke awali ent, áheria bit o hamá ke áheri ent, awalia bit.”

Issáy markay saymi pëshgói
(Mattá 20:17-19; Luká 18:31-34)

³² Issá pésar o morid áiy randá, Urshalimay némagá rawagá atant. Morid, hayrán o bah márag atant o á dega hamráháni delá, tors o bimmé wadi butagat. Issáyá á dwázdahén morid kerréa bortant o gwashti ke gón áia ché bayagi ent. ³³ “Nun má Urshalimá rawagá én, ódá Ensánay Chokká gerant o mazanén dini pëshwá o Sharyatay zánógeráni dastá dayant. Áiy markay hokmá borrant o darkawmén mardománi dastá dayanti. ³⁴ Darkawmén mardom áiy sará rishkand o maskará kanant, áiy sar o démá toha janant, § shallák o hayzaránia janant o koshanti, bale say róchá rand, á padá zendaga bit o jáha jant.”

Naráhén wáhag
(Mattá 20:20-28)

³⁵ Zebdiay doén chokk Ákub o Yuhanná, Issáyá kerrá átkant o gwashtesh: “Oo ostád! May wáhag esh ent ke á chizzá ke cha taw annuna lóthén pa má bekani.” ³⁶ Áia passaw dát: “Ché lóthét?” ³⁷ Gwashtesh: “Wahdé tai bádsháhia kayt, wati porshawkatén diwáná, cha má yakkéa wati rástén o á degará chappén némagá benendáren.” ³⁸ Issáyá passaw dát: “Shomá nazánét ché lóthagá ét. Báren, shomará é twán hast, á jámá ke man nósha kanán benóshét o á pákshódia ke mana kanán bekanét?”* ³⁹ Gwashtesh: “Ji haw, é kára korta kanén.” Issáyá gwasht: “Démterá, shomará é jám nóshagi o é pákshódi ham kanagi ent, ⁴⁰ bale bezánét ke é cha mani ejázatá dar ent o gwashta nakanán kay mani rástén o kay chappén némagá nendit. É jágah, hamáyánig ant ke pa áyán gissshénag butagant.” ⁴¹ Wahdé á

dega dahén moridán é habar eshкот, Ákub o Yuhannáay sará zahr geptant. ⁴² Gorhá, Issáyá sajjahén morid lóthetant o gwashti: “Shomá zánét, á ke darkawmánia hákem zánaga bant mardománi sará hákemia kanant o kawmánia master chérdastáni sará wati ehtiárá kára bandant. ⁴³ Bale shomá chosh makanét, cha shomá harkas ke mazania lóthit, báyard ent sajjahénáni hezmatkár bebit o ⁴⁴ cha shomá harkas ke masteria lóthit, sajjahénáni kaster o dazbój bebit. ⁴⁵ Hamé dhawlá, Ensánay Chokk nayátkgag ke mardom áiy hezmatá bekanant, átkag ke mardománi hezmatá bekant o gón wati sáhay dayagá, bázénéa berakkénit.”

Kórén Bártimáusay drahbakshi
(Mattá 20:29-34; Luká 18:35-43)

⁴⁶ Gorhá, Ariháay shahrá átkant. Wahdé Issá gón wati morid o dega bázén mardománi hamráhiá, cha Ariháya dar kapagá at, ráhay sará, yak kórén pendhógeré neshtagat ke námi Bártimáus at o Timáusay chokk at. ⁴⁷ Wahdé Bártimáus sahig but, Issá Náseri ent ke cha hamé ráhá gwazagá ent, gwánki jat o gwashti: “Issá, oo Dáud bádsháhay chokk! Tará mani sará bazzag bát.” ⁴⁸ Lahténá hakkal kanáná gwasht: “Bétawár bay!” Bale áia géshter kukkár kort: “Oo Dáud bádsháhay chokk! Tará mani sará bazzag bát.” ⁴⁹ Issá óshtát o gwashti: “Tawári kanét.” Mardomán á kór tawár kort o gwashtesh: “Delá mazan kan! Pád á, byá ke tará tawár kanagá ent.” ⁵⁰ Bártimáusá wati kabáh kerré dawr dát, koppi kort o Issáyá gwará átk. ⁵¹ Issáyá jost kort: “Ché lóthay? Man pa taw ché bekanán?” Gwashti: “Oo ostád! Mana lóthán biná bebán.” ⁵² Issáyá gwasht: “Beraw ke tai imáná tará dráh kort.” Kór hamá damáná biná but o Issáyá hamráhiá rawán but.

11

Pa Issáy wasshátká
(Mattá 21:1-11; Luká 19:28-40; Yuhanná 12:12-19)

¹ Wahdé Urshalimay nazziká, Zaytunay kóhay dámoná Bayt-Páji o Bayt-Anyáay métagán rasetant, gorhá Issáyá do morid rawán dát o ² gwashti: “Démi métagá berawét. Anchosh ke ódá rasét, korragén haré gendét ke bastag. Á korragá angat hechkas swár nabutag. Áia bójét o edá byáret. ³ Agan kaséa jost kort ke ‘shomá ché kanagá ét,’ begwashét ke ‘wájahá é korrag pakár ent o padá zutt peria tarrénit.’” ⁴ Gorhá doén morid shotant

§ 10:34 10:34 Toh janag, bezán tok janag. * 10:38 10:38 Issáyá maksad cha jám o pákshódia wati markay jám, bezán salibay sakki o sóriáni saggag ent.

o korrage distesh ke darwázagay dapá bastagat. Bótkesh. ⁵ Cha ódá óshátatagén mardomán lahténá jost kort: “Shomá ché kanagá ét? Pa ché é korrágá bójét?” ⁶ Anchosh ke Issáyá sój dátatagat, áyán hamá dáb gwasht. Gorhá, dátesh. ⁷ Korragesh Issáyá kerrá áwort o wati shál o cháderesh áiy poshtá ér kortant o Issá swár but. ⁸ Bázénéá Issáyá wasshátk kanagá, áiy ráhay sará wati shál o cháder chérgéján kortant. Dega bázénéá, cha machkadag o dhagárán drachkání thál o ták borret o ráhay sará ér kort. ⁹ Issáyá pëshromb o padrómbén mardom, kukkár kanáná gwashagá atant:

“Hushiáná,*

mobáarak bát hamá ke pa
Hodáwanday námá kayt!†

¹⁰ Shogr ent ke may bonpirok Dáuday
bádsháhi padá barjáh dáraga bit.
Hushiáná, borzén arshá!”

¹¹ Gorhá Issá Urshalimá átk o mazanén parasteshgáhá shot. Ódá, áiy parasteshgáhay chárén kondhání har chizz cháret. Bale béwahd at, paméshká gón wati dwázdahén moridán Bayt-Anyáyá shot.

Enjiray drachkay hoshk bayag
(Mattá 21:18-19)

¹² Domi róchá, wahdé Issá o áiy morid cha Bayt-Anyáyá dar kaptant, ráhá Issá shodig but. ¹³ Áiyá cha durá enjiray drachké dist ke táki sabz o buz atant. Drachkay nazziká shot tán begendit bérén bar ent yá na. Bale wahdé raset, abéd cha táká dega hecchi nadist, chiá ke enjiray baray mósom naat.‡ ¹⁴ Gorhá gón drachká gwashti: “Cha ed o rand, hechkas cha taw baré mawarát.” É habar moridán eshкот.

Cha mazanén parasteshgáhá sawdageráni dar kanag
(Mattá 21:12-17; Luká 19:45-48; Yuhanná 2:13-22)

¹⁵ Anchosh ke Urshalimá sar butant, Issá mazanén parasteshgáhay pëshjáhá§ shot o ódá sawdager o grákání* gallénag o dar kanagá goláesh but. Zarr badal kanókén sarrápáni mizz o barónki chappig kortant o kapót bahá kanókání korsi o tahtagi dawr dátant. ¹⁶ Mazanén parasteshgáhay pëshjáhá, tájeráná málay barag o áragi ham naesht. ¹⁷ Mardomí tálim dátant o gwashti: “Záná, Hodáay Ketábá nebisag

nabutag: *Mani lóg sajjahén kawmáni dwá o parasteshay jágah bebit,*† bale shomá dozzbázaré kortag.” ¹⁸ Wahdé mazanén dini pëshwá o Sharyatay zánógerán é habar eshкот, áiy koshagay johdesh kort. Bale torsetesh, chiá ke sajjahén mardom cha Issáyá tálimán hayrán o habakkah atant. ¹⁹ Bégáh ke but, Issá o áiy morid cha shahrá dar kaptant.

Enjiray drachkay ebrat
(Mattá 21:20-22)

²⁰ Domi sohbá, ráhá hamá enjiray drachkesh dist ke nun cha boná hoshk butagat. ²¹ Petros, Issáyá pésarigén habaray yát o tránagá kapt o gwashti: “Wájah! Bechár, é drachk ke taw baddwái kort gimmortag.” ²² Issáyá passaw dát: “Hodáay sará báwar kanét, ²³ shomará rásténa gwashán, agan kaséa setk o báwar bebit o é kóhá begwashit: ‘Watá cha edá chest kan o daryáay tahá dawr beday’ o wati gwashtagén habaray sará delá shakk mayárit o báwar bekant, á wahdi pa áiy anchosha bit. ²⁴ Paméshká shomará gwashán, harché ke wati dwáyáni tahá lóthét, báwar kanét ke shomará rasetag o shomará dayaga bit. ²⁵ Harwahdá ke pa dwáyá óshét, agan shomará gón yakkéa gelage hast, wati dwáay tahá áiy bebakshét, tánke shomay ásmáni Pet ham, shomay gonáh o mayarán bebakshít. ²⁶ Bale agan shomá mabakshét, shomay ásmáni Pet ham shomay gonáh o mayárána nabakshít.”*

Issáyá wák o ehtiár
(Mattá 21:23-27; Luká 20:1-8)

²⁷ Issá o áiy morid, padá Urshalimá átkant. Anchosh ke Issá mazanén parasteshgáhay pëshjáhá gám janagá at, mazanén dini pëshwá, Sharyatay zánóger o kawmay kamásh áiy kerrá átkant. ²⁸ Jostesh kort: “Taw gón kojám hakk o ehtiárá é kárána kanay? Kayá tará é káráni kanagay ehtiár dátag?” ²⁹ Issáyá passaw dát o gwasht: “Maná ham cha shomá josté hast, mani passawá bedayét, tán man ham shomará begwashán ke gón kojám hakk o ehtiárá é kárána kanán. ³⁰ Yahyáyá pákshódi dayagay ehtiár, cha ásmáná rasetagat yá cha ensánay némagá? Passaw bedayét!” ³¹ Áyán watmánwatá shawr o saláh kort o gwashtesh: “Agan begwashén cha ásmáná at, gorhá gwashtit: ‘Pa ché áiy sará

* **11:9** 11:9 Hushiáná, bezán “márá annun berakkén”.

† **11:9** 11:9 Zabur 118:26.

‡ **11:13** 11:13 Enjiray

bémósomén baré ham hast ke áiy sohayliga gwashtan o shodigén mardom géshter áiy warrant. Edá, pa Issáyá mannagá Urshalimay tayár nababay, bébarén enjiray drachkay tábiré. Urshalim ham, é enjiray drachkay dhawlá, sál 70 Miládiá bérán o tabáh but. § **11:15** 11:15 Pëshjáh, bezán pëshgáh, lógay chárdiwál, sahn. *

11:15 11:15 Grák, bezán á ke sawdá zurit. Arabi o Pársiá “moshtari, kharidár”. † **11:17** 11:17 Eshyá Nabiy Ketáb 56:7.

‡ **11:26** 11:26 Lahtén daznebeshtá, band 26 nést.

imánó nayáwort?' ³² Agan begwashén cha ensánay némagá at...?" É habaresh démá nabort chiá ke áyán cha mardomán torset, pa é háterá ke mardom Yahyáyá barhakkén nabíe hesáb kanagá atant. ³³ Paméshká passawesh dát: "Má nazánén." Issáyá gwasht: "Gorhá man ham shomará nagwashán ke gón kojám hakk o ehtiárá é kárana kanán."

12

Badén bágpánáni mesál

(Mattá 21:33-46; Luká 20:9-19)

¹ Issáyá, randá gón mesál o darwar wati habar gón áyán bongéj kort o gwashti: "Mardéa anguri bágé addh kort. Áiay chapp o chágerdá pall o pasili bast, pa anguráni shiragay geragá kall o kombé jórhi kort o pa negahpániá yak borjé ham basti. Randá bági pa konandahkári o zamán* lahtén bágpánay dastá dát o wat saparéá shot. ² Wahdé anguray mósom but, áiá hezmatkáré zamánzurén bágpánáni kerrá ráh dát tán cha bágá kammé nibag byárit, ³ bale bágpánán é hezmatkár latth o kotth kort o gón hórk o háligén dastán per tarrént. ⁴ Gorhá, hodábondá† dega hezmatkáré dém dát. Áyán, áiay sar ham prósho o bézzat kort. ⁵ Padá dega hezmatkáré rawáni dát o bágpánán á ham jat o kosht. Hamé dhawlá, áiá dega bázén hezmatkáré ráh dát, bale bágpánán lahtén jat o lahtén kosht. ⁶ Nun pa ráh dayagá áiay kerrá yak kasé pasht kaptagat, áiay dóstén mardénchokk. Godhsará, wati hamá chokki rawán dát, hayáli kort balkén áiay ruá bedárant. ⁷ Bale bágpánán watmánwatá gwasht: 'Bágay mirás barók hamesh ent, byáét eshiá ham kosshén, tánke melk o mirás may bebant.' ⁸ Gorhá gept o koshtesh o jónesh cha bágá dhann, dawr dát." ⁹ Issáyá jost kort: "Nun shomay gománá bágay hodábond ché kant? Á kayt, bágpánána koshit o bágá dega bágpánáni dastá dant. ¹⁰ Záná, shomá Pákén Ketábá nawántag:

Á seng ke bánbandén ostáyán‡pasond nakort o nazort

hamá seng, bonhesht§but.

¹¹ *É Hodáwanday kár ent o may chammán ajab ent.**

¹² Nun áyán lóthet Issáyá dagzir bekanant, chiá ke zántesh Issáyá é mesál hamáyáni bárawá áwortag, bale cha

mardomána torsetesh. Gorhá Issáesh esht o shotant.

Máliátay bárawá

(Mattá 22:15-22; Luká 20:20-26)

¹³ Randá, áyán lahtén Parisi o Hirudi Issáyá kerrá rawán dát tán áiá cha áiay jenday habarán mán begissshénant. ¹⁴ Nun átk o jostesh kort: Oo ostád! Má zánén ke taw tachk o rástén mardomé ay o harché gwashay pa rástiá gwashay o hechkaséay némagá nageray, chiá ke sajjahénán pa yak chamméa cháray o gón rásti o delsetki Hodáay ráh á sója dayay. Bárén, Rumay bádsháh Kaysará, song o máliát dayag rawá ent yá na? Má áiá máliát bedayén yá madayén? ¹⁵ Issáyá áyáni é dotal o dopósti zánt o gwashti: "Chiá maná chakkásagá ét? Yak dinaré byáret tán bechárán." ¹⁶ Áyán dinaré áwort. Josti kort: "Eshiy sará kai nám o naksh per ent?" Áyán passaw dát: "Kaysaray." ¹⁷ Nun Issáyá gwasht: "Gorhá Kaysaraygá Kaysará bedayét o Hodáaygá Hodáyá bedayét." Cha é passawá, á hayrán o habakkah mantant.

Áherat o sángo sur

(Mattá 22:22-33; Luká 20:27-40)

¹⁸⁻¹⁹ Randá, lahtén Saduki, ke áheratay namannók ant, Issáyá kerrá átk o jostesh kort: "Oo ostád! Mussáyá pa má nebesh-tag: *Agan kaséay sur kortagén braté bé chokká bemerit o janózami zendag bebit, gorhá áiay brát býayd ent gón á janózamá sur bekant tánke chokk o rand o ráhé pa wati brátá bellit.†* ²⁰ É dhawlá, hapt brát atant. Awali brátá jané gept o bé chokká mort, ²¹ gorhá domi brátá gón á janózamá sur kort, bale á ham bé chokká mort. Saymi brát ham, hamé dhawlá. ²² Cha haptén brátán hechkasá pa wat rand o ráhé naesh. Godhsará, á janén ham mort. ²³ Nun taw begwash, áheratay róchá é janén kojám brátayga bit? Chiá ke har haptén brátán bárig bárigá gón áiá sur kortagat." ²⁴ Issáyá gwasht: "Shomá gomráh naét? Parchá ke na cha Pákén Ketábán chizzé sarkecha warét o na Hodáay wák o zórá sarpada bét. ²⁵ Mordag ke jáha janant, na sura kanant o na sur dayaga bant, ásmáni préshtagáni dhawlá bant. ²⁶ Mordagáni padá zendag bayag o jáh janagay bárawá, záná shomá Mussáyá ketábá bon geptagén dhólokay‡ kessah nawántag, ke Hodáyá gón Mussáyá chón habar kort? 'Man án, Ebráhemay Hodá,

* **12:1** 12:1 Konandahkári o zamán, bezán paymánkári, ejáray sará, thékah. † **12:4** 12:4 Hodábond, bezán wájah, wáhong, málek, sáheb. ‡ **12:10** 12:10 Bánbandén ostá hamá ent ke lógay bandagá zántkár ent. § **12:10** 12:10 Bonhesht, bezán lógay awali hesht yá seng. * **12:11** 12:11 Zabur 118:22-23. † **12:18-19** 12:18-19 Sharyatay Domi Rahband 25:5 o rand. ‡ **12:26** 12:26 Dhólók, bezán gyábáni konthagi jarré ke polli espét ant. § **12:26** 12:26 Dargwaz 3:6.

Eshákay Hodá o Ákubay Hodá.[§] 27 Bezán á, mordagáni Hodá naent, zendagénáni Hodá ent. Shomá báz rad wártag.”

Masterén hokm

(*Mattá 22:34–40; Luká 10:25–28*)

²⁸ Cha Sharyatay zánógerán yakké, áyáni é habarán gósh dáragá at o áia máret* ke Issá sharr passaw dayagá ent, nazziká átk o josti kort: “Sharyatay masterén hokm kojám ent?” ²⁹ Issáyá passaw dát: “Sharyatay masterén hokm esh ent: ‘*Oo Esráil! Gósh dár: Hodáwand, may Hodá, yektáén Hodá ent,*’ ³⁰ wati Hodáwandén Hodáyá, pa del, gón sajjahén ján o sáh, gón sajjahén pahm o pegr o gón sajjahén was o wáká dóst bedár.”[†] ³¹ Domi hokm esh ent: ‘*Gón wati hamsáhegá wati jenday paymá mehr bekan.*’[‡] Cha é doénán, dega masterén hokm nést.” ³² Gorhá, Sharyatay zánógerá gwasht: “Oo ostád! Taw sakk rást o sharr gwasht, pa rásti ke Hodá yakké o abéd cha áia, Hodáé nést. ³³ Áia pa del, gón sajjahén pahm o pegr o sarjamén was o wáká dóst dárag o hamsáhegá wati jenday paymá mehr kanag cha sajjahén hayrátien sóchagi tohpah o sajjahén korbánigán sharter ent.” ³⁴ Wahdé Issáyá dist áia dánáén passawé dát, gwashti: “Taw cha Hodáay bádsháhiá dur naay.” Cha ed o rand, hechkasá del nakort cha Issáyá chizzé jost bekant.

Masih kai chokk ent?

(*Mattá 22:41–46; Luká 20:41–44*)

³⁵ Wahdé Issáyá, mazanén parasteshgáhá tálíma dát, josti kort ke “Sharyatay zánóger che paymá gwashant MasihDáud bádsháhay chokk ent? ³⁶ Dáudá wath cha Hodáay Pákén Ruhay shobén o elháma gwashtag:

Hodáwandá gón mani Hodáwandásgwasht

mani rástén némagá benend

*tán hamá wahdá ke tai dozhmeñán tai pádáni chérá dawr bedayán.**

³⁷ “Agan Dáuday jend, Masihá wati Hodáwanda gwashit, gorhá á chón Dáuday chokk buta kant?” Mardománi mocchiá gón wasshi o shádehi, Issáyá habar gósha dásht.

Issá Sharyatay zánógerán páshka kant

(*Mattá 23:1–36; Luká 20:45–47*)

³⁸ Padá, Issáyá wati tálímáni tahá gwasht: “Cha Sharyatay zánógerán hozzhár bét ke áyán, drájén jámag o kabáh gwará kanag dósta bit o bázaráni

tarr o gardá, cha mardomán wasshátk o drahbáta lóthant. ³⁹ Kanisaháni sharterén jáhán gechéna kanant o mehmánián, awali reday nendagesh pasond ent. ⁴⁰ Janózámáni lógán gón málwáriá barant o pa pésh dáragá wati dwá o sanáyán drájkassha kanant. Eshán sakterén sezá o padmozza rasit.”

Janózáméay pákwandhi hayrát

(*Luká 21:1–4*)

⁴¹ Issá, mazanén parasteshgáhay hayrátáni pétiay[†] dém pa démá neshtagat o hamá mardomán cháragá at ke é pétiá zarresh dawra dát. Cha zardarán bázénéá, zyadahén zarré ér kort. ⁴² Gorhá, garib o béwasén janózámé átk o do paysahi[‡] pétiá mán kort. ⁴³ Nun Issáyá morid wati kerrá lóthetant o gwashti: “Shomará rásténa gwashán, é béwasén janózámá cha á sajjahénán géshter zarr pétiá mán kort. ⁴⁴ Chiá ke á degarán cha wati géshén malá chizzoké dát, bale é janózámá, gón wati nézgári o garibíá, harché ke áia hastat dáti, bezán wati sajjahén bonmál.”

13

Áyókén zamánagay bárawá Issáay péshgói

(*Mattá 24:1–14; Luká 21:5–19*)

¹ Wahdé Issá cha mazanén parasteshgáhá dar áyagá at, cha moridán yakkéá gón áia gwasht: “Oo ostád! Bechár chónén dhawldárén seng o dhok ant o chónén shawkén lóg o márhi.”

² Issáyá passaw dát: “É dhawldárén lóg o márhiána genday? Cha eshán yak sengé ham domi sengay sará namánit, sajjahénána próshant o karójant.”

³ Wahdé Issá mazanén parasteshgáhay dém pa démá Zaytunay kóhay sará nesh-tagat, Petros, Ákub, Yuhanná o Andriás áiy kerrá átkant o pa halwat o ehwat jostesh kort: ⁴ “Márá begwash, bárén, é prosh o prósh kadéna bit o eshiay nazzik bayagay nesháni chi ent?” ⁵ Issáyá habar bongéj kort o gwashtant: “Hozzhár bét, kasé shomará gomráh makant. ⁶ Bázéné mani námá kayt o gwashit: ‘Man hamá án’ o bázénéá gomráha kant. ⁷ Wahdé jangáni kukkára eshkonét o áyáni hál o habar shomay góshána kapit, matorsét o paréshán mabét. Allam é dhawlá bit, bale angat halásiay wahd nayátkag. ⁸ Yak

* 12:28 12:28 Márag, bezán mahsus kanag. † 12:30 12:30 Sharyatay Domi Rahband 6:4 o rand. ‡ 12:31 12:31 Láwián 19:18. § 12:36 12:36 Mani Hodáwand, bezán Issá Masih. * 12:36 12:36 Zabur 110:1. † 12:41 12:41 Péti, bezán sanduk. ‡ 12:42 12:42 Asligén Yunáni nebeshtánka gwasht: “do lepton ke yak kodrantesay arzeshi hastent”. Lepton á zamánagay gwandhterén zarr. * 13:8 13:8 Zeminchandh, bezán zelzelah.

kawmé dega kawméay sará o yak hokumaté dega hokumatéay sará páda kayt. Bázén molk o jágahán zeminchandha* bit o kahta kapit. É, tahná zank o záyagay dardáni bendát ent.

⁹ “Hozzhár bét! Shomárá hakdiwánáni[†] demá pésha kanant, kanisaháni tahá janant o pa manigi, hákem o bádsháháni demá óshtárenant. Gorhá shomárá sharrén móhé rasit ke pa man gwáhi bedayét. ¹⁰ Bale pésará báyad ent ke mani washén mestág pa sajjahén kawmán jár janag bebít. ¹¹ Harwahd ke shomárá gerant o hakdiwánána barant, cha péshá paréshán mabét ke ‘má ché begwashén.’ Á wahdá, har chizzé ke shomárá sój dayaga bit, hamáia begwashét. Chiá ke gwashók shomá naét, Hodáay Pákén Ruh ent. ¹² Brát wati brátá dróhit o kóshárenit o pet wati chokká, chokk cha wati pet o mátá yágia bant o áyána kóshárenant. ¹³ Sajjahén mardom, pa mani námaygi cha shomá naprata kanant. Bale hamá ke tán áherá sakkíána saggit, á rakkít.

Torsnákén wahd o jáwar

(Mattá 24:15–28; Luká 21:20–24)

¹⁴ “Wahdé shomá á ‘palit o bérán kanókén bazhnáká[‡] hamá jágahá gendét ke áiy jágah naent,” wánók bezánt o sharr sarpad bebít, “hamá ke Yahudiahá ant dém pa kóhán betachant. ¹⁵ Á ke bán o bádgiray sará ent pa chizzéay zuragá jahlá ér makapit o lógá marawt o ¹⁶ á ke dhagáráni sará kesht o keshará ent, wati kabáhay zuragá per matarrít. ¹⁷ Á róchán, apsóz pa lápporr o chokmátén janénán. ¹⁸ Dwá bekanét ke é chizz zemestáná mabit. ¹⁹ Chiá ke hamá róchán, anchén sakkí o sórie kapit ke áiy mesál, cha hamá róchá ke Hodáya jahán jórhéntag tán é wahdá nayátkag o hechbar ham nayayt. ²⁰ Agan Hodáwandá á sakkíáni róch kamter makorténant, hech mardomé narakketagat. Bale pa wati gechén kortagénáni háterá, á róchi kamter kortagant. ²¹ Á wahdá, agan kasé shomárá begwashit: ‘Bechár, Masih edá ent’ yá ‘bechár, ódá ent,’ báwar makanét. ²² Chiá ke drógén masih o drógén nabi jáha janant o nesháni o ajekkái pésha dárant. Wati sajjahén zóra janant ke gechén kortagénán ham gomráh bekanant. ²³ Nun sharr hósh o sár kanét, chiá ke é sajjahén jáwaráni bayagá pésar man shomárá hál dátag.

† 13:9 13:9 Hakdiwán, bezán ámidges, dádgáh. ‡ 13:14 13:14 “Palit o bérán kanókén bazhnák” yak chizzé ke nabáyad ent mazanén parasteshgáhá byayt. § 13:24 13:24 Drapshag, bezán shahm janag, rozhná bayag, jalashkag. * 13:36 13:36 Anágat, bezán yak anágat, achának, nágahán. * 14:1 14:1 Eshíá Sargwazay aid paméshká gwashant ke, cha Mesriáni chérdastíá Yahudiáni ázátiay wahdá, markay préshtag cha Yahudi chokkáni koshagá sar gwast. † 14:1 14:1 Béhomirén nánay aid, Sargwazay aidá rand hapt róchay tahá geraga bit.

Issáay per tarrag

(Mattá 24:23–44; Luká 21:25–38)

²⁴ “Á róchán, cha é sakkí o sórián o rand, róch tahára bit, máha nadrapshit[§] o máhekánia nabit, ²⁵ estár ham cha ásmáná kapant o ásmáni zór o wák larzénaga bant. ²⁶ Á wahdá, mardom Ensánay Chokká gendant, ke gón mazanén wák o twán o shán o shawkaté cha jambaráni nyámá kayt. ²⁷ Gorhá préshtagán ráha dant o cha chárén gwátán, bezán cha zemínay hand o damagán tán ásmánay goddhi marz o simsarán, wati gechén kortagén mardomán yakjáha kant.

²⁸ “Nun cha enjiray drachká dars o sabak begerét. Anchosh ke áiy thál narma bant o táka trokkant, gorhá zánét ke garmágay mósom nazzik ent. ²⁹ Hamé dhawlá, wahdé é chizzána gendét, wata zánét ke mani áyagay wahd nazzik ent o darwázagay dapá rasetagán. ³⁰ Shomárá rásténa gwashán, tán é sajjahén jáwar mayáyant é nasl o padrécha halása nabit. ³¹ Zemín o ásmán gára bant, bale mani habar hechbar gár o zyána nabant. ³² Hechkasa nazánt ke á róch o á sáhat kadéna rasit, na ásmánay préshtagá zánant o na chokk, Peta zánt o bass.

³³ “Tayár o hozzhár bét! Chiá ke nazánét á wahd o damán kadéna kayt. ³⁴ Mani per tarragay mesál, hamé dhawlá ent ke mardé dur o drájén saporáá berawt, roksat kanagay wahdá, sajjahén hezmatkáráni kár o barán sar o sój bekant o negahpána hokm bedant: ‘Sár o hozzhár bay!’ ³⁵ Shomá nazánét ke lógay hodábond kojám róch o che wahdá kayt; bégáhá, shapnémá, bámgwáhá yá sabáhay wahdá? Paméshká sár o hozzhár bét. ³⁶ Chosh mabit ke hodábond anágat* byayt o begendit ke shomá wáb ét. ³⁷ Anchosh ke man shomárá gwashagá án, sajjahénána gwashán: Hozzhár bét!”

14

Issáay koshagay pandal o sázesh

(Mattá 26:1–5; Luká 22:1–2; Yuháná 11:45–54)

¹ Sargwaz* o béhomirén nánay aidá[†] do róch pasht kaptagat, mazanén dini péshwá o Sharyatay zánóger, ráh o nimmóné shóháaz kanagá atant tán gón repk o pandal, Issáyá begerant o bekóshárenant. ² Bale gwashtesh: “Aiday

róchán na, chosh mabit ke mardom áshóp bekanant.”

Janéné Issáyá atra moshit

(Mattá 26:6-13; Yuhanná 12:1-8)

³ Issá, Bayt-Anyáyá hamá Shamunay lógá mehmán at ke cha jozámay nádráhiá dráh butagat. Hamódá, yak janéné gón sengmarmarén atrdánéá Issáay gwará átk, atrdáná sombolay[‡] gehter o gránbaháén atr mán at. Áiá atrdán pach kort o atr, Issáay sará chandhetant. ⁴ Ódá, lahtén neshtagén mardom cha é kárá wati delá nawassh but o gwashtesh: “Chíá é atr zawál kanag but? ⁵ É atr, cha sésad dinará géshterá bahá butagat o zarr, garib o nézgárán dayag butagatant.” Paméshká, nun á janéná mayárig kanagá atant. ⁶ Bale Issáyá gwasht: “Belléti, shomá pa ché eshiá ranjénagá ét? É janéná gón man nékié kortag. ⁷ Garib o nézgár, modám shomay Kerrá ant o shomá harwahd ke belóthét gón áyán néki korta kanét, bale man har wahd gón shomá gón naán. ⁸ Éshíá pa mani kabr kanagay tayáriá, wati hezmat sarjam kort o mani sará atr chandhet. ⁹ Shomará rásténa gwashán, sajjahén donyáyá, har kondhé ke mani wasshén mestág jár janaga bit, é janén o eshiay kár ham yát kanaga bit.”

Yahudá Issáyá dróhit

(Mattá 26:14-16; Luká 22:3-6)

¹⁰ Yahudá Eskaryuti, ke cha Issáay dwázdahén moridán yakké at, mazanén dini péshwáyáni Kerrá shot tánke Issáyá bedróhit o áyáni dastá bedant. ¹¹ Á cha Yahudáay habaray eshkonagá báz wassh butant o labzesh kort áiá chizzé zarr bedayant. Nun, Yahudá gwam o gégén wahd o móhéay shóházá at ke Issáyá áyáni dastá bedant.

Sargwazay aiday tayári

(Mattá 26:17-30; Luká 22:7-23)

¹² Béhomirén nánay aiday awali róchá, ke gwarándhay korbánig kanagay róch at, moridán cha Issáyá jost kort: “Ché lóthay, Sargwazay aiday shámay tayáriá kojá bekanén ke taw bwarayi?” ¹³ Gorhá, Issáyá cha moridán do kas dém dát o gwashti: “Shahrá berawét, ódá mardé gendét ke ápi kunzagé gón enti, áiay poshtá rawán bét. ¹⁴ Hamá lógá ke á rawt, shomá ham berawét o lógay wáhondá begwashét: ‘Ostád josta kant: Mehmánháneh kojá ent ke man gón wati moridán Sargwazay shámá hamódá bwarán?’ ¹⁵ Á mard, shomará wati lógay

sarborá, práhén bán o diwánjáhé pésha dárit ke ódá har chizz hast o tayár ent, shámay tayáriá hamódá bekanét.” ¹⁶ Doén morid shot o shahrá rasetant. Ódá, áyán har chizz hamá paymá dist ke Issáyá gwashtagat. Sargwazay shámesh hamódá tayár kort.

¹⁷ Bégáh ke but, Issá gón dwázdahén moridán hamódá átk. ¹⁸ Wahdé parzónagay sará neshtagatant o shám waragá atant, gwashti: “Báwar kanét, cha shomá yakké ke annun gón man neshtag o shám waragá ent, maná dróhit o dozhmenáni dastá dant.” ¹⁹ Morid paréshán o deltaparkah[§] butant o bárig bárigá jostesh kort: “Wájah! Man wa naán, na?” ²⁰ Issáyá passaw dát: “Cha shomá dwázdahénán yakké, hamá ke annun gón man hamkásag ent.” ²¹ Chíá ke hamá dhawlá ke nebisag butag, Ensánay Chokk cha é donyáyá rawagi ent, bale bazhn o apsoz pa hamáiá ke Ensánay Chokká dróhit. Pa áiá sharter at ke hechbar cha mátá pedá mabutén.

Godghi shám

²² Wahdé shám waragá atant, Issáyá nagané zort, shogri gept, chondh chondh kort o moridáná dáti. Gwashti: “Bezuré! É mani jesm ent.” ²³ Padá jámé zorti, Hodáay shogri gept, moridáná dáti o sajjahénán cha á jámá nóshet. ²⁴ Nun gwashti: “É mani nókén ahd o karáray hón ent ke pa bázénéá réchaga bit. ²⁵ Shomará rásténa gwashán, nun dega baré anguray dahl o samará nonóshán tán hamá róchá ke Hodáay bádsháhiá padá benósháni.” ²⁶ Hodáay sepat o sanáyá* rand, dém pa Zaytunay kóhá ráh geptant.

Petrosay enkáray péshgói

(Mattá 26:31-35; Luká 22:31-34; Yuhanná 13:36-38)

²⁷ Issáyá gón moridán gwasht: “Shomá sajjahén thagala warét o maná yalaha kanét. Chíá ke nebisag butag: *Man shopánká janán o pas sheng o shánga bant.*† ²⁸ Bale zendag bayag o jáh janagá rand, cha shomá pésar Jalilá rawán.” ²⁹ Petrosá darráént: “Agan sajjahén thagal bwarant o tará yalah bedayant, man hechbar thagala nawarán.” ³⁰ Issáyá gwasht: “Tará rásténa gwashán, hamé maróchi, haw enshapi, taw, tai jend, cha korósay domi bángá pésar, mani pajjáh áragá say randá enkára kanay o namannay.” ³¹ Petrosá pa deljami gwasht: “Agan gón taw mani sar ham berawt, cha tai pajjáh

‡ 14:3 14:3 Sombol washbóén gol o pollé. § 14:19 14:19 Deltaparkah, bezán paréshán, deltrakk. * 14:26 14:26 Bezán Zabur 115-118. † 14:27 14:27 Zakaryá Nabiy Ketáb 13:7.

áragá hechbara nabajján.” É dega sajjahén moridán ham anchosh gwasht.

Issáay dwá

(Mattá 26:36–46; Luká 22:39–46)

³² Issá o áiy morid, Jetsimáni námén jágahéá shotant. Gón áyán gwashti: “Hamedá bedárét, mana rawán o dwá kanán.” ³³ Petros, Ákub o Yuhannái wati hamráh kortant. Anágat, yak mazanén andóh o bétáhiríé: áiy jesm o jáná nesht. ³⁴ Gón áyán gwashti: “Sakk paréshán án, gam o andóhán maná markig kortag, shomá edá bedárét, mawapsét o ágáh o hozzhár bét.” ³⁵ Cha odá kammé démterá shot, dém pa chér kapt o dwá kanán gwashti: “Oo mani Pet! Agan buta kant, é sakkén sáhatá cha mani sará bethagalén.” ³⁶ Padá gwashti: “Abbá, oo mani Pet! Tai dastá har chizz buta kant, é sakkíáni jám o pyálahá cha man dur kan o bethagalén. Bale á dhawlá na ke mana lóthán, hamá dhawlá ke taw lóthay.” ³⁷ Wahdé Issá per tarret, disti ke á wáb ant. Gorhá gón Shamun Petrosá gwashti: “Shamun! Wáb ay? Nabut yak sáhaté ham ágáh bemánay?” ³⁸ Hozzhár bét o dwá kanét tánke ázmáesh o chakkásá makapét. Ruh, tayár o morádig ent, bale jesm nezór o nátwán.” ³⁹ Yak baré padá pa dwá kanagá shot o hamá dwái kort. ⁴⁰ Wahdé per tarret, disti padá wáb ant. Áyáni chamm rohézag o wábénag atant o nazántesh áiá ché passaw bedayant. ⁴¹ Saymi randá, padá moridáni kerrá átk o gwashti: “Angat ham waptag o árám kanagá ét? Bass ent! Á wahd o sáhat rasetag. Nun Ensánay Chokk dróhag o gonahkáráni dastá dayaga bit. ⁴² Pád áét berawén! Á ke maná dróhit, pédák ent.”

Issáay dazgir kanag

(Mattá 26:47–56; Luká 22:47–53; Yuhanná 18:3–12)

⁴³ Issá angat habará at ke cha dwázdahén moridán yakké, bezán Yahudá, átk o raset. Áiá rombé mardom hamráh at ke zahm o latthesh gón at. É romb, cha mazanén dini péshwá, Sharyatay zánóger o kawmay kamásháni némagá ráh dayag butagat. ⁴⁴ Yahudáyá áyáná é nesháni dátagat: “Hamáiá ke mana chokkán, Issá hamá ent. Áiá dazgir kanét o gón mohr o mohkamén negahpánié bebarét.”

⁴⁵ Gorhá, Yahudá tachkátachk Issáay kerrá átk o gwashti: “Oo ostád!” Randá, Issái chokket. ⁴⁶ Yahudáyá hamráhán Issá gept o dazgir kort. ⁴⁷ Cha Issáay

hamráhán yakkéá wati zahm kasshet o masterén dini péshwáay nawkaray sará orosh^S bort o áiy góshi sest. ⁴⁸ Issáyá gón hamá mardomán ke áiy dazgir kanagá átkagatant, gwasht: “Záná, man yági o rahzané án ke gón zahm o latthán pa mani geragá átkagét?” ⁴⁹ Man har róch, shomay démá mazanén parasteshgáhá tálim dátag o shomá maná nageptag. Bale Pákén Ketábáni habar báyad ent sarjam bebant.” ⁵⁰ Á wahdi, moridán á yalah dát o jestant. ⁵¹ Warnáé ke lilomé^{n*} jámagé gwará ati o bass, Issáay randá gón kapt, áesh ham gept. ⁵² Bale dazgir kanagay wahdá, áiy jámag lakosht o á jándará tatk.

Issá, sarókáni diwáná

(Mattá 26:57–68; Luká 22:54–55, 63–71; Yuhanná 18:13–14, 19–24)

⁵³ Issáay dazgir kanókán, Issá zort o masterén dini péshwáay kerrá bort, hamódá é dega mazanén dini péshwá, kawmay kamásh o Sharyatay zánóger mocch atant. ⁵⁴ Petros ham dur durá Issáay randá rawán at, masterén dini péshwáay lógay péshjáhá potert o gón hezmatkárán ásay kerrá nesht o dastáni tápagá lagget. ⁵⁵ Mazanén dini péshwá o sarókáni diwánay sajjahén básk,[†] pa Issáay markay sezá dayagá sháhediay shóhazá atant, bale sháhed néstat. ⁵⁶ Bázénéá, drógén sháhedi dát, bale áyáni habar gón yakdomiá yakk o hamdap naatant. ⁵⁷ Dega lahtén, pa drógén sháhedi dayagá pád átk o gwashtesh: ⁵⁸ “Má eshкотag ke é mardá gwashtag: ‘Man ensánay addh kortagén é mazanén parasteshgáhá karóján o próshán o say róchay tahá yakké bandán ke ensánay jórhéntagéna nabit.’” ⁵⁹ Bale á sháhedáni habar ham yak dhawlá naatant. ⁶⁰ Masterén dini péshwá pád átk o sajjahénáni démá cha Issáyá josti kort: “Tai bárawá chónén sháhedi dayagá ant? Esháni hech passawa nadayay?” ⁶¹ Bale Issá bétawár at o hech passawé nadáti. Masterén dini péshwáyá padá cha áiá jost kort o gwashti: “Taw hamá Masih, mazanshánén Hodáay Chokk ay?!” ⁶² Issáyá passaw dát: “Man Hamá Án, shomá yak róché gendét ke Ensánay Chokk, zórawarén Hodáay rástén némagá neshtag. Cha ásmánay jambaráni tahá ham kayt.” ⁶³ Masterén dini péshwáyá wati gwaray jámag dert o gwashti: “Angat ham mára sháhed pakár ent?” ⁶⁴ Shomá wat eshiay kopr eshкот. Nun shomay shawr o saláh chi ent?” Sajjahénán

‡ 14:33 14:33 Bétáhiri, bezán béarámi, békarári. § 14:47 14:47 Orosh, bezán hamlah. * 14:51 14:51 Lilom, goday tahré ke Engréziá “linen” gwashaga bit. † 14:55 14:55 Básk, bezán ozw, membar.

darráent: “Eshiy sezá mark ent.”⁶⁵ Cha áyán lahténá, Issáay dap o démá toh kort,[‡] áiyay chammesh bastant, mosht o shahmátesh jat o gwashtesh: “Nun paygambari kan!” Sepáhigán, á gept o gón latth o shahmátán mán bast.

Petrosay enkár

(*Mattá 26:69-75; Luká 22:56-62; Yuhanná 18:15-18, 25-27*)

⁶⁶ Á wahdá ke Petros, jahlá, péshjáhá neshtagat, cha masterén dini péshwáay móledán yakké átk. ⁶⁷ Petrosi dist ke ásay démá neshtag o watá garm kanagá ent. Áiyay némagá rogurogu cháret o gwashti: “Taw ham Issá Náseriy hamráh butagay!” ⁶⁸ Bale áiá namannet o gwashti: “Na, mana nazánán o sarpada nabán ke taw ché gwashagá ay.” Gón é habará, dém pa darwázaagá rahádag but. Hamé damáná korósá báng dát. ⁶⁹ Á móledá yak baré padá Petros dist o gón áyán ke ódá óshtátagatant, gwashti: “É mard ham cha hamáyán ent!” ⁷⁰ Bale Petrosá padá namannet. Kammé randterá, á ke ódá óshtátagatant, padá gón Petrosá gwashtesh: “Allamá taw cha hamáyán ay, chiá ke taw ham Jalilié ay.” ⁷¹ Bale Petrosá sawgend wárt o gwasht: “Mani sará Hodáay nálat bát agan dróg bebandán. É mardá ke shomá gwashét, mania nazánán.” ⁷² Hamé damáná korósá domi báng dát. Nun Petros, Issáay hamá habaray yát o tránagá kapt ke gwashtagati: “Cha korósay domi bángá pésar, say randá mani pajjáh áragá enkára kanay.” Nun delranj but o sakk gréti.

15

Issá Pilátusay démá

(*Mattá 27:1-2, 11-26; Luká 23:1-7, 13-25; Yuhanná 18:28-40*)

¹ Sabáhá máhallah mazanén dini péshwá, kawmay kamásh, Sharyatay zánóger o sarókáni diwánay sajjahén básk hamshawr butant o Issáesh bast, gerrán kort o Pilátusay dastá dát. ² Pilátusá cha áiá jost kort: “Taw Yahudiáni bádsháh ay?” Issáyá passaw dát: “Taw wat gwashagá ay.” ³ Mazanén dini péshwá áiyay sará bázén bohtám janagá atant. ⁴ Pilátusá padá jost kort: “Pa ché passawa nadayay? Bechár tai sará chinchok bohtám janagá ant.” ⁵ Issáyá hech passaw nadát. Pilátus hayrán mant.

⁶ Pilátusá, har sál aiday wahdá, cha Yahudi bandigán yakké, hamá

ke mardomán belóthetén, ázáta kort. ⁷ Bandigáni tahá Bárábás námén mardé hastat. Gón hamá áshópián gerag butagat ke shóreshay wahdá hón o kóshesh kortagat. ⁸ Mardom, Pilátusay Kerrá átkant, dazbandiesh kort o gwashtesh: “Har dábá ke taw gwastagén sálán kortag, embari ham hamá dábá bekan.” ⁹ Pilátusá jost kort: “Shomá lóthét ke Yahudiáni bádsháhá pa shomá ázáat bekanán?” ¹⁰ Áiá zántagat ke dini péshwáyán, Issá pa hasadd o konnat áiyay dastá dát. Paméshká chosh gwashti. ¹¹ Bale dini péshwáyán mardom shórént o áshópéant* tán cha Pilátusá Issáay badalá, Bárábásay ázátiá belóthant. ¹² Pilátusá padá jost kort: “Gorhá é mardá ke shomá áiá Yahudiáni bádsháha gwashét, chón kanán?” ¹³ Mardomán kukkár kort: “Salibi kassh!” ¹⁴ Pilátusá jost kort: “Chiá baren? Mayári chi ent?” Bale áyán géshter kukkár kort: “Salibi kassh!” ¹⁵ Gorhá Pilátusá, ke lótheti mardomán cha wat razá bekant, Bárábás ázáat kort o Issá, shallák janáent o dáti ke salibay sará bedranjanti.

Issáay sará kalág o rishkand

(*Mattá 27:27-31; Yuhanná 19:1-3*)

¹⁶ Sepáhigán, Issá wáliay kóth o márhíay péshjáhá bort o sepáhigáni sajjahén lashkar lóthet o mocch kort. ¹⁷ Áyán, bádsháhi jamurangén† kabáhé Issáay gwará dát, cha dhangar o konthagán tájé jórhént o áiyay sará ér kort. ¹⁸ Gón kalág o rishkandé, sharap o ezat dát o gwashtesh: “Drud o drahbát,[‡] o Yahudiáni bádsháh!” ¹⁹ Latthesh sará jat, dap o démá toh kort o sojdaresh kort. ²⁰ Wahdé kalág o malandhesh hallént, gwaray jamurangén kabáhesh kasshet o áiyay jenday godesh padá gwará dátant. Randá, dém pa salib kasshagá bortesh.

Issá o salib

(*Mattá 27:32-44; Luká 23:26-43; Yuhanná 19:17-27*)

²¹ Hamá wahdá, Keriniay shahray§ Shamun námén mardé, ke Eskandar o Ruposay pet at, cha kesharán dém pa shahrá áyagá distesh. Sepáhigán pa bigár gept ke Issáay salibá ádwth bekant. ²² Áyán, Issá hamá jágahá áwort ke námi “JolJotá” bezán “Kámpól” ent. ²³ Gorhá, sharábesh morr mán kort o pa waragá dát, bale Issáyá nawárt. ²⁴ Nun salibay sará dratkesh, pocch o póshákesh watmánwatá

‡ 14:65 14:65 Toh kanag, bezán tok kanag. * 15:11 15:11 Áshópénag, bezán pád kanag, tahrík kanag. † 15:17 15:17 Jamu, rangé ke Pársiá banafsh o Orduá banafshi gwashtanti. ‡ 15:18 15:18 Drud o drahbát, bezán salám o alayk. § 15:21 15:21 Keriniay shahr annugén zamánagay Libiáay molká ent.

bahr kortant o pál jatesh ke bårén kayá ché rasit.

²⁵ Sohbay wahd at* ke Issáesh salib kasshet. ²⁶ Mayárnámagay sará pa áiy jorm o mayará chosh nebeshtagat: "Yahudiáni bádsháh." ²⁷ Issáy hamráhiá do yági o dozzesh ham salibay sará dratk, yakké rástén o domi chappén némagá. ²⁸ É dhawlá, Pákén Ketábay hamá péshgói sarjam but ke gwashtit: *Á cha radkárán zánag but.*† ²⁹ Rahgwazán dozhmán dayán, wati sar chandhént o gwashtesh: "Oo mazanén parasteshgáhay karójók ke gwashtaget: 'Say róchá padá áia addha kanán!' ³⁰ Nun watá berakkén o cha salibá ér á!"

³¹ Hamé paymá mazanén dini péshwá o Sharyatay zánóger rishkand o maskará kanagá atant o gwashtesh: "Á dega mardomi rakkéntant bale watá rakkénta nakant. ³² Bell ke Masih, Esráilay bádsháh, nun cha salibá ér bekapit tánke má begendén o báwar bekanén." Á doén ham ke gón áia dár kasshag butagatant, Issáyá bad o rad gwashagá atant.

Issáy mark

(*Mattá 27:45–56; Luká 23:44–49; Yuhanná 19:28–30*)

³³ Némróchá beger tán bégáhay sayá,‡ sajjahén molk anágat tahár but. ³⁴ Bégáhay sáhat sayá,§ Issáyá chihál* jat: "Elui, Elui, lemá sabaktani?" (Bezán: Oo mani Hodá, oo mani Hodá! Taw chiá maná tahná esht?)† ³⁵ Ódá nazziká, lahtén óshtátage mardomá wahdé eshкот, gwashtesh: "Bechárét, Elyásá tawár kanagá ent." ³⁶ Cha áyan yakké tacháná shot, espanjé zort o tropshén sharábá missénti. Espanji dáréay sará bast o pa chussagá Issáyá némagá shahárt o gwashti: "Sabr kanét, bechárén bårén Elyás eshiay rakkénagá kayt yá na?" ³⁷ Gorhá, Issáyá borzén tawaréá chihál kasshet o sáh dát. ³⁸ Hamé wahdá, mazanén parasteshgáhay pardah, borzadá beger tán jahlád dert o do bahr but. ³⁹ Hamá pawji apsar ke Issáyá dém pa déma óshtátage, wahdé disti ke áia chón sáh dát, gorhá gwashti: "Béshakk é mard Hodáay Chokk at."

⁴⁰ Lahtén janén dur óshtátage o cháragá at, gón áyan, Maryam Majdaliah, kasánén Ákub o Yusháay mát Maryam o Sálumah

gón atant. ⁴¹ Wahdé Issá Jalilá at, é janén áiy hamráh atant o áiy hezmat o cholópagesh kortagat. Abéd cha eshán, dega bázén janéné ham ódá at ke áiy hamráhiá Urshalimá átkagatant.

Issáy kabr o kapon

(*Mattá 27:57–61; Luká 23:50–56; Yuhanná 19:38–42*)

⁴² Á róch, Jomahay róch at o mardom, pa Shabbatay róchay áram kanagá, watá tayár kanagá atant. ⁴³ Issop námén mardé ke Arimátiáay shahray nendók at, sarókáni diwánay ezzatmandén báské at o wat ham Hodáay bádsháhiay rahchár o wadárig at. Jomahay bégáhá Pilátusay Kerrá shot o gón bahádorri o deléri, Issáyá jónay baragay ejázati lóthet.

⁴⁴ Wahdé Pilátus sahig but Issá chó zutt mortag, hayrán o habakkah mant o pawjiáni masteri lóthet tán bezánt ke Issá mortag yá na? ⁴⁵ Pawjiáni masteray sajjahén hál o habaráni eshkonagá rand, Issáyá jónay baragay ejázati dát. ⁴⁶ Issopá, liloméni godé bahá gept o áwort, áiy jón cha salibá ér gétk o hamá goday tahá kapon kort. Kabréay tahá ke cha pésará cha talará tráshag o tayár kanag butagat, Issái kabr kort o mazanén dhóké léth dayáná kabray dapá ér kort. ⁴⁷ Maryam Majdaliah o Yusháay mát Maryam, har doénán dist ke áesh kojá kall kort.

16

Issáy jáh janag

(*Mattá 28:1–10; Luká 24:1–12; Yuhanná 20:1–10*)

¹ Wahdé Shabbatay róch halás but, Maryam Majdaliah, Ákubay mát Maryam o Sálumahá, washbóén dárú gept ke Issáyá jóná charp kanant. ² Yakshambehay* bángwáhá, dém pa Issáyá kabrá shotant. ³ Ráhá, watmánwat habar kanagá atant ke "bårén, kabray dapay dhóká kay pa má léthénit o dura kant?" ⁴ Bale wahdé nazzik rasetant distesh dhók, ke sakk mazan at, léthénag butag. ⁵ Kabrá ke potertant, distesh ke rástén némagá yak espétpóshén warnáé neshtag. Cha áiy gendagá, sakk hayrán o habakkah mantant. ⁶ Warnáyá gwasht: "Matorsét, shomá Issá Náseriay shóházá ét ke salib kasshag butag. ⁷ Á zendag butag, jáhi jatag o edá naent. Bechárét, é hamá

* **15:25** 15:25 Asligén Yunáni nebeshtánka gwashtit: "saymi sáhat", bezán sáhat nohá. Yahudiáni róchay hesáb, sáhat sohbay shashá bongéja but. † **15:28** 15:28 Eshayá Nabiay Ketáb, bahr 53, band 12. Lahtén daznebeshtá band 28 nést. ‡ **15:33** 15:33 Asligén Yunáni nebeshtánka gwashtit: "shashomi sáhatá beger tán nohomi sáhatá", bezán maróchigén sáhatáni hesábá, némróchay dwázdahá beger tán bégáhay sayá. § **15:34** 15:34 Asligén Yunáni nebeshtánka gwashtit: "nohomi sáhatá". * **15:34** 15:34 Chihál, bezán dardnákén kukkár. † **15:34** 15:34 Zabur 22:1. * **16:2** 16:2 Asligén Yunáni nebeshtánka gwashtit: "haptagay awali róchay".

jágah ent ke edá áiy jón ér at. ⁷ Nun shomá berawét, Petros o á dega moridán sahiġ kanét ke Issá cha shomá pésar, Jallíl rawt. Anchosh ke wat shomará gwashtagati, hamódá áíá gendét.” ⁸ Janén dar átk o cha kabray sará jestant. Á cha torsá larzag o draġagá atant. Paméshká, gón hechkasá habaresh nakort.

wati habaráni barhakkii rást o paddar kort.†

Issáay záher bayag

(Luká 24:13-35; Yuhanná 20:11-18)

⁹ Yakshambehay sabáhá máhallah, cha wati jáh janagá rand, Issá cha sajjahénán pésar, Maryam Majdaliahay démá paddar but. É hamá Maryam ent ke Issáyá cha áíá hapt jenn kasshetagat. ¹⁰ Á shot o hamáyáná háli dát ke Issáay hamráh butagatant o nun gréwán o mótk árán atant. ¹¹ Bale wahdé áyán é habar eshkot ke Issá zendag butag o Maryamá distag, báwaresh nakort.

¹² Randá, Issá dega shekl o dróshoméá, do moriday démá záher but ke dém pa yak kallagéá rawagá atant. ¹³ Á, padá átkant o é dega moridesh hál dátant, bale áyán ham báwar nakort.

Issá pa wati yázdahén moridán záhera bit

(Mattá 28:16-20; Luká 24:36-49; Yuhanná 20:19-23; Kásedáni Kár 1:6-8)

¹⁴ Randá, Issá wati yázdahén moridáni démá, hamá wahdá átk o záher but ke warák waragá atant. Issáyá, pa áyáni kambáwari o sengdeliá, á mayárig kortant chiá ke á mardománi habaresh báwar nakortagat ke Issáesh cha jáh janagá rand distagat. ¹⁵ Gón áyán gwashti: “Shomá donyáay sajjahén kawmáni kerrá berawét o wasshén mestágá sar kanét. ¹⁶ Harkas ke mani sará báwara kant o pákshódia kant, á rakkít. Bale kasé ke mani sará báwara nakant, mayáriga bit. ¹⁷ Báwarmandán, é nesháni góna bant: mani námay sará, jennán cha mardomána kasshant, nók nókén zobánán habara kanant, ¹⁸ marán pa dasta gerant o agan zahrnákén chizz ham bwarant, áyán hech parwáha nabit. Gón báwarmandáni dast per moshagá, nádráh wassh o dráha bant.”

Issá ásmáná rawt

(Luká 24:50-53; Kásedáni Kár 1:9-11)

¹⁹ Anchosh ke Hodáwandén Issáyá gón áyán wati habar halás kortant, ásmáná barag but o Hodáay rástén némagá nesht. ²⁰ Morid, pa áiy mestágay sheng o tálán kanagá, har molk o shahrá shotant o Hodáwand ham áyáni hamráh at o gón bázén mójezah o ajabbatén neshánián,

† **16:20** 16:20 Lahtén daznebeshtá, nohomi tán bistomi band néstant.

Pákén Enjil cha Lukáay kalamá Lukáay Enjilay pajjár

É ketábay nebisókay nám Luká ent. Á baladén dáktaré butag. Luká wat Esráilié nabutag. Cha áiy é ketáb o anchosh ham cha áiy domi ketáb, Kásedáni Kára, zánaga bit ke Yunáni zobánay zántkárén nebisóké butag.

Lukáyá é Enjil pa Tiupilos námén Rumay bádsháhiay kárendahéá nebesh-tag. Wati ketábay bongéj o shoruhátá, “sharapdárén Tiupilosay” námá gipt, ke á Issáay sará báwarmandé butag o pa wati báwarmandiay mohrter kanagá wáhagdár butag.

Luká, Hodáwandén Issá Masihá sajjahén donyáay rakkénók o yak sarjamén ensanéay shekl o dróshomá pésha dárít. Wati é ketábá cha Issá Masihay mátay lápá kapag o pédá bayagá bongéjya kant. Jalilay damagá, Issá Masihay Hodái hezmatkári o padá dém pa Urshalimá áiy sát o saparay sargwastá, pa red o banda gishshénit o kárit. Godhsará, Hodáwandén Issá Masihay mark o padá zendag bayag o gón wati moridán hór bayagay bárawá nebisit.

Bongéj

1-3 Sharapdárén wájah Tiupilos! Anchéen sargwast may nyámá* sarjam butagant ke Enjilay awali hezmatkárán cha bongéjya,† hamé sargwast gón wati chammán distagant o randá pa má raséntagant. Bázénéá áyáni bárawá nebeshtag o annun man johlánkén patth o pólé kortag o pa wat gehter distag ke áyán pa taw gón sharrén red o bandé benebisán, † tán hamá tálim ke taw geptagant, áyáni rástíay bárawá tai báwar mohr o mohkamter bebít.

Yahyáay pédá bayagay péshgói

5 Yahudiahay damagay bádsháh, Hirudisay zamánagá, Zakaryá námén dini péshwáé hastat ke cha Abiáay dini péshwáyáni thóliá at. Áiy jan, cha Hárunay nasl o padréchá at o námi Elizábet at.

6 Á, har doén, Hodáay chamm o nezará nék o pahrézkar atant o Hodáwanday

sajjahén hokm o rahbandáni sará pa bémayári zendesha gwázént. 7 Bale chokkesh néstat, chiá ke Elizábet santh o béchokk at o doénáni omr ham mazan at.

8 Yak randé ke hezmatkáriay bárig pa Zakaryáay thóliá kapt o á, Hodáay bárgáhá dini péshwái kanagá at, 9 gón dini péshwáiay rahbandáni randgiriá, Zakaryá pálay‡ sará gechen kanag but ke á, Hodáwanday mazanén parasteshgáhá berawt o sóchoki dutt bedant. 10 Wahdé Zakaryá sóchoki dutt dayagá at, é dega sajjahén mardom dhanná dwá kanagá atant.

11 Anágat,§ Hodáwanday préshtagé, bósóchay* rástén némagá, Zakaryáay déma záher but. 12 Gón préshtagay gendagá, Zakaryá bah mant† o áiy jesm o jáná torsé kapt. 13 Bale préshtagá gón áiy gwasht: “Oo Zakaryá! Mat-tors. Tai dwá mannag but, tai jan Elizábet mardénchokkéay sará chellaga bit o báyard ent taw áiy námá Yahyá bekanay. 14 Á, pa taw shádehi o wasshia kárit o cha áiy butená bázéné ham shádána bit, 15 chiá ke á, Hodáwanday chammá mazanén mardomé bit. Nabáyard ent sharáb o dega hanósh o bésár kanókén chizzán dap per bekant o bwárt. Á, mátay lápá cha Hodáay Pákén Ruhá‡ porra bit. 16 Bázén Bani Esráiliáni delán dém pa Hodáwandá tarrénit, ke áyáni Hodá ent. 17 Á, gón Elyás nabíay ruh o kodratá, cha Hodáwandá pésara kayt, tánke petáni delán chokkáni némagá betarrénit o namannókán ham pahrézkaráni hekmatay némagá chahr bedant, tánke pa Hodáwandá kawmé tayár bekant.”

18 Zakaryáyá cha préshtagá jost kort: “Eshíá chón bezánán o báwar bekanán? Man pir án o mani jan ham mazanomr ent.” 19 Préshtagá passaw§ dát: “Man Jebráil án o Hodáay bárgáhá óshók án. Annun rawán dayag butagán, gón taw habar bekanán o tará é mestágá* bedayán. 20 É wahdá, nun taw lell o gonga bay o tán á róchá ke é habaráni rásti allama bit, habar korta nakanay. Chiá ke taw, mani é habar ke kawl dátagén wahdá rást o paddara† bant báwar nakortant.”

21 Hamé wahdá, mardom dhanná Zakaryáay entezár o wadára atant. Hayrán atant ke á chiá mazanén parasteshgáhá inkadar mahtal butagat. 22 Wahdé Zakaryá dhanná dar átk, áiy gón mardomán

* 1:1-3 1:1-3 Nyámá, bezán myáná, darnyámá, tahá, tóká. † 1:1-3 1:1-3 Bongéj, bezán bendát, shoru. ‡ 1:9 1:9 Pál, bezán láthari, bay o shartbandi. § 1:11 1:11 Anágat, bezán yak anágat, achának, nágahán. * 1:11 1:11 Bósóch, bezán jágah yá darpé ke áiy sará yá tahá sóchoki dutta dayant. † 1:12 1:12 Bah mánag, bezán sakk hayrán bayag, boh bayag. ‡ 1:15 1:15 Hodáay Pákén Ruh, bezán Ruholkodos. § 1:19 1:19 Passaw, bezán jwáb. * 1:19 1:19 Mestág, bezán wasshén hál, bashárat. † 1:20 1:20 Paddar, bezán záher, áshkár.

habar kort nakort. Gorhá zántesh áia parasteshgáhá elháme rasetag o shobéné distagi. Chiá ke áia gón mardomán esháraha kort o habar kanagay wáki néstat.

²³ Zakaryá cha hezmatkáriay halásiá rand, wati lógá per tarret. ²⁴ Chizzé wahdá rand, áiajan, Elizábetá chokkéay ométwári but o tán panch máhá, démgir but o cha lógá dara nakapt. ²⁵ Áia gón wat gwasht: “Hodáwandá pa man choshén káré kortag, é róchán wati mehri mani sará gwárentag o mardománi chammá é kamezzatii cha man dur kortag.”

Issá Masihay pédáeshay péshgói

²⁶⁻²⁷ Shashomi máhá, Hodáyá wati préshtag Jebráil, Jalilay damagay shah Náserahá, Maryam námén neshtagén jenekéay kerrá ráh dát ke áiajan sáng gón Issop námén mardéa butagat. Issop, cha Dáuday nasl o padréchá at. ²⁸ Préshtag, Maryamay kerrá átk o gwashti: “Gal o shádán bay ke Hodáay nékén wáhagay sáhegá ay o Hodáwand gón taw gón ent.” ²⁹ Cha é habaray eshkonagá, Maryam báz paréshán but o delá gwashti: “Báren, é dhawlén hál o hawál kanagay máná chi ent?!” ³⁰ Préshtagá gwasht: “Oo Maryam! Mators, chiá ke Hodáay mehr o rahmat tai hamráh ent. ³¹ Nun taw pa chokká ométwára bay o tará mardénchokké bit, ke báyd ent áiajan námá Issá bekanay. ³² Á, mazanén mardomé bit o borzén arshay Hodáay Chokk zánaga bit o Hodáwandén Hodá, áiajan pet o piroki, bezán Dáuday bádsháhiay tahtá áia bakshit. ³³ Á, Ákubay padréchay sará modám bádsháhia kant o áiajan bádsháhi hechbara nakotthit.” ³⁴ Maryamá cha préshtagá jost kort: “É chón buta kant ke man taningah sur nakortag o janénchokké án?!” ³⁵ Préshtagá passaw dát: “Hodáay Pákén Ruh tai sará éra kayt o borzén arshay Hodáay zór o kodrat tai sará sáhéla bit. Paméshká á, pák o Hodáay Chokk zánaga bit. ³⁶ Elizábet ham ke tai syád ent, piránsariá pa mardénchokkéá ométwár ent. Hamá ke gwashtagatesh santh o bérand ent, nun shash máh ent ke lápi porr ent. ³⁷ Chiá ke pa Hodáyá, hech káré nabuteni naent.” ³⁸ Maryamá gwasht: “Man Hodáwanday móled án, hamé dhawlá ke taw gwashtag, anchosh bát.” Randá préshtag cha áiajan kerrá shot.

Maryam Elizábetay gendagá rawt

³⁹ Hamá róchán, Maryam eshtápiá sar gept o Yahudiahay kóhestáni hand o damagay shahréa shot. ⁴⁰ Ódá Zakaryáay

lógá shot o Elizábeti hál o hawál kort. ⁴¹ Anchosh ke Maryamay tawár Elizábetay góshán kapt, áiajan lápá, chokká serr bast o Elizábet cha Pákén Ruhá porr but. ⁴² Gón borzén tawaré gwashti: “Taw, janénáni nyámá bahtáwar ay! Bahtáwar ent hamá chokk ke tai lápá ent. ⁴³ Man kay án ke mani Hodáwanday mát mani gendagá byayt? ⁴⁴ Wahdé tai tayárjórhiay tawár mani góshán kapt, chokk cha galá lápá tahá sore. ⁴⁵ Bahtáwar ay taw ke báwaret kortag, chiá ke Hodáwanday hamá habar ke gón taw gwashtag butagant, sarjama bant.”

Pa Hodáyá Maryamay saná o satá

⁴⁶ Maryamá, áiajan passawá gwasht: “Mani sáh o ján, Hodáwandá satá o saná kant. ⁴⁷ Mani ruh gal o bál ent, ke Hodá mani rakkénók[‡] ent. ⁴⁸ Chiá ke wati móleday nezórii cháretag. Cha ed o rand, sajjahén nasl o padréch maná bahtáwara zánant. ⁴⁹ Chiá ke á Páknámén Zóraká pa man mazanén kár kortag. ⁵⁰ Áiajan mehr o rahmat, hamá sajjahénáni posht dar poshtá mánit ke áiajan torsesh delá hastent. ⁵¹ Áiajan gón wati zórakén báská, mazanén kár o kerd pésh dáshtag o hamá ke wati delá bázén pahresh[§] bastag, áiajan sheng o sháng kortagant. ⁵² Áiajan, hokmrán cha wati tahtán sarshakun o garib, borz o sarperáz kortagant. ⁵³ Shodig, gón washshén chizzán sérláp o séréni dast hórke o hálig rahádag kortagant. ⁵⁴ Á wati mehr o rahmatáni yát o tránagá kaptag o pa wati hezmatkárén Bani Esráili kawmá mehrabán butag. ⁵⁵ bezán pa Ebráhém o áiajan chokk o óbádagán abadi mehri bakshetag, hamá paymá ke gón may pet o pirokán labzi kortagant.” ⁵⁶ Maryam, say máhay kesásá Elizábetay lógá mant o randá per tarret o wati lógá shot.

Yahyáay pédáesh

⁵⁷ Wahdé Elizábetay máh o róch sarjam butant, áiajan mardénchokké but. ⁵⁸ Áiajan chellagay hál ke syád o hamsáhegán sar but o eshkotesch Hodáwandá áiajan sará mazanén mehr o rahmaté kortag, gorhá gón áiajan washshá hór o sharikdár butant.

[‡] 1:47 1:47 Rakkénók, bezán neját dayók. [§] 1:51 1:51 Pahr, bezán takabbor, gorur.

⁵⁹ Wahdé nonnoká hasht róch but, pa áiy sonnat kanagá átkant. Áyan nonnokay nám petay námay sará, Zakaryá per bandagi at. ⁶⁰ Bale nonnokay mátá gwasht: "Na, áiy nám býad ent Yahyá bebit." ⁶¹ Mardomán gwasht: "Tai kothom o hándáná, é námén mardom kass nabutag." ⁶² Gorhá áyan chokkay pet, Zakaryá pa eshárah jost kort ke á wati chokká chónén námé pera bandit? ⁶³ Zakaryáyá nebisagi dártahtagé lóthet o áiy sará nebeshti: "Chokkay nám Yahyá ent." Gorhá sajjahén mardom hayrán butant. ⁶⁴ Hamá damáná Zakaryáyá gongén zobán pach but o habará lagget o Hodáay satá o sanái bongéj kort. ⁶⁵ Cha é habará, hamsáhegán tors delá kapt o Yahudiahay damagay kóhestagáni sajjahén mardomán é bárawá habara kort. ⁶⁶ Harkasá ke é hál eshkot wati del o hayálá chosh gwashti: "Bárén, é chokk chónén mardomé bit?" Chiá ke Hodáwanday dast gón áiá gón at.

Issáy pédáeshay bárawá Zakaryáyá peshgói

⁶⁷ Gorhá, Yahyáyá pet Zakaryá, cha Pákén Ruhá porr but o peshgói kort o gwashti:

⁶⁸ "Hodáwand, Esráilay Hodáyá satá o saná bát,

chiá ke pa wati kawmay madat kanagá átkag o kawmi rakkéntag.*

⁶⁹ Áiá cha wati hezmatkárén Dáuday lóg o bonjáhá,

kánthé† pa may rakkénagá jórhéntag,

⁷⁰ anchosh ke áiá bázén wahdéá pésar, cha wati pákén nabíáni zobáná kawl dátag.

⁷¹ Áiá, cha may sajjahén dozhmen o badwáhán ke cha má naprata kanant,

márá rakkéntag,

⁷² may pet o pirokáni sará mehr o rahmati kortag o

wati pákén hamá ahd o karáray yát o tránagi dáshtag.

⁷³ Gón may pet Ebráhémá sawgendi ham kortagat,

⁷⁴ ke márá cha dozhmenáni dastá be-rakkénit,

tánke bé tors o bimmá pa áiá hezmat bekanén o

⁷⁵ áiy chamu o nezará wati sarjamén zendá

nék o pák bebén.

⁷⁶ Taw, oo mani chokk!

Borzén arshay Hodáay nabi zánaga bay,
chiá ke taw cha Hodáwanday áyagá pésar,
áiy ráh o keshká tachk o tayára kanay.

⁷⁷ Taw áiy kawmá é zántá dayay ke gón áyani gonáháni pahelliá, Hodá áyána rakkénit.

⁷⁸ Chiá ke may Hodá mehrabán ent o cha áiy békesásén‡ rahmatán róch cha borzén arshá,
may zendmáná sara kasshit,

⁷⁹ tán pa áyan ke tahárokí o markay sáhegá neshtagant,
rozhnáí bebakshit o márá dém pa sohl o ásudagiay ráhá rahshóni bekant."

⁸⁰ Á chokk, rodán o mán Pákén Ruhá zórmand bayán at. Cha Bani Esráiláni nyámá záher bayagá pésar, gyábánána mant.

2

Issá Masihay pédáesh

¹ Hamá róchán, Rumay bádsháh Kaysar Águstusá jár jat o hokm kort ke Rumay sarjamén molk* mardomshomári kanag bebit. ² É awali mardomshomári at o á wahdá, Kwirinius Suriahay wáli at. ³ Harkas pa wati námay nebeshtah kanáénagá, wati pet o piroki shahrá shot.

⁴ Issop ham cha Jalilay shahr Náserahá dar kapt o Yahudiahay shahr Bayt-Lahemá shot. Bayt-Lahem, hamá shahr ent ke bázén wahdé pésar ódá Dáud bádsháh pédá butagat. Issop, béhá cha Dáuday padréchá at, paméshká pa wati námay nebeshtah kanáénagá ódá shot. ⁵ Issopá, wati deshtár, Maryam ham gón at ke á, pa chokkéá oméwár at.†

⁶ Hamé wahdá ke á Bayt-Lahemá atant, Maryamay chellag bayagay máh o róch sarjam butant o ⁷ mardenchokkéay sará chellag but ke áiy awali chokk at. Maryamá wati nonnok godéá péték o káhdánéay tahá wápént, chiá ke pa áyan mehmánjáhá jágah néstat.

Pa shopánkán préshtagáni mestág

⁸ Hamá hand o damagá, lahtén shopánk hastat ke shapá gyábáná wati ramagesh negahpánia kort. ⁹ Á shapá, anágat Hodáwanday préshtagé áyani démá átk o chárén némagán Hodáwanday mazaniay shahm o rozhnáí draphán but. Cha eshiá, áyan sakk torset. ¹⁰ Bale préshtagá

* 1:68 1:68 Rakkénag, bezán neját dayag, bacchéneg.

† 1:69 1:69 Kánthay máná edá zór o kodrat ent. ‡ 1:78

1:78 Békesás, bezán sakk báz, béandázah, béhesáb.

* 2:1 2:1 Asligén Yunáni nebeshtánka gwashtit: "sajjahén

jahán". † 2:5 2:5 Hamá dhawlá ke peshi bahrá gwashag butag, Maryamay oméwáriay é chokk Hodá bakshetagen chokké at.

gwasht: "Matorsét, maná mestágé gón ent ke pa shomá bázén wasshié kárit o pa sajjahén kawmá wasshén mestágé. ¹¹ Á esh ent ke Dáuday shahr Bayt-Lahemá maróchi pa shomá rakkénóké pédá butag ke á, Hodáwandén Masih[‡] ent. ¹² Eshiyá pajjááh áragay nesháni esh ent ke shomá kahdánéay tahá, mán godéá pétkagén nonnoké gendét."

¹³ Anágat, cha ásmáni préshtagáni lashkará rombé á préshtagay Kerrá átk o Hodáesh sepat o saná kort:

¹⁴ "Shán o shawkat borzén arshay Hodáyá bát o zeminay sará sohl o ásudagi pa hamá mardomán bát ke Hodá cha áyán wassh o washnód ent."

¹⁵ Wahdé préshtag per tarret o ásmáná shotant, shopánkán wadmánwatá shawr kort o gwashtesh: "Byáét Bayt-Lahemá berawén o hamé sargwast ke ódá butag o Hodáwandá mará hál dátag, wat begendén." ¹⁶ Gorhá á, pa eshtápi sar gept o hamódá shotant, Issop o Maryamesh dar gétkant o nonnokesh kahdánay tahá dist. ¹⁷ Nonnokay gendagá rand, shopánkán é chokkay bárawá harché ke cha préshtagán eshкотagat, mardom sahig kortant. ¹⁸ Á mardomán ke shopánkáni habar eshкот, hayrán o habakkah mantant. ¹⁹ Bale Maryamá é sajjahén habar, wati delá dáshtant o esháni sará báz pegr o hayáli kort. ²⁰ Shopánkán, harché ke eshкотag o distagat, pa áyán Hodáyá sepat o saná kanán per tarretant, chiá ke é sajjahén hamá dhawlá atant ke gón áyán gwashag butagat.

Mazanén parasteshgáhá Issáay árag

²¹ Hashtomi róchá, wahdé nonnokay sonnat kanagay wahd átk, áiy námesh Issá per bast, hamá nám ke mátay lápá kapagá pésar, préshtagá per kortagat.

²² Wahdé mát o chokkay chellagshódíay wahd halás but, Mussáay Sharyatay randgiriá, Issop o Maryamá Issá Urshalimaymanén parasteshgáhá áwort tánke áiá Hodáwanday sepordah bekanant, ²³ anchosh ke Hodáwanday Sharyata gwashtit: *Awali har mardénchokk báyad ent pa Hodáwandá nadrigé hesáb kanag bebit.* ²⁴ Pa korbánig kanagá ham átkant, tán hamá dhawlá ke Hodáwanday Sharyata gwashtit, "jopté shántol* yá do kasánén kapót" hayrát bekanant.

²⁵ Hamá wahdá Urshalimay shahrá, Shamun námén mardé hastat ke pahrézkár o Hodádósté at o Bani Esráiliáni rakkénókay rahchár at o Hodáay Pákén Ruh, gón áiá gón at. ²⁶ Pákén Ruhá mestág dátagat, tán wahdé ke Hodáwanday Masihá magendit, á namerit. ²⁷ Cha Pákén Ruhay elhám o shobénagá, mazanén parasteshgáhay péshjááh[†] átkagat. Nun wahdé Issáay pet o mátá Sharyatay ráh o rahbandáni sarjam kanagá Issá Pákén Lógá áwortagat, ²⁸ Shamuná Issá zort, dastáni delá dásht, Hodá saná o satá kort o gwashti:

²⁹ "Oo zórakén Hodáwand! Nun maná, wati é hezmatkárá, anchosh ke taw wat labz dátag,

cha é jaháná pa wasshi o salámati chest kan o wati gwará bebar,

³⁰ chiá ke man gón wati chammán cha tai némagá

é neját o rakkénag distag

³¹ ke taw sajjahén kawmáni démá paddar kort.

³² Á pa dega kawmán Hodáay bárawá sarpad kanókén rozhné bit o pa tai Bani Esráili kawmá pahr o sháné."

³³ Wahdé Issáay pet o mátá áiy bárawá Shamunay é habar eshкотant, hayrán butant. ³⁴ Shamuná pa áyán nékén dwá kort o gón chokkay mát, Maryamá gwashti: "Hodáyá é chokk, pa bázén Bani Esráiliáni rakkénag o bázénéay gár o bégwáh kanagá ráh dátag. É chokk neshánié bit, bale bázéné áiá namannit. ³⁵ Hamé paymá á, bázénéay deláni rázán páshka kant. Oo Maryam! Taw wati zendá mazanén gam o andóhé genday ke á gam, zahmay dhawlá tai delá kappa kant."

³⁶ Hamódá, Asheray kabilahay yak janéné hastat ke nabíé at. Áiy nám Hanná at o áiy Petary nám Panuil at. Omri mazan at. Sur kanagá rand, hapt sáli gón wati lógwájahá gwázéntagat, ³⁷ bale randá janózám but. Nun áiy omr hashtád o chár sál at o áiá cha mazanén parasteshgáhá dhann, pád éra nakort. Shap o róch, Hodáyá saná o satá kanán, wati wahd pa dwá o róchaga gwázént. ³⁸ Á ham, hamá sáhatá áyáni Kerrá átk, Hodáay shogri gept o gón hamá sajjahén mardomán ke Urshalimay rakkénogay rahchár atant, gwashti: "É chokk hamá rakkénók ent."

³⁹ Wahdé Issáay pet o mátá Hodáwanday Sharyatay sajjahén ráh o rahband purah kortant, gorhá per tarret o Jalilá, wati shahr Náserahá átkant.

[‡] 2:11 2:11 Masih, bezán Hodáay hamá gechén kortagén bádsháh. [§] 2:23 2:23 Dargwaz, bahr 13, band 2, 12.

* 2:24 2:24 Shántol, bezán shátóren morg. [†] 2:27 2:27 Péshjááh, bezán péshgáh, lógay chárdiwál, sahn.

40 Á chokk, rodán o zórmand bayán at. Cha zánt o zánagá sarréach at o Hodáay rahmati gón at.

Kasánén Issá mazanén parasteshgáhá

41 Issáay pet o mát, Issop o Maryam, har sál Sargwazay aidá, Urshalimá shotant. 42 Wahdé Issáyá dwázdah sál but, wati hél o ádatay padá, aidá Urshalimá shotant. 43 Aiday róch ke halás butant, per tarragay wahdá, kasánén Issáay mát o pet sahig naatant o á Urshalimá mant. 44 Awali róchá, áyán wati delá pegr kort balkén gón kárwaná gón ent, paméshká yak róchéay menzelá demá shotant. Randá, áiy shóházá dar kaptant o cha wati syád o pajjárókán áiy jostesh gept. 45 Bale Issáay nagendagá per tarret o pa áiy shóházá, Urshalimá shotant.

46 Saymi róchá, áyán Issá mazanén parasteshgáhay péshjáhá dar gétk ke ódá á, Sharyatay zánógeráni[§] nyámá neshtagat, áyáni habarán gósh dáragá at o cha áyán jost o pors kanagá at. 47 Sajjahén eshkonók cha áiy hóshmandi o passawán hayrán atant. 48 Wahdé Issop o Maryamá á dist, hayrán butant. Mátá gón áiy gwasht: “Oo mani chokk! Taw chia gón má chosh kort? Man o tai pet gón parésháni tai shóházá butagé.” 49 Issáyá passaw dát: “Shomá chia mani shóházá butagét? Záná, nazántagó ke man báyad ent wati Petay lógá bebán?”* 50 Bale á Issáay é habarán sarpad nabutant.

51 Issá gón áyán padá Náserahá shot o áyáni sajjahén habari gept o mannetant. Áiy mátá é sajjahén habar, wati delá dáshtant. 52 Issá rodán o cha zánt o zánagá sarréach bayán at o Hodá o mardomán róch pa róch dóstera but.

3

Pákshódókén Yahyáay kolaw

(Mattá 3:1-12; Markás 1:1-8; Yuhanná 1:19-28)

1 Rumay bádsháh, Tiberius Kaysaray bádsháhiay pánzdahomi sál at. Hamá róchán, Pontius Pilátus, Yahudiayah wáli at. Hirudis, Jalilay hákem at. Hirudisay brát Piliapos, Eturiah o Tráhunitisay hákem at o Lisániás, Ábiliniay hákem at. 2 Hanná o Kiápá, á wahday masterén dini péshwá atant. Hamá róchán, Hodáay kolaw gyábáná Zakaryáay bacch,

‡ 2:41 2:41 É aidá Sargwazay aid paméshká gwashant ke, cha Mesriáni chérdastiá Yahudiáni ázátiay wahdá, markay préshtag cha Yahudi chokkáni koshagá sar gwast. § 2:46 2:46 Sharyatay zánóger, bezán dini álem o Mussáay Sharyatay zántkár. * 2:49 2:49 Yá: wati Petay káráni randá bebán. * 3:3 3:3 Pashómán bayag, bezán tawbah kanag. † 3:4 3:4 Gwánk, bezán borzén tawár. ‡ 3:5 3:5 Darag, bezán wádi, gwatr. § 3:6 3:6 Eshayá Nabiyay Ketáb 40:3-5; 52:10. * 3:7 3:7 Dháh, bezán hóshdár, wárning. † 3:9 3:9 Hamé paymá Hodá mardománi sellén káráni sezá o padmozzay dayagá tayár ent. ‡ 3:12 3:12 Song, bezán máliát, thayks.

Yahyáay sará átk. 3 Yahyá, Ordonay kawray doén pahnátán har jágaha shot o Hodáay kolawi pa mardomána rasént o gwashti: “Cha wati gonáhán pashómán bebét* o pákshódi bekanét ke bakshaga bét.” 4 Anchosh ke é bárawá Eshayá Nabiyay Ketábá nebeshtah ent:

Gyábáná, kasé gwánka[†]jant:

“Hodáwanday ráhá tayár o áiy keshká rást o tachk bekanét.

5 Sajjahén kandh o darag[‡]porr kanaga bant

o sajjahén kóh o jomp jahl áraga bant.

Chapp o chóthén ráh tachk kanaga bant o

sajjahén sarkap o érkap hamdap o hamlasun kanaga bant.

6 Jahánay sajjahén mardom cha Hodáay némagá

rakkénag o rastgária gendant.”[§]

7 Wahdé mardom pa pákshódi kanagá átk o mocch butant, Yahyáay gón áyán gwasht: “Oo syahmárzadagán! Kayá shomará dháh* dátog o gwashtag ke cha Hodáay áyókén kahr o gazabá rakketa kanét?! 8 Anchén kár bekanét cha áyán paddar bebit ke shomá pa del cha wati gonáhán pashómán butagét. Wati delá pahr mabandét ke ‘má Ebráhémay nasl o óbádag én.’ Man shomará gwashán ke Hodá cha é seng o dhókán ham, pa Ebráhémá chokk o óbádag pédá korta kant. 9 Nun tapar tayár ent drachkán cha boná begoddhít o har drachké ke sharrén bara nayárit, goddhag o ásá dawr dayaga bit.”† 10 Mardomán jost kort: “Gorhá má ché bekanén?” 11 Áiy passaw dát: “Agan kaséa do jámag hast, yakkéa hamá kasá bedant ke áiy hecch nést o agan kaséay Kerrá ward o warák hast, áyán ham bahr bekant.”

12 Songi[‡] o máliátgir ham pa pákshódiá Yahyáay Kerrá átkant. Jostesh kort: “Oo ostád! Má ché bekanén?” 13 Gorhá áiy gwasht: “Cha gísshéntagén kesásá géshter magerét.” 14 Sepáhigán ham cha áiy jost gept: “Má ché bekanén?” Passawí dát: “Pa zór cha kaséa zarr magerét o kaséay sará drógén tohmat majanét. Wati mozzay sará gozarán bekanét.”

15 Mardom, Hodáay wádah dátogén rakkénókay entezár o wadará atant, paméshká hayálesha kort ke balkén Yahyá hamá Masih ent? 16 Bale Yahyáay

á sajjahén passaw dátant o gwashti: “Man shomárá tahná gón ápá pákshódia dayán, bale yak anchén kasé áyagi ent ke á cha man zóráakter ent o man áiay kawshbandáni bójagay láhech ham naán. Á shomárá gón Hodáay Pákén Ruh o ásá pákshódia dant. ¹⁷ Áiá cha buch o pogán dánay jetá kanag o gissshénagá, hanshóné§ dastá ent. Jóháná* pák o sallahá kant o dánán ambará éra kant, bale pog o palárán anchosha sóchit ke áshesh hechbara namerit.” ¹⁸ Yahyáyá, mardom dega bázén sar o sój o delbaddhi† ham dátant o wasshén mestág, dayán kort.

¹⁹ Bale wahdé Yahyáyá, Jalilay hákem Hirudis pa é háterá sakk mayárig kort ke áiá gón wati brátay jan Hirudiáyá, náráhen nazziki hastat o dega bázén radén kári ham kortagat,‡ ²⁰ Hirudisá wati gandahén kár gésh kort o Yahyái gept o bandig kanáént.

Issáy pákshódia

(Mattá 3:13–17; Markás 1:9–11)

²¹ Wahdé Yahyá bázén mardomán pákshódia dayagá at, áiá Issá ham pákshódia dát. Wahdé Issá dwá kanagá at, hamá wahdá ásmánay dap pach but o ²² Pákén Ruh, kapótéay dróshomá§ áiay sará ér nesht o cha ásmána tawaré átk ke “taw mani dóstén Bacch ay, man cha taw báz wassh o razá án.”

Issáy béh o bonyád

(Mattá 1:1–17)

²³ Issáyá kamm o gésh si sál at ke wati kári bongéj kort. Mardománi hayál at ke Issá Issopay chokk ent. Issop Háliay chokk ent o cha Háliá rand: ²⁴ Mattát, Mattáte Láwi, Láwie Malki, Malkie Yanná, Yannáe Issop, ²⁵ Issope Mattátia, Mattátiaé Ámus, Ámuse Náhum, Náhume Hasli, Haslie Najjáy, ²⁶ Najjáye Mahat, Mahate Mattátia, Mattátiaé Shemi, Shemie Issop, Issope Yahudá, ²⁷ Yahudáe Yuhanán, Yuhanáne Risá, Risáe Zerubábel, Zerubábele Shiáltiál, Shiáltiaé Niri, ²⁸ Nirie Malki, Malkie Addi, Addie Kusám, Kusáme Elmudám, Elmudáme Ér, ²⁹ Ére Yushah, Yushahe Elyázar, Elyázare Yurim, Yurime Mattát, Mattáte Láwi, ³⁰ Láwie Shamun, Shamune Yahudá, Yahudáe Issop, Issope Yunán, Yunáne Elyákim, ³¹ Elyákime Maliá, Maliáe Minán, Mináne Mattátá,

Mattátáe Nátán, Nátáne Dáud, ³² Dáude Yassi, Yassie Óbayd, Óbayde Buáz, Buáze Salmun, Salmune Nahshun, ³³ Nahshune Aminádáb, Aminádábe Aram, Arame Hesrun, Hesrune Páres, Párese Yahudá, ³⁴ Yahudáe Ákub, Ákubé Eshák, Esháke Ebráhém, Ebráhéme Tárah, Tárahe Náhur, ³⁵ Náhure Soruj, Soruje Rau, Raue Pálaj, Pálaje Ábér, Ábére Shálah, ³⁶ Shálahe Kaynán, Kaynáne Arpakshád, Arpaksháde Sám, Sáme Nuh, Nuhe Lámak, ³⁷ Lámake Matushálah, Matushálahe Hannuh, Hannuhe Yáred, Yárede Mahalálil, Mahalálile Kaynán, ³⁸ Kaynáne Anush, Anushe Shays, Shayse Ádam, o Ádam cha Hodáay némagá ent.

4

Shaytán Issáyá chakkásit

(Mattá 4:1–11; Markás 1:12–13)

¹ Issá, Hodáay Pákén Ruhá sarréch, cha Ordonay kawrá per tarret o Pákén Ruh, gyábáná áiay rahshón at. ² Ódá Shaytáná Issá tán chel róchá chakkásit.* Á róchán áiá hech waráké nawárt. Wahdé á róch halás butant shodig but. ³ Shaytáná gwasht: “Agan taw Hodáay Chokk ay, gorhá é sengá begwash nagané bebit.” ⁴ Issáyá passaw dát: “Pákén Ketábá nebisag butag ke mardom tahná pa nán zendaga nabit.”†

⁵ Gorhá Shaytáná á, yak borzén jágahéá bort o pa yak damané donyáay sajjahén bádsháhi pésh dáshtant o ⁶ gwashti: “Man esháni sajjahén was o wák o shawkatá tará dayán, chiá ke é mani dastá kaptagant o man harkasá belóthán, dayánesh. ⁷ Paméshká, agan taw maná parastesh bekanay, é sajjahén taiga bant.” ⁸ Issáyá passaw dát: “Pákén Ketábá nebisag butag: wati Hodáwándén Hodáyá parastesh bekan o tahná hamáiy hezmatá bekan.”‡

⁹ Randá, Shaytáná Issá Urshalimá bort, mazanén parasteshgáhay diwálay borzterén jágahá óshtrént o gwashti: “Agan taw Hodáay Chokk ay gorhá watá cha edá jahlád dawr beday. ¹⁰ Chiá ke Pákén Ketábá nebisag butag:

Hodá pa tai negahpániá wati préshtagán hokma kant§ o

*† á, tará wati dastáni delá dárant tán tai pád dhókéá malaggit.”**

§ 3:17 3:17 Hanshón, bezán dáré ke pa dán o pogáni jetá kanagá kármaza bit. * 3:17 3:17 Jóhán, bezán kesháráni mocch kanagay jágah. † 3:18 3:18 Delbaddhi, bezán tasallá, ométwári. ‡ 3:19 3:19 Sharyatá jáez naent ke kasé gón wati zendagén brátay janá sáng o sur bekant (bechár Láwián 18:16). § 3:22 3:22 Dróshom, bezán shekl. * 4:2 4:2 Chakkásag, bezán ázmáesh kanag, emtehán gerag. † 4:4 4:4 Sharyatay Domi Rahband 8:3. ‡ 4:8 4:8 Sharyatay Domi Rahband 6:13. § 4:10 4:10 Zabur 91:11. * 4:11 4:11 Zabur 91:12. † 4:12 4:12 Sharyatay Domi Rahband 6:16.

¹² Issáyá passaw dát: “Pákén Ketáb chosh ham gwashit: *Wati Hodáwandén Hodáyá machakkás o ázmáesh makan.*”[†]

¹³ Shaytáná, wahdé wati sajjahén chakkás halás kortant, Issái pa dega sharterén wahd o móhéá esht o shot.

Cha Náserahá Issáy dar kanag

¹⁴ Gorhá Issá gón Pákén Ruhay zór o wáká Jalilá per tarret o áiy nám o tawár á sajjahén damagá sar but. ¹⁵ Issáyá áyáni kanisaháni[‡] tahá tálíma dát o sajjahén mardomán á satá kort o sárhát. §

¹⁶ Gorhá, Náserahá shot, hamódá ke rostag o mazan butagat. Shabbatay róchá,* wati hél o ádatay sará kanisahá átk. Ódá pa wánagá óshtát. ¹⁷ Eshayá Nabiay Ketábesh áiy dastá dát. Anchosh ke áiy pach kort, chammi pa hamá bahrá kapt ke gwashit:

¹⁸ “*Hodáwanday Ruh mani sará ent, áiy maná dast per moshtag[†]*

tánke wár o nézgáran wasshén mestágé berasénán,

maná démi dátag ke bandig o asirán ázátiay basháratá bedayán o

pa kórán bináiy mestágá berasénán, zolm dístagénán berakkénán o

¹⁹ *Hodáwanday mehr o rahmatay sálay basháratá bedayán.*”[‡]

²⁰ Gorhá, Issáyá ketáb pétk, kanisahay hezmatkáray dastá dát o nesht. Parasteshgáhay sajjahén mardom áiy némagá chárágá atant. ²¹ Issáyá gón áyán gwasht: “Maróchi gón shomay gósh dárágá, Pákén Ketábay é nebeshtahay rásti pakká o sarjam but.” ²² Harkasá pa áiy sharrén gwáhié dát o cha áiy pormehrén habarán, sajjahén mardom hayrán o habakkah mantant. Gwashtesh: “Báren, é hamá Issopay chokk naent.”

²³ Issáyá gón áyán gwasht: “Man deljam án shomá é batalá pa mana kárét ke ‘agan taw dáktaré ay gorhá pésará watá dráh bekan. Hamá mójezah ke má eshkotag taw Kaparnáhumá kortagant, áyán edá wati shahr o hankená ham pésh bedár.’”

²⁴ Géshi kort: “Shomárá rásténa gwashán, hech nabíéá wati shahr o hankená sharap nést. ²⁵ Deljam bebét ke Elyás nabíay zamánagá, wahdé tán say o ném sálá ásmánay dap band but o sajjahén molká mazanén dhokkálé§ kapt, Esráilá bázén

janózámé hastat. ²⁶ Bale Elyás pa komaká cha áyán yakkéay kerrá ham ráh dayag nabut, tahná Saydunay shahr Sarapahá, pa yak janózáméay komaká rawán dayag but. ²⁷ Hamé paymá, Elishá nabíay zamánagá, Esráilá bázéné syahgarray* nádráhiá geptagat, bale yakké ham dráh nabut. Tahná Nómán námén mardé rakket ke á Suriahay molká nendók at.”

²⁸ Cha é habaráni eshkonagá, kanisahay neshtagén mardom zahr geptant. ²⁹ Pád átkant o Issáesh télánk dayán cha shahrá dar kort o hamá kóhay kashagá bort ke shahr á kóhay sará addh butagat, tánke jahlád dawri bedayant. ³⁰ Bale Issá cha mardománi nyámá dar átk, wati ráhi gept o shot.

Yak mardéay jennay dar kanag
(*Markás 1:21–28*)

³¹ Randá, Issá Kaparnáhumá shot, ke Jalilay damagay shahré. Shabbatay róchá, parasteshgáhay tahá mardomi tálím dátant. ³² Issáyá tálímáni gósh dárók cha áiy habaráni eshkonagá hayrán atant, chiá ke áiy gón wák o ehtiár, gapp o trána kort.

³³ Kanisahay tahá yak mardéa ke áiy jenné per at, kukkár kananá gwasht: ³⁴ “Oo Issá Náseri! Tará gón má che kár ent? Átkagay ke mára gár o tabáh bekanay? Mana zánán taw kay ay, taw Hodáay gechén kortagén hamá Pákén ay.” ³⁵ Issáyá jenn hakkal dát o gwashti: “Wati dapá bedár o é mardá yalah day!” Jenná mardománi démá á mard zeminá dawr dát o anchosh dar átk ke á mardá hech noksané naraset.

³⁶ Cha é kára sajjahén mardom hayrán butant o wadmánwatá gwashtesh: “É chónén habaré?! Gón wák o ehtiáré jennán hokma dant o á ham mardomán yalaha kanant.” ³⁷ Nun, kerr o gwaray sajjahén halk o hankénán, Issáy nám o tawár prosht o sheng but.

Drahbakshi[†] o Hodáay kolaw
(*Mattá 8:14–17; Markás 1:29–39*)

³⁸ Issá cha kanisahá dar kapt o Shamunay lógá shot. Shamunay wassig, trondén tapéa geptagat. Shamunay lógay mardomán, pa áiy dráh kanagá gón Issáyá dazbandí kort. ³⁹ Issá shot, áiy kashá óshtát o tapi hakkal dát. Hamá damaná

‡ **4:15** 4:15 Kanisah, bezán Yahudiáni parasteshgáh. § **4:15** 4:15 Sárháyag, bezán satá kanag. * **4:16** 4:16 Shabbatay róch hamá Shambéh ent, bezán Yahudiáni kár nakanagay róch. † **4:18** 4:18 Asligén Yunáni nebeshtánka gwashit: “rógen per moshtag”. Yahudián wati har bádsháh cha bádsháh bayagá pésar rógen per moshtag. “Masihay” labzay maná “rógen per moshtagén” ent. ‡ **4:19** 4:19 Eshayá Nabiay Ketáb 61:1–2, Láwíán 25:10. § **4:25** 4:25 Dhokkál, bezán kaht, hoshksáli. * **4:27** 4:27 Asligén Yunáni zobánay labz, pa syahgarr o bag, bezán jozám o pa dega tahr tahrén garrán ham kár bandaga bit. † **4:37** 4:37 Drahbakshi, bezán dráhi o salámatíay bakshag, Arabi o Pársiá “shafá”.

tapi sest o pa áyani hezmat kanagá pád átk.

⁴⁰ Rónendá, † mardomán har dhawlén nádráh Issáay kerrá áwortant o áia nádráháni sará dast per mosht o dráh kortant. ⁴¹ Jenn, cha bázén mardomán dar átkant o kukkár kanán gwashtesh: “Taw Hodáay Chokk ay,” chiá ke áyan zántagat, á Hodáay hamá gechén kortagén Masih ent. Bale Issáyá hakkal dayán bétawár kortant.

⁴² Wahdé róch but, Issá yak gestá§ o panáhén jágahéá shot. Mardom áiy shóházá atant. Wahdé áyan Issá dist, gwashtesh: “Gón má bejall* o mára yalah maday.” ⁴³ Issáyá gwasht: “Maná Hodáay bádsháiyamestág, á dega shahrán ham rasénagi ent, chiá ke Hodáyá maná pa hamé kárá ráh dátag.” ⁴⁴ Gorhá Yahudiahay sajjahén kanisahán, wasshén mestági jár jat.

5

Issáay awali morid

(Mattá 4:18-22; Markás 1:16-20)

¹ Yak randé Issá Genisáretay mazangwarmay* lambá† óshtátagat o mardom Hodáay habaráni gósh dáragá, yakdomiá télánch dayán, áiy chapp o chágerdá moch atant. ² Áia, gwarmay kerrá do bójig‡ dist. Máhigir cha bójigán ér kaptagatant o wati dám o máhórán shódagá atant. ³ Issá cha hamá bójigán yakkéá ke Shamunay at, swár but. Cha Shamuná lótheti bójigá cha tayábá§ kammé dur bebárt. Randá nesht o cha hamódá mardománi tálim dayagá lagget.

⁴ Wahdé habari halás butant, gón Shamuná gwashti: “Bójigá gwarmay johlánkián bebar o wati dámán pa máhigay shekárá ápá dawr bedayét.” ⁵ Shamuná gwasht: “Wájah! Dóshi má sajjahén shap delsyáhi kasshetag o mára hech máhig dastá nakaptag, bale nun ke taw gwashay, man dámán ápá dawra dayán.” ⁶ Áyan dám ápá dawr dátant o haminchok máhigesh gept ke dám deragi butant. ⁷ Paméshká, domi bójigay neshtagén hamkáresh, gón eshárah pa komaká tawár kortant. Á átkant o doén bójig cha máhigá haminkadar porr butant ke ápá boddhagi atant.

⁸ Wahdé Shamun Petrosá é kár dist, cha torsá Issáay pádán kapt o gwashti: “Oo Hodáwand! Maná yalah day o beraw, chiá ke man gonahkaré án.” ⁹ Cha bázén máhigáni shekárá, Shamun Petros o áiy sajjahén hamkár hayrán atant. ¹⁰ Hamé dhawlá, Zebdiay doén chokk, Ákub o Yuhanná ke Shamunay sharikdár atant, ham hayrán butant. Issáyá gón Shamuná gwasht: “Mators! Tán é wahdá taw máhig shekár kortag, cha ed o rand mardománi delán shekára kanay.”* ¹¹ Padá áyan wati bójig o dám tayábá áwortant o wati sajjahén kár o bár yalah dátant o Issáay hamráh butant.

Garriéay drabhakshi†

(Mattá 8:2-4; Markás 1:40-45)

¹² Dega róché, Issá yak shahréá at. Ódá mardé sará tán pádá syahgarray nádráhiá geptagat. Wahdé Issái dist, átk o dém pa chér kapt, dazbandii kort: “Oo wájah! Agan taw belóthay maná wassh o palgár korta kanay.”‡ ¹³ Issáyá wati dast shahárt, dasti per mosht o gwashti: “Mana lóthán. Dráh o pák bebay!” Hamá damáná, syahgarrá mard yalah dát. ¹⁴ Issáyá á hokm dát o kaddhan§ kort: “É habará gón hechkasá magwash, bale beraw, watá dini péshwáyá pésh bedár o pa wati pák o palgáriá, hamá korbánig ke Mussáay Sharyatá nebisag butag, hayráti bekan tánke pa áyan gwáh o sháhedíe bebit.” ¹⁵ Bale Issáay nám o tawár angat ham har jáh sheng o tálána but o bázén mardom pa áiy habaráni gósh dárag o wati nájórhiáni dráh kanáénagá átk o áiy kerrá moccha butant. ¹⁶ Issá géshter, cha mardomán dur, gestá o tahná, barr o gyábánán dwá kanagá at.

Lang o mondhén mardéay drabhakshi

(Mattá 9:2-8; Markás 2:1-12)

¹⁷ Yak róché, Issá dars o sabak dayagá at. Lahtén Parisi o Sharyatay ostád, ke cha Jalil o Yahudiahay sajjahén métagán o cha Urshalimá átkagat, hamódá nesh-tagatant. Pa nádráháni dráh kanagá, Hodáwanday zór o twán gón Issáyá gón at. ¹⁸ Hamá wahdá lahtén mardomá, tahtéay sará yak lang o mondhén mardé gón at o átkant. Áyan báz johd kort ke áia Issáay démá byárant, ¹⁹ bale cha mardománi bázén mocchiá, áyan lógay

‡ 4:40 4:40 Rónend, bezán hamá némag ke rócha nendit, magreb. § 4:42 4:42 Gestáh, bezán yak kerr, dur.

* 4:42 4:42 Jallag, bezán dárag, óshtag, mánag. * 5:1 5:1 Bezán Jalilay mazangwarm. Mazangwarm, bezán daryáchah. † 5:1 5:1 Lamb, bezán dámon, kerr. ‡ 5:2 5:2 Bójig, bezán lánch, yakdár, kashiti. § 5:3 5:3 Tayáb, bezán daryáay kerr, sáhel. * 5:10 5:10 Delay shekár kanagay maksad mardomán Hodáay ráhá árag ent. † 5:11 5:11 5:11 Drabhakshi, bezán dráhi o salámatiay bakshag, Arabi o Pársiá “shafá”. ‡ 5:12 5:12 Tawrátá garray nádráh palit o nápák zánag butagant. Agan kasé cha é nájórhiá dráh bebit býayad ent gón Mussáay Sharyatay randgiriá dini péshwáéay gwará berawt o hayráte bekan. § 5:14 5:14 Kaddhan, bezán mohrén tákid, hokm.

tóká átk nakort. Paméshká, nádráhesh zort, lógay sará sar kaptant o nádráhesh gón tahtá cha bánay sará jahlád, Issáay démá ér dát. ²⁰ Wahdé Issáyá áyáni é báwar dist, gwashti: “Oo mani dóst! Tai gonáh bakshag butant.” ²¹ Cha Issáay é habará, Parisi o Sharyatay é dega zánóger, ke ódá neshtagatant, pegr kanagá atant: “É kay ent ke kopra kant?! Abéd cha* Hodáay jendá, dega kass gonáhán pahell kort o baksheta nakant.” ²² Bale Issáyá áyáni delay hál o habar zántant o gwashti: “Shomá chiá wati delá choshén hayála káret?” ²³ Kojám habaray gwashag ásánter ent: “Tai gonáh bakshag butagant, yá: ‘Pád á, beraw?’” ²⁴ Bale tán shomá bezánét, maná ke Ensánay Chokk† án, é donyáyá gonáháni pahell kanagay wák o ehtiár hast...” padá gón á langá gwashti: “...tará gwashán, pád á, wati taht o gandalán bezur o lógá beraw.” ²⁵ Hamá damáná, mard sajjahénáni démá pád átk, wati taht o gandali baddhá kortant o Hodáay sepat o satá kanán lógá shot. ²⁶ Cha é káray gendagá, óday neshtagén mardom hayrán o habakkah butant, Hodáesh satá kort o sárhát o pa torsé gwashtesh: “Maróchi má chónén bah mánagén kár distag!”

Láwiay lóthag

(Mattá 9:9-13; Markás 2:13-17)

²⁷ Randá, Issá dhanná dar átk o Láwi námén yak songi o máliátgirén mardé disti, ke wati káray jágahá neshtagat. Issáyá gwasht: “Byá, mani randgiriá bekan.” ²⁸ Láwi pád átk o sajjahén chizzi yalah dátant o áiy hamráh but.

²⁹ Gorhá Láwiá wati lógá pa Issáay sharapá, pormarháhen mehmánié kort. É mehmániá, bázén máliátgir o lahtén dega mardom gón áyan gón at.† ³⁰ Parisi o áyáni Sharyatay zánógerán, gón Issáay moridán gelag kanáná gwasht: “Shomá chiá gón songi o gonahkárán yakkén wánay sará warét o nóshét?” ³¹ Issáyá gwasht: “Dráh o salámatén mardomán, dáktar pakár naent, nádráhán dáktar pakár ent. ³² Man pa pahrézkárán nayátkagán, gonahkáráni lóthag o gwánk janagá átkagán, ke á cha wati sellén kárán pashómán bebant.”

Róchagay bárawá

(Mattá 9:14-17; Markás 2:18-22)

³³ Lahténá, cha Issáyá jost kort: “Yahyáay morid géshter róchaga dárant o zegr o dwá kanant. Parisiáni morid ham

anchosha kanant, bale tai morid modáma warant o nóshant.” ³⁴ Issáyá gwasht: “Suray mehmán, tán wahdé ke sálónk gón áyan gón ent, pa róchagay dáragá hojj kanaga bant?” ³⁵ Bale wahdé kayt ke sálónk cha áyan jetá kanaga bit, gorhá á róchaga bant.”

³⁶ Issáyá é mesál ham dát: “Hechkas cha nókén pashkéá chondhé naborrit o kwahnén pashká pacch o pinaga najant o agan chosh bekant nókén pashká der-rit. Kwahnén pashk ham gón nókén pacchá dhawldára nabit. ³⁷ Hamé dhawlá, hechkas nókén sharábá kwahnén zekkáń mána nakant, chiá ke nókén sharáb, zekká trákénit. Sharába rechant o zekk ham zawála bit. ³⁸ Nókén sharáb, báyard ent nókén zekká mán réchag bebit. ³⁹ Kasé ke kwahnén sharábay waragá héldár ent, nókén sharába nawárt. Pa áiy delá kwahnén sharáb támdárter ent.”

6

Shabbatay róchay ehtiár

(Mattá 12:1-8; Markás 12:23-28)

¹ Yak baré Shabbatay róchá, Issá cha gandomi kesharán gwazagá at. Áiy morid gandomi hóshagán sendag o gón wati dastán moshag o waragá atant. ² Gorhá cha Parisián lahténá gwasht: “Chiá anchén kára kané ke Shabbatay róchá rawá naent?” ³ Issáyá passaw dát: “Zána, shomá nawántag, wahdé Dáud o áiy hamráh shodig butant, gorhá Dáudá ché kort?” ⁴ Á, Hodáay Pákén Lógá shot, Hodáay námá hamá hayráti o pákwandhén náni zort, wártant o wati hamráháná ham pa waragá dáti, ke áyáni warag tahná pa dini péshwayán rawá at.” ⁵ Padá Issáyá gón áyan gwasht: “Maná, ke Ensánay Chokk án, Shabbatay róchay ehtiár hast.”

Mondhén mardéay drahbakshi

(Mattá 12:9-14; Markás 3:1-6)

⁶ Dega Shabbatay róché, Issá kanisahá shot o mardománi tálim dayagá goláésh but. Hamódá, yak mardé at ke rástén dasti hoshk o mondh at. ⁷ Sharyatay zánóger o Parisi, Issáyá chárágá atant o yak nimmónéay shóházá atant ke “agan é marday dastá Shambehay róchá dráh bekant, gorhá má áiy sará Shabbatay róchá kár kanagay bohtámá* jata kanén.” ⁸ Issáyá áyáni delay hál o habar zánt. Gón

* 5:21 5:21 Abéd cha, bezán gayr cha. † 5:24 5:24 Dányál nabiá é pernám pa yak hastiéá kár bastag ke á cha ásmáná kayt. Issá Masihá é pernám pa wat zortag tán mardom bezánant ke á cha ásmáná átkag o hamá wádah dátágén Masih ent. ‡ 5:29 5:29 Bani Esráilián, songi o máliátgirén mardom nádóst atant, chiá ke á Rumay hokumatay kárendah atant o bázénéá pa wati nap o suttá cha mardomán géshén song o bája gept. § 5:37 5:37 Zekk, bezán cha pasay póstá addh kortágén darpé ke cha mashká bazter ent.

* 6:7 6:7 Bohtám, bezán malámát, tohmat.

mondhén mardá gwashti: “Pád á, byá demá bósht, mardom tará begendant!” Á mard pád átk o óshtát. ⁹ Gorhá Issáyá chá mardomán jost kort: “Nun maná begwashét ke Shabbatay róchá néki kanag rawá ent yá badi? Ensánay zen-day rakkénag rawá ent, yá koszag o gár kanag?” ¹⁰ Gorhá sajjahénáni némagá cháret o gón á mardá gwashti: “Dastá shahár day!” Áiá anchosh kort o dasti wassh o dráh but. ¹¹ Sharyatay zánóger o Parisi sakk zahr geptant o watmánwatá shawr o saláhesh kort ke gón Issáyá ché bekanant.

Dwázdah háсэн káseday gechén kanag
¹² Hamá wahdá yakk róché, Issá pa dwá kanagá kóhá shot o sajjahén shapi gón Hodáyá pa dwá gwázént. ¹³ Wahdé róch but, áiá morid wati Kerrá lóthetant o cha áyán dwázdah kas gechén kort o wati háсэн kásed náméntant. ¹⁴ Áyáni nám esh ant: Shamun ke Issáyá áiay nám “Petros”† per bast, áiay brát Andriás, Ákub, Yuhanná, Pilipos, Bartulumá, ¹⁵ Mattá, Tumá, Halpiay chokk Ákub, Shamun ke áiay pannám “sarmachár” ent, ¹⁶ Ákubay chokk Yahudá o Yahudá Eskaryuti ke randá Issái dróhagi‡ o dozhmenáni dastá dayagi at.

Nádráhani drahbakshi
(Mattá 4:23–25)

¹⁷ Issá gón moridán cha kóhá ér kapt o yak patth o pachén jágahéá óshtát. Cha áiay moridán bázéné ódá at. Cha Yahudiah, Urshalim o Sur o Saydunay tayábgwaray mardomán, mazanén rombé ham átk o mocch but. ¹⁸ Mardománi é mazanén mocchi, pa áiay habaráni gósh dárag o wati nádráhiáni dráh kanáénagá átkagat. Á ke palitén ruhán dochár atant ham dráh kanag butant. ¹⁹ Mardomán Issáyá dast per kanagay kóshesha kort, chiá ke cha áiá jak anchén wák o twáné dar áyagá at ke sajjahéni dráha kortant.

Bazhn o bahtáwari
(Mattá 5:1–12)

²⁰ Issáyá wati moridáni némagá cháret o gwashti: “Bahtáwar ét shomá ke wár o bazzag ét, chiá ke Hodáay bádsháhi shomayg ent. ²¹ Bahtáwar ét shomá ke annun shodig ét, chiá ke séra bét. Bahtáwar ét shomá ke annun gréwán ét, chiá ke kandána bét. ²² Bahtáwar ét shomá, wahdé mardom pa Ensánay Chokkaygi shomará ázára dayant o cha wat dur o gestá kanant, dozhmána dayant

o bannáma kanant. ²³ Á róchá, shádkámi bekanét o gal o bál bebét, chiá ke ásmáná shomay mozz sakk ház ent. Áyáni pet o pirénán ham gón nabián hamé dhawlá kortag.

²⁴ “Bale bazhn o apsóz pa shomá ke hastómand ét, chiá ke shomará áram o ásudagi rasetag. ²⁵ Bazhn o apsóz pa shomá ke annun sér ét, chiá ke shodiga bét. Bazhn o apsóz pa shomá ke annun kandán ét, chiá ke gamnák o gréwána bét. ²⁶ Bazhn o apsóz pa shomá, wahdé ke sajjahén mardom shomará satá dayant o sárháyant, chiá ke áyáni pet o pirénán ham gón drógen nabián, anchosh kort.

Mehr

(Mattá 5:38–48; 7:12)

²⁷ “Oo mani gósh dárókán! Shomará gwashán ke gón wati dozhmenán mehr bekanét o gón áyán ham ke cha shomá naprata kanant, néki bekanét. ²⁸ Pa áyán ke shomará badén dwá kanant barkat belóthét, pa áyán ke shomará ázára dayant nekén dwá belóthét. ²⁹ Agan kaséá tará shahmáté jat, wati domi gobbá§ ham áiay némagá betarrén o agan kaséá tai kabáh* pach gept, belli ke tai pashká ham bebárt. ³⁰ Agan kasé cha taw chizzé lóthit, bedayi, agan kasé tai chizzé pa zór bebárt, padá malóthi. ³¹ Gón degarán hamá dhawlá néki bekanét ke cha áyána lóthét.

³² “Agan shomá tahná gón hamáyán mehr bekanét ke gón shomá mehra kanant, gorhá shomá chónén sób o páedagé katthetag?† É kár, gonahkáráni dastá ham buta kant. ³³ Agan shomá gón hamáyán néki bekanét ke gón shomá nékia kanant, gorhá shomará che páedagé rasit? Gonahkár ham anchosha kanant. ³⁴ Agan shomá tahná hamáyán wám bedayét ke ométa kasshét zortagén wámán dát korta kanant, gorhá shomará che mozzé rasit? Gonahkár ham gonahkárán wáma dayant o padá pacha gerant. ³⁵ Bale shomá gón wati dozhmenán ham mehrabán bebét, gón áyán néki bekanét, wámesh bedayét o padá malóthét. É dhawlá, shomará cha Hodáay némagá, mazanén mozzé rasit o shomá mazzánán Hodáay Chokka bét, chiá ke á, gón náshogr o badkárén mardomán ham mehrabán ent. ³⁶ Hamá dhawlá ke shomay ásmáni Pet rahmdel ent, shomá ham rahmdel bebét.

Ayb o iráz magerét

† **6:14** 6:14 Yunáni zobáná, “Petráay” máná “talár” ent. Pársiá “khíánat”. § **6:29** 6:29 Gobb, bezán gónag. *

‡ **6:16** 6:16 Dróhag, bezán pa repk rad dayag. Arabi o **6:29** 6:29 Kabáh, bezán jobbah. † **6:32** 6:32 Katthag,

bezán nap o sutt kanag, dastá árag.

³⁷ “Degarán ér majanét o iráz magerét, tánke shomá ér janag mabét. Kaséa mayárig makanét, tánke mayárig kanag mabét, degarán pahell kanét o bebakshét tánke pahell kanag o bakshag bebét. ³⁸ Bedayét tán shomará ham dayag bebit. Shomay dátagegnáni badalá, sarréch o dapádapén kayl o paymánah, shomay kotthá réchaga bit, chiá ke, gón har kayléa bedayét, gón hamá kaylá shomará dayaga bit.”

³⁹ É mesáli ham pa áyán áwort: “Kóré che paymá dega kóréa ráhá pésh dáshtha kant? Har doén chátá nakapant? ⁴⁰ Shágerd cha wati ostádá zántkártera nabit, bale hamá ke rost o rodóma gipt o cha tálimá sarrécha bit, wati ostáday dhawlá buta kant.

⁴¹ “Chiá wati brátay chammay pilláshká[‡] genday, bale wati chammay bondhá nagenday? ⁴² Wahdé taw wati chammay bondhá nagenday, chón wati brátá gwashta kanay: ‘Bell ke tai chammay pilláshká dara kanán?’ Oo dopóstén shatalkár! Pésará wati chammay bondhá dar kan, randá tai chamm pacha bant o wati brátay chammay pilláshká kassheta kanay.

Drachk o drachkay bar

(Mattá 7:17–20; 12:32–35)

⁴³ “Hech sharrén drachké sellén bar o nibaga nayárit o na sellén drachk sharrén bar o nibaga kárit. ⁴⁴ Har drachk, cha wati bará zánaga bit. Na cha dhangarán[§] enjir chenaga bit o na cha dhóloká* angur. ⁴⁵ Sharrén mardom, wati delay hazánagay ér kortagén nékián, cha wati dap o zobáná dara kant o sellén mardom, wati delay ambáray ér kortagén gandagián, cha wati dap o zobáná réchit. Chiá ke harché mardomay delá bebit, hamá cha áiyay dapá dara kayt.

Báwar o kerd

(Mattá 7:24–27)

⁴⁶ “Wahdé shomá mani habaráni sará kára nakanét, gorhá chiá maná ‘Hodáwand, Hodáwanda’ gwashét? ⁴⁷ Á kas ke mani habaráni eshkonagá kayt o áyáni sará kára kant, man shomará pésha dárán ke á, kai paymá ent. ⁴⁸ Á hamá bánbandén ostáay[†] dhawlá ent ke pa lógay bandagá cholli[‡] johl borret o bonredi[§] taláray sará ér kort. Wahdé hár o hirróp átk, hárá á lóg sorént nakort, chiá ke mohr

o mohkam bandag butagat. ⁴⁹ Bale kasé ke mani habarán gósha dárit o áyáni sará kára nakant, hamá mardomay paymá ent ke lógi bé bonredá bast. Wahdé hár o hirróp átk, lóg hárá mallet, kapt o pahk wayrán but.”

7

Pawji apsaray báwar

(Mattá 8:5–13; Yuhanná 4:43–54)

¹ Wahdé Issáya gón mardomán wati habar halás kortant, Kaparnáhumá shot.

² Ódá, yak Rumi pawji apsaréa, hezmatkáré hastat ke áia báz dóst at. Á hezmatkár, sakk nádráh o markig at. ³ Wahdé á pawji apsar Issáay bárawá sahig but, áia Yahudiáni lahtén kamáshén mardom Issáay kerrá ráh dát tán áiyay mennatgiriá bekanant o begwashanti ke byayt o áiyay hezmatkárá dráh bekant. ⁴ Á Yahudi kamásh Issáay kerrá átkant, áiyay mennatesh gept o gwashtesh: “É pawji apsara karzit ke taw pa áia é kára bekanay. ⁵ Chiá ke may kawmay dózwáh ent. May kanisah ham hamáia[†] adhd kanáéntag.”

⁶ Issá áyáni hamráh but o shot. Wahdé lógay nazziká rasetant, pawji apsará wati lahtén dóst kásed kort o pa Issáya, kolawi rawán dát: “Oo Hodáwand! Watá zahmatwár makan. Mana nakarzán ke taw mani lógá byáay o ⁷ man pa wat é láhekiá ham nagendán ke tai kerrá byáyán. Taw tahná hokm bekan, mani hezmatkár dráha bit. ⁸ Chiá ke man ham wati masteráni hokmay chérá án o mani dastay chérá ham sepáhig hast. Agan kaséa hokm bekanán ‘beraw,’ á rawt o agan kaséa begwashán ‘byá,’ á kayt. Agan wati hezmatkárá begwashán ‘é kára bekan,’ á kant.”

⁹ Wahdé Issáya é habar eshкот, hayrán but o démi gón wati hamráhén mardomán kort o gwashti: “Shomará gwashán, man choshén mohrén setk o báwar Esráiliáni nyámá ham nadistag.” ¹⁰ Wahdé pawji apsaray kásed per tarret o lógá átkant, distesh ke hezmatkár wassh o dráh ent.

Janózáméay chokkay zendag kanag

¹¹ Dér nagwast, Issá gón wati morid o dega bázén mardománi hamráhiá, Náin námén shahréa shot. ¹² Wahdé shahray darwázagay nazziká raset, disti mardom yak mordagé cha shahrá dhann baragá ant ke á wati janózámén mátay yakkén chokk at. Shahray bázén mardom ham, gón á janózámá gón atant. ¹³ Wahdé

[‡] 6:41 6:41 Pilláshk, bezán buchok, prishk, bákasay dhillyay kasterén chondh. [§] 6:44 6:44 Dhangar, bezán bébarén konthagi drachk o dár. * 6:44 6:44 Dhólok, bezán gyábáni konthagi jarré ke polli espét ant. [†] 6:48

6:48 Bánbandén ostá hamá ent ke lógay bandagá zántkár ent. [‡] 6:48 6:48 Choll, bezán chari, náli. Pa lógay bandagá zeminá kóchant. É kótkagén jágahá cholla gwashant. [§] 6:48 6:48 Bonred, bezán lóg yá diwáléay awali o johlterén red.

Hodáwandén Issáya á janózám dist, áiy sará sakk bazzagi but o gwashti: “Magrêw.”¹⁴ Nazzik átk o mordagay tahti dast per kort, mordagay kópag dayók óshtátant. Issáya mordag gwánk jat: “Oo warná! Man tará gwashán, pád á.”¹⁵ Mordag pád átk o nesht o habará lagget. Issáya á warná mátay dastá dát.

¹⁶ Sajjahénáni delá torsé nesht o Hodáya sepat o saná kanán, gwashtesh: “May kerrá mazanén nabié wadi butag” o “Hodá wati kawmay komak kanagá átkag.”¹⁷ Issáya hál o habar, sajjahén Yahudiah o kerr o gwaray sardhagarán tálán but.

Yahyáay kásed
(Mattá 11:2-15)

¹⁸ Pákshódókén Yahyáay moridán, Yahyá cha Issáya é ajabén kárán sahig kort, paméshká Yahyáya cha wati moridán do kas lóthet o¹⁹ pa jost kanagá Hodáwandén Issáya kerrá dém dát ke “báren, taw hamá ay ke áyagi at, yá pa degaréá rahchár bebén?”

²⁰ Á doén Issáya kerrá átkant o gwashtesh: “Mára pákshódókén Yahyáya pa é habaray jostá ráh dátag: ‘Báren, taw hamá ay ke áyagi at, yá pa degaréá rahchár bebén?’”²¹ Hamá wahdá, Issá bázén najórh o nádráhán dráh kanagá at, cha jennián, palitén ruhán kasshagá at o bázén kórání chammán, rozhnái bakshagá at.²² Issáya passaw dátant: “Harché ke shomá distag o eshkotag, berawét Yahyáya sahig kanét ke kór gendag o maym kanagá ant, lang tarrag o ráh rawagá ant, garri pák o palgár bayagá ant, karr eshkonagá ant, mordag zendag bayagá ant o bazzag o nézgarán wasshén mestág sar bayagá ent.²³ Bahtáwar hamá ent, ke mani kárání gendagá thagal mawárt o malakoshit.”

Yahyáay bárawá
(Mattá 11:7-19)

²⁴ Wahdé Yahyáay kásed dar kapt o shotant, Issá gón mardomán Yahyáay bárawá gapp o trán kanagá lagget: “Chónén chizzéay chárágá gyábáná shotagét? Kalam o káshay dhilléay chárágá ke gón gwátay kasshagá é dém o á dém shikka wárt?”²⁵ Agan na, gorhá chónén chizzéay chárágá shotagét? Anchéen mardéay chárágá shotagét ke narm o názorkén pósháki gwará at? Á mardom ke brahdárén póshák gwará kanant o hastómandáni dhawlá zenda gwázénant, kalát o márhián nendók ant.²⁶ Gorhá ódá shomá chónén chizzéay chárágá shotagét? Paygambaréay chárágá? Haw, shomára gwashán ke Yahyá cha paygambaréa ham master ent.

²⁷ Á hamá ent ke áiy bárawá nebisag butag: *Bechár; man wati kásedá cha taw pésar ráha dayán ke á, tai ráh táchk o tayára kant.*²⁸ Man shomára gwashán ke hech máta pákshódókén Yahyáay warhén bématthén chokké nayáwortag. Bale Hodáay bádsháhiá, hamá ke cha sajjahénán kaster ent, á cha Yahyáya ham master ent.

²⁹ “Wahdé Yahyáya Hodáay paygám áwort, bázén mardomán, songi o máliátgirán ham mannet ke Hodáay kolaw o paygám rást ent, chiá ke á Yahyáay dastá pákshódi dayag butagatant.³⁰ Bale Parisi o Sharyatay kázian cha Yahyáay dastá pákshódi nagept o Hodáay lóth o wáhagesh pa wat namannet.

³¹ “É zamánagay mardomán kai hamdarwar bekanán ke á, kai dhawlá ant?”

³² Á, hamá chokkáni paymá ant ke bázará neshtagant o yakdomiá gwashagá ant: ‘Má pa shomá nal o kalam sáz kort, bale shomá nách o sohbat nagept, má pa shomá mótk áwort, bale shomá arsé narétk.’³³ Pákshódókén Yahyá átkag, na náni wárt o na sharábi nóshet o shomá gwashét: ‘Jenni per ent,’³⁴ bale Ensánay Chokk átkag, wárt o nóshit o shomá gwashét: ‘Lápi o sharábié, máliátgir o gonahkárání sangat ent.’³⁵ Bale hekmat o zántá hamá záhera kanant ke áiy randgir o mannóger ant.”

Gonahkárén janéné Issáya pádán charpa kant

³⁶ Cha Parisián yakkéá Issá wati lógá mehmán kort. Á shot o pa waragá parzónagay* sará nesht.³⁷ Á shahrá, yak badkárén janéné hastat. Wahdé sahig but ke Issá é Parisiay mehmán ent, sengmarmarén atrdánéay tahá, atri zort o hamóda shot.³⁸ Issáya poshtá, áiy pádáni nazziká gréwan óshtát, gón wati arsán Issáya pádi tarr kort o gón wati mud o malgórán hoshk kortant o pádi chokket o atr per moshtant.

³⁹ Wahdé á Parisiá ke Issá mehmán kortag é dist, wati delá gwashti: “Agan é mard paygambaré butén, allamá zántagati é janén ke áiy dast per kanag o moshagá ent, kay ent o chónén gonahkáré.”⁴⁰ Issáya gwasht: “Oo Shamun! Maná gón taw yak habaré gwashagi ent.” Áiy gwasht: “Ji ostád, begwash!”

⁴¹ Issáya gwasht: “Mardéa do wámdár hastat, yakké panchsad dinár o domi panjáh dináray wámdár at,⁴² bale á doénán pa wámáni dayagá hech néstat, paméshká wám dayóká áyáni wám bakshetant. Nun cha á doénán kojámi wám

* 7:36 7:36 Parzónag, bezán soprah.

dayók géshter dósta bit?”⁴³ Shamuná passaw dát o gwashti: “Mani hayálá, hamá ke áiy wám géshter atant.” Issáyá passaw dát: “Taw sharr gwasht.”

⁴⁴ Gorhá Issáyá janénay némagá chakk tarrént o gón Shamuná gwashti: “É janéná genday? Man tai lógá átkán, taw maná pádání shódagá trampé áp nadát, bale é janéná mani pád gón wati arsán tarr kort o gón malgórán hoshk kortant.”⁴⁵ Taw maná nachokket, bale é janén cha mani rasagá tán é wahdi, yakpaymá mani pádán chokkagá ent.⁴⁶ Taw mani sará rógen per namosht, bale áia mani pádání sará atr per mosht.⁴⁷ Paméshká tará gwashán: É janénay bázén dóstiy sawab esh ent, ke eshiay bázén gonáh bakshag butant, bale á ke áiy dósti kamter ent, hamá ent ke áiy bakshetág gonáh kamter ant.”⁴⁸ Gorhá démi gón á janéná tarrént o gwashti: “Tai gonáh bakshag butant.”

⁴⁹ Bale é dega mehmán gón yakdegará gwashagá laggetant: “É kay ent ke mardománi gonáhn ham pahella kant?”⁵⁰ Nun Issáyá gón á janéná gwasht: “Tai setk o báwará tará rakként, pa wasshi o salámati beraw.”

8

Gón Issáyá janénáni hamráhi

¹ Randá, Issá shahr pa shahr o métag pa métaga tarret o pa mardomán, Hodáay bádsháhiyemestágy jária jat. Áiy dwázdahén kásed hamráh atant.² Lahtén janén ham ke Issáyá áyáni jenn kasshetagatant o cha nádráhián dráh o jórh kortagatant, gón áyán gón atant. Cha áyán yakké Maryam at, ke áiy pannám Majdaliyah at o Issáyá cha áia hapt jenn kasshetagat.³ Dega yakké Yuánná at ke áiy lógwájah, Huzá, Hirudis bádsháhay kalátay kelitdár* at. Yakké Susan at o dega báz janén atant, ke cha wati zarr o málán, pa Issá o áiy moridán komak kanagá atant.

Tohm chandhagay mesál

(Mattá 13:1-17; Markás 4:1-12)

⁴ Cha har shahr o har halk o hankená mardom Issáyá kerrá pédák atant. Wahdé bázén mardom átk o mocch but, Issáyá pa mesál o darwar gón áyán gwasht:⁵ “Yak dehkáné pa tohmay chandhagá shot, tohmáni chandhagay wahdá kammoké tohm ráhay sará retk ke pálapásh butant o báli morgán chet o wártant.”⁶ Kammoké

dhal o dhókáni sará retk, á rostant bale zutt gimmort† o hoshk butant, chiá ke zeminá namb néstat.⁷ Dega kammoké, shezz o cherekkáni‡ nyámá retk, gón áyán hórígá rostant bale shezzán áyáni rost o rodóm dásht.⁸ Á dega tohm, sharrén zeminá retk o sharr rost o mazan but o sad sari hóshag o baresh kort.” É mesálay gwashagá rand, Issáyá pa borztawári gwasht: “Harkasá pa eshkonagá gósh per, beshkont.”

⁹ Issáay moridán, cha áia é mesálay máná jost kort.¹⁰ Áia passaw dát: “Hodáyá shomay delay chamm pach kortagant, ke shomá áiy bádsháhiy rázán sarpad bebét, bale pa á dega mardomán, mesál o darwar ant o bass, tánke: ‘gón chammán bechárant, bale magendant gón góshán beshkonant, bale sarkech mawarant.’”

¹¹ “É mesálay máná esh ent: Tohm, Hodáay habar ant.¹² Ráhay sará retkagén tohmáni máná, hamá mardom ant ke Hodáay habarán gósha dárant, bale Shaytána kayt o cha áyáni delá, Hodáay habarán dara kant ke chosh mabit á báwar bekanant o berakkant.¹³ Dhal o dhókén zeminay retkagén tohmáni máná, hamá mardom ant ke Hodáay habarána eshkonant o pa gal o wasshia mannant, bale Hodáay habar, áyáni delá rissag o wandhála§ najanant, tán kammoké wahdá rand, áyáni báwar kamma bit o ázmáesh o chakkásay wahdá poshtá kenzant o cha ráhá thagalant.¹⁴ Shezz o dhangaráni tahá retkagén tohmáni máná, hamá mardom ant ke Hodáay habarán gósha dárant, bale donyái parésháni o mál o zarray hers o jópah* o aysh o nóshán mána gishshant o hóshag o bara nayárant.¹⁵ Sharrén zeminá retkagén tohmáni máná, hamá mardom ant ke Hodáay habarán gósha dárant o pa setk o del o pákén niyaté áyána mannant. É chó hamá keshará ant ke hóshag o bara kanant o páydára bant.

Cherágay mesál

(Markás 4:21-25)

¹⁶ “Kasé ke cherágá róka kant, tagaréay† chérá chéria nadant, yá tahtay chérá éria nakant. Róken cherágá, cherágdáná éria kanant, tán harkas ke lógá kayt rozhnáia begendit.¹⁷ Chiá ke hech choshén chérén chizzé nést ke záher o paddar mabit o hech choshén panáh o andémén habaré nést ke áshkár o démdará mabit.¹⁸ Shomá hozzhár bét o bezánét ke che paymá

* **8:3** 8:3 Kelitdár, bezán hazánagay hesábdár o sambálók. † **8:6** 8:6 Gimmorag, bezán hoshk tarrag, napasgir bayag. ‡ **8:7** 8:7 Shezz, yá shenz, o cherekk bébarkatén sabzagé ke asligén kesháray nyámá rodit o áyáni rost o rodómá dárít. § **8:13** 8:13 Wandhál, bezán rissag o rótag. * **8:14** 8:14 Jópah, bezán lálech o tamah. † **8:16** 8:16 Tagár, bezán mazanén johlén darp, hirán, lagan.

eshkonét. Kaséa ke chizzé hast, áia géshter dayaga bit o kaséa ke nést, bale gomána kant ke hasti, cha áia hamá ham pach geraga bit.”

Issáy mát o brát

(Mattá 12:46-50; Markás 3:31-35)

¹⁹ Hamé wahdá Issáy mát o brát áiy gendagá átkant, bale cha mardománi bázén mocchiá áiy nazziká átkesh nakort. ²⁰ Issáesh hál dát ke “tai mát o brát pa tai gendagá dhanná óshítatagant.” ²¹ Issáyá darráént: “Mani mát o brát hamá ant ke Hodáay habarán gósha dárant o áyani sará kára kanant.”

Tuppánay érmósh kanag*

(Mattá 8:23-27; Markás 4:35-41)

²² Yak róché, Issáyá gón moridán gwasht: “Byáét gwarmay domi némagá rawén.” Bójigá swár butant o ráh geptant. ²³ Wahdé bójig rawagá at, Issá wáb kapt. Anágat syahgwátéa sar kort o tuppán but o bójig cha ápá porr bayagi at. Áyani zend, hataray tahá at.

²⁴ Morid Issáyá gwará shotant, cha wábá ágáshesh kort o gwashtesh: “Wájah, oo wájah! Má ér bokkagiš o meragi én.” Á, cha wábá ágáh but o tuppán o mawj o chawli hakkal dátant, cha neherr o hakkalán gwát kapt o tuppán prosht o érmósh but. ²⁵ Áia gón wati moridán gwasht: “Shomay setk o báwar kojá shot?!” Moridán cha é ajabén kára torset o bah mantant o cha yakdomiá jostesh gept: “É chónén mardomé ke gwát o chawlán neherr o hokma dant o á ham, áiy hokmá mannant.”

Jenni ganókéay drahbakshi

(Mattá 8:28-32; Markás 5:1-20)

²⁶ Gorhá, Gerásiáni* sardhagará rasetant ke Jalilay damagay dém pa démá, mazangwarmay domi pahnátá ent. ²⁷ Wahdé Issá cha bójigá ér kapt o hoshkiá átk, cha shahray mardomán yakké, ke jenni ganóké at, gón áia dochár kapt.† Cha bázén wahdéa, áia pocch gwará nakortagat o lógéa naneshtagat, shap o róch kabrestáná kaptagat. ²⁸ Wahdé áia Issá dist, kukkáré korti, áiy pádán kapt o gón borztawári gwashti: “Issá, Oo mazanshánén Hodáay Chokk! Tará gón man che kár ent? Tará pa Hodá sawgend, maná azáb maday.” ²⁹ Áia paméshká chosh gwasht ke Issáyá jenn hokm dátatagat, é mardá yalah bedant. Jenná, é mard pésará ham báz randá

geptagat, mardomán pa zamzil mohr bastagat o ger o dár kortagat, bale mardá zamzil próshtagatant o jenná, á kasshakán kortagat o gyábáná bortagat. ³⁰ Issáyá cha áia jost kort: “Tai nám kay ent?” Áia passaw dát: “Mani nám lashkar ent,” chiá ke bázén jenné áiy jesm o jáná potertagat. ³¹ Jennán gón Issáyá dazbandi kort ke áyan, johlén tahtarunay‡ chátá dawr dayagay hokmá madant.

³² Hamódá, jompéay sará, hukkáni mazanén ramagé charagá at, jennán gón Issáyá dazbandi kort: “Mará bell ke é hukkáni jesmá poterén.” Issáyá ejázat dátant. ³³ Jennán á mard yalah dát o hukkáni jesmá potertant o anágat, hukkáni ramag cha jompá jahlagá ér kapána gwarmá bokket.

³⁴ Wahdé hukkáni shwánagán chosh dist, pa drekké métag o shahrá shotant o mardomesh hál dátant. ³⁵ Mardom shotant tán gón wati chammán é sarg-wastá begendant. Issáyá kerrá átkant o hamá mardesh dist ke jennán yalah kortagat, Issáyá pádáni démá neshtag, pocch o pósháki gwará o pa hósh o sár ent. Nun torsesh delá nesht. ³⁶ Á ke wat chamdistén sháhed atant, á dega mardomesh hál dátant ke é jenni ganók chónaká dráh butag. ³⁷ Gerásináay sardhagáray mardomán, gón Issáyá dazbandi kort ke áyani sardhagará yalah bedant o berawt, chiá ke áyan báza torset. Paméshká Issá bójigá swár but o shot.

³⁸ Hamá mardá ke Issáyá áiy jenn dar kortagatant, gón Issáyá dazbandi kort ke áia gón wat bebárt. Bale Issáyá á mard per tarrént o gwashti: ³⁹ “Lógá beraw o wati mardomán hál beday ke Hodáyá gón taw chónén kéré kortag.” Á mard shot o wati shahrá jári jat ke Issáyá gón áia ché kortag.

Janénéay drahbakshi o jenekéay zendag kanag

(Mattá 9:18-26; Markás 5:21-43)

⁴⁰ Wahdé Issá per tarret, rombé mardomá wasshátk kort, chiá ke sajjahén áiy rahchár atant. ⁴¹ Hamá wahdá, Yáyrus námén yak mardé ke kanisahay master at, Issáyá kerrá átk. Áiy pádán kapt o dazbandi o mennati kort ke “mani lógá byá.” ⁴² Chiá ke áiy yakkén jenek, ke omri dwázdah sáláy kesásá at, markig at. Wahdé Issá áiy lógay némagá rawagá at, mardom chakká kapán o télánk dayán áiy gwará mocch butant.

‡ 8:21 8:21 Érmósh, bezán árám, hámósh. § 8:24 8:24 Bokkag, bezán ápá ér rawag, bodhdhag, gark bayag.

* 8:26 8:26 Lahtén daznebeshtá átkag: “Gadáriáni”. Anchosh band 37ay tahá. † 8:27 8:27 Dochár kapag, bezán dhikk warag, yakdegará gendag. ‡ 8:31 8:31 Tahtarun, bezán jahannam, dózah.

⁴³ Hamodá yak janéné ham hastat ke dwázdah sál at áiy hón band nabutagat. Hechkasá ham á dráh kort nakortagat. §
⁴⁴ Hamá janén, Issáay poshti némagá átk o áiy kabáhay lambi dast jat o hamá damáná hón band but. ⁴⁵ Gorhá Issáyá gwasht: “Kayá mani kabáh dast jat?” Wahdé hechkasá namannet, gorhá Petrosá gwasht: “Wájah! Wat gendagá ay ke mardomán tará chón angerr kortag* o chakká kapán ant.” ⁴⁶ Bale Issáyá padá gwasht: “Allamá kaséá maná dast per kort, man máret† ke wák o twáné cha man dar bayagá ent.”

⁴⁷ Wahdé janéná zánt ke é habar chér dayaga nabit, gorhá larzáná átk o Issáay pádán kapt. Áiá sajjahénáni déma gwasht ke chiá Issáay kabáhi dast per kortag o che paymá, hamá damáná cha wati nádráhiá rakketag. ⁴⁸ Issáyá gwasht: “Oo mani jenek! Tai setk o báwará tará rakkéntag, pa wasshi o salámati beraw.”

⁴⁹ Issá angat habará at, ke cha kanisahay masteray lógá, mardomé átk o Yáyrusi hál dát ke “tai jenek mortag o nun ostádá géshter delsyáh makan.” ⁵⁰ Issáyá é habar eshkor o gón Yáyrusá gwashti: “Mators, béwar kan, tai jeneka rakkít.”

⁵¹ Wahdé Issá Yáyrusay lógá raset, áiá Petros, Yuhanná, Ákub o hamá jenekay pet o máta abéd, dega hechkas hamráhiay ejázat nadát. ⁵² Sajjahén mardom pa jenekay marká mótk o zári kanagá atant. Bale áiá gwasht: “Magréwét, á namortag, bass wáb ent.” ⁵³ Áyán Issáay sará kandet o kalág gept, chiá ke zántagatesh jenek mortag. ⁵⁴ Issáyá jenekay dast gept o gón borzén tawaré gwashti: “Oo mani chokk! Pád á.” ⁵⁵ Jenekay sáh per tarret o hamá damáná pád átk. Issáyá gwasht: “Chokká warag bedayét.” ⁵⁶ Chokkay mát o pet hayrán o habakkah mantant, bale Issáyá kaddhan kortant ke é habará gón hechkasá magwashant.

9

Dwázdahén kásedáni ehtiár (Mattá 10:5-15; Markás 6:7-13)

¹ Issáyá wati dwázdahén kásed lóthetant, áyaná sajjahén jenn o palitén ruháni dar kanag o nájrhiáni dráh kanagay zór o ehtiári ham dát. ² Pa Hodáay bádsháhiay jár janag o nádráháni drahbakshiá ráhi dátant. ³ Gwashti: “Ráhá, gón wat chizzé mabarét, na asá

o dazlatthé, na lót* o turagé, na nán o tóshag, na zarr o na geshén jámag. ⁴ Wahdé lógéá rawét, tán shahray yalah dayagá hamá lógá bemánét. ⁵ Agan yak shahréay mardom shomárá wasshátk nakanant, gorhá dar áyagay wahdá, wati pádáni danzán hamodá bechandhét o betakénét tán áyáni helápá sháhedi bebit ke shomá Hodáay kolaw pa áyán raséntag.” ⁶ Gorhá Issáay morid dar kapt o métag pa métag har jáh, wasshén mestágesh pa mardomána rasént o nádráhén mardomesh dráha kortant.

Hirudisay parésháni

(Mattá 14:1-12; Markás 6:14-29)

⁷ Wahdé Jalilay hákem Hirudis, cha é sajjahén habar o hálán sahig but, paréshán o takánsar† but chiá ke lahtén mardom Issáay bárawá chosh gwashagá at: “Á, Yahyá ent ke padá cha mordagán zendag butag.” ⁸ dega lahtén gwashagá at ke “Elyás nabi záher butag,” o dega lahtén chosh ham gwashagá at ke “cha péshi zamánagay paygambarán yakké ke padá zendag butag.” ⁹ Gorhá Hirudisá gwasht: “Yahyáay sar wa man borretag, nun é kay ent ke áiy bárawá man é dhawlén hál eshkonagá án?” Á pa Issáay gendagá hodónák‡ at.

Panch hazár mardomá warák dayag

(Mattá 14:13-21; Markás 6:30-44; Yuhanná 6:1-14)

¹⁰ Wahdé Issáay kásed cha wati saporá per tarret o átkant, wati kortagén káráni hálesh Issáyá sar kort. Gorhá Issáyá á gón wat hamráh kortant o Bayt-Saydá námén shahréá shot tánke cha mardomán dur o gestá bebant. ¹¹ Bale wahdé mardom sahig butant, áiy randá ráh geptant. Issáyá á wasshátk kortant, Hodáay bádsháhiay bárawá sar o sój dátant o nádráhén mardom ham wassh o dráh kortant.

¹² Rónenday wahdá, dwázdahén kásed átkant o gwashtesh: “Nun é mardomán ráh day ke é gwar o kerráni métag o bázarán berawant o pa wat warag o wábjáhé shóház bekanant, chiá ke edá barr o gyábánén jágahé.” ¹³ Bale Issáyá gwasht: “Shomá wat eshán warák bedayét.” Áyán passaw dát: “May kerrá panch nagan o do máhigá géshter chizzé nést, bale haw, agan berawén pa é sajjahén mardomán warák pa bahá begerén.” ¹⁴ Cha á mardomán, kesás panch hazár mardén atant. Issáyá

§ 8:43 8:43 Lahtén daznebeshtá ham átkag: Áiá wati sajjahén zarr pa wati dawá o darmáná táwán kortagatant.

* 8:45 8:45 Angerr kanag, bezán chapp o chágérdá gerag, Arabi o Pársiá “mohásERAH.” † 8:46 8:46 Mángar, bezán mahsus kanag. * 9:3 9:3 Lót, bezán turag, pélek, pélag. † 9:7 9:7 Takánsar, bezán kasé ke pegri gerept o janjálá kaptag, sarbatag. ‡ 9:9 9:9 Hodónák, bezán wahágdár, armáni, lóthók, delmánag.

gón moridán gwasht: “Mardomán panjáh panjáyah thóliá benendárénét.”¹⁵ Moridán anchosh kort o mardom nendáréntant.

¹⁶ Issáyá panchén nán o doén máhig zortant o ásmánay némagá cháret, Hodáay shogri gept o padá nán o máhigi chondh chondh kort o moridáni dastá dátanti tánke mardománi sará bahr bekanant.¹⁷ Sajjahén mardomán lápsérá warag wárt o angat cha sar átkagén chondhán, dwázdah sapt porr but.

Petrosay gwáhi

(Mattá 16:13-28; Markás 8:27-33)

¹⁸ Yak róché, Issá éwaká dwá kanagá at o morid gón áiá gón atant. Cha moridán josti kort: “Mardom mani bárawá ché gwashant, man kay án?”¹⁹ Áyán passaw dát: “Lahténa gwashtit taw pákshódókén Yahyá ay o lahténa gwashtit taw Elyás nabi ay. Dega lahtén chosh ham gwashtit, taw cha pésarigén zamánagay á dega nabián yakké ay ke padá zendag butagay.”²⁰ Áiá jost kort: “Shomá wat mani bárawá ché gwashét, man kay án?” Petosá passaw dát: “Taw Hodáay ráh dátágén hamá Masih ay.”

Wati markay bárawá Issáy awali péshgói

²¹ Bale Issáyá á hokm kortant ke “é habará gón hechkasá magwashét.”²² Gwashti: “Ensánay Chokk báyard ent bázén sakkí o sóri besaggit. Kawmay kamásh, mazanén diní péshwá o Sharyatay zánóger allamá áiá mamannant o bekóshárénant o saymí róchá padá zendag bebit.”

Issáy randgiri

(Mattá 10:38-39; 16:28; Markás 8:34-9:1)

²³ Issáyá sajjahén mardom gwashtant: “Agan kasé lóthit mani randgiriá bekant, wati delay wáhaq o lóthán yalah bedant o har róch wati jenday salibá baddhá bekant[§] o mani ráhá gám bejant.²⁴ Harkas ke wati sáhay rakkénagay johdá bebit, áiá báhénit.* Bale á ke pa manigí wati sáhá báhénit, áiá rakkénit.²⁵ Agan yakkéá sajjahén donyá berasit bale wati sáhá bebáhénit, chónén sóbé bárt o ché kattheta kant? ²⁶ Agan kasé cha man o mani habarán lajjí[†] bekant, gorhá Ensánay Chokk ham, á wahdí ke gón watig o ásmáni Petayg o pákén préshtagáni shán o shawkatá é jahaná padá kayt, cha áiá

lajja kant.²⁷ Bale man shomará rásténa gwashán, edá lahtén mardom óshtátág ke tán áyáni démá Hodáay bádsháhi paddar mabit, markay támá nachashant.”

Issáy dém o dróshomay drapshnáki

(Mattá 17:1-9; Markás 9:2-9)

²⁸ Cha é habarán, kesás hasht róchá rand, Issáyá Petros, Yuhanná o Ákub hamráh kortant o pa dwáyá yak kóhéay sará shot.²⁹ Wahdé Issá dwá kanagá at, áiy démay rang badal but o gwaray god sakk espét but o drapshagá[‡] laggetant.³⁰ Yak anágat do mardom paddar but o gón Issáyá habar kanagá atant, yakké Mussá o á dega Elyás at.³¹ Á doén gón mazanén shán o shawkatéá záher butant o Issáyá markay bárawá habar kanagá atant ke allamá Urshalimá bayagi at.

³² Petros o áiy hamráh Ákub o Yuhanná sakk wabénag atant, bale wahdé sharr ágáh butant, gorhá distesh ke Issá pa shán o shawkaté gón Mussá o Elyásá yajjáh óshtátág.³³ Wahdé á doén Issáyá roksat kanag o rawagi atant, Petosá gwasht: “Wájah! May edá bayag sakk sharr ent, bell ke má say sáheg o kápára[§] bandén, yakké pa taw, yakké pa Mussá o degaré pa Elyásá.” Bale Petosá wat nazánt ché gwashagá ent.

³⁴ Angat Petros habará at ke jambaréa* áyáni sará sáheg kort. Wahdé jambar áyáni sará sáhél but moridán torset.³⁵ Cha jambará tawaré rost: “É mani gechéni Bacch ent. Shomá eshiay habarán gósh bedárét.”³⁶ Tawáray eshkonagá rand, moridán Issá éwaká dist. Áyán é sargwast wati delá dásht o á wahdá wati distagénesch gón hechkasá nagwasht.

Jenni bachakéay drahbakshi

(Mattá 17:14-18; Markás 9:14-27)

³⁷ Domi róchá wahdé Issá o sayén morid cha kóhá ér átkant, mardománi mazanén mocchié átk o gón Issáyá dochár kapt.³⁸ Cha mardománi nyámá yak mardoméa kukkár kanáni gwasht: “Oo ostád! Gón taw dazbandia kanán ke tará mani bachakay sará bazzag bebit, á mani yakkén chokk ent.³⁹ Jenné anágha mani chokká gipt o zhámbalénit[†] o hamá damáná chokk ják o kukkára kant, kap o gajja bit. Áiá báz kamm yalaha dant o lóthit áiá bekoshit.⁴⁰ Man gón tai moridán dazbandi kort ke é jenná bekasshant, bale áyán kasshet nakort.”⁴¹ Issáyá gwasht: “Oo bebáwar o gomráhén nasl o padréch!

§ 9:23 9:23 Salib baddhá kanagay maksad Issáyá wáhaqáni purah kanag ent. * 9:24 9:24 Báhénag, bezán gár dayag, cha dast dayag. † 9:26 9:26 Lajj, bezán sharm, hajálat. ‡ 9:29 9:29 Drapshag, bezán shahm janag, rozhná bayag, jalashkag. § 9:33 9:33 Kápár, kápar, kapar. * 9:34 9:34 Jambar, bezán abr. † 9:39 9:39 Zhámbalénag, bezán chizzéay gerag o pa trondi sorénag o larzénag.

Man tán kadená gón shomá bemánán o besaggán? Chokká edá byár.”⁴² Wahdé chokk pédák at, jenná zhámbalént o dhagará jat. Issáyá jenn gón neherr o hakkalán mán bast, chokk dráh kort o petay dastá dát.⁴³ Sajjahén mardom cha Hodáay mazaniá hayrán but o bah mantant.

Issáy markay domi pëshgói
(Mattá 17:22–23; Markás 9:30–32)

Wahdé sajjahén mardom cha Issáy mójezah o ajabén karán hayrán atant, gón wati moridán gwashti: ⁴⁴ “Mani é habarán pa sharri delgósh kanét, Ensánay Chokk gón dagá[‡] o dróhag mardománi dastá dayaga bit.”⁴⁵ Bale morid áiy é habará sarpad nabutant, chiá ke pa áyán ramz o rázé at. Cha Issáyá jost kanagesh ham torset.

Mazani chi ent?
(Mattá 18:1–5; Markás 9:33–37)

⁴⁶ Issáy morid watmánwatá é gappay sará dapiák kanagá atant: “Bárén, may nyámá sajjahénáni master o kamásh kay ent?”⁴⁷ Issáyá áyáni delay habar zánt o yak kasánén chokké wati kashá óshtárént o ⁴⁸ gón moridán gwashti: “Harkas ke pa mani námaygi é kasánén chokká gón washwáhagi bezurit o wati gwará bedárit, bezán áiy maná zortag o man-netag. Harkas ke maná bemannit hamá Hodáay mannit ke maná ráhi dátag, chiá ke cha shomá, hamá master ent ke watá cha sajjahénán kastera zánt.”

Á ke shomay badwáh naent, gón shomá ent
(Markás 9:38–40)

⁴⁹ Yuhannáyá gón Issáyá gwasht: “Wájah! Má yak mardé dist ke gón tai námay geragá cha mardomán palitén ruhán dara kant, bale má á makan o manah kort, chiá ke á mard cha má naat.”⁵⁰ Issáyá gwasht: “Na, é kará makanét, chiá ke agan kasé shomay badwáh mabit, gón shomá ent.”

Sámeriáni namannag

⁵¹ Wahdé Issáy chest bayag o ásmáná rawagay wahd nazzik but, gorhá gón deljamén shawré dém pa Urshalimá sar gept.⁵² Bale cha watá pésar, lahtén kásedi ráh dát. Á shotant o Sámeriáni yak métagéá rasetant tánke cha áiy áyagá pésar, pa áiyáyá tayári bekanant.⁵³ Bale

óday mardomán Issá wasshátak nakort chiá ke á Urshalimá rawagá at. ⁵⁴ Wahdé Issáy morid, Ákub o Yuhanná cha é hálá sahig butant, gwashtesh: “Oo Hodáwand! Taw razá dayay má cha Hodáay belóthén ke cha ásmáná áse ráh bedant o eshán besóchit o hák o por bekant?”⁵⁵ Bale Issáyá chakk tarrént, á neherr o hakkal dátant.*⁵⁶ Randá gón wati moridán, dega métagéa shot.

Kay Issáy morid buta kant?
(Mattá 8:19–22)

⁵⁷ Issá o áiy morid, ráhá rawagá atant. Yak mardéa gwasht: “Har jáh ke taw raway man tai hamráha bán.”⁵⁸ Issáyá gwasht: “Róbáhán hóndh o jágah hast o báli morgán kodóh o kodám, bale man ke Ensánay Chokk án, maná pa saray ér kanagá hech jágah nést.”

⁵⁹ Issáyá gón dega mardéa gwasht: “Byá, mani randgiriá bekan.” Bale áiyá passaw dát: “Oo wájah! Maná mókal beday pésará rawán wati petá kabra kanán.”⁶⁰ Issáyá gwasht: “Bell ke mordag wati mordagán wat kabr o kapona kanant, taw beraw o Hodáay bádsháhiay wasshén mestágá pa mardomán sar kan.”

⁶¹ Degaréa gwasht: “Oo wájah! Man tai randgiriá kanán, bale maná bell tán pésará wati lógay mardomán roksat bekanán.”⁶² Issáyá áiy passawá gwasht: “Á kas ke nangár kanagay wahdá poshtá chárit, Hodáay bádsháhiay hezmatkáriay láhek naent.”

10

Pa haptádén moridán Issáy sar o sój
(Mattá 10:1–15; Markás 6:7–13)

¹ Cha eshiá rand, Hodáwandén Issáyá dega haptád* morid gechén kort o hamá shahr o métagán ke rawagi at, cha watá pésar, do doá ráhi dátant o ² gón áyán gwashti: “Keshár báz ent, bale ronók[†] kamm. Paméshká gón kesháray wáhondá dazbandi bekanét o belóthét ke pa wati kesharán ronók dém bedant.³ Berawét, ke man shomará gwaragáni dhawlá, gorkáni nyámá rawána kanán.⁴ Wati sát o saporá gón wat, na zarturag o lót o pélek[‡] bezurét o na chawath o swás. Ráhá, gón kaséa géshén tayárjórhi makanét.

⁵ “Har lógéa ke rawét awalá begwashét: ‘É lógay mardom dráh o émen bátant.’⁶ Cha á lógay mardomán, agan kasé sohl

[‡] **9:44** 9:44 Dagá, bezán préb, repk. Arabi o Pársiá “khiánat”. **§** **9:53** 9:53 Urshalim, Yahudiáni pákén shahr at, bale Sámerián Urshalim pákén shahré namannet. * **9:55** 9:55 Lahtén daznebeshtá átkag: Issáyá gésh kort: “Shomá nazánét gón kojám ruhá hamgranch ét. Chiá ke Ensánay Chokk pa mardománi gár o tabáh kanagá nayátkaag, pa áyáni rakkénagá átkag.” * **10:1** 10:1 Lahtén daznebeshtá “haptád o do” átkag. Anchosh band 17ay tahá. [†] **10:2** 10:2 Ronók, bezán hamá ke keshará borrit o moccha kant. [‡] **10:4** 10:4 Pélek, bezán turag, lót, pélag.

o émeniy lóthók ent, shomay é émeniy wáhag pa áiá rasit o agan á nakarzit, shomay é wáhag padá pa shomá pera tarrít. ⁷ Hamá yakkén lógá bedarét o lóg pa lóg marawét. Harché ke shomará pa waragá dátesh, bwarét o benóshét, chiá ke kár kanók wati rózīgay hakdár ent.

⁸ "Har shahréa ke rawét o á shahray mardom shomará wasshátka kanant, gorhá harché ke pa waragá kárant, bwarét.

⁹ Hamá shahray nádráhán dráh kanét o mardomán begwashét ke Hodáay bádsháhi nazzik ent. ¹⁰ Bale agan shahréa shotét ke á shahray mardomán shomará wasshátka nakort, gorhá cha ódá dar byáét o hamá shahray rahsarán harkasá ke gendét, áyán begwashét: ¹¹ "Shomay shahray hamá danz ke may pádán laggetag, má á danzán hamedá chandhén o takénén, tánke é danz sháhedi bedayant ke má Hodáay wasshén kolaw pa shomá áwort. Bale bezánét ke Hodáay bádsháhi nazzik ent." ¹² Báwar kanét, jost o porsay róchá Sodumay mardománi sezá cha á shahray mardománi sezá o azábá ásánter o kamtera bit.

Issáy bazhn

(Mattá 11:20-24)

¹³ "Bazhn o apsóz pa shomá, oo Korázinay mardomán! Bazhn o apsóz pa shomá, oo Bayt-Saydáay mardomán! Hamá mójegah o ajekkái[§] ke man shomay nyámá pésh dáshtagant, agan Sur o Saydunay shahrán pésh bedáshténant, gorhá óday mardomán hamá wahdá wati gonáháni pashómániay póshák gwará kortagat o poráni sará neshtagatant. ¹⁴ Jost o porsay róchá, Sur o Saydunay mardománi sezá cha shomay sezá o azábá ásánter o kamtera bit. ¹⁵ Oo Kaparáhumay mardomán! Shomá chest kanag o ásmáná baraga bét? Hechbar! Tahtarunay johlánkián sarshakuna bét.

¹⁶ "Agan kasé shomay habarán gósh bedárit, á mani habarán ham gósha dárit. Harkas shomará mamannit, á maná ham namannit o mani namannók áiá ham namannit ke maná ráhi dátág."

¹⁷ Issáy haptádén morid gón shádehi per tarretant o gwashtesh: "Oo Hodáwand! Cha tai námay zórakiá, jenn ham may hokmá mannant." ¹⁸ Issáyá darráént: "Man Shaytán dist ke grókéay dhawlá cha ásmáná kapt. ¹⁹ Man shomará hamá wák o ehtiár dátág ke már o zumm o dozhmenay sajjahén wák o kodratá lagatmál bekanét. Hech chizz shomará táwán dáta nakant o noksána narasénit.

²⁰ Bale pa eshiá delwassh mabét ke jenn shomay hokmá mannant, shomay delwasshi é bebit ke námó ásmáná nebisag butag."

Issáy shádmáni

(Mattá 11:25-27; 13:16-17)

²¹ Hamá damáná, gón Páken Ruhá gal o shádán, Issáyá gwasht: "Oo Pet, zemín o ásmánay Hodábond!* Tará satá kanán o sárháyán ke taw é ráz o habar cha zántkár o hóshmandán chér dátant o kódakáni sará paddar kortant. Oo Pet! Taw cha wati razá o wáhagá é dhawlá kort. ²² Sajjahén chizz, Petá mani dastá dátagant. Abéd cha Petá, hechkas Chokká nazánt, hamé dhawlá, abéd cha Chokká o hamá mardomán ke Chokk belóthit Petá pa áyán paddar bekant, dega hechkas Petá nazánt."

²³ Padá Issáyá pa ehwat o halwatá dém gón moridán kort o gwashti: "Bahtáwar ant hamá chamm ke harché shomá distag á ham begdant. ²⁴ Man shomará gwashán, bázén paygambar o bádsháháni wáhag o morád hamé butag ke harché shomá gendagá ét áyán ham bedistén, bale nadistesh o harché shomá eshkonagá ét áyán ham beshkotén bale naeshkotesh."

Nékén Sámeriy mesál

(Mattá 22:34-40; Markás 12:28-31)

²⁵ Cha Sharyatay kázián yakké, Issáyá kerrá átk o pa áiy chakkasá josti kort: "Oo ostád! Man chón bekanán ke namiránén zenday wáhond bebán?"

²⁶ Issáyá passaw dát: "Sharyatá ché nebeshtah ent, cha áiy wánagá taw ché sarpada bay?" ²⁷ Áiá passaw dát: "Wati Hodáwandén Hodáya, pa del, gón sajjahén ján o sáh, gón sajjahén was o wák o gón sajjahén pahm o pegrá dóst bedár^o hamsáhegá ham wati jenday paymá mehr bekan."[‡] ²⁸ Issáyá gwasht: "Taw sharr gwashtag, hamé dhawlá bekan, tará abadmánén zenda rasit."

²⁹ Nun Sharyatay zánógerá pa é sawabá ke pésh bedárit áiá sharrén josté kortag, cha Issáyá padá jost kort: "Gorhá, mani hamsáheg kay ent?"

³⁰ Áiyá passawá, Issáyá chosh gwasht: "Yahudi mardé cha Urshalimá dém pa Ariháay shahrá rawagá at. Ráhá, dozzán gept o áiy mál o maddhi[§] polet o áiy pocch o póshák pach geptant, jat, latth o kottth o némzadag kort o ráhay sará dawr dát o shotant. ³¹ Bé gat o gománá, cha hamé ráhá yak dīni péshwáé gwazagá at, wahdé é mardi dist,

§ **10:13** 10:13 Ajekkái, bezán mójegah, hayrán kanóken kár. * **10:21** 10:21 Hodábond, bezán wáyah, wáhond, málek, sáheb. † **10:27** 10:27 Láwián 19:18. ‡ **10:27** 10:27 Sharyatay Domi Rahband 6:4 o rand. § **10:30** 10:30 Maddhi, bezán ganj o hasti.

wati ráhi táb dát o gwast. ³² Hamé dhawlá, mazanén parasteshgáhay hezmatkáré ham cha hamé ráhá gwazagá at, wahdé á mardi dist gwast o shot. ³³ Bale randterá, Sámeri kawmay* yak mardé cha ódá gwazán, hamé jágahá raset. Wahdé á mardi dist, áiy sará bazzagi but, ³⁴ áiy kerrá átk o thappi gón sharáb o théll darmán kort o bastant, wati óláká swár kort, yak kárwánsaréá áwort o áiy hayáldárii kort. ³⁵ Domi róchá, kárwánsaréay hodábondi do dinár dát o gwashti: 'É marday hayáldáriá bekan, agan cha é zarrán géshter pakár but per tarragay wahdá tará dayán.' "

³⁶ Gorhá Issáyá cha hamá Sharyatay zánógerá jost kort: "Taw ché gwashay, cha á sayénán kojámíá gón é zadag o thappigén mardá wati hamsáhegi zemmahwári sarjam kort?" ³⁷ Áiá passaw dát: "Hamá ke áiy sará bazzagi but." Issáyá gwasht: "Beraw taw ham anchosh bekan."

Issá, Maryam o Martáay lógá

³⁸ Issá o áiy morid, gwazán o pand janán, átk o métagéa rasetant. Ódá, Martá námén janénéá Issá wati lógá mehmán kort. ³⁹ Martáyá Maryam námén goháré hastat ke pa Hodáwandén Issáyá habaráni gósh dárágá áiy pádáni démá nesht.

⁴⁰ Bale Martá ke mehmániay káráni chen o lánchá dazgatth at, Issáyá kerrá átk o gwashti: "Oo Hodáwand! Tará é habaray parwáh nést ke mani gohárá maná kár kanagá tahná yalah dátag? Begwashí maná komak bekant." ⁴¹ Bale Hodáwandén Issáyá passaw dát: "Martá, oo Martá! Taw bázén kár o báráni sará watá negrán o deltaparkaha† kanay, ⁴² bale tahná yak chizz zalurat ent. Maryamá hamá gehterén pa wat gechéen kortag ke cha áiá pach geraga nabit."

11

Dwáay bárawá

(Mattá 6:9-13; 7:7-11)

¹ Yak baré Issá jágahé dwá kanagá at, wahdé dwái hallént, cha áiy moridán yakkéa gwasht: "Oo Hodáwand! Anchosh ke Yahyáyá wati morid dwá kanag sój dátagant hamé paymá taw ham márá dwá kanag sój beday." ² Issáyá gwasht: "Harwahd dwá kanét, é dhawlá begwashét:

'Oo Pet!† Tai nám sharapdár bát. Tai bádsháhi byáyát.†

³ May har róchigén rezk o rózigá har róch márá beday.

⁴ May gonáh o radián bebaksh, anchosh ke má wati sajjahén daynkárána bakhshén. Márá ázmaesh o chakkásá dawr maday.' "‡

⁵ Gorhá Issáyá gwasht: "Cha shomá yakké, agan shapnéma wati sangatay lógá berawt o begwashit: 'Oo brát! Maná say nán pa badal beday, ⁶ ke dósté cha separá átkag o mani lógá pa waragá hech nést,' ⁷ buta kant á cha wati lógá jwáb bedant o begwashit: 'Oo dóst! Maná delsyáh makan, lógay dap band ent o man gón chokkán waptagán. Annun pád átká nakanán tará chizzé bedayán.' ⁸ Shomará gwashán, é mard agan pa dóstiá pád mayayt o áiá chizzé madant, bale cha áiy bázén lézgi o lés o pellésá§ páda kayt o harché á lóthit danti.

⁹ "Nun shomará gwashán: Belóthét, shomará dayaga bit. ShóháZ bekanét, dara géjét. Darwázagá bethokkét, pacha bit. ¹⁰ Chiá ke harkas belóthit, áiá rasit. Harkas shóháZ bekant, dara géjít. Harkas darwázagá bethokkit, pa áiá pacha bit.

¹¹ "Shomay nyámá choshén peté hast ke agan áiy chokk máhig belóthit máré bedanti? ¹² Yá agan hayké belóthit, zummé bedanti? ¹³ Nun agan shomá ke radkár ét, angat ham wati chokkán sharrén chizzáni dayagá zánét, gorhá may ásmáni Pet chenkadar shartera zánt ke wati lóthókén chokkán Pákén Ruhá bedant."

Issá o Belzabul

(Mattá 12:22-30, 43-45; Markás 3:22-27)

¹⁴ Yak baré, Issá cha yakkéa jenné dar kanagá at ke áiá é mard gong kortagat. Wahdé jenn dar átk, gongén mard habar kanagá lagget o sajjahén mardom hayrán butant. ¹⁵ Bale lahténá gwasht: "Issá cha jennáni sardár Belzabulay sarókiá, jennána kasshit." ¹⁶ Dega lahténá pa Issáyá chakkásagá cha áiá ásmáni neshánié lóthet. ¹⁷ Bale Issáyá áyáni delay hál o habar zántant o gwashti: "Agan yak molkéa nátepáki bekapit, á molk gár o zawála bit, agan yak lógeay mardom gón wat jang o jérhah bekanant, á lóg haráb o barbáda bit. ¹⁸ Agan Shaytán gón wat jang bekant, gorhá áiy bádsháhi chón barjáha mánit? Shomá gwashét ke man cha jennáni sardár, Belzabulay komaká jennán dara kanán. ¹⁹ Nun agan

* **10:33** 10:33 Yahudián Sámeri gomráh zántagant o gón áyán dayger o badal o bándát nakortag. † **10:41** 10:41 Deltaparkah, bezán paréshán, deltrakk. * **11:2** 11:2 Lahtén daznebeshtá átkag: Oo ásmáni Pet. † **11:2** 11:2 Lahtén daznebeshtá átkag: tai wáhag o erádah zeminay sará ham hamá dhawlá sarjam bát ke ásmáná sarjama bit.

‡ **11:4** 11:4 Lahtén daznebeshtá gésh kanag butag: o márá cha sherr o Shaytáná berakkén. § **11:8** 11:8 Yá: pa laj o mayáray háterá. Lés o pellés, bezán bázén takrár.

man gón Belzabulay sarókiá jennán dara kanán, gorhá shomay jenday chokk o morid gón kai zór o wáká jennán dara kanant? É paymá, shomay morid wat shomará mayáriga kanant. ²⁰ Bale agan man gón Hodáay zór o wáká jennán dara kanán, bezánét ke Hodáay bádsháhi shomay nyámá rasetag.

²¹ “Agan yak zóráwarén mardomé seláhband bebit o wati lógay negahpániá bekat, gorhá áiyai mál o melkat barjáha mánant. ²² Bale agan zórmandterén mardomé áiyai lógay sará hamlah o orosh* bebárt o cha áiyai sardast bebit, hamá seláhán ke á mard cha áyán deljam at, cha áiyai pacha gipt o áiyai mál o melkatá bahr o banga kant. ²³ Kasé ke mani hamráh o dózwáh naent á mani badwáh ent, kasé ke moch o yakjáh kanagá gón man hór naent, á tak o park o sheng o shánga kant.

²⁴ “Wahdé jenné cha kaséá dara kayt, gorhá gyábánána rawt tán pa wati árami o ásudagiá jáhé shóház bekat, bale choshén jágahé narasiti. Gorhá gwashit: ‘Cha ódá ke dar átkagán, padá hamódá rawán.’ ²⁵ Wahdé pera tarrít o gendít ke á jágah roptag o sáp o sallah ent, ²⁶ gorhá rawt o cha watá dega hapt selterén jenna kárit. Á sajjahén, horigá ódá rawant o ord o bonaga kanant. É dhawlá, á mardomay ásar o ákebat cha pésarigéná angat badtera bit.”

²⁷ Hamé wahdá ke Issá é habarán kanagá at cha mardománi nyámá yak janénéá gwánk jat: “Bahtáwar hamá mát ent ke cha áiyai lápá taw pédá butagay o tará shiri méchéntag.” ²⁸ Issáyá áiyai passawá darráént: “Bahtáwar hamá ant ke Hodáay habarán gósha dárant o áyáni sará kára kanant.”

Neshániay lóthag

(Mattá 12:39–42; Markás 8:12)

²⁹ Wahdé mardománi mocchi géshter bayán at, Issáyá gwashit: “É zamánagay mardom sherr o zenahkárén mardom ant. Ajabbatén neshánia lóthant, bale áyán Yunes nabiyai neshániá abéd, dega hech neshánié dayaga nabit. ³⁰ Anchosh ke pa Naynawáay mardomán Yunes yak neshánié at, hamé paymá Ensánay Chokk ham wat pa é zamánagay mardomán yak neshánié bit. ³¹ Jost o porsay róchá, Sabáay malakah† gón é zamánagay mardomán horigá páda kayt o áyán mayáriga kant, chiá ke Sabáay malakah cha donyáay á dastá átk tán Solaymánay hekmatá

beshkont. Bale nun cha Solaymáná masteréné edá ent. ³² Jost o porsay róchá, Naynawáay mardom gón é zamánagay mardomán horigá páda káyant o áyán mayáriga kanant, chiá ke á, Yunesay dháh o hozhárábashay sará cha wati gonáhán pashómán butant. Bale nun cha Yunesá masteréné edá ent.

Jesm o jányai rozhnáí

(Mattá 5:15; 6:22–23)

³³ “Hechkas cherágá pa chér dayagá róka nakant o na áiyai tagaray chérá éra kant. Áiyai cherágdánay sará éra kant, tán harkas ke lógá kayt áiyai rozhnáíi begendit. ³⁴ Tai chamm, jesm o jányai cherág ent. Wahdé tai chamm wassh o dráh ent, tai sajjahén jesm o ján rozhnága bit, bale agan tai chamm nádráh bebit, gorhá tai jesm o ján ham tahára bit. ³⁵ Hozhár bay, é nur o rozhn ke tará hastent, tahár mabit. ³⁶ Agan tai sajjahén jesm o ján rozhnág bebit o áiyai hech bahré tahár mabit, gorhá sarjamiá drapshnáka bit, anchosh ke cherágay shahm tará rozhnága kant.”

Parisi o Sharyatay zánógeráni mayárig kanag

(Mattá 23:1–36; Markás 12:38–40; Luká 20:45–47)

³⁷ Wahdé Issáyá habar halás kort, yak Parisiéá á wati lógá mehmán kort, Issá áiyai lógá shot o pa warákay waragá parzónagay sará nesht. ³⁸ Bale wahdé Parisiá dist ke Issáyá cha waragá pésar dast nashoshyant hayrán mant. ³⁹ Gorhá Hodáwandén Issáyá dém gón áiyai kort o gwashiti: “Shomá Parisi, pyálah o darpáni dhanni némagá sáp o sallaha kanét, bale shomay darun cha lálech o tamah o radén kárán porr ent. ⁴⁰ Oo násarpadán! Áiyai ke shomay dhanni némag, bezán jesm o ján addh kortag, shomay del o darun ham hamáia najórhéntag? ⁴¹ Gorhá cha darunay chizzán hayrát bedayét tán sajjahén chizz pa shomá pák o sallah bebant.

⁴² “Oo Parisián! Bazhn o apsóz pa shomá ke purchénk o sadáp o é dega káhokáni sará dahyakka dayét bale cha dádrasi‡ o ensáp o Hodáay mehrá béhayál o bétránag ét. Dréगतá,§ shomá é kár bekorténant o á ham yalah madáténant. ⁴³ Oo Parisián! Bazhn o apsóz pa shomá ke kanisaháni awali red o srabay nendag o bázarán mardománi wasshátk o drahbátán dósta dárét. ⁴⁴ Bazhn ent, shomá hamá kabráni paymá ét ke áyáni sará seng o shakk* nést o gendaga nabant

* 11:22 11:22 Oros, bezán hamlah. † 11:31 11:31 Asligén Yunáni nebeshtánka gwashit: “jonubay malakah”.

‡ 11:42 11:42 Dádrasi, bezán hakkén paysalah, hamá shawr ke cha dádgáhána kayt, dáwari. § 11:42 11:42

Dréगतá, bezán dréché, Pársiá “káshki”. * 11:44 11:44 Shakk, bezán kabray seng ke áiyai sará mordagay námá nebisant.

o mardom pa názánti áyána lapáshant o gwazant.”

⁴⁵ É habaráni sará Sharyatay káziéa gwasht: “Oo ostád! Taw gón wati é habarán, márâ ham béezat kanagá ay.”
⁴⁶ Issáyá gwasht: “Oo Sharyatay kázián! Pa shomá ham bazhn o apsóz ent. Shomá mardománi chakká gránén bára laddhét ke cha áyáni zórâ gësh ent, bale wat pa komak kanagá, lankok o mórdánagé† ham nasorénét.

⁴⁷ “Bazhn o apsóz pa shomá! Hamá nabiáni kabráni sará gombod o addi-
raha bandét ke shomay pet o pirokán
koshtagant. ⁴⁸ É paymá, shomá wat
áyáni é káray sháhed o mannóger ét.
Shomay pet o pirokán paygambar koshta-
gant o shomá áyáni kabráni sará addi-
raha bandét. ⁴⁹ Paméshká, Hodáyá cha
wati hekmatá gwashtag: Man paygambar
o kásed pa áyán ráha dayán, bale á
lahténâ koshtant o lahténâ ázara dayant.
⁵⁰ Paméshká cha donyáay bongéjâ hamá
sajjahén paygambar ke mardomán koshta-
gant, áyáni hón é zamánagay mardománi
gardenâ ent, ⁵¹ bezán Hábilay hónâ beger
tán Zakaryáay hónâ, ke korbánjâ o
mazanén parasteshgáhay nyamá réchag
but. Haw! Shomárâ gwashán ke é
zamángay mardom, á sajjahén hónáni
daynkár ant.

⁵² “Oo Sharyatay kázián! Bazhn ent ke
shomá zántkáriay hazánagay kelit zort o
bort, na wat tahâ átkagét o na á ke ráhâ
ant, tahâ rawagá eshtagant.”

⁵³⁻⁵⁴ Wahdé Issá cha ódá dar átk, Parisi
o Sharyatay zánóger gón zahrnáki áiay
démâ óshatant o bázén jost kanagá lagge-
tant, tán Issáyá cha áiay jenday habarán
mán begishshéant o dâmâ dawr bedayant.

12

Ryákariay homir (Mattá 10:26-27)

¹ Hamá wahdá, hazárán mardom mocch
but o yakdomiá gwarmósh dayán o
lapáshán at. Issáyá pésarâ dém gón
moridán tarrént, wati gapp o tráni bongéj
kort o gwashti: “Cha Parisiáni homirá ke
ryákári o dotal o dopóstiay homir ent,
watâ dur bedárét, ² chiá ke hech chérén
káré nést ke záher o paddar mabit o
choshén andém o panáhén chizzé nést ke
áshkár o démdará mabit. ³ Paméshká,
har habaré ke shomá shapay taháriá ko-
rtag, róchay rozhnáíá eshkonaga bit o har
habaré ke shomá dapbandén lógáni tahâ

pa halwat kortag, cha lóg o bánáni sará jár
janaga bit.

Matorsét

(Mattá 10:19-20, 28-33; 12:32)

⁴ “Oo mani dóstán! Shomárâ gwashán
ke cha mardomán matorsét. Á shomay
jesm o jáná koshta kanant, bale cha eshiá
gështer hecch korta nakanant. ⁵ Man
shomárâ kaddhana kanán o gwashán ke
cha kayâ betorsét. Cha hamáíá betorsét
ke koshta kant o koshtagá rand tahtarunâ
dawr dayagay wáki ham hast. Haw!
Man shomárâ gwashán ke cha hamáíá
betorsét. ⁶ Panch jenjeshk pa do paysahâ*
bahá nabit? Bale Hodá cha áyán yakkéá
ham béhayála nabit. ⁷ Hodáyá shomay
saray mudáni hesáb ham gón ent, gorhá
matorsét chiá ke shomay kadr o arzesh cha
sajjahén jenjeshkán gështer ent.

⁸ “Man shomárâ gwashán ke harkas
mardománi démâ maná bemannit,
Ensánay Chokk Hodáay préshtagáni démâ
áiá mannit. ⁹ Bale harkas mardománi
démâ maná mamannit, man ham
Hodáay préshtagáni démâ áíá namannán.
¹⁰ Hamé dhawlá, agan kasé Ensánay
Chokkay helápâ habar bekant pahell
kanaga bit, bale harkas Hodáay Pákén
Ruhay sarâ kopr bekant, á bakshaga nabit.

¹¹ “Mardom shomárâ gerant o
kanisahána barant o hákem o hokumatáni
démâ pésha kanant. Á wahdá, pa
wati démpániá† paréshán mabét ke
ché begwashét, ¹² chiá ke Pákén Ruh
shomárâ hamá wahdá wat sója dant ke
ché begwashét.”

Nádánén zemindáray mesál

¹³ Cha mardománi mocchiá, yakkéá gón
áiá gwasht: “Oo ostád! Mani brátâ
begwash ke cha petay mirásâ mani bahrâ
begishshéni o bedant.” ¹⁴ Issáyá passaw
dát: “Oo mard! Kaséá maná shomay
mirásay bahr kanók nakortag.” ¹⁵ Gorhá
gón mardomán gwashti: “Hozzhár bét!
Watâ cha har dhawln tamah o lálechâ
dur bedárét, chiá ke mál o dawlatay
zyádahi ensánay zenday maksad o morád
naent.”

¹⁶ Áíá yak mesálé dát o gwashti: “Yak
hastómandén zemindaré hastat ke áíá cha
wati dhagár o keshárán bázén dahl o
rasadé raset. ¹⁷ Nun wati delâ pegri
kort ke ‘ché bekanán? Maná pa esháni
ambár kanagá jágah nést.’ ¹⁸ Gorhá gón
wat gwashti: ‘Nun zánton ché bekanán.
Wati ambárána karóján o harába kanán
o esháni jágahá masterén ambára bandán

† **11:46** 11:46 Mórdánag, bezán lankok, band o bóg.
asariun.” Asariun á zamánagá kamnehádén zarré at. †

* **12:6** 12:6 Asligén Yunáni nebeshtánk gwashti: “do
12:11 12:11 Démpáni, bezán wati rakkénagay johd, Arabi

o sajjahén dán o málán hamódá ambára kanán. ¹⁹ Padá gón wata gwashán: “Taw pa bázén sálán mazanén malé mocch kortag. Nun ásudag bebay, wassh bwar o benósh o shádehi kan!” ²⁰ Bale Hodáya gwasht: ‘Oo nádán! Enshapi tai sáh cha taw gera bit, gorhá tai é mocch kortagén mál o melkat kaiga bant?’

²¹ “Esh ent á mardomay ásar o ákebat ke pa wat mál ambára kant bale Hodáay gwará hastómand naent.”

Ásudagén zend
(Mattá 6:25–33)

²² Issáyá gón wati moridán gwasht: “Paméshká shomará gwashán ke pa wati zendá paréshán o deltaparkah mabét ke ‘Ché bwarén?’ na pa wati jesm o jáná ke ‘Ché bepóshén?’ ²³ chiá ke zend, cha waráká o jesm o ján, cha pósháká géshtera karzit. ²⁴ Gwarágán bechárét, na keshant o na ronant o na kahdán o ambáresh hast. Bale angat Hodá áyán róziga dant. Shomay arzesh o kimmat cha morgán báz géshter ent. ²⁵ Kasé gón pegr o hayáláni zóra wati zenday róchán sáhaté ham gésh korta kant? ²⁶ Agan shomá inchokén kasánén káré korta nakanét, gorhá chiá zenday dega chizzáni bárawá pegra kanét?”

²⁷⁻²⁸ “Oo kambáwarán! Gol o polláni némagá delgósh kanét ke chón rost o rodóma kanant. Na zahmaté kasshant o na réstant o gwapant, bale man shomará gwashán ke Solaymán bádsháhá gón wati mazanén shán o shawkatá, hechbar choshén dhawldárén póshák gwará nabutag, chosh ke é poll zébá o brahdár ant. Wahdé Hodá gyábány káhán ke maróchi hasant o bándá taruná sóchaga bant, é dhawlá zébá o brahdára kant, gorhá shomará che paymá sharterén pósháka nadant? ²⁹ Paméshká pa ward o warákay shóházá watá delsyáh makanét. ³⁰ Donyáay sajjahén Hodánábáwarén mardom é chizzáni randá tachant, bale shomay ásmáni Peta zánt ke shomará é chizz pakár ant. ³¹ Shomá Hodáay bádsháhiay shóházá bebét, é sajjahén wat shomará dayaga bant.

³² “Oo maní kasánokén romb o thóli! Matorsét chiá ke shomay ásmáni Petay razá o wáhag hamesh ent ke bádsháhiá shomará bedant. ³³ Wati mál o melkatá bahá kanét o nézgáráni sará bahr kanét. Pa wat anchén zarturag addh bekanét ke hechbar kwahn mabant, nahallagi o abadmánén ásmáni ganjé ambár kanét ke na dozz áiá bárt o na warók o raméz ^S áiá

wárt. ³⁴ Shomay del hamá jáhá rawt ke mál hamódá ent.

Pa Issáy per tarragá tayár bebét
(Mattá 24:42–51)

³⁵ “Lánká bebandét o wati cherágá rók o rozhnágí bedarét. ³⁶ Hamá hezmatkár o dazbójáni paymá bebét ke rahchár ant áyáni hodábond kadén cha sur o árósay shádehián pera tarrít o anchosh ke kayt o darwázagá thokkit, á darwázagá pacha kanant. ³⁷ Bahtáwar ant hamá hezmatkár ke áyáni hodábonda kayt o gendít ágáh o hozhár ant. Báwar kanét hodábond wat pa áyáni hezmatá lánka bandít, áyána nendárénit o warag démá dant. ³⁸ Bahtáwar ant hamá hezmatkár agan áyáni wájah shapay domi yá saymi pásá byayt, begendít ke ágáh ant. ³⁹ Shomá sharra zánét, agan lógay hodábondá bezántén dozz kojám wahdá kayt, gorhá áiá hechbar dozz wati lógá pa dozziá naeshtagat. ⁴⁰ Hamé paymá tayár bebét, chiá ke Ensánay Chokk anchén wahdéa kayt ke shomá áiay entezár o wadará nabét.”

⁴¹ Petosá gwasht: “Oo Hodáwand! É mesál taw pa má áwort yá pa sajjahénán?” ⁴² Hodáwandén Issáyá gwasht: “Wapádár o shiwwárén kármaster hamá ent ke hodábond áiá wati é dega sajjahén hezmatkáráni master bekant tán áyán pa wahd ward o warák bedant. ⁴³ Bahtáwar ent hamá hezmatkár ke wahdé hodábonda kayt, áiá hamá káráni sará gendít. ⁴⁴ Shomará rásténa gwashán, hodábond hamá hezmatkára wati sajjahén mál o hastiay kármastera kant.

⁴⁵ “Bale agan hamá kármaster wati delá begwashit: ‘Angat mani hodábonday áyagá báz wahd hast’ o paméshká warag o charagá malár o hanósh bebit o wati hamkárén golám o móledán latth o kothh bekant. ⁴⁶ Áiay hodábond anchén róch o sáhatéa kayt o rasit ke á nazánt o wadará naent. Gorhá hodábond áiá thokkor thokkora kant o béwapá o nábáwaráni nyámá dawra dant.

⁴⁷ “Á hezmatkár ke wati hodábonday wáhag o delkasshiána zánt, bale angat áiay razá o morádáni sará kár kanagá watá tayára nakant, bázén latthé wárt. ⁴⁸ Bale hamá ke pa názánti anchén radé jant ke latth o koththay sezáwar ent, kamter lattha wárt. Chiá ke cha masterén mansabdará géshter jost o porsa bit o kaséa ke géshter zemmahwári dayag butag, cha áiá géshter hesáb geraga bit.

‡ 12:25 12:25 Yá: wati báládá yak dasté borzter korta kant. § 12:33 12:33 Warók o raméz, bezán gwandhén kern o lulok ke dár o poccha wárt.

Issáy randgiri
(Mattá 10:34-36)

⁴⁹ “Man donyáya átkagán ke ásé rók bekanán. Drégatá é wahdí á ás rók butén. ⁵⁰ Bale cha áia pésar, maná pákshodié zalurat ent,* ke pa áiy sarjam kanagá báz paréshán o bétáhir† án. ⁵¹ Gomána kanét man átkagán tán zeminay sará tepáki o sohl byarán? Na, man pa jetáiy aragá átkagán. ⁵² Cha é damáná o rand, har lógay panchén mardománi nyamá jetáia kapit, say doay helápá o do sayay helápá bit. ⁵³ Pet gón chokká nátepáka bit o chokk gón petá, jenek cha matá jetá bit o mát cha jeneká, wassig gón neshará nátepáka bit o neshár gón wassigá.”

Neshániáni pajjár
(Mattá 5:25-26; 16:2-3)

⁵⁴ Gorhá Issáyá gón mardomán gwasht: “Wahdé shomá dém pa rónendá gendét ke jambaréá bastag, hamá damáná gwashét ke hawra bit o hawr ham gwárit. ⁵⁵ Wahdé cha jonubá gwáta kasshit, gwashét ke maróchi garm o lewára bit o hamé dhawlá ham bit. ⁵⁶ Oo dopóstén shatalkarán! Wahdé shomá zemin o ásmánay rang o neshániána zánét ke ché bayagi ent, gorhá chón é annugén zamánagay neshánián kesás korta nakanét?”

⁵⁷ “Shomá pa ché rástiá wat kesás korta nakanét? ⁵⁸ Wahdé gón wati daynkará hakdiwán‡ raway, johd kan ráhá gón áia pa ohalá saláh berasay. Chosh mabit ke tará káziay Kerrá bebárt o á tará sepáhigay dastá bedant o sepáhig tará bandijáhá bebárt o jél bekant. ⁵⁹ Tará gwashán, tán wahdé ke taw zarráni goddhi pai o paysahá porr makanay, cha ódá ázáta nabay.”

13

Pashómán bebét

¹ Hamá wahdá, lahténá gón Issáyá á Jalili mardománi bárawá hál o habara kort ke Pilátusá koshtagatant o áyáni hón, gón hamáyáni korbánigén dalwatáni* hóná hór o hawár kortagat. ² Issáyá áyáni passawá gwasht: “Shomá gomána kanét, á Jalili ke pa choshén bazzagi o syahróchié dochár kaptant, cha á degarán gonahkárter atant? ³ Man shomará gwashán na, chosh naent, bale agan cha wati gonáhán pashómán mabét, shomá ham hamáyáni dhawlá gár o gomsára bét. ⁴ Gomána kanét hamá hazhdahén mardom ke Siluháay borj áyáni sará kapt o mortant, cha Urshalimay á

dega sajjahén mardomán radkárter atant? ⁵ Man shomará gwashán na, shomá ham, agan cha wati gonáhán pashómán mabét, hamáyáni dhawlá gár o gomsára bét.”

⁶ Padá Issáyá pa áyán mesalé jat: “Mardéa wati anguri bágá enjiray drachké hastat. Yak róché, á enjiray baráni chárágá bágá shot, bale baré nadisti. ⁷ Gorhá gón wati bágpaná gwashti: ‘Say sál ent ke man é enjiray baráni chárágá káyán bale heccha nagendán. Begoddhi tán zeminá bébar o bésamar makant.’ ⁸ Bale bágpaná passaw dát: ‘Wájah! Dega yak sálé belli, man eshiay boná kóchán o kolóndhán o samáta dayán, ⁹ démi sálá, agan bari dát sharr, agan nadáti gorhá begoddhi.’”

Kompén janénéay drahbakshi

¹⁰ Shabbatay róché, Issá yak kanisahéa mardomán sabak o tálim dayagá at. ¹¹ Yak janéné hamódá at ke hazhdah sálá, yak arwáhéa nádráh kortagat. Kompi jatagat o hech dhawlá wati sréni tachk korta nakort. ¹² Wahdé Issáyá chamm pa áia kaptant, tawári kort o gwashti: “Oo janén! Taw cha wati nájórhiá raketay.” ¹³ Issáyá wati dast áiy sará ér kort o hamá damáná á kompén janénay srén tachk but o Hodáay sepat o sanáyá lagget.

¹⁴ Bale kanisahay master pa é sawabá ke Issáyá Shabbatay róchá drahbakshi kortagat nárazá but o gwashti: “Shomará pa wati kárán shash róch hast o hamá róchán pa wati drahbakshiá byáét, na ke Shabbatay róchá.” ¹⁵ Hodáwandén Issáyá áiy passawá darráent: “Oo shatalkarén ryákarán! Cha shomá hechkas Shabbatay róchá wati har o gókán cha wati banjáhána nabójit o dhanná pa áp dayagá nabárt? ¹⁶ Gorhá, é janén, ke Ebráhémay nasl o padréch ent o hazhdah sál ent ke Shaytáná wati bandig kortag, chiá Shabbatay róchá cha wati azábán ázát o ásudag kanag mabit?”

¹⁷ Wahdé Issáyá chosh gwasht, áiy sajjahén badwáh pashal o sharmendag butant. Bale é dega sajjahén mardom cha Issáyé é mójezah o ajabén karán báz washdel o shádán butant.

Hodáay bádsháhiay do mesál
(Mattá 13:31-33; Markás 4:30-32)

¹⁸ Randá, Issáyá gwasht: “Hodáay bádsháhi che paymá ent? Áia gón chónén chizzé hamdarwar bekanán? ¹⁹ Hodáay bádsháhi, thélkáhay† tohmay paymá ent ke mardéa zort o wati bágá kesht. Á dánag rost o drachkéay dhawlá but o báli morgán

* 12:50 12:50 Issáyá máná wati mark ent. † 12:50 12:50 Bétáhir, bezán náarám, békarár. ‡ 12:58 12:58 Hakdiwán, bezán ámidgés, dádgáh. * 13:1 13:1 Dalwat, bezán haywán. † 13:19 13:19 Thélkáh, bezán hardal.

áiy ták o tháláni chérá kodóh o kodám bast.”

²⁰ Padá gwashti: “Man pa Hodáay bádsháhiá chónén mesálé pësh bekanán?”

²¹ Hodáay bádsháhi hamá homiray paymá ent ke janénéá zort o gón bázén ártéá[‡] hawár kort o kam kammá sajjahén árt gwát gept o homir but.”

Tankén darwázag

(Mattá 7:13-14, 21-23)

²² Issá shahr pa shahr o métag pa métag mardomán tálim dayán dém pa Urshalimá rawagá at, ²³ yakkéá jost kort: “Oo wájah! Bären, cha mardomán, tahná kammokéné rakkít?” ²⁴ Áiá passaw dát: “Johd kanét cha tankén darwázagá begwazét, chiá ke man shomárá gwashán, bázéné cha hamé darwázagá gwazagay johdá kant, bale gwasta nakant. ²⁵ Wahdé kayt ke lógay hodábond páda kayt o lógay darwázagá banda kant, gorphá shomá lógay dapá óstét o harchont darwázagá thokkét o tawára kanét: ‘Oo wájah! Darwázagá pa má pach kan!’, bale á passawa dant ke ‘man shomárá pajjáha nayarán o nazánán cha kojá ét.’ ²⁶ Shomá gwashét: ‘Má gón taw hamwán[§] o hamdiwán butagén o taw may damk o kuchahán mára tálim dátag.’ ²⁷ Bale á passawa dant: ‘Man shomárá pajjáha nayarán o nazánán cha kojá ét? Oo radkarán! Cha mani démá dur bét.’ ²⁸ Á wahdá, gréwét o dantán pa dantána droshét, chiá ke Ebráhém, Eshák, Ákub o sajjahén paygambarán, mán Hodáay bádsháhiá gendét, bale wat cha Hodáay bádsháhiá dhanná dawr dayaga bét.

²⁹ “É dega mardom cha ródarátk* o rónend o cha shomál o jonubay chárén némagána káyant o Hodáay bádsháhiay parzónagay sará nendant. ³⁰ Haw, an-chosh ent ke áheri, awalía bant o awali, áheria bant.”

Pa Urshalimá Issáy gam o andóh

(Mattá 23:37-39)

³¹ Hamá wahdá, lahtén Parisi, Issáy gwará átk o gwashtesh: “Nun taw é jágahá yalah kan o dega jáhéá beraw, chiá ke Hirudis tai koshagay randá ent.” ³² Áyáni passawá gwashti: “Berawét á róbáhá begwashét ‘Maróchig o bándá, jennána kasshán o mardomán dráha kanán o saymi róchá, wati kára sarjam pa sara rasénán.’ ³³ Bale maróchi, bándát o póshi, allamá wati é sát o separá démá barán, chiá ke hech paygambaray kósh cha Urshalimá dhanná nabít.

³⁴ “Urshalim, oo Urshalim! Taw paygambarána koshay o Hodáay ráh dátágénán sengsára kanay. Báz randá man lóthetag tai chokkán wati kerrá mocch o yakjáh bekanán, anchosh ke nekénkén morgé chureg o chippokán wati bál o bánzoláni chérá moccha kant, bale shomá nalóthet.

³⁵ Nun shomay lógay ákebat, shomay wati dastá yalah dayaga bit. Shomárá gwashán dega baré maná nagendét tán á wahdá ke cha wati zobáná begwashét: ‘Mobáarak bát hamá ke pa Hodáwanday námá kayt!’ [†]

14

Issá Parisiéay lógá mehmána bit

¹ Shabbatay róché, Issá pa warákay waragá cha Parisi sarókán yakkéay lógá shotagat. Óday mardom pa delgósh áiá chárágá atant ke bären ché kant? ² Áiy dém pa démá, mardé at ke gón jalandaray nádráhiá* gwát geptagat. ³ Issáyá cha Sharyatay kázi o Parisián jost gept: “Shabbatay róchá nádráháni dráh kanag rawá ent yá na?” ⁴ Bale á bétawár butant. Gorphá Issáyá á marday dast gept, dráhi kort o roksat dát ke berawt.

⁵ Gorphá Issáyá dém gón áyán tarrént o gwashti: “Cha shomá kay ent ke áiy chokk yá gók Shabbatay róchá chátá bekapit o áiá hamá damáná cha chátá dar makant?” ⁶ Bale áyán hech passaw dát nakort.

⁷ Wahdé Issáyá dist ke mehmán, che paymá diwánjáhay sharterén jágahán gechén kanagá ant, gorphá é mesáli dát o gwashti: ⁸ “Wahdé taw pa sur o ároséá lóthaga bay, diwánay sharterén jágahán manend, balkén cha taw masterén mardomé ham lóthag butag. ⁹ Gorphá, á mehmándár ke shomá har doéni lóthetagant, tará gwashit: ‘Wati jáhá áiá beday.’ Gorphá taw pashal o sharmendaga bay o nácháriá, cha sajjahénán jahiltera nenday. ¹⁰ Wahdé kasé tará mehmán bekat, sajjahénáni poshtá benend, tánke mehmándár wat byant o begwashit: ‘Oo mani dóst! Byá o démáter benend.’ Á wahdá, taw á dega mehmánáni chammá sharapdártera bay. ¹¹ Chiá ke harkas watá mazana zánt o lékit,† kamsharapa bit o harkas watá jahl o érdasta mannit, washnám o sharapdára bit.”

¹² Gorphá, Issáyá gón mehmándará gwasht: “Wahdé taw pa sobáreg yá shámá mehmánia kanay, wati sangat, brát o syád yá hastómandén hamsáhegán malóth,

‡ **13:21** 13:21 Asligén Yunáni nebeshtánka gwashit: “say sátá”, bezán cha bist litará gész. § **13:26** 13:26 Hamwán, bezán yakjáh warák warag. * **13:29** 13:29 Ródarátk, bezán hamá némag ke róch dara kayt, mashrek. † **13:35** 13:35 Zabur 118:26. * **14:2** 14:2 Jalandar nádráhié ke dast yá pád cha ápa gwáta gerant. † **14:11** 14:11 Lékag, bezán hesáb árag.

chosh mabit ke á ham tai mehmániay badalá, tará mehmán bekanant o taw wati mehmániay badalá begeray. ¹³ Wahdé mehmánia kanay, gorhá nézgar o mondh o lang o kórán belóth. ¹⁴ Gorhá bahtáwara bay, chiá ke áyáni kerrá chizzé nést tará badalá bedayant o taw wati mozzá pahrézkáráni padá zendag bayagay wahdá geray.”

*Mazanén mehmániay mesál
(Mattá 22:1-10)*

¹⁵ Cha óday mehmánán yakkéá, gón é habaray eshkonagá gwasht: “Bahtáwar ent hamá ke Hodáay bádsháhiay mehmánia waraga wárt.” ¹⁶ Issáyá passaw dát o gwashti: “Mardéá mazanén mehmánié kort o bázén mardomé lótháent. ¹⁷ Mehmániay róchá, gón wati golámá gwashti: ‘Beraw mani mehmánán begwash: ‘Byáét ke har chizz nun tayár ent.’” ¹⁸ Bale cha á sajjahénán har yakkéá nimmoné kort o nayátk. Yakkéá gwasht: ‘Man yak dthagaré pa bahá geptag o báyad ent pa áyay chárágá berawán, paméshká pahellia lóthán.’ ¹⁹ Degaréá gwasht: ‘Man panch jopt káigar[‡] geptag o pa áyáni chárág o chakkásagá sar geptagán, paméshká pahellia lóthán.’ ²⁰ Saymiá gwasht: ‘Man nóki sur kortag, paméshká átka nakanán.’

²¹ “Golám átk o wati hodábondi cha sajjahénáni hálá sahig kort. Hodábond é habaráni eshkonagá sakk zahr gept o hokmi kort: ‘Pa eshtápi beraw, cha shahray tank o rahsarán, sajjahén nézgar, mondh, kór o langán pa é mehmániay waragá byár.’ ²² Randá, golám átk o gón hodábondá gwashti: ‘Wájah! Harché ke taw maná hokm dát man hamá dhawlá kort, bale angat jágah hastent.’ ²³ Gorhá hodábondá wati golám hokm kort: ‘Shahrá dhann, ráh o rahsarán beraw, mardomán shóház kan o áyán mennat kan o mani lógá byár tánke mehmánjáh cha mardomá porr bebit.’ ²⁴ Shomará rásta gwashán ke cha awali lóthetagé mardomán yakké ham, mani mehmániay warákána nachashit.”

*Issáyá moridiay táwán
(Mattá 10:37-38; 16:24; Luká 9:23)*

²⁵ Mazanén romb o mocchié, Issáyá hamráhi kanagá at. Áiá dém gón áyán tarrént o gwashti: ²⁶ “Á ke lóthit mani morid bebit, agan cha wati pet o mát, jan o chokk, brát o gohárán o cha wati jenday sáhá ham sar magwazit, mani morid buta nakant. ²⁷ Agan kasé wati salibá baddhá makant o mani randá mayayt, á ham mani morid buta nakant.

²⁸ “Kay ent á ke lóthit borjé bebandit, bale cha borjay bandagá pésar, manendit o áyay zarr o málay hesábá makasshit o machárit ke bárén é káray sarjam o purah kanagay wák o twáni hast yá na? ²⁹ Chiá ke agan é borjay bonredá ér bekanant o némtamán bellit, sajjahén mardom ke gendant, áiá kalág o rishkanda kanant o ³⁰ gwashant: ‘É mardá karé bongéj kort bale sarjam kanagá dar mant.’

³¹ “Yá kojám bádsháh ent ke gón dega bádsháhéá pa jangá sar begipt bale cha jangá pésar, manendit o é pegrá makant ke bárén gón dah hazaray pawjá, á bádsháhay bist hazári lashkaray demá dáshta kant yá na? ³² O agan begendit ke áyay demá dáshta nakant, gorhá angat ke dozhmenay lashkar dur ent, cha peshá pa sohl o tráná wati kásedán rawána kant. ³³ Hamé paymá, cha shomá harkasé, tán wahdé ke cha wati sajjahén mál o hastiá dast makasshit, mani morid buta nakant.

³⁴ “Wád sharr ent bale agan wáday tám berawt, gorhá chón áiá padá wádók korta kanant? ³⁵ Na pa zemín o dhagará darda wárt o na samát buta kant, áiá dura réchant. Harkasá pa eshkonagá gósh per, beshkont.”

15

*Gárén mész
(Mattá 18:12-14)*

¹ Nun sajjahén songi o máliátgir o gonahkárén mardom, Issáyá gwará átkant tán áyay habarán beshkonant. ² Bale Parisi o Sharyatay zánóger, norondhán o iráz geráná gwashagá atant: “É mard gón gonahkárán nend o nyáda kant o gón áyán hór waraga wárt.”

³ Gorhá Issáyá pa áyán é mesál áwort o gwashti: ⁴ “Cha shomá agan kaséá sad mész bebit o cha áyán yakké gár bebit, gorhá nawad o nohén mészán charágáhá yalaha nadant o hamá gárén mészay shóházá narawt tán áiá dar begéjit? ⁵ Wahdé gárén mészá dara géjit pa galé wati kópagá kanti, ⁶ lógá rawt, dóst o hamsáhegána lóthit o gwashti: ‘Gón man gal o shádehi kanét ke man wati á gárén mész dar gétkag.’ ⁷ Man shomará gwashán, hamé dhawlá pa yak pashómánén gonahkaréá ásmáná mazanén jashné geraga bit, bale pa nawad o noh pahrézkará ke áyán pashómáni darkár naent choshén jashné geraga nabit.

Gárén kaldár

⁸ “Yá ke agan janénéá dah kaldár bebit o cha á dahén kaldarán yakké gár bebit, gorhá pa wati gárén kaldáray shóházá,

[‡] 14:19 14:19 Káigar, bezán mazanén narén gók.

cherág róka nakant o lógá narópit? Tán áiá dar magéjit cha wati shóháza dasta kasshit? ⁹ Anchosh ke á kaldará dara géjit, dóst o hamsáhegána lóthit o gwashti: ‘Gón man gal o shádehi kanét chiá ke wati gárén kaldáron wadi kortag.’ ¹⁰ Hamé paymá man shomará gwashán, agan yak gonahkáré cha wati gonáhán pashómán bebít o Hodáay ráhá byayt, Hodáay préshtagáni bárgáhá jashn o shádehi geraga bit.”

Gár o gomráhén bacch

¹¹ Issáyá gesh kanán kort o gwashti: “Yak mardéa do mardénchokk hastat. ¹² Kasteréná yak róché gón petá gwasht: ‘Oo mani pet! Cha tai mál o melkatá, harché ke mani bahr o wandhá kapit maná annun beday.’ Gorhá petá wati sajjahén mál o maddhi doén chokkáni sará bahr kort.

¹³⁻¹⁴ “Lahtén róchá o rand, kasterén chokká wati sajjahén bahr yakjáh kort, zort o durén molkéá shot o sajjahén zarri pa hawsnáki gár kortant. Randá, á molká sakk dhokkál kapt o á dastang o mohtáj but. ¹⁵ Hamá molká, yak mardoméay Kerrá shot o pa kéréay geragá watá lachénti. Gorhá, áiá wati dhagaráni sará hukkáni chárénók kort. ¹⁶ Ódá haminchok shodíg but ke delia lóthet hamá kónsagán* bwárt o wati lápá sér bekant ke hukkáni warák atant, bale kassá pa waragá hecch nadát.

¹⁷ “Wahdé hóshi kort o zánti, gón wat gwashti: ‘Mani petay bázén nawkar o kárdará lápáy sérá waráka rasit o man edá shodá mark án. ¹⁸ Nun wati petay Kerrá pera tarrán o áiá gwashán: Oo mani pet! Man tai o ásmánay Hodáay gonahkár án o ¹⁹ nuna nakarzáan ke tai chokk gwashag bebán. Maná wati hezmatkáráni dhawlá yak hezmatkáré bekan.’

²⁰ “Gorhá pád átk o dém pa petay lógá rahádag but. Petá ke cha durá dist deli pa áiá sotk o pa eshtápi áiay démá tachán but o gwarambázi kort o chokketi. ²¹ Chokká gwasht: ‘Oo mani pet! Man tai o ásmánay Hodáay gonahkár án o nuna nakarzáan ke tai chokk gwashag bebán.’

²² “Bale petá wati hezmatkár gwashtant: ‘Eshtáp kanét, pa áiá gehterén kabáhá byárét o gwarái bedayét. Challah o mondriki dastá o kawshi pádá bedayét. ²³ Á pábondi† gwaská‡ byárét o bekoshét tánke jashné bekanén o wasshén waráké bwarén. ²⁴ Chiá ke mani é chokk mortagat

bale nun padá zendag butag, gár at o nun wadi butag. É dhawlá áyan gal o shádehi kort.’

²⁵ “Bale masterén chokk dhagaráni sará at. Wahdé lógay nazziká raset o sáz o zémelay tawári eshкот, ²⁶ cha hezmatkárán yakké lóthet o josti kort: ‘Edá ché bayagá ent?’ ²⁷ Hezmatkárá passaw dát: ‘Tai brát padá lógá átkag o nun ke á pa wasshi o salámati rasetag tai petá jashné geptag o á pábondi gwaski koshtag.’ ²⁸ Gorhá, masterén brát sakk zahr gept o nalótheti lógá berawt. Bale pet dhanná átk o áiay wasshán kanagá§ mennatwár but.

²⁹ “Chokká petay mennatgiriay passawá gwasht: ‘Wati delá bechár, man inchok sála tai Kerrá goláméay dhawlá kár kortag, hechbar cha tai hokmá dar nabutagán o taw maná yak sheneké ham nadátag ke gón wati dóst o hambalán shádehi bekanán. ³⁰ Bale tai é chokká tai mál gón waylánkén* janénán gár o gárat kortag o taw pa áiay per tarragá pábondi gwask koshtag.’ ³¹ Petá gwasht: ‘Oo mani chokk! Taw harwahd mani Kerrá ay o harché ke maná hast á sajjahén taig ant, ³² bale annun márá paméshká jashn o shádehi kanagi ent ke tai é brát mortagat o nun zendag butag, gár o bégwáh at o nun wadi butag o átkag.’”

16

Chálákén hesábdáray mesál

¹ Issáyá gón wati moridán gwasht: “Azgár o hastómandén mardéa hesábdaré hastat. Wahdé pa áiá é hál sar but ke hesábdár áiay malá wárt o gára kant, ² gorhá á lóthet o gwashti: ‘É chónén habar ant ke tai bárawá man eshkonagá án? Beraw wati sarjamén hesáb o ketábán begishshén o byár o maná beday. Maróchi o rand, taw cha mani hesábdáriá dar ay.’ ³ Hesábdará wati delá jérhet: ‘Nun chón bekanán ke mani wáhond maná cha kárá dar kanagá ent, bard o kódhál man jata nakanán, pendhagá ham maná lajja kant. ⁴ Bale haw! Annun zánton ché bekanán. Báyad ent anchén kéré bekanán ke wahdé cha kárá kasshaga bán, randá mardom maná wati lógán bellant.’

⁵ “Áiá wáhonday wámdár yak yakká wati Kerrá lóthetant. Cha awali wámdará josti gept: ‘Tará mani wáhonday chinchok wám per ent?’ ⁶ Passawi dát:

* **15:16** 15:16 Kónsag, bezán karó o bánkalénkay hamá drájén póst ke dánagi mán ent. † **15:23** 15:23 Pábondi, bezán hamá pas o gók ent ke pa helár kanagá lógay dapá dáranti. ‡ **15:23** 15:23 Gwask, bezán góló, gókyak chokk.

§ **15:28** 15:28 Wasshán kanag, bezán sohl kanag, áshti kanag. * **15:30** 15:30 Waylánk, bezán badkár, kahbag.

* **16:6** 16:6 Asligén Yunáni nebeshtánk gwasht: “yaksad batos”, bezán 3700 litaray kesásá.

‘Maná yaksad kayl* zaytuni rógen wám per ent.’ Hesábdará gwasht: ‘Beger, esh ent tai wámáni kabz, zutt benend o panjáh kayl benebis.’⁷ Padá cha domi wámdará josti kort: ‘Tará chinchok wám per ent?’ Gwashti: ‘Yaksad kayl† gandom.’ Hesábdará gwasht: ‘É tai wámáni kabz ent. Beger o hashtád kayl benebis.’

⁸ “Wáhondá wati loch o dozzén hesábdár shábásh gwasht, ke áiá é kár, gón aglmandi kortagat. Chiá ke é wahday chokk gón wati zamánagay mardomán donyái gir o dáráni dar baragá, cha Nuray chokkán bezán Hodái mardomán ákelter ant. ⁹ Shomará gwashán ke donyáay é béwapaén málá pa sharrén dóstáni shóház kanagá kár bandét, tánke wahdé é mála hallit, shomará abadmánén jahána wasshátk bekanant.

¹⁰ “Á ke gwandh o kasánén káráni sará tachk o rásta bit, mazanénáni sará ham rásta bit o á ke gwandhén káráni sará rásta nabit, mazanénáni sará ham rásta nabit. ¹¹ Nun agan shomá é béwapa o kurhahén‡ donyáay máláni sará rást o tachk mabét, gorhá kay barhakkén mál o ganjay bárawá shomay sará báwara kant? ¹² Agan pa degaráni málá rást o tachk mabét, kay ent ke shomay wati málá, shomará bedant?”

¹³ “Hech golámé pa do wájahá hezmat korta nakant, yá gón yakkéá dozhmenia kant o domigi dósta bit, yá gón awaligá wapádára bit o cha á degará badia kayt. Shomá yakwahd o yakjáh, Hodá o zarray golamiá korta nakanét.”

Sharyat o Hodáay bádsháhi

(*Mattá 5:31-32; 11:12-13; Markás 10:11-12*)

¹⁴ Parisi ke wat zarparast atant, gón é habaráni eshkonagá, Issáesh kalág gept o rishkand kort. ¹⁵ Issáyá gwasht: “Shomá ham ék ke mardománi demá watá tachk o pahrézkár pésha dárét, bale Hodá cha shomay delay hálán sahig ent. Shomará begwashán, hamá chizz ke mardománi gwará báz kimmati ent, Hodá cha á chizzá sakk bézár ent.

¹⁶ “Tawrát o sajjahén nabiáni bárig, tán Yahyáay wahdá at. Nun randá, Hodáay bádsháhiyemstág dayaga bit o harkas johda kant wati ráhá dém pa áiá dar begéjit. ¹⁷ Bezánét ke ásmán o zeminay gár o bérán bayag cha Sharyatay yak thekk o noktahéay kapag o dur bayagá báz ásánter ent.

¹⁸ “Agan kasé wati janá sawn o taláka dant o gón dega janénéá sura kant, zená

kant o harkas ke gón talák dátagén janénéá sur o sánga kant, á ham zená kant.

Máldár o Ilázar

¹⁹ “Yak máldár o azgáren mardéa modám gránkimmatén[§] pocch o pósháka póshet o wati róchi pa aysh o nósha gwázéntant. ²⁰ Ilázar námén yak garibén mardé hamáiy lógay dapá nádénag butagat ke jesm o jáni, sará tán pádá résh at. ²¹ Áiy armán at ke cha azgáren marday parzónagay sar átkagén chonhd o chánigán, wati lápá sér bekant. Kochek ham átkant o áiy résh o násuresha chatthetant.

²² “Wahdé á garib mort, préshtagán á zort o Ebráhémay Kerrá bort. Azgáren mard ham mort o mardomán kabr o kapon kort. ²³ Hamá sér o azgáren mard, dózahá sakk bazzagi kasshagá at. Áiá ke sar chest kort cha durá chammí pa Ebráhémá kapt ke hamá Ilázar áiy kashá nendók at. ²⁴ Gwánki jat: ‘Ebráhém, oo mani pet! Tará mani sará bazzag bát, Ilázará mani Kerrá dém beday ke wati lankoká ápá bejant o mani nokká tarr bekant ke man ásá sochagá án.’ ²⁵ Bale Ebráhémá passaw dát: ‘Oo mani bacch! Hayálá bekap ke taw wati zendá sharrén chizzáni wájah butagay o Ilázará wati róch pa bazzagi gwázéntagant. Bale á nun edá ásudag ent o taw azábán talwasagá ay. ²⁶ Eshíá abéd, shomayg o may nyámá, yak anchéen johlén daragé borrag butag ke na may némagay mardom shomay gwará shota kanant o na shomay némagay mardom may Kerrá átka kanant.’

²⁷ “Padá azgáren mardá gón Ebráhémá gwasht: ‘Oo mani pet! Gorhá cha taw dazbandia kanán, Ilázará mani petay lógá rawán bekan, ²⁸ chiá ke mani panch brát ant o mani wáhag ent ke Ilázar áyáni Kerrá berawt o áyán dháh bedant o hozzhár bekant, chosh mabit ke á ham é porazábén jágahá byáyant.’ ²⁹ Bale Ebráhémá gwasht: ‘Áyáni Kerrá Mussá o Nabiáni Ketáb hastant. Áyán bwánant o habaránesh gósh bedárant.’ ³⁰ Á mardá gwasht: ‘Na, oo mani pet Ebráhém! Cha mordagán agan kasé áyáni Kerrá berawt, allamá á cha wati badén kárán pashómána bant.’ ³¹ Ebráhémá gwasht: ‘Agan á Mussá o paygambaráni habarán gósha nadárant, gorhá cha mordagán ham agan kasé zendag bebít o áyáni Kerrá berawt, áiy habarán ham báwara nakanant o namannant.’”

† 16:7 16:7 Asligén Yunáni nebeshtánka gwasht: “yaksad korus”, bezán 37000 litaray kesásá. ‡ 16:11 16:11 Kurhah, bezán haráb, gandah, nápadár. § 16:19 16:19 Asligén Yunáni nebeshtánka gwasht: “jamurangén”. É rang bádshádi póshákáni rang at.

17

Gonáh, báwar, zemmah

(Mattá 18:6-7, 21-22; Markás 9:42)

¹ Issáyá gón wati moridán gwasht: "Nabit ke mardom rad majant o thagal mawárt, bale apsoz pa hamá kasá ke degarán dém pa gonáhá bebárt. ² Cha é kasánokénán yakkéay dém pa gonáhá baragay badalá, gehter hamesh ent ke áiy gardená jenteri táé bebandant o daryáyá chagali bedayant. ³ Cha wati kár o kerdán hozzhár bét. Agan tai brát gonáhé bekant, áiá sarkech day o mayárig kan, agan pashómán but, bebakshi. ⁴ Toré róché hapt randá gonáh bekant o hapt randá tai gwará byayt o begwashit: 'man pashómán án,' bebakshi."

⁵ Issáay kásedán gón Hodáwandén Issáyá gwasht: "Wájah! May setk o báwará gesh kan." ⁶ Gwashti: "Agan shomay báwar arzonéay kesásá* ham bebit, shomá tuday é drachká hokm korta kanét ke 'watá cha boná begway o beraw zeray† tahá berod o besabz'. Á wahdá, drachk shomay hokmá mannit.

⁷ "Cha shomá á kas kay ent ke áiy hezmatkár cha dhagaráni nangár kanag, ramagay chárénag o káray halás kanagá byayt, wáhond áiá begwashit: 'Zutt byá o benend o warag bwar?' ⁸ Gón áiá nagwashit: 'Pésará pa man warag addh kan, tán man nawártag taw mani hezmatá bósht, wahdé man halás kort gorhá taw bwar?' ⁹ Hodábond, wati hezmatkáray shogr o mennatá gipt ke 'taw mani hokm mannetag?' Na, hechbar. ¹⁰ Hamé paymá shomá ham, sajjahén á hokmán ke shomará dayag butagant sarjam bekanét o begwashét ke 'má tai hezmatkár bayagay láhek ham naén, tahná wati zemmah o dhobbah‡ sarjam kortagant.' "

Dah garriay drahbakshi

¹¹ Issá dém pa Urshalimay rawagá, cha Sámerah o Jalilay simsarán gwazagá at. ¹² Wahdé dém pa yak métagéá pédák at, dah syahgarrién mardom gón áiá dochár kapt. Dur óshtánt o ¹³ gón borzén tawaré gwashtesh: "Oo wájah Issá! Tará may sará bazzag bát." ¹⁴ Issáyá ke distant gwashti: "Berawét watá pa dini peshwáyán pesh bedáret."§ Á, ráh gepant o ráhay nyámá, pák o palgár butant.

¹⁵ Cha áyán yakkéá, wahdé dist ke nun dráh ent, gón borztawári Hodáyá satá kanán, per tarret o átk, ¹⁶ Issáay pádán kapt o shogri gept. Á, cha Sámerián* at. ¹⁷ Issáyá jost kort: "Záná, har dahén cha garrá pák o palgár nabuté? Á dega nohén kojá ant? ¹⁸ É yakkén darkawmá† abéd, cha áyán dega yakké pa Hodáay sepat o sanáyá nayátk?" ¹⁹ Gorhá Issáyá gón á mardá gwasht: "Pád á, beraw, ke tai setk o báwará tará dráh kortag."

Hodáay bádsháhi

(Mattá 24:37-40)

²⁰ Yak róché, lahtén Parisiá cha Issáyá jost kort: "Hodáay bádsháhi kadéna kayt?" Issáyá gwasht: "Hodáay bádsháhi chamzáherá gendaga nabit. ²¹ Gwashaga nabit ke Hodáay bádsháhi edá ent yá ódá. Chiá ke Hodáay bádsháhi, shomay delá ent."‡

²² Padá gón wati moridán gwashti: "Yak wahdé kayt ke shomá pa Ensánay Chokkay rócháni yak róchéay gendagá armán o árzua kanét, bale á róchá nagendét. ²³ Mardom shomará gwashant ke 'á edá ent' yá 'á ódá ent,' bale shomá áyáni habará gón makapét. ²⁴ Anchosh ke grók cha yak kondhéá jant o sajjahén ásmáná jarhashkénit o rozhnága kant, Ensánay Chokk ham wati á róchá, anchosh záher o paddara bit. ²⁵ Bale awalá báyad ent bázén sakki o sóri besaggit o é zamánagay nasl o padréch áiá mamannant.

²⁶ "Hamá dhawlá ke Nuhay bárigá butag, Ensánay Chokkay róch ham anchosha bit. ²⁷ Á róchán, mardom ward o nósh o sáng o surá dazgatth atant tán hamá róchá ke Nuh bójiǵá swár but. Randá, mazanén hár o tuppáná sajjahén mardom gár o bégwáh kortant.

²⁸ "Lutay zamánagá ham hamé dhawlá at, mardom pa warag o charag o badal o bándát o kesh o keshár o lóg o jágahay bandagá goláesh atant, ²⁹ bale á róchá ke Lut cha Sodumay shahrá dar átk, Hodáyá cha ásmáná ás o rókén gókort gwárent o Sodumay sajjahén mardom gár o bégwáh kortant.

³⁰ "Ensánay Chokkay paddar bayagay róchá, hamé dhawlá bit. ³¹ Á róchá, agan kasé wati lógay sará bebit o áiy ord o poténk lógá ér bant, pa áyáni zuragá jahlá ér makapit. Hamé dhawlá,

* **17:6** 17:6 Asligén Yunáni nebeshtánka gwasht: "thélkáhay tohmay kesásá". Thélkáh bezán hardalay tohm báz gwandh ant. † **17:6** 17:6 Zer, bezán daryá. ‡ **17:10** 17:10 Dhobbah, bezán ogdah, zemmah, Arabi o Pársiá "wazifah". § **17:14** 17:14 Tawratá garray nádráh palit o nápak zánag butagant. Agan kasé cha é nájorhiá dráh bebit báyad ent gón Mussáay Sharyatay randgiriá dini peshwáéay gwará berawt o hayráté bekant. * **17:16** 17:16 Yahudián Sámeri gomráh zántagant o gón áyán dayger o badal o bándát nakortag. † **17:18** 17:18 "Darkawm" bezán á ke Yahudi naant. ‡ **17:21** 17:21 Yá: shomay nyámá ent.

agan kasé wati dhağaráni sará kesht o keshará ent, á ham padá lógá per matarrit. ³² Lutay lógbánokay sargwastá yát bekanét. ³³ Harkas wati sáhay rakkénagay randá bebit, áiá báhénit. Harkas wati sáhá bebáhénit, áiá rakkénit. ³⁴ Shomará gwashán ke á wahdá, agan do mardom yakkén taht o nepáday sará waptag, yakké baraga bit o domi hamódá pasht géjaga bit.* ³⁵ Cha do janéna, ke horigá jenteray sará dánay droshagá bant, yakké baraga bit o domi hamódá pasht géjaga bit. ³⁶ Do mard ke dhağaráni sará bit, yakké baraga bit o domi hamódá pasht géjaga bit.† ³⁷ Jostesh kort: “Oo Hodáwand! Kojá chosha bit?” Passawi dát: “Har jáh ke jóné kapit, ódá gittó‡ o dhundhwárén morg moccha bant.”

18

Janózám o náhakkén káziay mesál

¹ Issáyá pa moridán mesále áwort tán áyán sarkech bedant o pésh bedárit ke harwahd dwá bekanant o hechbar delprósh o náoméť mabant. ² Gwashti: “Shahréa, yak kázié hastat ke áiá na cha Hodáyá torset o na mardománi parwáhia kort. ³ Hamá shahrá, janózámé ham hastat ke harwahd káziay kerrá átk o mennatwár at ke áiay hakká cha daynkára begipt.

⁴ “Tán lahtén wahdá, káziá janózámay peryátay némagá hech delgósha nakort, bale randá delá hayáli kort ke ‘rást ent, maná na Hodáay tors ent o na mardománi parwáh. ⁵ Bale é janózám maná delsyáh kanagá ent. Paméshká gehter ent eshiay hakká begerán o bedayán. Chosh mabit gón wati har róchigén rawag o áyagá maná géshter delsyáh bekanat.’”

⁶ Gorhá Hodáwandén Issáyá gwasht: “Beshkonét é náhakkén kázi ché gwashtit? ⁷ Nun bárén Hodá gón wati gechén kotagénán, ke shap o róch gón áiá pa wati hakká peryáta kanant, hakka nakant? Pa áyáni hakrasíá déra kant? ⁸ Shomará gwashán ke zutt áyáni hakká dant. Bale á wahdi ke Ensánay Chokka kayt, bárén setk o báwar é zeminay sará pashta kapit ke á begendit?”

Parisi o máliátgiray mesál

⁹ Issáyá hamá mardománi bárawá mesále áwort ke watá nék o pahrézkára zánant o é dega mardomán éra janant. ¹⁰ “Do mardom pa dwá kanagá mazanén parasteshgáhá shot ke cha áyán yakké Parisié at o domi máliátgiré at. ¹¹ Parisi

óshtát o pa wati jendá dwái kort o gwashti: ‘Oo Hodá! Tai mennatwár án ke man é dega mardománi dhawlá dozz o radkár o zenahkáré naán o na é máliátgiray dhawlá án.’ ¹² Man haptagé do róch, róchaga dárán o wati sajjahén málay dahyakká dayán. ¹³ Bale hamá máliátgir dur óshtátogat o ásmáni cháret ham nakort. Dasti wati sénagá jat o peryát kanáná gwashti: ‘Oo Hodá! Tará mani sará bazzag bát ke gonahkáré án.’

¹⁴ “Nun man shomará gwashán: Parisi na, bale hamá máliátgir nék o pahrézkár but o lógá shot, chiá ke harkas watá mazana zánt o lékit, kamsharapa bit o harkas watá jahl o érdasta mannit, washnám o sharapdára bit.”

Pa chokkán Issáyay mehr

(Mattá 19:13-15; Markás 10:13-16)

¹⁵ Mardomán wati nonnokén chokk ham Issáyay gwará áwortant ke dastesh sará per bemoshit. Wahdé moridán chosh dist, mardomesh neherr o hakkal dátant. ¹⁶ Bale Issáyá chokk wati kerrá lóthetant o gwashti: “Chokkán bellét ke mani kerrá byáyant, áyáni demá madaréť, chiá ke Hodáay bádsháhi anchen mardománig ent. ¹⁷ Shomará rásténa gwashán, á ke Hodáay bádsháhiá chokkáni paymá mamannit, hechbar ódá pád ér korta nakant.”

Zardárén warná o namiránén zend

(Mattá 19:16-29; Markás 10:17-30)

¹⁸ Cha sardarán yakkéa jost kort: “Oo nékén ostád! Man chón bekanán ke namiránén zenday wáhond bebán?” ¹⁹ Issáyá gwasht: “Taw maná ‘nékén’ pa ché gwashay? Abéd cha Hodáyá kass nék naent. ²⁰ Taw Hodáay hokmána zánay: ‘Zená makan, hón makan, dozzi makan, drógén sháhedi maday, wati pet o mátá ezzat beday.’”* ²¹ Áiá gwasht: “Man cha kasániá é sajjahén hokm barjáh dáshtagant.”

²² Wahdé Issáyá áiay passaw eshкот, gwashti: “Tará angat yak káré kanagi ent, wati sajjahén mál o hastiá bahá kan o zarrán garib o nézgarén mardománi sará bahr kan, é paymá tará ásmáni ganjé rasit. Gorhá byá o mani randgiriá bekan.” ²³ Wahdé á mardá é passaw eshкот, báz delgir o gamig but chiá ke á mazanén máldaré at. ²⁴ Issáyá á mard cháret o gwashti: “Pa azgár o máldárén mardomán Hodáay bádsháhiá pád ér kanag sakk grán ent. ²⁵ Haw! Cha suchenay domká oshteray gwazag wa báz grán ent, bale

§ 17:32 17:32 Lutay janá wati mál o manál dóst at, Hodáay habari nazort o paméshká mort. * 17:34 17:34 Pasht géjag, bezán nazurag, yalah dayag, gechén nakanag. † 17:36 17:36 Lahtén daznebeshtá, band 36 nést. ‡ 17:37 17:37 Gittó yak morgé ke dhundh, bezán gahetagéń jóna wárt. * 18:20 18:20 Dargwaz 20:12-16, Sharyatay Domi Rahband 5:16-20.

Hodáay bádsháhiá, zardárén mardomay pád ér kanag, angat gránter ent.”

²⁶ Hamá ke é habará eshkonagá atant, jostesh kort: “Gorhá kay rakketa kant?”

²⁷ Issáyá passaw dát: “Pa ensáná nabuteni ent, bale Hodáay dastá har chizz buta kant.”

²⁸ Petrosá gwasht: “Má wati har chizz yalah dátag o tai randgiriá kanagá én.”

²⁹ Issáyá gwasht: “Haw! Báwar kanét, harkasá ke pa Hodáay bádsháhiá wati jan o chokk, brát, mát o pet yá lóg o jágah yalah dátagant, ³⁰ hamé jaháná é chizzáni badalá áiá báz géshtera rasit o á dega jaháná, abadmánén zenday wáhonda bit.”

Issáy markay saymi péshgói

(*Mattá 20:17-19; Markás 10:32-34*)

³¹ Padá Issáyá wati dwázdahén kásed yak kerré bortant o gwashti: “Nun má Urshalimá rawagá én, har chizzé ke nabián Ensánay Chokkay bárawá nebesh-tag, á sajjahén ódá sarjama bant. ³² Áiá darkawmén mardománi dastá dayant o hamá darkawm, kalágia gerant, béezzatia kanant o sar o démá tohia janant, ³³ shallák o hayzaránia janant o koshtanti. Bale saymi róchá, á padá zendaga bit o jáha jant.”[†] ³⁴ Áiay morid cha é habarán yakkéá ham sarpad nabutant. Issáy é habaráni máná cha áyáni zántá chér at o áyan sarkerch nawárt ke Issá ché gwashagá ent.

Kóréay drahbakshi

(*Mattá 20:29-34; Markás 10:46-52*)

³⁵ Wahdé Issá Ariháay shahray nazziká raset, kóré disti ke ráhay sará neshtag o pendhagá at. ³⁶ Wahdé kórá mahluk o mocchiay tawár eshkot, josti kort: “Ché bayagá ent?” ³⁷ Hálesh dát: “Issá Náseri gwazagá ent.” ³⁸ Gorhá áiá kukkár kort: “Issá, oo Dáud bádsháhay chokk! Tará mani sará bazzag bát.” ³⁹ Á ke cha sajjahénán pésar o péshgám atant, kóresh hakkal kort o gwashtesh: “Bass kan, betawár bay!” Bale áiá géshter kukkár kort: “Oo Dáud bádsháhay chokk! Tará mani sará bazzag bát.”

⁴⁰ Issá óstát o hokmi kort: “Á mardá byaré.” Wahdé nazzik átk, Issáyá jost kort: ⁴¹ “Taw cha man ché lóthay? Pa taw ché bekanán?” Áiá passaw dát: “Oo Hodáwand! Mana lóthán biná bebán.” ⁴² Issáyá gwasht: “Biná bebay! Tai imáná tará dráh kort.” ⁴³ Hamá damáná kór biná but, Hodáyá sepat o saná kanán, Issáyá

hamráhiá rahádag but. Mardomán ke chosh dist, áyan ham Hodáay shogr gept.

19

Zakkáay mehmáni

¹ Issá Ariháya átk o cha shahray nyámá gwazagá at. ² Ódá Zakká námén sér o azgárén mardé hastat ke máliátgiráni kamásh at. ³ Áiá lóthet bechárit Issá chónéné, bale mardománi mocchi mérhi báz at o áiay jend pathakk o lokkaddé at. Paméshká disti nakort. ⁴ Gorhá pa drekké démá shot o mazanén drachkéay* sará sar kapt tán áiá begendit, chiá ke Issá cha hamé ráhá gwazagá at.

⁵ Wahdé Issá hamá jágahá raset, borzád cháret o gwashti: “Oo Zakká! Zutt jahlá ér kap, ke maróchi man tai mehmán án.”

⁶ Á, eshtápi cha drachká ér kapt o Issái pa gal o shádehi wati lógá wasshátk kort.

⁷ Wahdé mardomán é dist, watmánwatá norondhán gwashtesh: “Issá gonahkárén mardéay lógá mehmán butag.” ⁸ Bale Zakká pád átk, óstát o gón Hodáwandén Issáyá gwashti: “Oo Hodáwand! Wati sajjahén mál o maddhiay némá pa nézgar o garibén mardomán bahr o bánga kanán o agan man kaséay mál pa náhakk poshtá kasshetag o bortag, áyáni badalá chár sari géshtera dayán.”

⁹ Issáyá gón áiá gwasht: “Maróchi é lógá, pahelli o rakkag sar butag, chiá ke é mard ham cha Ebráhémay nasl o padréchá ent. ¹⁰ Haw! Ensánay Chokk pa gonahkár o gárénáni shóház o rakkénagá átkag.”

Bádsháh o dah hezmatkár

(*Mattá 25:14-30*)

¹¹ Hamá wahdá ke mardom Issáyá habarán gósh dáragá atant, Issáyá gésch kanán mesalé áwort. Chiá ke á Urshalimay nazziká rasetagat o mardománi gomán esh at ke Hodáay bádsháhi hamá wahdá paddara bit. ¹² Gwashti: “Yak baré, sardárzádagé durén molkéá shot tánke pa bádsháhiá berasit o padá wati dhéh o dhagará per betarrit. ¹³ Gorhá, dah hezmatkári wati kerrá lóthet o har yakkéá yak ashrapíé[†] dát o gwashtanti: ‘Tánke man wati separá janán o padá káyan, shomá gón é zarrán sawdágeri bekanét.’ ¹⁴ Bale hamá molkay mardomán cha áiá naprata kort. Áiay rawagá rand, kásed o kolawesh ráh dát ke ‘má nalóthén é mard, may sará bádsháhi bekané.’

[†] **18:33** 18:33 Jáh janag, bezán cha wati jáhá anáगतén pád áyag, Arabi o Pársái “qjám, rastákhiz”. * **19:4** 19:4 É drachkay elmi nám “Ficus sycomorus” ent. [†] **19:13** 19:13 Asligén Yunáni zobáná, é zarray nám “miná” ent. Yakk mináé yak kár kanókéay kamm o gésh say máhay mozz butag.

15 “Bale áia bádsháhi raset o wati molká per tarret o átk. Gorhá hokmi kort hamá dahén hezmatkárán ke zarri dátagatant byárant, tán bezánt áyán chinchok nap o sutt katthetag. 16 Awali hezmatkár átk o gwashti: ‘Oo wájah! Cha tai yakkén ashrafiá, man dah ashrafi katthetag.’ 17 Bádsháhá gwasht: ‘Shábásh, oo sharren golám! Nun paméshká ke taw gón kammén bonmálá tachk o rást butagay, man tará wati molkay dah shahray hákema kanán.’

18 “Domi átk o gwashti: ‘Oo wájah! Man cha tai yakkén ashrafiá, panch katthetag.’ 19 Bádsháhá gwasht: ‘Man tará wati molkay panch shahray hákemiá dayán.’

20 “Dega hezmatkáré átk o gwashti: ‘Oo wájah! Esh ent tai dátagén ashrafi ke man dazmáléá bastag o ér kortagat. 21 Chiá ke maná cha taw torsetag, taw trondén mardé ay o hamá ke taw ér nakortagant, hamá chizzán payradá janay o watiga kanay o nakeshtagéna ronay.’ 22 Bádsháhá gwasht: ‘Oo békáren golám! Man tará cha tai jenday habarán mayáriga kanán, taw zánt man trondén mardomé án, ér nakortagén chizzán watiga kanán o nakeshtagéna ronán. 23 Gorhá taw chiá mani dátagén zarr, byáji o bápáriéay kerrá ér nakort ke man per tarragá rand, wati zarr gón sutt bepepténant.’

24 “Gorhá bádsháhá gón wati diwánay mardomán gwasht: ‘Ashrafiá cha eshiá pach gerét o hamáiaá bedayét ke áiy kerrá dah ashrafi ant.’ 25 Áyán gwasht: ‘Wájah! Gón áia pésará dah ashrafi hast.’ 26 Bádsháhá gwasht: ‘Shomára gwashán, harkasá ke chizzé hast, áia géshter dayaga bit, bale harkasá ke nést, harché ke hasti ham pach geraga bit. 27 Bale hamá ke mani dozhmen ant o mani bádsháhiá nalóthant, áyán mani kerrá byárét o mani démá bekoshét.’”

Pa Issáy wasshátká

(Mattá 21:1-9; Markás 11:1-10; Yuhanná 12:12-15)

28 Cha é habarán o rand, Issá pésar o peshgám dém pa Urshalimá rawagá at. 29 Wahdé Zaytun námkaptén kóhay sará, Bayt-Páji o Bayt-Anyáay métagáni nazziká raset, wati dó moridi pésará dém dát o 30 gwashtanti: “Demi métagá berawét o anchosh ke shomá ódá rasét, korragén haré gendét ke bastag o taningah kasé áia swár nabutag. Áia bójét o edá byárét. 31 Agan kaséa cha shomá jost kort ‘Chiá eshiá bójagá ét,’ begwashét: ‘Wájahá pakár ent.’”

32 Morid shotant o hamá dhawlá ke Issáyá gwashtagat, hamá paymá dis-tesh. 33 Anchosh ke korragay bójagá atant, korragay hodábondán cha áyán jost kort: “Shomá chiá é korragá bójagá ét?”

34 Moridán passaw dát: “Wájahá pakár ent.” 35 Áyán korrag Issáyá kerrá áwort, wati shál o cháderesh korragay poshtá ér kortant o Issáesh swár kort. 36 Anchosh ke Issá démá rawán at, mardomán wati shál o cháder ráhay sará chérgéján kortant.

37 Wahdé Issá Zaytunay kóhay érkapay nazziká raset, áiy moridáni mocchiá pa é sajjahén ajekkái o mójegahán ke áyán distagatant, pa gal o shádehi o gón borzén tawaré, Hodá satá kort o gwasht: 38 “Mobáarak bát, hamá bádsháhá ke pa Hodáwanday námá kayt! Sohl o ásudagi mán ásmána o shán o shawkat borzén arshá.”

39 Cha mardománi nyámá, lahtén Parisiá gón Issáyá gwasht: “Oo ostád! Wati moridán neherr o hakkal kan ke chosh magwashant!” 40 Issáyá darráent: “Man shomára gwashán, agan é bétawár bebant, seng o dhók kukkára kanant.”

Issáyá gréwag

41 Wahdé Issá Urshalimá nazzik but o shahri dist, gréti o 42 gwashti: “Drégatá taw, haw, hamé taw, maróchi bezántén ke kojám chizz, pa taw sohl o ásudagi áworta kant. Bale bazhn o apsóz ke nun á cha tai chammá chér o andém ent. 43 Pa taw anchén rócha káyant ke dozhmen tai chapp o chágérdá sangara bandant o tai chárén némagán angerra kanant o tai perh o chágérdá tanka tarrénant. 44 Tará o tai chokkán, dhagará chagala dayant o gón hák o hóná hór o hawára kanant o sengé pa sengéay sará ham pashta nagéjant, chiá ke taw wati Hodáay áyagay wahd o sáhat, pajjáh nayáwort.”

Cha mazanén parasteshgáhá sawdageráni dar kanag

(Mattá 21:12-16; Markás 11:15-18; Yuhanná 2:13-16)

45 Cha eshiá rand, Issá mazanén parasteshgáhay peshjháhá shot o sawdageráni dhanná dar kanagá goláesh but. 46 Gwashti: “Hodáay Ketábá nebisag butag: *Mani lóg, dwá o parasteshay jágah bebit,* bale shomá dozzbázaré kortag.”

47 Áia har róch mazanén parasteshgáhá tálima dát. Mazanén dini peshwá, Sharyatay zánóger o kawmay kamásh, áiy koshagay johdá atant, 48 bale pa wati é maksadá, hech ráhé dar gétk nakortesh, chiá ke áiy har habar mardománi delá neshtagat.

20

*Issáy wák o ehtiáray bárawá
(Mattá 21:23-27; Markás 11:27-33)*

¹ Yak róché ke Issá mazanén parasteshgáhay peshjáhá mardomán tálim o wasshén mestág dayagá at, mazanén dini peshwá o Sharyatay zánóger gón kawmay kamáshán áiy Kerrá átkant o ² gwashtesh: “Mára begwash ke taw gón kojám hakk o ehtiára é kárana kanay? Kayá tará é kárani ehtiár dátag?” ³ Issáyá passaw dát: “Maná ham cha shomá yak josté hast. Begwashét, ⁴ Yahyáya, pákshódi dayagay ehtiár cha ásmáná rasetagat yá cha ensánay némagá?” ⁵ Áyan watmánwatá shawr o saláh kort o gwashtesh: “Agan begwashén ‘cha ásmáná at,’ gwashit: ‘Pa ché imánó nayáwort?’” ⁶ Oo agan begwashén ke ‘mardomi karé butag,’ gorhá mardom márá sengsára kanant, chiá ke áyani setk o báwar hamesh ent ke Yahyá nabíé butag.” ⁷ Paméshká passawesh dát: “Má nazánén cha kojá at.” ⁸ Issáyá gwasht: “Gorhá man ham shomárá nagwashán ke gón kojám hakk o ehtiára é kárana kanán.”

*Badén bágpnáni mesál
(Mattá 21:33-46; Markás 12:1-12)*

⁹ Randá, Issáyá pa mardomán é mesál áwort: “Mardéa anguri bágé addh kort o pa konandahkári o zamán,* lahtén bágpnány dastá dát o wat drájén saporéa shot. ¹⁰ Wahdé anguray mósom but, bágay hodábondá pa wati bahray geragá, hezmatkáré ráh dát, bale zamánzurén bágpnán á hezmatkár latth o koth kort o gón hórk o háligén dastán per tarrént. ¹¹ Bágay hodábondá, padá dega hezmatkáré dém dát, bale bágpnán á ham jat o bézzat kort o gón hórk o háligén dastán per tarrént. ¹² Gorhá saymi randá, dega hezmatkáré ráhi dát, bale áyan á ham jat o thappig kort o dhanná gallént.

¹³ “Nun bágay hodábondá wati delá pegr kort ke ‘chón bekanán?’ É randá, wati dóstén chokká ráha dayán, balkén áiy ruá bedarant. ¹⁴ Bale wahdé bágpnán áiy chokk dist, watmánwatá shawr kort o gwashtesh: ‘Bágay mirás barók o poshtpad hamesh ent, eshiá ham bekoshén tán bág may mirás bebit.’ ¹⁵ Gorhá cha bágá dhann bort o koshtesh. Nun shomay gománá, bágay hodábond gón é bágpnán ché kant? ¹⁶ Á kayt, é bágpnána koshit o bágá dega bágpnáni

dastá dant.” Wahdé mardomán Issáyá é habar eshkot, gwashtesh: “Chosh mabát!”

¹⁷ Issáyá áyani némagá cháret o gwashti: “Gorhá, á nebeshtahay máná chi ent ke gwashit: ‘Hamá seng ke bánbandén ostáyán pasond nakort o nazort, hamá seng bonhesht’but.’” ¹⁸ Harkas ke á sengay sará bekapit, thokkor thokkora bit o kasé ke seng áiy sará kapit, hurta bit.”

¹⁹ Sharyatay zánóger o mazanén dini peshwáyan zánt ke Issáyá é mesál hamáyáni bárawá áwortag. Paméshká, shawresh kort hamá damáná Issáyá begerant, bale cha mardomána torsetesh.

*Máliatay bárawá
(Mattá 22:15-22; Markás 12:13-17)*

²⁰ Gorhá Issáesh chammáni chérá kort, wati chárig o jásusesh rawán dátant tán watá Issáyá démá tachk o pahrézkárén mardom pesh bedarant. Áyani maksad esh at ke Issáyá cha áiy jenday habarán mán begishshénant o Rumay wáliay dastá bedayant. ²¹ Áyan jost kort: “Oo ostád! Má zánén taw harché ke gwashay, har tálimé ke dayag, á sajjahén rást ant o hechkaséay némagá nageray o pa rásti Hodáay ráhá sója dayag. ²² Nun márá begwash, bárén Rumay bádsháh Kaysará song o máliát dayag rawá ent yá na?” ²³ Bale Issáyá áyani é repk o mandrŠ zánt o gwashti: ²⁴ “Maná yak dinaré pesh bedaré, eshiay sará kai nám o naksh per ent?” Áyan passaw dát: “Kaysaray.” ²⁵ Issáyá gwasht: “Gorhá Kaysaraygá Kaysará bedayét o Hodáaygá Hodáyá bedayét.” ²⁶ É dhawlá, áyan mardománi démá Issá cha áiy jenday habarán dámá dawr dát nakort o cha áiy passawán bah mant o bétawár butant.

*Áherat o sáng o sur
(Mattá 22:23-33; Markás 12:18-27)*

²⁷ Randá, lahtén Saduki, ke áheratay namannók ant, Issáyá Kerrá átk o ²⁸ jostesh kort: “Oo ostád! Mussáyá pa má nebeshtag: Agan kaséay sur kortagen braté bé chokká bemerit o janózami zendag bebit, gorhá áiy brát báyd ent gón á janózamá sur bekant tánke chokk o rand o ráhé pa wati brátá bellit.*” ²⁹ Nun hapt brát atant, awali brátá jané gept, chokki nabut o mort, ³⁰ domi brátá o ³¹ padá saymi brátá gón á janéná sur kort o á ham bé chokká mortant. Hamé paymá haptén brátán gón hamá janéná sur kort o bé pad o rand cha donyáyá shotant. ³² Godhsará, á janén ham mort. ³³ Nun taw begwash, áheratay

* **20:9** 20:9 Konandahkári o zamán, bezán paymánkári, ejáray sará, thékah. † **20:17** 20:17 Bonhesht, bezán lógay awali hesht yá seng. ‡ **20:17** 20:17 Zabur 118:22. § **20:23** 20:23 Mandr, bezán repk, sázesh, pachali.

* **20:28** 20:28 Sharyatay Domi Rahband 25:5 o rand.

róchá, é janén, kojám brátayga bit, chiá ke har haptén brátán bárig bárigá gón áia sur kortagat.”

³⁴ Issáyá passaw dát: “Mardom, é jaháná sáng o sura kanant, ³⁵ bale hamá mardom ke namiránén zendá karzant o áheratay láhek ant, á na sura kanant o na sur dayaga bant. ³⁶ Á hechbar padá namerant o préshtagáni dhawlá ant, Hodáay chokk ant, chiá ke namiránén zenday chokk ant. ³⁷ Bale mordagáni zendag bayagay habaray rásti, Mussáyá mán bon geptagén dhólokay kessahá pésh dáshtag. Ódá Mussá Hodáwandén Hodáyá, *Ebráhémay Hodá, Eshákay Hodá o Ákubay Hodá* gwasht. ³⁸ Á mordagáni Hodá naent, zendagénáni Hodá ent, chiá ke áiy gwará, sajjahén zendag ant.”

³⁹ Cha Sharyatay zánógerán lahténá gwasht: “Oo ostád, taw sharr gwasht.”

⁴⁰ Cha ed o rand, hechkasá del nakort cha áia dega josté begipt.

Masih kai chokk ent?

(Mattá 22:41-46; Markás 12:35-37)

⁴¹ Issáyá gón áyán gwasht: “É chónén habaré ke gwashtant: ‘Masih, Dáud bádsháhay chokk ent?’ ⁴² Chiá ke Dáud wat Zaburay ketábá gwasht:

Hodáwandá gón mani Hodáwandá gwasht

mani rástén némagá benend

⁴³ *tán hamá wahdá ke tai dozhmenán tai pádáni chéray padag o chárchóbahé bekanán.* §

⁴⁴ Nun agan Dáud, Masihá wati Hodáwanda gwasht, gorphá Masih chón áiy chokk buta kant?”

Issá Sharyatay zánógerán páshka kant

(Mattá 23:1-7; Markás 12:38-40)

⁴⁵ Hamé wahdá ke sajjahén mardom gósh dárágá atant, Issáyá gón moridán gwasht: ⁴⁶ “Cha Sharyatay zánógerán hozzhár bét, ke áyán drájen jámger o kabáh gwará kanag dósta bit o bázaráni tarr o gardá cha mardomán wasshátk o drahbáta lóthant. Kanisaháni sharterén jáhán gechéna kanant o mehmánián, awali reday nendagesh pasond ent. ⁴⁷ Janózámáni lógán gón málwáriá barant o pa pésh dárágá wati dwá o sanáyán drájkassha kanant. Eshán sakterén sezá o padmozza rasit.”

† 20:37 20:37 Dargwaz 3:6. ‡ 20:42 20:42 Mani Hodáwand, bezán Issá Masih. § 20:43 20:43 Zabur 110:1.

* 21:1 21:1 Péti, bezán sanduk. † 21:2 21:2 Asligén Yunáni nebeshtánka gwasht: “do lepton”, bezán á zamánagay gwandhterén zarr. ‡ 21:11 21:11 Zeminchandh, bezán zelzelah. § 21:16 21:16 Tantaná, bezán hattá, tán é haddá ke.

21

Janózáméay hayrát

(Markás 12:41-44)

¹ Issáyá sar borz kort o disti ke lahtén azgár o hastómand, wati hayráti zarrán mazanén parasteshgáhay pétiá* mán kanagá ent. ² Áia, yak nézgarén janózámé ham dist ke pétiay tahá do paysahi† dawr dát. ³ Nun gwashti: “Shomará rásténa gwashán, é béwasén janózámá cha sajjahénán géshter mán kort. ⁴ Chiá ke á degarán cha wati géshén mála chizzoké dát, bale é janózámá, gón wati nézgári o garibiá, harché ke áia hastat dáti, bezán wati sajjahén bonmál.”

Áyókén zamánagay bárawá Issáyá péshgói

(Mattá 24:1-14; Markás 13:1-13)

⁵ Lahtén mardom mazanén parasteshgáhay bárawá habar kanag o gwashagá at ke “é gón chónén dhawldárén seng o gránkimmatén hayrát o thékián nakshband kanag butag.” ⁶ Á wahdi Issáyá gwasht: “Cha eshán ke shomá maróchi gendagá ét, róché kayt ke yak sengé ham domi sengay sará namánit. Sajjahénána próshant o karóyant.” ⁷ Jostesh gept: “Oo ostád! Bárén, é prosht o prósh kadéna bit o eshiay nazzik bayagay nesháni chi ent?” ⁸ Issáyá gwasht: “Hozzhár bét, kasé shomará gomráh makant. Chiá ke bázéné pa mani námá kayt o gwasht: ‘Man hamá án’ o ‘Wahd átkag o nazzik ent,’ bale shomá áyáni habará gón makapét. ⁹ Wahdé shomá jang o áshópay kukkárá eshkonét, matorsét o paréshán mabét. Chiá ke awalá býad ent é dhawlá bebít, bale halásiay wahd hamá damáná pa sara narasit.”

¹⁰ Gorphá gón áyán gwashti: “Yak kawmé dega kawméay sará o yak hokumaté dega hokumatéay sará páda kayt. ¹¹ Mazanén zeminchandha‡ bit o bázén jágahán dhokkál o wabá kapit. Cha ásmáná torsnákén sargwast o ajabbatén nesháni paddara bit.

¹² “Bale cha é sajjahénán o pésar, shomará gerant o pa shomá jawr o ázára kanant, kanisah o jélána barant o bandiga kanant. Pa mani námay sawabá bádsháh o hákemáni démá barant o pésha kanant. ¹³ Gorphá shomará pa gwáhi dayagá sharrén móhé rasit. ¹⁴ Gón wat shawr kanét ke pa wati démpániá, cha wahdá pésar paréshán mabét. ¹⁵ Chiá ke man shomará anchén habaráni zántkáriá

dayán ke hech dozhmené shomay démá maóshítit o shomay habarán próshnt makant. ¹⁶ Tantaná^S shomay má^t o pet, brát o syád o dóst, shomará geráénant o lahténá kóshárénant. ¹⁷ Sajjahén mardom pa mani námay sawabá cha shomá naprata kanant, ¹⁸ bale cha shomay sará yak mudé ham kamma nabit. ¹⁹ Agan pa deléri sakkián besaggét, wati sáhá rakkénét.

Urshalimay harábi o wayrániay péshgói

(*Mattá 24:15-21; Markás 13:14-19*)

²⁰ “Wahdé shomá gendét ke Urshalim, pawj o lashkará chapp o chágérdá angerr kortag, gorhá bezánét ke eshiay wayrániay wahd nazzik ent. ²¹ Á wahdá hamá ke Yahudiahá ant, kóhán betachant, á ke Urshalimá ant dhanná dar bekapant o á ke cha shahrá dhann ant shahrá marawant. ²² Chiá ke á wahd sezáay wahda bit o sajjahén nebeshtánkáni habar purah o sarjama bant. ²³ Á róchán, apsó^z pa lápporr o chokmátén janénán, chiá ke molkay sará báz sáki o janjála kayt o é kawmay sará Hodáay kahra kapit. ²⁴ Dozhmen áyán zahmáni dapá dayant o bázénéá bandig o sajjahén donyáay tahá darándhéha^{*} kanant. Urshalim, darkawmáni pádáni lagatmála bit, tán á wahdá ke darkawmáni wahd o báriga kotthit o halása bit.

Issáay per tarrag

(*Mattá 24:29-31; Markás 13:24-27*)

²⁵ “Cha róch o máh o estarán ajabatén nesháni paddara bant o donyáay sajjahén kawm cha daryáay chawl o mawjáni trondén tawará paréshán o sargardána bant. ²⁶ Mardom, donyáay sará áyó^{kén} janjál o sáki o sóriáni tors o bimmá behósha bant, chiá ke ásmánay zór o wák larzénaga bant. ²⁷ Á wahdá, mardom Ensánay Chokká gendant, ke gón mazanén wák o twán o shán o shawkaté cha jambaréay nyámá kayt o paddara bit. ²⁸ Wahdé é jáwara káyant o rasant, gorhá wati sará borz kanét o tachká^{tachk} bóshtét ke shomay rakkénagay wahd nazzik ent.”

Enjiray drachk

(*Mattá 24:32-35; Markás 12:28-31*)

²⁹ Issáyá pa áyán é mesál ham dát ke “enjir o é dega drachkán bechárét, ko anchosh ke tákesh jat, wata zánét ke nun garmágay mósom nazzik ent. ³¹ Hamé paymá, wahdé é chizzána gendét, wata zánét ke Hodáay bádsháhi nazzik ent. ³² Shomará rásténa gwashán, tán é

sajjahén jáwar mayáyant, é nasl o padréch halása nabit. ³³ Zemin o ásmán gára bant, bale mani habar hechbar gár o zyána nabant.

³⁴ “Hozzhár bét, chosh mabit ke shomay del pa neshah o malarán berawt o zenday pegr o andóh shomay delá gránbár bekant o á róch anágat shomay gothá lóp bebit. ³⁵ Chiá ke á róch pa donyáay sajjahén mardomána kayt. ³⁶ Paméshká harwahd hozzhár bét o dwá bekanét, tán shomará á róchá ke chosha bit o é jáwar pa sara rasant dar rawagay wák bebit o Ensánay Chokkay bárgáhá óstát bekanét.”

³⁷ Issáyá har róch, mazanén parasteshgáhá sabak o tálima dát. Har shap cha shahrá dhann, Zaytun námkaptén kóhay sará shot o wati shapi sabáha kort. ³⁸ Mardom ham har sabáhá máhallah, pa áiyay habaráni gósh dáragá, mazanén parasteshgáhá átkant.

22

Issáay koshagay pandal o sázesh

(*Mattá 26:2-5; Markás 14:1-2*)

¹ Béhomirén náney aid, hamá ke Sargwaz gwashaga bit nazzik at. ² Mazanén dini péshwá o Sharyatay zánóger pa Issáyá kóshárénagá, ráh o nimmoné shóház kanagá atant, bale cha mardomána torsetesh. ³ Hamá wahdá, Yahudá ke Eskaryuti nám kaptagat o wat cha Issáyá dwázdahén moridán yakké at, Shaytán áiyay póstá potér. ⁴ Yahudá, mazanén dini péshwá o mazanén parasteshgáhay negahpánén sepáhigáni masteráni Kerrá shot o gón áyán gend o nendi kort ke che paymá Issáyá bedróhit o áyáni dastá bedant. ⁵ Á báz wassh butant o shawresh kort ke áia chizzé zarr bedayant. ⁶ Yahudáyá mannet o nun gwam o gégén wahd o móhéay shóházá at ke cha mardománi mocchiá dur, Issáyá áyáni dastá bedant.

Sargwazay shámay tayári

(*Mattá 26:17-19; Markás 14:12-16*)

⁷ Gorhá, béhomirén náney aiday hamá róch átk ke gwarándhá korbániga kanant. ⁸ Issáyá Petros o Yuhanná dém dátant o gwashti: “Berawét Sargwazay aiday shámay tayáriá bekanét ke bwarén.” ⁹ Áyán jost kort: “Taw ché lóthay, má é tayáriá kojá bekanén?” ¹⁰ Passawi dát: “Shahrá ke rasét, mardéá gendét ke ápi kunzagé gón enti,* áiyay randá hamá lógá berawét ke á rawt. ¹¹ Lógay wáhondá begwashét: ‘Ostád josta kant: “Mehmánhánah kojá ent ke man gón wati moridán Sargwazay shámá hamódá

* **21:24** 21:24 Darándhéh, bezán jaláwatan.

* **22:10** 22:10 É ajabén habaré. Áp kasshag janénáni kár at. † **22:12**

22:12 Bán, bezán kóthi, kamrá, ótag.

bwarán?"¹² Á mard, shomará wati lógay sarborá, práhén bán[†] o diwánjáhé pésha dárit ke ódá har chizz hast, shámáy tayáriá hamódá bekanét."¹³ Á shotant. Ódá, áyán har chizz hamá paymá dist ke Issáyá gwashtagat. Sargwazay shámesh hamódá tayár kort.

Godhi shám

(*Mattá 26:24, 26-29; Markás 14:22-25*)

¹⁴ Hamá sáhat ke raset, Issá gón moridán parzónagay sará nesht. ¹⁵ Gón áyán gwashti: "Mani masterén armán hamé butag ke gránén sakkí o sóriáni saggagá pésar, é Sargwazay shámá gón shomá horigá bwarán. ¹⁶ Shomará gwashán, tán Hodáay bádsháhi barjáh dárag mabit, dega baré é shámá nawarán."

¹⁷ Gorchá, jámé chesti kort, Hodáay shogri gept o gwashti: "É jámá bezuré, wati nyámá bahr kanét. ¹⁸ Shomará gwashán ke cha ed o rand, tán Hodáay bádsháhi mayayt o marasit, man anguray dahl o samará nanóshán." ¹⁹ Nagani ham zort, Hodáay shogri gept, chondh chondhi kort, moridáná dát o gwashti: "É mani jesh ent ke pa shomá korbániga bit, é rasmá pa mani yát o yátmáná barjáh bedarét."

²⁰ Hamé dhawlá, cha waragá rand, jámé zort o gwashti: "É jám, mani nókén ahd o karáray hón ent ke pa shomaygi réchaga bit. ²¹ Bale, hamá ke maná dróhit, áiyay dast gón mani dastá yakkén parzónagá ent. ²² Chiá ke hamá dhawlá ke péshá shawr borrag[‡] butag, Ensánay Chokka rawt, bale bazhn o apsóz pa hamá mardomá ke áia dróhit." ²³ Á wahdi, morid yakdomiá jost kanagá laggetant: "Báren, cha má kay choshén karé kant?"

Mazani o masteriyá bárawá

(*Mattá 20:25-27; Markás 10:42-44*)

²⁴ Moridáni nyámá arh o dáwáé pád átk ke "báren, may nyámá sajjahénáni master o kamásh kay ent?"²⁵ Issáyá gón áyán gwasht: "Darkawmáni bádsháh, wati mardománi sará gón zóraki wájahia kanant o áyáni hákemáni maksad o morád esh ent ke mardom áyán hayr o barkat dayók bezánant. ²⁶ Bale shomá chosh makanét, bellét ke shomay masterén, kasterénay dhawlá bebit o shomay hákem, hezmatkáráy dhawlá. ²⁷ Báren, kay master ent? Hamá ke neshtag o waragá ent, yá hamá ke hezmat kanagá ent? Albat, hamá ke neshtag o waragá ent. Bale man shomay nyámá, hezmatkáréay dhawlá án. ²⁸ Shomá hamá ét ke mani

ázmáesh o chakkásán, gón man hamráh o hamkópag butagét. ²⁹ Hamá dhawlá ke Petá maná bádsháhi bakshetag, man ham áia shomará bakshán ³⁰ tán mani bádsháhiay tahá cha mani parzónagá bwarét, benóshét, tahtáni sará benendét o Bani Esráilay dwázdahén kabilaháni dádrasiá bekanét.

Petrosay enkáray péshgói

(*Mattá 26:31-35; Markás 14:27-31; Yuhanná 13:36-38*)

³¹ "Shamun, oo Shamun! Shaytáná mókal o ejázat lóthet ke shomará gandomay dhawlá kamak bekant o begécht. ³² Bale man pa taw dwá kort tán tai báwar o imán zawál mabit. Gorchá, wahdé per tarret o padá mani ráhá átkay, wati brátáni dastá beger o delbaddhi beday." ³³ Bale Petosá passaw tarrént: "Oo Hodáwand! Man gón taw horigá pa kayd o band o marká ham tayár án." ³⁴ Issáyá gwasht: "Oo Petros! Man tará gwashán ke maróchi taw cha korósbángá pésar, mani pajjáh áragá say randá enkára kanay o namannay."

³⁵ Randá cha áyán josti kort: "Báren, hamá wahdá ke man shomará bé zarturag o pélek, bé chawath o swásá dém dát, shomá pa chizzé wázmánd o mohtáj butét?" Áyán passaw dát: "Na, pa hech chizzá." ³⁶ Gorchá gwashti: "Bale nun cha shomá agan kaséay Kerrá zarturag o pélek hast, gón wat bezurit o áiyay Kerrá ke zahm nést, wati kabáhá bahá bekant o zahmé bahá begipt. ³⁷ Chiá ke é nebeshtah mani bárawá, báyad ent purah o sarjam bebit ke gwasht: *A gón gonakhárán hesáb kanag but.Š* Haw! Á chizz ke mani bárawá nebisag butag nun sarjam bayagi ent." ³⁸ Moridán gwasht: "Oo Hodáwand! Bechár, mára do zahm gón ent." Gwashti: "Bass ant."

Jetsimániay bága Issáyay dwá

(*Mattá 26:36-46; Markás 14:32-42*)

³⁹ Randá, Issá dar átk o anchosh ke áiyay hél o ádat at, dém pa Zaytunay kóh shot. Morid ham áiyay randá shotant. ⁴⁰ Ódá ke sar but, gwashti: "Dwá kanét ke ázmáesh o chakkásá makapét." ⁴¹ Randá, yak dhókéay chagaljáhay kesásá, cha moridán dur but, kóndháni sará nesht o chosh dwái kort: ⁴² "Oo mani Pet! Agan tai razá ent gorchá é sakkáni jám o pyálahá* cha man dur kan o bethagalén, bale na pa mani lóth o wáhagá, pa tai jenday washnódiá." ⁴³ Hamá wahdá, cha ásmáná préshtagé záher but o Issái deldári o

[‡] 22:22 22:22 Shawr borrag, bezán paysalah kanag. § Issáyay maksad wati markay sakkí o sórián ent.

§ 22:37 22:37 Eshayá Nabiay Ketáb 53:12. * 22:42 22:42

delbaddhi dát. ⁴⁴ Á, yak grán o jánsóchéen ranjéá dochár at, paméshká géshter dwái kort o áiy héd, hónay trampáni dhawlá zeminay sará petthetant.

⁴⁵ Cha dwáya ke pád átk, moridáni némagá per tarret, disti ke cha bázén gam o andóhán, wáb kaptagant. ⁴⁶ Gwashti: “Pa ché waptagét? Pád áét, dwá kanét ke chakkásá makapét.”

Issáay dazgir kanag

(Mattá 26:47-56; Markás 14:43-50; Yuhanná 18:3-11)

⁴⁷ Angat Issá gón moridán habar kanagá at ke rombé mardom átk o raset. Cha Issáay dwázdahén moridán yakké, bezán Yahudá, áyáni rahshón at. Á, Issáay nazziká átk tán bechokkiti. ⁴⁸ Issáay gwasht: “Oo Yahudá! Taw gón chokkag o drót, †Ensánay Chokká geráénay?”

⁴⁹ Wahdé Issáay hamráhán dist ché bayagá ent, jostesh kort: “Oo Hodáwand! Wati zahmán bekasshén?” ⁵⁰ Cha moridán yakkéá wati zahm kasshet o masterén dini péshwáay nawkaray rástén góshi sest. ⁵¹ Bale Issáay gwasht: “Bass ent! Dast bedárét!” Áiy góshá dasti per mosht o dráhi kort.

⁵² Á wahdá, Issáay gón mazanén dini péshwá, mazanén parasteshgáhay negahpánén sepáhigáni master o kawmay kamáshán ke pa áiy dazgir kanagá átkagatant, gwasht: “Záná, man yági o rahzané án ke shomá gón zahm o latthán pa mani dazgir kanagá átkagét?” ⁵³ Man har róch mazanén parasteshgáhá gón shomá hór o yakjáh butagán, ódá shomá maná dast najatag. Bale haw! Nun wahd shomayg ent o taháróki hákem ent.”

Petrosay enkár

(Mattá 26:57-58, 69-75; Markás 14:53-54, 66-72; Yuhanná 18:12-18, 25-27)

⁵⁴ Gorhá, Issáesh dazgir kort o masterén dini péshwáay lógá bort. Petros dur durá, áyáni poshtá rawán at. ⁵⁵ Lógay péshjáhá, ásé rókesh kortagat o ásay chágerdá nesh-tagatant. Petros ham gón áyán nesh. ⁵⁶ Móledéá, ásay rozhnáiyá, Petros dist, roguogu cháret o gwashti: “É mard ham gón Issáay hamráh butag.” ⁵⁷ Bale Petrosá namannet o gwashti: “Oo janén! Man áiy nazánán.”

⁵⁸ Kammé wahdá rand, degaréá Petros dist o gwashti: “Taw ham cha hamáyán ay.” Petrosá passaw dát: “Oo mard! Man cha áyán naán.”

⁵⁹ Kamm o gésch sáhatéá rand, dega yakkéá Petrosay némagá cháret o pa deljami gwashti: “É mard allamá Issáay hamráh butag chiá ke á ham Jililié.”

⁶⁰ Petrosá darráént: “Oo mard! Man sarpada nabán taw ché gwashagá ay.” Petros hamé habará gwashagá at ke korósá báng dát. ⁶¹ Hodáwandén Issáay chakk tarrént o Petrosay némagá cháret. Gorhá, Petros Hodáwanday habaray yát o tránagá kapt ke gwashtagati: “Taw maróchi korósbángá pésar, say randá mani pajjáh áragá enkára kanay.” ⁶² Nun dhanná dar átk o sakk gréti.

Issáay sará malandh o rishkand

(Mattá 26:67-68; Markás 14:65)

⁶³ Á sepáhigán ke Issá wati nyámá gep-tagat, áiy janag o malandh o maskará kanagesh bongéj kort. ⁶⁴ Issáay chammesh bastant o gwashtesh: “Nun paygambari kan, begwash kayá tará jat?!” ⁶⁵ Dega bázén bad o radé ham gwashtesh.

Sarókáni diwáná Issáay pésh kanag

(Mattá 26:59, 63-66; Markás 14:61-63; Yuhanná 18:19-21)

⁶⁶ Wahdé róch but, kawmay kamásháni diwán, bezán mazanén dini péshwá o Sharyatay zánóger yakjáh butant, Issáesh lóthet o áwort. ⁶⁷ Jostesh kort: “Agan taw Masih ay gorhá márá begwash.” Issáay passaw dát: “Agan man begwashán, báwara nakanét. ⁶⁸ Oo agan jost begerán, passawa nadayét. ⁶⁹ Bale cha annun o rand, Ensánay Chokk zóráwarén Hodáay rástén némagá nendit.” ⁷⁰ Á wahdá sajjahénán gwasht: “Acha, taw Hodáay Chokk ay?!” Passawi dát: “Shomá wat gwashagá ét ke *Man Hamá Án.*” ⁷¹ Áyán gwasht: “Nun dega chónén gwáh o sháhedié lóthén? Má wat cha áiy jenday zobaná é habar eshkot.”

23

Issá Pilátusay démá

(Mattá 27:1-2, 11-14; Markás 15:1-5; Yuhanná 18:28-37)

¹ Randá, diwánay sajjahén mardom pád átkant o Issáesh Pilátusay démá bort.

² Áiy sará tohmat o bohtám janána gwashtesh: “Má distag ke é mard, kawmá gomráha kant, Rumay Kaysaray song o máliát dayagá manah o makana kant o gwasht: ‘Man Masih o bádsháh án.’”

³ Pilátusá jost kort: “Taw Yahudiáni bádsháh ay?” Issáay passaw dát: “Taw wat gwashagá ay.”

⁴ Pilátusá gón mazanén dini péshwá o á dega mardomán gwasht: “Man pa é mardá hech mayaré nagendán.” ⁵ Bale mardom wati habaray sará óshtátant o gwashtesh: “É mard, gón wati tálimán, Yahudiahay sajjahén damagay mardomána shórenit.

† 22:48 22:48 Drót, bezán chokkag, bósah.

Cha Jalilá bongéji kortag o annun edá rasetag.”⁶ Pilátusá mardománi é habar ke eshkotant, lótheti bezánt, bárén, á cha Jalilay mardomán ent?⁷ Wahdé sahig but Issá Jalilié, gorhá Hirudisay némagá ráhi dát, chiá ke Jalilay hákem, Hirudis á wahdá Urshalimá at.

Issá o Hirudis

⁸ Hirudisá Issá ke dist, báz wassh but, chiá ke dérén wahdé at ke áiy gendagá wáhtagdár* at. Cha Issáay kortagén káráni eshkonagá rand, nun oméwár at ke yak mójezah o ajabbatén neshánié begendit.⁹ Gorhá, cha Issáyá bázén jost o porsé korti, bale Issáyá hech passawé nadát.¹⁰ Mazanén dini péshwá o Shary-atay zánóger ke hamódá óshtátatant, Issáay sará bázén tohmat o bohtám janagá atant.¹¹ Hirudisá ham gón wati sepáhigán hórígá, Issá béezat kort o kalág gept. Randá, dhwáldárén kabáhé gwará dát o padá Pilátusay kerrá rawán kort.¹² Cha hamá róchá, Hirudis o Pilátus, bél o sangat butant. Pésará, á watmánwat dozhmen atant.

Issáay markay hokm

(*Mattá 27:15–26; Markás 15:6–15; Yuhanná 18:39–19:16*)

¹³ Pilátusá, mazanén dini péshwá, Yahudiáni kamásh o mahluk lóthetant o ¹⁴ gwashti: “Shomá, é mard mani gwará áwortag o tohmat o bohtám jatag ke mardomán gomráh o yágia kant. Bale cha á jostán ke man shomay démá kortagant, áiy sará shomay jatagén bohtámán hech rástíe nadiston.¹⁵ Hirudisá ham mayaré nadistag, paméshká padá may gwará ráhi dátag. É mardá choshén hech gonáh o mayaré nakortag ke sezái mark bebit.¹⁶ Gorhá, man áia adaba dayán† o yalaha kanán.”¹⁷ † ¹⁸ Bale sajjahén mardomán kukkár kort o gwasht: “Issáyá bekosh! Bárábásá yalah beday!”¹⁹ Bárábás, Urshalimay shahrá, áshóp o hón kanagay mayáray sará, bandig kanag butagat.

²⁰ Pilátus, Issáay yalah dayagá delmánag at, Paméshká dega yak randé áiy bárawá gón mardomán habari kort.²¹ Bale mardom sakk kukkár kanagá atant o gwashtesh: “Salibi kassh! Salibi kassh!”

²² Pilátusá, saymi randá cha áyan jost kort: “Chiá bárén? É mardá che badén káré kortag? Man pa eshiá hech choshén mayaré nagendán ke kóshay hokmá be-dayán, paméshká adabia dayán o yalaha

kanán.”²³ Bale mardom gón kukkár wati habaray sará óshtátant o gwashtesh: “Salibi kassh!” Néth,[§] áyáni wáhayg o kukkár pa sar raset.²⁴ Pilátusá áyáni wáhayg sará hokm dát.²⁵ É dhawlá, áia hamá mard ke pa áshóp pád kanag o hónay bohtámá bandig at o mardomán áiy yalah dayaga lóthet, ázát kort o áyáni wáhayg sará, pa Issáay kóshá hokm dát.

Issá dém pa salibá

(*Mattá 27:32–44; Markás 15:21–32; Yuhanná 19:17–24*)

²⁶ Wahdé Issáyá baragá atant, Shamun námén mardé distesh ke Keriniay shahray mardomé at o dém pa shahrá pédák at. Sepáhigán á mard gept, salib áiy bad-dhá dát o hojesh kort ke Issáay randá berawt.²⁷ Issáay randá, bázén mardomé rawagá at o gón áyan rombé janén ham gón at ke pa Issáaygi gréwán o mótk kanán atant.²⁸ Issáyá chakk tarrént, áyáni némagá cháret o gwashti: “Oo Urshalimay jenekán! Pa man magréwét, pa wat o wati chokkán begréwét.²⁹ Yak anchén wahdé kayt ke gwashtant: ‘Bahtáwar ant á janén ke santh o bérand ant, hamá janén ke chokkesh nabutag o cha wati sénagán chokkesh naméchéntag.’³⁰ Hamá wahdá, mardom kóhán tawára kanant: ‘Byáét may sará bekapét’ o jompána gwashtant: ‘Márá panáh dayét.’³¹ Wahdé á gón sabzagén drachká chosha kanant, gorhá gón hoshkéná ché nakanant.”

³² Áyan, do radkárén mardom áwort ke gón Issáyá hór, koshagi atant.³³ Wahdé hamá “Kámpól” námén jágahá rasetant, áyan Issá salibay sará dratk. Áiy rástén némagá yak radkáré salib kasshet o chappén némagá domi radkár.³⁴ Issáyá gwasht: “Oo Pet! Áyan pahell kan, chiá ke nazánant ché kanagá ant.” Gorhá sepáhigán Issáay pocch o póshák kasshetant o pa áyáni bahr kanagá pál jatash ke bárén kayá rasant.

³⁵ Mardom pa sayl o nedáragá* óshtátatant o sarókáni diwánay básk† rishkand kanáná, gwashtagá atant ke “eshiá, á dega rakkéntant, bale agan Masih ent o Hodáay hamá gechén kortagén, nun gorhá watá berakkénit.”

³⁶ Sepáhig ham áiy nazziká shotant o kalágesh gept, trophshén sharábshén cháshént o gwashtesh:³⁷ “Agan taw Yahudiáni bádsháh ay, gorhá watá berakkén.”³⁸ Issáay saray borzádiá é

* **23:8** 23:8 Wáhtagdár, bezán lóthók, delmánag, hodónák. † **23:16** 23:16 Edá adab dayagay máná shallák o hayzarán janag ent. ‡ **23:17** 23:17 Lahtén daznebeshtá é band nést, bale lahténá chó átkag: Pilátusá har Sargwazay aida, cha wati bandigán yakké, allamá ázát kanagi at. § **23:23** 23:23 Néth, bezán godhsrá, áherá.

* **23:35** 23:35 Nedárag, bezán sayl, tamáshá. † **23:35** 23:35 Básk, bezán ozw, membr.

dhawlnén mayárnámagé ham lónj kortagat ke: “É Yahudiáni bádsháh ent.”

³⁹ Cha doén radkárán ke salibá dratkatant, yakkéá dozhmán dayáná gwasht: “Taw Masih naay? Gorrhá, byá watá o márá berakkén!” ⁴⁰ Bale domi radkárá á hakkal kort o gwashti: “Záná, tará cha Hodáyá natorsit? Tará ham hamé sezá rasagá ent. ⁴¹ May sezá barhakk ent, chiá ke may kortagén káráni ásar ent. Bale é mardá hech mayaré nakortag.” ⁴² Gorrhá gwashti: “Oo Issá! Wahdé taw wati bádsháhiá sar butay, mani hayalá ham bekap.” ⁴³ Issáyá passaw dát: “Tará rásténa gwashán ke taw maróchi mani hamráhiá, beheshtá raway.”

Issáy mark

(Mattá 27:45-56; Markás 15:33-41; Yuhanná 19:28-30)

⁴⁴ Némróchay wahd at. ⁴⁵ Anágat sajjahén molk tahár but o é tahárokí tán bégáhá mant. ⁴⁶ Chiá ke róchay drapshag band butagat o mazanén parasteshgáhay pardah cha nyámá dert o do ném but. ⁴⁷ Issáyá borzén tawaréá chihál kasshet o gwasht: “Oo Pet! Man wati ruh o sáhá tai dastá dayán.”* Gón hamé habará, sáhi dát.

⁴⁸ Pawjiáni yak apsaréá é nedárag dist, Hodái satá kort o gwashti: “Béshakk ke é nékén mardé at.” ⁴⁹ Á dega sajjahén mardom ke pa saylá átkagatant, gón é nedáragay gendagá sar o sénag janán o mótk kanáná wati lógán per tarretant. ⁵⁰ Hamá mardom ke Issáy pajjárók atant o hamá janén ke cha Jalilá áiy hamráhiá átkagatant, dur o gestá óshtátagatant o é sajjahén sargwastesh distant.

Issáy kabr kanag

(Mattá 27:57-61; Markás 15:42-47; Yuhanná 19:38-42)

⁵¹ Hamódá, Issop námén mardé ham gón at ke tachk o pahrézkárén mardé at. Belli ke sarókáni diwánay báské at, ⁵² bale pa Issáy mayárig kanagá gón áyáni shawr o habarán hamdel naat. Á, Yahudiáni shahr Arimátiáy mardomé at o Hodáay bádsháhiay rahchár o wadárig at. ⁵³ Pilátusay kerrá shot o cha áiy Issáy jónay baragay ejázati lóthet. ⁵⁴ Issáy jóni cha salibay sará ér gétk, liloméⁿ godéay tahá kapon kort o taláray tráshtagén kabréá ér kort ke pésará ódá hechkas kall

kanag nabutagat. ⁵⁵ Á róch, tayáriay róch at o Shabbat bongéj bayagi at.

⁵⁶ Hamá janén ke cha Jalilá, Issáy hamráhiá átkagatant, Issopay randá rawán butant o hamá kabresh dist. Áyán é ham dist ke Issáy jón che paymá kabrá ér dayag but. ⁵⁷ Randá, wati lógán átkant o washbóén atr o rógenesh tayár kort. Shabbatay róchá, Sharyatay rahbanday sará, áyán áram kort.

24

Issáy jáh janag
(Mattá 28:1-8; Markás 16:1-8; Yuhanná 20:1-8)

¹ Haptagay awali róchá, bezán Yaksham-behay gwarbámá,* janénán hamá washbóén rógen o atr ke tayár kortagatant, zortant o kabray sará shotant, ² bale distesh hamá dhók ke kabray dapá at léth geptag o cha wati jágahá thagaletag. ³ Wahdé kabray tahá shotant, Hodáwandén Issáy jónesh nadist. ⁴ Hayrán atant o nazántesh ché bekanant ke anágat do mard, gón drapshókén god o pochán áyáni kashá óshtát. ⁵ Janénán, cha torsá wati sar jahl kort, bale á doénán gwasht: “Shomá chiá á zendagéná, mordagáni nyámá shóháza kanét? ⁶ Á, edá naent, áiy jáh jatag. Yát kanét, á wahdi ke angat gón shomá Jalilá at, ché gwashti? ⁷ Shomará nagwashti ke “Ensánay Chokk báyard ent gonahkáráni dastá dayag bebit, báyard ent salib kasshag bebit o saymi róchá padá zendag bebit o jáh bejant?” ⁸ Gorrhá, á janén Issáy é habaray yát o tránagá kaptant.

⁹ Cha kabray sará ke per tarretant, é sajjahén hál o habaresh gón yázdahén kásed o á degarán gwashtant. ¹⁰ Á ke é habaresh pa kásedán rasént, Maryam Majdaliah, Yuánná, Ákubay mát Maryam o áyáni á dega hamráhén janén atant. ¹¹ Kásedán, janénáni habar bé sar o bonén habar zánt o báwaresh nakortant. ¹² Bale Petros pád átk o pa drekké kabray némagá shot, sari jahl kort o kabray tahá cháreti, bale cha liloméⁿ godán o abéd, dega hecchi nadist. Gorrhá cha wati distagénán, hayrán o habakkah but o lógá per tarret.

Emáusay rahsará

(Markás 16:12-13)

¹³ Hamá róchá, cha áyán do morid, dém pa Emáus námén métagéá rawagá at ke cha Urshalimá kesás yázdah kilumitar

‡ **23:44** 23:44 Asligén Yunáni nebeshtánka gwasht: “shashomi sáhát”. Yahudiáni róchay hesáb, sáhát sohbay shashá bongéja but. § **23:44** 23:44 Asligén Yunáni nebeshtánka gwasht: “shashomi sáhátá beger tán nohomi sáhátá”, bezán maróchigén sáhátáni hesábá, dwázdahá beger tán sayá. * **23:46** 23:46 Bechár: Zibur 31:5. † **23:53** 23:53 Lilom, goday tahré ke Engréziá “linen” gwashaga bit. * **24:1** 24:1 Gwarbám, bezán róthekk, róchay dar áyagay wahd. † **24:13** 24:13 Asligén Yunáni nebeshtánka gwasht: “shast stádiá”.

dur at.[†] 14 Á, ráhá gón yakdegará hamé butagén habar o háláni bárawá gapp o trán kanagá atant. 15 Hamé wahdá ke gapp o habará atant, anágat Issá wat áyáni Kerrá átk o gón áyán hör o hamráh but. 16 Bale pajjáhesh nayáwort, chiá ke áyáni chamm pardahéá póshetagtant.

17 Issáyá jost kort: “Shomá wati ráhá, chónén sarháláni bárawá gapp o trán kanagá ét.” Á gón gamnákén chehragé óshátant. 18 Gorrhá cha áyán yakkéá ke námi Kliupás at, passaw dát: “Urshalimá darámadén mardom yakkén taw ay, cha é sarhálán ke hamé róchán ódá butagant sahig naay?” 19 Josti kort: “Cha kojám sarhálán?” Gwashtesh: “Hamá ke Issá Náseriay sará átkant. Á, paygambaré at ke áiy kár o habarán, Hodáay bárgáh o mardománi gwará, bázén zór o kodraté mán at. 20 Bale may mazanéni dini péshwá o kawmay sarókán darkawmáni dastá dát ke pa áíá kóshay hokmá bedayant o randá áyán salib kasshet. 21 Mára omét at, á hamá bit ke Esráílá rakkénit. Nun gapp esh ent ke é habarán say róch gwastag. 22 Cha may hamráhén janénán, lahténáni habarán ham mára hayratéá perréntag. Á maróchi bámgwáhá kabray sará shotagant, 23 bale áiy jónesh nadistag. Gorrhá átkant o mára hálesh dát ke áyán pa elhám o shobén préshtag distagant ke gwashtagesh: ‘Issá zendag ent.’ 24 Cha may mardomán ham lahtén kabray sará shotag o áyán ham anchosh ke janénán gwashtag hamá dhawlá distag, bale áyáni chamm pa wájahay jendá nakaptag.”

25 Issáyá gón áyán gwasht: “Oo násarpadán! Pa nabíáni sajjahén habaráni báwar kanagá shomay del kór ent. 26 Masihá pa wati shán o shawkatay rasagá, é sakki o sóri saggagi naatant?” 27 Randá Issáyá wati bárawá, Mussá o sajjahén nabíáni Pákén Ketábáni tahá, harché ke nebisag butagat, á sarpad kortant.

28 Anchosh ke hamá métagay nazziká átk o rasetant ke ódá rawagi atant, Issáyá é dába pésh dásht ke áíá durter rawagi ent. 29 Áyán dazbandi kort: “Shapá gón má bejall chiá ke róch shotag o shap áyagi ent.” Gorrhá, Issá ham shot tán gón áyán bemánit.

30 Hamá wahdá ke Issá gón áyán pa waragá neshit, náni zort, Hodáay shogri gept, náni chondh chondh kort o áyáni dastá dát. 31 Nun áyáni chamm pach butant o Issáesh pajjáh áwort bale hamá damáná cha áyáni chammá chér o andém but. 32 Gorrhá cha yakdomiá jostesh kort: “Ráhá wahdé á gón má trán kanagá at

o mára Pákén Ketábáni habarán sarpad kanagá at, may del janag o drik drik kanagá naat?”

33 Gorrhá, hamá damáná pád átk o Urshalimá per tarretant. Ódá, áyán yázdahén kásed o á dega morid yakjáh distant, 34 ke gwashtagá atant: “É rást ent ke Hodáwandá jáh jatag o pa Shamuná záher butagi!” 35 Gorrhá é doénán wati ráhay sargwast gón áyán gwasht ke Issáesh che paymá nánay chondh kanagay wahdá pajjáh áwortag.

Issá pa moridán paddara bit

(Markás 16:14; Yuhanná 20:19-23)

36 Taningah á hamé habarán atant ke Issá wat átk o áyáni nyámá óshát o gwashti: “Drud o drahbát[‡] pa shomá!”

37 Áyán torset o hayrán o habakkah butant o gománesh kort balkén ruhé gendagá ant. 38 Bale Issáyá gwasht: “Pa ché shomará inchoka torsit o hayrán o habakkah mantagét o chiá shomay delá shakk pád átkag. 39 Dast o pádánon begendét, é mani jend ent. Maná dast janét o bechárét, arwáhá haddh o góshit pera nabit, bale shomá gendagá ét ke maná haddh o góshit per ent.”

40 É habaray gwashtagá rand, wati dast o pádi pésh dáshtant. 41 Á, cha shádmániá hayrán o habakkah butant o báwaresh nakort. Gorrhá, josti kort: “Gón shomá pa waragá edá chizzé hast?” 42 Chondhé patkagén máhigesh dát, 43 Issáyá zort o áyáni dém pa démá wárt. 44 Gorrhá gwashti: “É mani hamá habar ant ke man gón shomá á wahdá kortagant ke angat gón shomá butagán. Mani bárawá, har habaré ke Mussáay Sharyat, Zabur o Nabíáni Ketábán nebeshtah ent, á zalur báyard ent hamá dhawlá sarjam bebant.”

45 Randá, áyáni zánt o zánagi rozhnág kort tánke Pákén Ketábáni máná o mak-sadá sarpad bebant. 46 Gwashti: “Nebisag butag ke Masih báyard ent sakki besaggit, sáh bedant o saymi róchá, cha mordagáni nyámá jáh bejant o 47 áiy námay sará, pashómán bayag o gonáháni pahelli báyard pa sajjahén kawmán jár janag bebit. É káray bongéj cha Urshalimá bit. 48 Shomá é kár o habaráni gwáh o sháhed ét. 49 Man wati Petay wádh dátagén Pákén Ruhá pa shomá rawána dayán, nun shomá shahrá bemánét, tán hamá wahdá ke cha borzá shomará wák o kodrat berasit.”

Issá ásmáná rawt

(Markás 16:19; Kásedáni Kár 1:9)

50 Randá, Issáyá morid tán Bayt-Anyáay nazziká bortant o dast borz kort o pa

‡ 24:36 24:36 Drud o drahbát, bezán salám o alayk.

áyán nékén dwái lóthet o barkat dátant.
⁵¹ Hamá wahdá ke dwá kanag o barkat
dayagá at, cha áyán gisshet o ásmáná
barag but. ⁵² Moridán Issá parastesh kort o
gón bázén gal o wasshié Urshalimá per tar-
retant. ⁵³ Modám mazanén parasteshgáhá
mantant o Hodáyá satá kanán atant.

Pákén Enjil cha Yuhannáay kalamá Yuhannáay Enjilay pajjár

É ketábay nebisók, Yuhanná, wat Yahudié at. Cha Issá Masihay moridiá pésar, Shamun Petrosay dóst o máhigiriay kárá áiy sharikdár at (Luká 5:1–11; Markás 1:19–20). Yuhannáyá wati nám é ketábá nanebeshtag, bale watá “hamá morid ke Issáyá báz dóst ent” zántagi (Yuhanná 13:23; 19:26). Cha ketábay goddhi bahrá (Yuhanná 21:20–24) paddara bit ke Issá Masihay dósterén morid hamáiy jend ent.

Anchosh ke Yuhanná wata nebisit, é ketábay sajjahén sargwast áiy gón wati chammán distagatant, paméshká é habaráni bárawá wat sháhedia dant (Yuhanná 21:24). Wati Enjilay nebisagay mull o morádáni bárawá gwashtit ke é sargwast o mójezah o ajabbatén nesháni, áiy paméshká nebeshtant “tán shomá báwar kanét ke Issá, Masih ent o Hodáay Chokk, tánke imán byárét o áiy námay sará namiránén zenday wáhond bebét” (Yuhanná 20:31).

Yuhannáay Enjilá, Pákshódókén Yahyáay awali morid, Issáay awali morid, Issáay tálim o mójezah, é jaháná Issáay goddhi haptag, áiy mark o cha mordagán jáh janagá rand, wati moridáni demá záher bayagay hál mán ant.

Gál ensán but

¹ Bongéjá,* cha azal, Gál† hastat. Gál gón Hodáyá gón at o Gál Hodáay jend at. ² Cha azalá, Gál gón Hodáyá at. ³ Sajjahén chizz cha Gálá jórh butant o cha é jórh butagénán, bé Gálá hech chizzé jórh nabut. ⁴ Hasti o zend cha hamáiy pédá but o zend, mardománi nur o rozhn at. ⁵ Rozhn, tahárókiá drapshít‡ o tahárókiá, rozhn hechbar zánt nakortag o prósh nadátag. §

⁶ Yahyá námén mardé pédá but ke Hodáay ráh dátágen at. ⁷ Á átk ke sháhed bebit o pa hamá rozhná gwáhi bedant, tánke sajjahén mardom cha áiy gwáhiá imán byárant. ⁸ Á wat hamá rozhn naat, bale átk tán pa rozhná gwáhi bedant. ⁹ Hamá rástén rozhn, ke pa sajjahén mardomán rozhnáia kárit, nun

mán jaháná áyagi at. ¹⁰ Á mán jaháná at o Hodáyá jahán cha hamáiy jórhéntagat, bale jaháná á pajjáh nayáwort. ¹¹ Á wati mahlukay nyámá* átk o mahluká namanet. ¹² Bale hamá mardomán ke báwara kort o mannet, áiy é hakk o ehtiár dátant ke Hodáay chokk bebant, bezán hamá ke áiy námay sará imánesha áwort. ¹³ Á, na cha hóná pédá butant o na cha jesmáni wáhagán o na cha ensáni lóthán, cha Hodáyá pédá butant.

¹⁴ Gál ensán but o may nyámá jágahi kort. Má áiy shán o shawkat dist, shán o shawkaté ke Petay yakkén Chokkayg ent, hamá Chokk ke cha rahmat o rástiá porr ent. ¹⁵ Yahyá pa áiy gwáhia dant, gwánka† jant o gwashtit: “Esh ent hamá kas ke áiy bárawá man gwashtag: Cha man o randa kayt, bale cha man master o demáter ent. Chiá ke cha man pésará butag.” ¹⁶ Má sajjahénán cha áiy pormehrén rahmatay sawgátá modám barkatá geptag. ¹⁷ É rást ent ke Tawránt cha Mussáyá mará bakshag butag, bale rahmat o rásti, cha Issá Masihá pa má átk o sar but. ¹⁸ Kassá hechbar Hodá nadístag, bale hamá yakdánagén Chokk ke wat Hodá ent o Petay ambázá ent, hamáiy Hodá pajjáréntag.

Pákshódókén Yahyáay gwáhi

¹⁹⁻²⁰ Wahdé Urshalimay shahray Yahudián wati lahtén dini péshwá o Láwiay kabilahay mardom Yahyáay Kerrá rawán dát ke jost begerant: “Taw kay ay?” Áiy enkár nakort, tachk o pa rásti gwáhi dát o gwashti: “Man Masih naán.” ²¹ Áyán jost kort: “Taw Elyás ay?” Gwashti: “Na.” Gwashtesh: “Gorhá taw hamá wádah dátágen nabi ay?” Gwashti: “Na.” ²² Jostesh kort: “Acha, taw kay ay? Má báyard ent pa áyán passawé‡ bebarén gón ke mará rawánesh dátágen. Wati bárawá ché gwashtay?” ²³ Áiy cha Eshayá nabiy kawlá gwasht: “Man hamá tawár án ke mán gyábáná gwánka jant o gwashtit, Hodáwanday ráhá rást o tachk kanét.” §

²⁴ Cha é rawán dátágen kásedán lahtén Parisi atant. ²⁵ Jostesh kort: “Agan taw na Masih ay o na Elyás ay o na hamá nabi, gorhá pa ché pákshódia dayay?” ²⁶ Yahyáyá áyáni passawá gwasht: “Man gón ápá pákshódia dayán, bale kaséá shomay nyámá jáh jatag* ke shomá áiy nazánét. ²⁷ Á cha man o randa kayt o man áiy kawshbandáni bójagay láhek ham

* 1:1 1:1 Bongéj, bezán bendát, shoru. † 1:1 1:1 Gál, bezán habar, kalamah, labz. ‡ 1:5 1:5 Drapshag, bezán shahm janag, rozhná bayag, jalashkag. § 1:5 1:5 Bezán taháróki rozhná prósh dáta nakant. * 1:11 1:11 Nyámá, bezán myáná, darnyámá, tahá, tóká. † 1:15 1:15 Gwánk, bezán borzén tawár. ‡ 1:22 1:22 Passaw, bezán jwáb. § 1:23 1:23 Eshayá Nabiy Ketáb, bahr 40, band 3. * 1:26 1:26 Jáh janag, bezán cha wati jáhá anagátén pád áyag, Arabi o Pársiá “qiám, rastákhiz”.

naán.”²⁸ É kár Ordonay kawray á dastá, Bayt-Anyáyá but, hamá jágahá ke Yahyáyá mardom pákshódia dátant.†

Hodáay Gwarándh

²⁹ É dega róchá, wahdé Yahyáyá Issá dist ke dém pa áia pédák ent, gwashti: “Bechárét! Esh ent Hodáay hamá Gwarándh ke jáhánay gonáhán dura kant. ³⁰ Esh ent hamá kas ke áiy bárawá man gwashtag: ‘Cha man o randa kayt bale cha man master o démáter ent, chiá ke cha man pésará butag.’ ³¹ Man wat pajjáh nayáwort, bale gón ápa mardománi pákshódi dayagá átkán tánke é dhawlá á pa Bani Esráilián zánag o paddar* kanag bebit.”

³² Yahyáyá wati gwáhi é paymá démá bort: “Man Hodáay Ruh dist ke kapóteay dróshomá§ cha ásmáná ér átk o áiy sará nesht. ³³ Man á nazánt, bale hamá kasá ke maná rawán dát tán gón ápa pákshódi bedayán, gwashtagati: ‘Wahdé taw dist Ruh kaséay sará ér byayt o benendit, bezán á hamá kas ent ke gón Hodáay Pákén Ruhá* pákshódia dant.’ ³⁴ Man é chizz distag o gwáhia dayán ke á Hodáay Chokk ent.”

Issáy awali morid

³⁵ É dega róchá, Yahyá gón wati do moridá oshátatagat. ³⁶ Wahdé Yahyáyá Issá dist ke cha ódá gwazagá ent gwashti: “Esh ent Hodáay Gwarándh.” ³⁷ Á doén moridán é habar eshkot o Issáy randá rawán butant. ³⁸ Issáyá chakk tarrént o har doéni distant ke áiy randá áyagá ant. Josti kort: “Shomá ché lóthét?” Gwashtesh: “Rabbi!” Bezán: “Oo ostád! ‘Tai jágah kojá ent?’” ³⁹ Gwashti: “Byáét o bechárét!” Gorrhá á doén shotant o distesh ke kojá neshtag o róchay pasht kaptagén bahrá hamáiy kerrá mantant. Bégáhay wahd at.†

⁴⁰ Yahyáyá habaráni eshkonagá rand, cha é doénán ke Issáy randesh gept o shotant, yakké Shamun Petrosay brát, Andriás at. ⁴¹ Áia pésará wati brát Shamun wadi kort o gwashti: “Má Masih dar gétk.” ⁴² Randá, áia Shamun Issáy kerrá bort. Issáyá Shamun cháret o gwashti: “Taw Shamun, Yuhannáay chokk ay. Bale nun tai nám Kaypá bit.” Kaypáay máná Petros, bezán talár ent.

Pilipos o Natnáil

⁴³ É dega róchá, wahdé Issáyá wati delá gwasht ke Jalilay damagá berawt, Piliposi dar gétk o gwashti: “Mani randgiriá bekan.” ⁴⁴ Pilipos ham, Petros o Andriásay dhawlá, cha Bayt-Saydáay shahray mardomán at. ⁴⁵ Pilipos ham shot o Natnáili shóház kort o gwashti: “Má hamá kas distag o dar gétkag ke Mussáyá Tawrátay tahá áiy mestág dátag o á dega nabíán ham áiy bárawá gwashtag. Á Issá Náseri, Issopay chokk ent.” ⁴⁶ Natnáilá gón áia gwasht: “Cha Náserahá ham sharrén chizzé dar kapta kant?” Piliposá gwasht: “Byá o bechár!” ⁴⁷ Wahdé Issáyá Natnáil dist ke dém pa áia pédák ent, gwashti: “É tachkén Bani Esráilié ke delá hech paymén mandr‡ o repké mán nést.” ⁴⁸ Natnáilá jost kort: “Taw maná cha kojá zánay?” Issáyá áiy passawá gwasht: “Cha á wahdá pésar ke Piliposá tará tawár kort, man tará hamá wahdá dist ke enjiray drachkay chérá atay.” ⁴⁹ Natnáilá gwasht: “Oo ostád! Taw Hodáay Chokk ay, taw Esráilay bádsháh ay.” ⁵⁰ Issáyá passaw dát: “Paméshká imánet áwort ke man gwasht: ‘Tará enjiray drachkay chérá distagon’. Cha é chizzán masteréna genday.” ⁵¹ Gorrhá gón áia gwashti: “Shomará rásténa gwashán, démterá ásmáná pacha gendét o Hodáay préshtag dém pa Ensánay Chokká,§ ke man án, jahl o borza káyant o rawant.”

2

Kánáy métagay sur o áros

¹ Saymi róchá, Jalilá, Kána námén métagéá, sur o árosé hastat o Issáy mát ham hamodá at. ² Issá o áiy moridesh ham lóthetagtant. ³ Wahdé sharáb halletant, Issáyá mátá gón áia gwasht: “Áyán dega sharáb nést.” ⁴ Gwashti: “Oo bánok! Maná o tará gón eshiá che kár? Mani wahd angat narasetag.” ⁵ Mátá gón kárendah o hezmatkárán gwasht: “Harché shomará gwashit, hamá kára bekanét.”

⁶ Ódá ápay shash sengén kunzag* ér at, ke har yakkéá sad tásay jágah† hastat o Yahudiáni pákizagiay rasmán kármarza butant. ⁷ Issáyá gón hezmatkárán gwasht: “Kunzagán cha ápa porr kanét.” Gorrhá kunzagesh cha ápa sarréché kortant. ⁸ Nun Issáyá gwasht: “Pa diwánay kamáshá

† 1:28 1:28 É Yahyá at ke pákshódia dátí. ‡ 1:31 1:31 Paddar, bezán záher, áshkár. § 1:32 1:32 Dróshom, bezán shekl. * 1:33 1:33 Hodáay Pákén Ruh, bezán Ruholkodos. † 1:39 1:39 Asligén Yunáni nebeshtánka gwasht: “dahomi sáhat”, bezán bégáhay chárá. Yahudiáni róchay hesáb, páhat sohbay shashá bongéja but. ‡ 1:47 1:47 Mandr, bezán repk, sázesh, pachali. § 1:51 1:51 Dányál nabíá é sérnag pa yak hastiéá kár bastag ke á cha ásmáná kayt. Issá Masihá é pernán pa wat zortag tán mardom bezánant ke á cha ásmáná átkag o hamá wádah dátagén Masih ent. * 2:6 2:6 É kunzag kombpaymén mazanén kunzag atant. † 2:6 2:6 Asligén Yunáni nebeshtánka gwasht: “do tán say metretes”, bezán 75 tán 115 litar.

kammoké bebarét.” Áyán anchosh kort.⁹ Diwánay kamáshá nazánt é áp ke sharáb butagatant cha kojá árag butagant, áiá chashtet o nósh kortant, bale hezmatkárán ke áp kasshetagatant zántesh. Nun diwánay kamáshá, sálónk tawár jat o¹⁰ gwashti: “Harkas mehmánán sharterén sharábá pésará dant, wahdé á malár o sargrána bant, randá adná o arzánteréná kárant. Bale taw sharterén nóki áwortag!”

¹¹ É mójegah o ajabbatén nesháni ke Jalilay métag Kánáyá but, Issáay awali mójegah at. Áiá gón hamé mójegahá wati mazani o shawkat paddar kort o moridán áiy sará imán áwort. ¹² Randá Issá gón wati mát, brát o moridán Kaparnáhumay shahrá shot o lahtén róchá hamódá mant.

Issá mazanén parasteshgáhá rawt

(Mattá 21:12-13; Markás 11:15-17; Luká 19:45-46)

¹³ Yahudiáni Pesah, bezán Sargwazay aid,[‡] nazzik at. Paméshká, Issá Urshalimá shot. ¹⁴ Mazanén parasteshgáhay tahá disti ke mardom gók, pas o kapótay bahá kanagá golésh ant o zarr bálod kanókén sarráp ham neshtagant. ¹⁵ Gorrhá gón sád o chilleká, hayzaráné jórhénti o sajjahén bápári o pas o góki cha parasteshgáhá dar kortant o sarrápáni zarr o sekkahi ham rétkant o mizz o barónki chappig kortant. ¹⁶ Gorrhá gón kapót bahá kanókán gwashti: “Eshán cha edá dar kanét. Mani ásmáni Petay lógá bázaré makanét.” ¹⁷ Nun morid yát o tránagá kaptant ke Hodáay Pákén Ketába gwasht: *Á gayrat ke maná pa Hodáay lógá hastent, maná jánsócha kant o báhénit.*^{§*}

¹⁸ Gorrhá Yahudián gwasht: “Taw gón chónén neshánié paddara kanay ke tará é káráni ejázat hastent?” ¹⁹ Issáay gwasht: “É mazanén parasteshgáhá bepróshét o karójét, man say róchá padá chestia kanán.” ²⁰ Yahudián gwasht: “É mazanén parasteshgáh, chel o shash sálá jórh kanag butag, taw chón áiá say róchá chesta kanay?” ²¹ Bale á parasteshgáh ke Issá áiy bárawá gapp kanagá at, áiy jenday jesm o ján at. ²² Cha Issáay merag o jáh janagá rand, morid yát o tránagá kaptant ke áiá wat é habar gwashtagat, paméshká Hodáay Pákén Ketáb o Issáay habaráni sará imánesh áwort.

²³ Á róchán, Issá pa Sargwazay aidá Urshalimá at. Bázén mardoméá ke Issáay

ajabbatén nesháni distant, áiy námay sará báwresh kort. ²⁴ Bale Issáay waté áyáni démá záher o paddar nakort, chiá ke áiá sajjahén mardom sharriay sará zántant. ²⁵ Pa ensánay zánag o pajjáh áragá, áiá hechkaséay gwáhiay zalurat naat, chiá ke á, mardománi delay har hálá sahiq at.

3

Issá o Nikudimus

¹ Nikudimus námén Parisié, ke cha Yahudiáni sarók o diwánay báskán* yakké at, ² shapéá Issáay kerrá átk o gón áiá gwashti: “Oo ostád! Má zánén taw ostádé ay ke cha Hodáay némagá átkagay, chiá ke tán Hodá gón kaséá gón mabit, á é dhawlén ajabbatén nesháni pesh dáshata nakant ke taw pesh dáragá ay.” ³ Issáay áiy passawá gwasht: “Tará rásténa gwashán, tán kasé padá nóksará† pedá mabit, Hodáay bádsháhiá dista nakant.” ⁴ Nikudimúsá gwasht: “Chón buta kant ke piréné padá cha mátá pedá bebit? Buta kant ke á padá mátay lápá berawt o pedá bebit?” ⁵ Issáay passaw dát: “Tará rásténa gwashán, tán kasé cha áp o Ruhá pedá mabit, Hodáay bádsháhiá pád ér korta nakant. ⁶ Á chizz ke cha jesmá pedá bit, jesm ent o á chizz ke cha Ruhá bit, ruh ent. ⁷ Hayrán mabay ke tará gwashán shomá sajjahén báyad ent nóksará pedá bebét.

⁸ “Gwát har jáh ke belóthit, kasshit. Taw áiy tawará eshkonay, bale nazánay cha kojá kayt o kojá rawt. ⁹ Á kas ke cha Ruhá pedá bit, á ham anchosh ent.”

⁹ Nikudimúsá gwasht: “É chón buta kant?” ¹⁰ Issáay gwasht: “Taw wat Esráiliáni ostádé ay, é chizzá nazánay? ¹¹ Báwar kan, má hamá chizzáni habará kanén ke áyáni bárawá zánén o hamá chizz ke distagant, áyáni sháhediá dayén. Bale shomá may sháhediá namannét. ¹² Wahdé zemini chizzáni bárawá habara kanán báwara nakanét, agan ásmáni chizzáni bárawá habar bekanán gorrhá che paymá báwara kanét? ¹³ Hechkas ásmáná borzád nashotag, abéd cha‡ hamá kasá ke cha ásmáná ér átk, bezán man ke Ensánay Chokk án. ¹⁴ Hamá dhawla ke Mussáyá, gyábáná á már dáray sará dratk,[§] Ensánay Chokk ham báyad ent chest kanag bebit, ¹⁵ tán harkas ke pa áiá imána kárit, namiránén zenday wáhond bebit.” ¹⁶ Chiá ke Hodáyá jahánay mardom haminchok

‡ 2:13 2:13 Eshíá Sargwazay aid paméshká gwashant ke, cha Mesriáni chérdastiá Yahudiáni ázátiay wahdá, markay préshtag cha Yahudi chokkáni koshagá sara gwast. § 2:17 2:17 Báhénag, bezán gár dayag, cha dast dayag. * 2:17

2:17 Zabur 69:9. * 3:1 3:1 Básk, bezán ozw, membr. † 3:3 3:3 Yá: cha borzá, cha ásmáná. ‡ 3:13 3:13

Abéd cha, bezán gayr cha. § 3:14 3:14 É kessah Tawrátay tahá átkag.

dóst atant ke wati yakk o yakdánagén Chokki ham nadr kort tán harkas ke áiy sará báwar bekant gár o zyan mabit o tán abad zendag bemánit. ¹⁷ Hodáyá wati Chokk pa mardománi ér janag o mayárig kanagá jaháná rawán nadát. Rawáni dát ke áyan neját bedant o berakkénit.* ¹⁸ Harkas ke áiy sará báwar bekant mayáriga nabit, bale harkas ke báwar makant, hamé annun mayárig ent, chiá ke Hodáay yakdánagén Chokkay námay sará báwari nakortag. ¹⁹ Hodáay dádrasi† hamesh ent: Rozhn o nur jaháná átk, bale rozhnay badalá, mardomán taharóki dóst at, parchá ke áyani kár sell atant. ²⁰ Chiá ke á mardom ke sellén káráni ráh o keshká zurit cha rozhnáia bézára bit o watá cha rozhná dura dárit, tánke áiy badén kerd páshk o paddar mabant. ²¹ Bale á ke rástia gechéna kant o zurit dém pa rozhnáia kayt, tán pakká bebit ke áiy kár Hodái butagant.

Issá o Yahyá

²² Randá, Issá gón wati moridán Yahudiahay métag o kallagan shot o gón áyan hamódá mant o pákshódia dáti. ²³ Yahyá ham Sálemay nazziká, Aynuná, mardománi pákshódia goláesh at. Á chágerdá áp báz at o mardom pa pákshódia átkant. ²⁴ Chiá ke Yahyá angat jélé bandi nabutagat.

²⁵ Pákizagiay sará, Yahyáay morid o yak Yahudiéay nyámá kassh o chillé but. ²⁶ Gorhá á, Yahyáay kerrá átkant o gwashtesh: “Oo ostád! Hamá mard ke Ordonay kawray á dastá gón taw gón at o taw áiy bárawá gwáhi dát, á edá pákshódi dayagá ent o sajjahén mardom hamáiy kerrá rawagá ant.” ²⁷ Yahyáay áyani passawá gwasht: “Cha Hodáay dátagená abéd, mardom dega chizzé katheta‡ nakant. ²⁸ Shomá wat sháhed ét gwashton ke ‘Man Masih naán, bale cha áia pésar rawán dayag butagán.’ ²⁹ Bánóray hodábond,§ salónk ent. Salónkay dóst ke óshátatag o áiy tawára eshkot, gal o shádána bit. Hamé dhawlá, mani shádehi annun pa kamál rasetag o sarréch butag. ³⁰ Á báyad ent demá berawt o man pad bekenzán.”

Á ke cha ásmáná kayt

³¹ Á kas ke cha borzáda kayt, cha sajjahénán master ent o á ke cha é hákién donyáyá ent zemini mardomé o donyái chizzáni bárawá habara kant. Bale á ke

cha ásmáná kayt cha sajjahénán master ent. ³² Har chizzé ke distag o eshkotagi, pa áyan gwáhia dant, bale hechkas áiy gwáhiá namannit. ³³ Harkasá ke áiy gwáhi mannetag, Hodáay rástiaiy gwáhii dátatag.

³⁴ Á kas ke cha Hodáay némagá rawán dayag butag, Hodáay habarána kant, chiá ke Hodá wati Ruhá pa áia békesása* bakshit. ³⁵ Petá Chokk dóst ent o sajjahén chizzi hamáiy dastá dátatag. ³⁶ Á kas ke Chokkay sará imán byárit namiránén zenday wáhonda bit, bale á kas ke Chokkay habarán mamannit, zenday wáhonda nabit o Hodáay naráziay tahá gereptára bit.

4

Issá o Sámeri janén

¹ Issáyá zánt Parisián eshkotag ke áia cha Yahyáay géshterén moridé wadi kortag o áyan pákshódia dant. ²⁻³ Gorhá cha Yahudiahá dém pa Jalilá per tarret. Chónáhá, Issáyá wat mardom pákshódia nadátant, é kár moridána kort. ⁴ Bale zalurat at ke cha Sámerahay damagá begwazit. ⁵ Ódá, yak shahréa raset ke námi Suhár at o hamá dhagáray nazziká at ke Ákubá wati chokk Issopará dátatag.*

⁶ Ákubay chát hamódá at. Issáyá cha saporá dam bortagat o hamé chátay kerrá nesht. Némróchay wahd† at.

⁷ Sámeri janéné ápay kasshagá átk, Issáyá gón áia gwasht: “Kammé áp maná beday.” ⁸ Áiy morid, pa warákay gerag o áragá shahrá shotagatant. ⁹ Sámeri janéné gwasht: “Taw ke yak Yahudié ay, chón cha man ápa lóthay?” Janená paméshká chosh gwasht, ke Yahudi gón Sámerián raw o á nakanant. ¹⁰ Issáyá áiy passawá gwasht: “Agan taw bezántén Hodáay bakshesh chi ent o é kay ent ke cha taw ápa lóthit, gorhá allamá taw gón áia dazbandi kortagat ke tará zendáp bedant.”

¹¹ Janená gwasht: “Oo wájah! Tará pa ápay kasshagá dhól nést o é chát sakk johl ent, cha kojá zendápa káray? ¹² Taw cha may pirok Ákubá master ay, ke é chátí mará dátatag o áiy jend, chokk, ramag o górróm‡ cha é chátá áp wártag?” ¹³ Issáyá passaw tarrént: “Harkas ke é ápá bwárt padá tonniga bit, ¹⁴ bale harkas ke mani bakshetagen ápá bwárt, hechbar tonniga nabit. Chiá ke hamá ápá ke mana

* **3:17** 3:17 Rakkénag, bezán neját dayag, bacchéneg. † **3:19** 3:19 Dádrasi, bezán hakkén paysalah, hamá shawr ke cha dádgáhána kayt, dáwari. ‡ **3:27** 3:27 Katthag, bezán nap o sutt kanag, dastá árag. § **3:29** 3:29 Hodábond, bezán wájah, wáhond, málek, sáheb. * **3:34** 3:34 Békesás, bezán sakk báz, béandázah, béhesáb. * **4:5** 4:5 Bezán Ákubá wati dhagár pa Issopá dátatag. † **4:6** 4:6 Asligén Yunáni nebeshtánka gwasht: “shashomi sáhat.” ‡ **4:12** 4:12 Górróm, bezán gókáni romb.

dayán agan kasé bwárt, cha áiy daruná zendápay chammagé bojit o jáha jant ke abadi ent.”¹⁵ Janéná gwasht: “Oo wájah! Hamá ápa maná beday tán dega baré tonnig mabán o pa ápay kasshagá edá mayáyán.”

¹⁶ Issáyá gwasht: “Beraw wati lógwájahá tawár kan o padá hamedá byá.”¹⁷ Janéná áiy passawá gwasht: “Maná mard nést.” Issáyá gwasht: “Rásta gwashay ke tará mard nést,¹⁸ chiá ke tará panch mard butag o é mard ke annun gón taw zendagia kant, tai mard naent. Taw rást gwasht.”¹⁹ Janéná darráent: “Oo wájah! Mani zánagá, taw yak nabié ay.²⁰ May pet o pirokán hamé kóhay sará parastesh kortag, bale shomá Yahudia gwashét, báyad ent Hodá Urshalimáparastesh kanag bebit.”²¹ Issáyá gwasht: “Oo janén! Báwar kan, yak wahdé kayt ke Hodáén Petá na é kóhay sará parastesh kanant o na ham Urshalimá.²² Shomá Sámeri hamáía parastesh kanét ke áía nazánét. Bale má hamáía parastesh kanén ke áía zánén. Chiá ke neját o rastgári cha Yahudiáni némagá kayt.²³ Yak wahdé kayt o á wahd annun bongéj butag ke rást o barhakkén parastesh kanók Petá gón Ruh o pa rásti parastesh kanant. Chiá ke Pet hamé dhawlén parastesh kanókáni lóthók ent.²⁴ Hodá Ruh ent o harkas ke áía parastesh kant gón Ruh o pa rásti parastesh bekant.”²⁵ Janéná gwasht: “Mana zánán ke Masiha kayt o har wahdé ke á kayt, sajjahén chizzán márá gwasht.”²⁶ Issáyá gwasht: “Man ke gón taw habar kanagá án, hamá án.”

²⁷ Hamé wahdá Issáy morid padá átkant. Wahdé distesh ke Issá gón janénéá habar kanagá ent, hayrán butant. Bale hechkasá jost nakort ke “chiá gón eshiá habar kanagá ay?” yá “cha eshiá ché lóthay?”²⁸ Nun janéná wati kunzag zemíná ér kort, shahrá shot o gón mardomán gwashti: “Byáét mardéa begendét, man tán é wahdi harché kortag, áía maná gwashtant. Bären, Masih naent?”³⁰ Gorhá mardom cha shahrá dar kapt o Issáy némagá ráh geptant.³¹ É nyámá moridán gón Issáyá dazbandi kort o gwashtesh: “Oo ostád! Chizzé bwar.”³² Bale áía gwasht: “Maná waráké hast ke shomá áiy bárawá nazánét.”³³ Nun morid watmánwat habará atant ke “báren, kaséa pa áía waráké áwortag?”³⁴ Issáyá gón áyán gwasht: “Mani warák hamesh ent ke wati rah dayókay wáhagá barjáh bekanán o áiy kárán sarjam bekanán.

³⁵ Shomá nagwashét ke pa rón o móshay mósomá angat chár máh pasht kaptag? Sharr delgósh kanét, shomará gwashán, kesharán bechárét o begendét ke annun pa róná rasetag o tayár ant.³⁶ Ronók wati mozzá gipt o bar o samará pa namiránén zendá moccha kant, tán keshók o ronók hór gal o shádán bebant.³⁷ Edá é habar rást ent ke ‘yakké keshit o degaré ronit.’³⁸ Man shomará rawán dát tán hamá bar o samaráni wáhond bebét ke shomá pa áyán hech zahmaté ham nakasshetag. Degarán zahmat kasshetag o shomá cha áyáni kára nap o sutta gerét.”

³⁹ Á shahray bázén Sámeri mardomán paméshká Issáyá sará imán áwort ke á janéná gwáhi dáttag o gwashtagat: “Har chizzé ke tán é wahdi man kortag áía maná gwashtant.”⁴⁰ Gorhá Sámeri Issáyá kerrá átkant o dazbandiesh kort ke áyáni kerrá bemánit. Issá tán do róchá gón hamáyán nesht o⁴¹ bázénéá áiy habaráni sará imán áwort.⁴² Gón á janéná gwashtesh: “Nun éwak o tahná tai habaráni sará báwarmand naén, má áiy jenday habar ham eshokotagat o deljam én ke á pa rásti jahány rakkénók ent.”

Bádsháhay kárdaray chokkay drahbakshi

⁴³ Do róchá rand, Issá cha ódá dar kapt o Jalilá shot.⁴⁴ Issáyá wat gwashtagat ke “hech nabiéa wati shahr o hankená ezzat nést.”⁴⁵ Bale wahdé Jalilá raset, mardomán pa delsetki wasshátk kort, chiá ke aiday róchá á Urshalimá atant o ódá áiy kortagén káresh distagatant.

⁴⁶ Issá padá Jalilay métag Kánáyá shot, hamódá ke ápi sharáb kortagatant. Bádsháhay kárdaré hastat ke chokki, Kaparnáhumay shahrá nádráh at.⁴⁷ Wahdé á sahig but ke Issá cha Yahudiahá Jalilá átkag, áiy kerrá átk o dazbandi korti ke Kaparnáhumá byayt o áiy nádráhén bachaká berakkénit ke markig ent.⁴⁸ Issáyá gón áía gwasht: “Shomá tán mójegah o ajabbatén nesháni magendét hech paymá imána nayáret.”⁴⁹ Á mardá gwasht: “Oo wájah! Bachakay meragá pésar byá.”⁵⁰ Issáyá gwasht: “Beraw tai chokk dráha bit.” Á mardá Issáyá habar báwar kort o wati lógá shot.

⁵¹ Angat lógá narasetagat ke nawkarán ráhay nyámá dist o hálesh dát: “Tai chokk dráh butag.”⁵² Áía jost gept: “Che wahd o damáná gehter butag?” Áyán gwasht: “Zi némróchá kammé rand,* tapá yalah dáttag.”⁵³ Petá zánt ke é wahd, hamá wahd at ke Issáyá gwashtagat: “Tai chokk

Š 4:42 4:42 Drahbakshi, bezán dráhi o salámatiay bakshag, Arabi o Pársiá “shafá”. * 4:52 4:52 Asligén Yunáni nebeshtánka gwasht: “haptomi sáhat”.

dráha bit." Gorrhá áia wat gón lógay sajjahén mardomán Issáay sará imán áwort.⁵⁴ Cha Yahudiahá, Jalilá ke átk, é Issáay domi ajabbatén nesháni at.

5

Nájórhén mardéay drahbakshi

¹ Kammé randterá, Issá pa Yahudiáni yak aidéá, Urshalimá shot. ² Urshalimá, yak darwázagéay nazziká, ke áia pasay darwázaga gwashant, taláwagé* hastent ke cha panch gombodá jórh butag o Árámí zobáná áia Bayt-Hasdá gwashant. ³ Ódá bázén lang, mond, kór o nádráhé wap-tagat.†

⁵ É mardománi nyámá yak mardé hastat, si o shash sál at ke nájórh at. ⁶ Wahdé Issáay á mard waptagén hálatá dist o zánti ke cha dérigén wahdéá nádráh ent, gwashti: "Taw lóthay wassh o dráh be-bay?" ⁷ Á nádráhé gwasht: "Oo wájah! Wahdé ápa rombit o rawána bit, kasé nést ke maná taláwagá dawr bedant. Tán man watá berasénán, degaré zutter koppa kant." ⁸ Issáay gwasht: "Pád á, wati nepádán bezur o beraw." ⁹ Á mard dráh but, wati nepád o gandali zortant o ráh kapt.

Á róch Shabbatay róch‡ at. ¹⁰ Paméshká Yahudi gón á dráh butagén mardá gwashagá laggetant: "Maróchi Shabbatay róch ent, tará wati gandaláni zurag o rawagay hakk nést." ¹¹ Passawi dát: "Á mardá ke maná dráh kort gwashti: 'Pád á, wati gandalán bezur o beraw.'" ¹² Cha áia jostesh kort: "Kayá tará gwashtag: 'Wati gandalán bezur o beraw?'" ¹³ Bale dráh butagén mardá nazánt á kay at. Chiá ke Issá mardománi mocchiay tahá chér o andém butagat.

¹⁴ Randá, Issáay á mard mazanén parasteshgáhá dist o gwashti: "Nun ke dráh butagay, gonáh makan. Chosh mabit ke ganterén baláhé tai sará bekapit." ¹⁵ Á mard shot o gón Yahudián gwashti: "Á ke maná rakkénti, Issá at." ¹⁶ Yahudián Issá ázara rasént, chiá ke áia é dhawlén kár, Shabbatay róchá kortant. ¹⁷ Bale Issáay gón áyan gwasht: "Mani Pet angat kár kanagá ent, man ham kára kanán." ¹⁸ Cha é gappán, Yahudi pa áiy koshtagá tézaster butant. Chiá ke Shabbatay hok-may próshagá abéd, áia Hodá ham wati

jen-day Pet zánt. É dhawlá, watá gón Hodáyá barábari kort.

Hodáay Chokkay ehtiár

¹⁹ Gorrhá Issáay gwasht: "Báwar kanét ke Chokk watsar hech káré korta nakant, Petay kárána gendit o áyáni randgiriá kant. Har káré ke Peta kant, Chokk ham hamá kára kant. ²⁰ Chiá ke Petá Chokk dóst ent o harché ke wata kant, Chokká ham sója dant. Áia dega masterén kár ham pésha dárít tán shomá hayrán bemánét. ²¹ Anchosh ke Pet mordagán zendaga kant o áyan zenda bakshít, Chokk ham harkasá ke wat zendag kanag belóthít, áia zendaga kant. ²² Pet hechkaséay sará shawr o hokmé naborrit, áia wati dádrasiay sajjahén ehtiár Chokkay dastá dátagant, ²³ tán sajjahén mardom hamá dhawlá ke Petá ezzata dayant Chokká ham ezzat bedayant. Kasé ke Chokká béezzata kant, Petá ham ke áiy rah dayók ent béezzata kant.

²⁴ "Shomará rásténa gwashán, harkas mani gappán beshkont o mani rah dayókay sará imán byárit, namiránén zenday wáhonda bit o hechbar mayáriga nabit, bezán á cha marká rakketag o namirán butag. ²⁵ Báwar kanét, wahdé kayt o anchosh ent ke á wahd annun bongéj butag, mordag Hodáay Chokkay tawará eshkonant o harkas ke beshkont padá zendaga bit. ²⁶ Chiá ke hamá dhawlá ke Pet zendmánay sarchammag ent, wati Chokká ham é wák o twáni dátag ke zendmánay sarchammag bebít. ²⁷ Dádrasiay ehtiári áiy dastá dátag, chiá ke Ensánay Chokk ent. ²⁸⁻²⁹ Cha eshiá hayrán o habakkah mabét, wahdé kayt ke sajjahén mordag áiy tawará eshkonant o cha wati kabrán dara káyant, nékkár pa namiránén zendá rawant o badkár, mayárig bayag o sarzaneshay jágahá.

Issáay bárawá gwáhi

³⁰ "Man watsar káré korta nakanán, wati eshkotagénáni sará shawr o hokma borrán o mani dádrasi barhakk ent. Parchá ke wati delay wáhagáni sarjam kanagay padá naán, wati rah dayókay wáhagáni sarjam kanagay randá án. ³¹ Agan man wati bárawá wat gwáhi bedayan, mani gwáhiá ehtebár o arzeshé nabit. ³² Bale degaré hastent ke mani bárawá gwáhia dant o mana zánán ke áiy gwáhi mani bárawá báz porehtebár ent. ³³ Shomá wati kásed Yaháay kerrá rawán dátant

* 5:2 5:2 Taláwag, bezán hawz. † 5:3 5:3 Lahtén nókén daznebeshtá gesh kanag butag: Ódá bázén lang o mond o kórén nádráh waptagatant o ápa rawáni o rombagay entezár o wadará atant. Chiá ke baré baré, Hodáwanday préshtagé é taláwagá átk, ápa rombént o rawána kort. Á wahdi, awali har nádráhé gón har paymén nájórhíe ke watá mán ápa dawra dát, dráha but. ‡ 5:9 5:9 Shabbatay róch hamá Shambeh ent, bezán Yahudiáni kár nakanagay róch.

o áiá ham pa mani rástíá gwáhi dát. ³⁴ Mardománi gwáhiá mana nalóthán, pa shomay rakkénagá é habarána gwashán. ³⁵ Yahyá, cheragéay dhawlá rók o drapshán at, shomará ham tán gwandhén wahdéá áiy nuray chérá shádmáni dósta but.

³⁶ “Bale maná cha Yahyáyá masterén sháhed hast. Hamé kár ke Petá mani dastá dátagant ke sarjamesh bekanán o manesha kanán wat mani sháhed ant ke maná Petá rawán dátag. ³⁷ Hamá Petá ke maná rawán dátag, hamá wat mani gwáh o sháhed ent. Shomá hechbar á nadistag o áiy tawár naeshkotag. ³⁸ Áiy habarán shomay delá jáh nést, chiá ke shomá áiy rawán dátagénay sará báwara nakanét. ³⁹ Pákén Ketábán patth o póla kanét o wánét, hayála kanét ke áyáni tahá namiránén zend hastent, bale hamé Pákén Ketáb pa man gwáhia dayant. ⁴⁰ Shomá nalóthét mani Kerrá byáét ke shomará abadmánén zend bedayán.

⁴¹ “Man mardománi dátagén shán o sharapá nazurán. ⁴² Man shomará jáha kárán o zánán ke Hodáay mehr shomay delá néstent. ⁴³ Man pa wati Petay námá átkagán o shomá maná namannét, bale agan kasé watsar byayt, áiá mannét o wasshátka kanét. ⁴⁴ Shomá cha yakdegará mazani o ezzata zurét o á ezzat ke cha Hodáay némagá kayt, áiy shóházá naét. Gorhá chón imán áworta kanét?”

⁴⁵ “Gomán makanét ke man Petay démá shomará mayáriga kanán. Degaré, bezán hamá Mussá ke cha áiá ométwár ét, á shomará mayáriga kant. ⁴⁶ Agan shomará pa Mussáyá báwar butén, pa manó ham imána áwort, chiá ke áiá mani bárawá nebeshtag. ⁴⁷ Bale wahdé shomará áiy nebeshtagénáni sará imán nést, mani habarán chón báwara kanét?”

6

Panch hazár mardomá warák dayag
(Mattá 14:13-21; Markás 6:32-44; Luká 9:10-17)

¹ Randá, Issá Jalilay mazangwarmay* á dastá shot, ke Teberiahay gwarm ham gwashaga bit. ² Mardománi mazanén rombé áiy randá gón kapt, chiá ke áyán cha Issáyá nádráháni drahbakshiyajabaten nesháni distagatant. ³ Gorhá Issá kóhéay sará shot o gón wati moridán hamódá nesh. ⁴ Yahudiáni Sargwazay aid nazzik at.

⁵ Wahdé Issáyá wati chapp o chágerd cháret, disti ke mardománi mocchié dém

pa áiá pédák ent. Gón Piliposá gwashti: “Nán cha kojá bezurén ke é mardom warák bwarant?” ⁶ Issáyá é habar pa áiy emtehán o chakkásagá gwasht, wat zánti ché bekant. ⁷ Piliposá gwasht: “Dosad dináray nán† ham bassa nabít, toré harkas kammok ham bwárt.” ⁸ Cha áiy moridán yakkéá ke námi Andriás at o Shamun Petrosay brát at, gwasht: ⁹ “Yak bachaké hamedá ent ke panch jawén nagan o do máhigi gón, bale pa rombé mardomá ché bant?” ¹⁰ Issáyá gwasht: “Mardomán benendárenét.” Ódá bázén káh o sabzagé rostagat, mardom neshant. Cha áyán kamm o gesh panch hazár mardén atant. ¹¹ Issáyá nagan zortant, Hodáay shogri gept o neshtagén mardománi sará bahri kortant. Máhig ham anchosh, harkasá haminchok ke lóthet dáti.

¹² Wahdé sajjahén sér butant, gón moridán gwashti: “Náni thokkorán o mantagén máhigan mocch o yakjáh kanét ke zawál mabant.” ¹³ Gorhá nánesh mocch o yakjáh kortant, ke cha á panchén jawén naganáni thokkorán, dwázdah sapt porr but. ¹⁴ Mardomán ke Issáyá é mójezah o ajabbaten nesháni dist, gwashtesh: “Pa del é hamá wádah dátagén nabi ent ke báyad ent yak róché jahána byayt.” ¹⁵ Bale wahdé Issáyá zánt mardoma lóthant pa zór áiá bebarant o bádsháh bekanant, gorhá cha mardomán dur but o tahná kóhá shot.

Issá ápay sarborá gáma jant
(Mattá 14:22-33; Markás 6:45-51)

¹⁶ Róchay érnendá, morid dém pa gwarmá shotant. ¹⁷ Bójigá‡ neshant o gwarmay á dastá, dém pa Kaparnáhumá ráh geptant. Tahár butagat o Issá angat áyáni Kerrá nayátkgat. ¹⁸ Trondén gwáté ham kasshagá at o chawl o mawj chest butant. ¹⁹ Wahdé kesás panch tán shash kilumitar§ démá shotant, distesh ke Issá ápay sará gám janán, dém pa bójigá pédák ent. Áyán torset. ²⁰ Bale Issáyá gwasht: “Matorsét, é man án.” ²¹ Lóthetesh áiá bójigá byárant o anchosh ke á swár but bójig menzelá raset.

²² É dega róchá, hamá mardom ke gwarmay á démá mantagatant, zántesh cha hamá bójigá abéd ke morid swár butagatant, dega bójigé ódá néstat. Issá áiy tahá naat o morid bé áiá shotagatant. ²³ Randá, dega lahtén bójig cha Teberiahá, hamá jágahá átk o raset ke ódá Hodáwandén Issáyá Hodáay shogr geptagat o mardomán nán wártagat. ²⁴ Wahdé

* **6:1** 6:1 Mazangwarm, bezán daryáchah. † **6:7** 6:7 Yak dinár, yak róchay mozz at. ‡ **6:17** 6:17 Bójig, bezán lánch, yakdár, kashti. § **6:19** 6:19 Asligén Yunáni nebeshtánka gwasht: “bist o panch yá si stádios”. Yak stádios 190 mitaray kesásá ent.

mardomán dist ke na Issá ódá ent o na áiy morid, Issáay shóházá, bójjigán swár butant o dém pa Kaparnáhumá shotant.

Namiránén nán

²⁵ Wahdé Issáesh gwarmay á dastá dist, gwashtesh: “Ostád! Taw kadi edá átkagay?” ²⁶ Issáyá áyáni passawá gwasht: “Báwar kanét, shomá pa eshiá mani randá nakaptagét ke mójezah o ajabbatén nesháni distagant, paméshká átkagét ke nánó wárt o sérláp butét. ²⁷ Bale pa é zawál bayókén waráká johd mákanét, pa hamá dáemi waráká johd bekanét ke namiránén zenda bakshit, hamá waráká ke Ensánay Chokk shomará dant. Chiá ke Hodáén Petá áiy sará wati mannagay mohr jatag.” ²⁸ Gorhá jostesh kort: “May kár o zemmahwári chi ent? Hamá kárán ke Hodá cha má lóhit, áyán chón purah o sarjam bekanén?” ²⁹ Issáyá passaw dát: “Á kára ke Hodá cha shomá lóhit, esh ent: Hamá kasay sará imán byárét ke Hodáyá ráh dátag.” ³⁰ Áyán gwasht: “Chónén ajabbatén nesháni pésha dáray ke begendén o tai sará imán byáren? Ché kanay? ³¹ May pet o pirokán gyábáná mann* wárt, anchosh ke Pákén Ketába gwasht: ‘Áiá cha ásmáná, nán rawán dát ke bwarant’.”†

³² Gorhá Issáyá gón áyán gwasht: “Báwar kanét, á nán ke cha ásmáná ér átkagat Mussáyá shomará nadátogat, é mani Pet ent, ke cha ásmáná asligén náná shomará bakshit. ³³ Chiá ke Hodáay nán hamá ent ke cha ásmáná ér átkag o jaháná zendmána dant.” ³⁴ Nun gón áiá gwashtesh: “Oo wájah! É náná harwahd márá beday.”

³⁵ Issáyá gwasht: “Hasti o zenday nán, man án. Harkas mani kerrá kayt hechbar shodiga nabit. Harkas mani sará báwar bekant hechbar tonniga nabit. ³⁶ Bale hamá dhawlá ke gwashton, shomá maná distag o angat imána nayaré. ³⁷ Á sajjahénán ke Pet maná bakshit dém pa mana káyant, harkas ke mani kerrá kayt, man áiá cha wat dura nakanán. ³⁸ Man cha ásmáná wati wáhagáni sarjam kanagá ér nayátkagán, átkagán tán wati rah dayókay wáhagán sarjam bekanán. ³⁹ Mani rah dayókay wáhag esh ent, hamá ke maná dátaganti, yakké ham cha mani dastá marawt o áherzamáná áyán padá zendag bekanán. ⁴⁰ Chiá ke mani Petay wáhag hamesh ent, harkas ke Chokká

gendit o áiy sará imána kárit, namiránén zenday wáhond bebít o man áherzamáná áiá zendaga kanán.”

⁴¹ Gorhá Yahudi pa gelag o norondhag dar átkant, chiá ke áiá gwashtagat: “Man hamá nán án ke cha ásmáná ér átkag.” ⁴² Áyán gwasht: “É mard, hamé Issopay chokk Issá naent ke má áiy pet o mátá zánén? Gorhá chóna gwasht ke ‘man cha ásmáná ér átkagán?’” ⁴³ Issáyá áyáni passawá gwasht: “Inchok manorondhét o shekáyat makanét. ⁴⁴ Kass mani kerrá átka nakant tán hamá Pet ke maná ráhi dátag, áiá mani némagá machekkít o mayárit. Gorhá, man áiá áherzamáná zendaga kanán. ⁴⁵ Nabiáni Ketábán nebisag butag: ‘Sajjahén cha Hodáyá dars o sabaka gerant.’‡ Harkas ke Petay habarán beshkont o cha áiá sabak begipt, mani kerrá kayt. ⁴⁶ Chosh ent ke kassá Pet nadistag. Tahná hamáia Pet distag ke cha Hodáay némagá átkag. ⁴⁷ Báwar kanét, á ke imána kárit, namiránén zenday wáhonda bit. ⁴⁸ Hasti o zenday nán, man án. ⁴⁹ Shomay pet o pirénán gyábáná mann wárt o mortant. ⁵⁰ Bale man hamá nánay bárawá habar kanagá án ke cha ásmáná ér átkag. Agan yakké áiá bwárt, hechbara namerit. ⁵¹ Man hamá zend bakshókén nagan án ke cha ásmáná ér átkag, harkas ke é náná bwárt, tán abad zendaga mánit. É náná ke mana dayán, mani jenday jesm o ján ent ke áiá pa jahánay mardománi zendá nadra kanán.”

⁵² Nun, Yahudián pa jérhah o dapjáak watmánwatá gwasht: “É mard chón wati jesm o jáná dant, ke mái bwarén?” ⁵³ Issáyá gwasht: “Shomará rásténa gwashán, agan Ensánay Chokkay jesm o jáná, bezán mani jesm o jáná mawarét o mani hóná manóshét,§ shomá pa namiránén zendá narasét. ⁵⁴ Harkas mani jesm o jáná bwárt o mani hóná benóshit, namiránén zenday wáhonda bit o áherzamáná man áiá zendaga kanán. ⁵⁵ Chiá ke mani jesm o ján, asligén warák o mani hón, asligén zendáp ent. ⁵⁶ Harkas mani jesm o jáná bwárt o mani hóná benóshit, á mani arwáh o jabiná* mánit o man áiyagá. ⁵⁷ Hamé paymá ke namiránén Petá maná rawán dát o man cha áiy némagá zendag án, harkas mani jesm o jáná bwárt, cha mani némagá zendaga mánit. ⁵⁸ É nán ke cha ásmáná ér átkag, á nán naent ke shomay pet o pirénán wárt o mortant, chiá ke harkas

* 6:31 6:31 Mann hamá nán ent ke Mussáyá zamánagá, Hodáyá gyábáná pa Yahudián ér áwortag. † 6:31 6:31 Dargwaz 16:4 o rand; Zabur 78:24-25. ‡ 6:45 6:45 Eshayá Nabiy Ketáb 54:13; Eremiá Nabiy Ketáb 31:33 o rand.

§ 6:53 6:53 Edá, jánay warag o hónay nóshagá yak ruhánién mánáé hast. * 6:56 6:56 Jabin, bezán wajud, daran, zamir, wejđán. † 6:59 6:59 Kanisah, bezán Yahudiáni parastesgháh.

é náná bwárt, tán abad zendaga mánit.”
 59 Issáyá é chizz hamá wahdá dars o sabak dátant, ke Kaparnáhumay kanisahá† at.

Petrosay mannag o gwáhi

60 Bázén moridéá é habaráni eshkonagá rand, gwasht: “É sabak sakk grán ant, kay eshán manneta kant?” 61 Wahdé Issáyá máret‡ ke áiy morid, cha é habará nálant o shekáyata kanant, gwashti: “Shomará é habara tawrénit? 62 Agan Ensánay Chokká begendét ke pa wati awali jágahá borzáda rawt, gorhá ché kanét? 63 É Ruh ent ke zendmána dant, jesmá sutt o páedagé nést. É habar ke man gón shomá gwashtant, Ruh o zend ant. 64 Bale cha shomá lahténá báwar nést.” Chiá ke Issáyá á mardom ke báwaresh néstat cha béhá pajjáha áwortant o zánti kay ent hamá ke randá áia dróhit§ o dozhmenáni dastá dant. 65 Gorhá gwashti: “Paméshká man gwasht ke kass mani kerrá átka nakant, tán wahdé ke mani Pet imánay sawgátá áia mabakshít.”*

66 Randá, bázén moridéá Issá yalah dát o áiy hamráhi nakort. 67 Gorhá Issáyá cha wati dwázdahén moridán jost kort: “Báren, shomá ham maná yalaha kanét?” 68 Shamun Petrosá passaw dát: “Oo Hodáwand! Kai kerrá berawén? Namiránén zenday gál o habar tai kerrá ant o 69 márá báwar ent o zánén ke taw Hodáay hamá Pákén ay.” 70 Issáyá gwasht: “Man, shomá dwázdahén gechéh nakortant? Anchosh ham zánán ke cha shomá yakké, eblisé.” 71 Áiy maksad Shamunay chokk, Yahudá Eskaryuti at. Chiá ke á cha dwázdahén moridán yakké at o Issái dróhagi o dozhmenáni dastá dayagi at.

7

Issá gón brátán

1 Randá, Issáyá Jalilá tarr o tába kort. Yahudi áiy kóshay randá atant, paméshká nalótheti Yahudiahá bemánit. 2 Anchosh ke Yahudiáni kápáráni* aid nazzik but, 3 Issáyá brátán gón áia gwasht: “É jáhá bell o Yahudiahá beraw, tán hamá kárán ke taw kanay, tai morid begendant. 4 Kasé ke námárdria lóthit, pa chérokái kára nakant. Taw ke é kárána kanay, bell ke sajjahén donyá tará begendit.” 5 Chiá ke brátán ham pa áia báwar néstat. 6 Issáyá gón áyan gwasht: “Angat á wahd pa man narasetag, bale pa shomá har wahd sharr ent. 7 Donyá cha shomá naprata nakant,

bale cha man naprata kant, chiá ke man áiy bárawá gwáhia dayán ke áiy kár sell o gandah ant. 8 Shomá pa é aidá berawét, man annun é aidá nayáyán, chiá ke mani wahd angat narasetag.” 9 Issáyá é habar gón áyan gwasht o Jalilá mant.

Issá Urshalimá rawt

10 Issáyá brát ke pa aidá Urshalimá shotant, randá áiy jend ham hamódá shot, bale mardománi chamdidá nashot, chérokái shot. 11 Aiday róchán, Yahudi áiy shóházá atant o jost o porsesha kort ke “á kojá ent?” 12 Áiy bárawá mardománi nyámá pa chérokái bázén gwasht o góé hastat, lahtén gwashagá at: “Á sharrén mardé.” Dega lahtén gwashagá at: “Mardomána répénit o gomráha kant.” 13 Bale cha Yahudiáni torsá, kasséa sarzáherá hecch nagwasht.

14 Aiday nyámi róchán, Issá mazanén parasteshgáhá shot o dars o sabak dayagá goláesh but. 15 Yahudián gón hayráté gwasht: “É mardá nawántag, inchok zántkári cha kojá áwortagi?” 16 Issáyá áyáni passawá darráént: “É chizzán ke man sabaka dayán mani naant, cha mani rah dayókay némagá ant. 17 Harkas ke belóthi Hodáay wáhagán sarjam bekant, zánt ke mani sabak Hodáayg ant yá man cha wat habara kanán. 18 Harkas ke watsar habara kant, pa wati mazaniay pésh dáragá habara kant. Bale á kas ke wati rah dayókay shán o shawkatay lóthóka bit, tachkén mardomé o áia nárásti nést. 19 Záná, Mussáyá Sharyat shomará nadát, hamá Sharyat ke cha shomá kass áiy sará kár nakanagá ent? Pa ché lóthét maná bekoshét?” 20 Mardomán gwasht: “Tará jenn per ent, kay tará koshit?” 21 Issáyá áyáni passawá gwasht: “Man tahná yak karé kortag o shomá sajjahén chó habakkah o hayrán mantagét. 22 Mussáyá chokkáni sonnat kanag shomará dát, harchont ke é kár cha Mussáyá bongéj nabutagat o cha kawmay pet o pirénán at o shomá Shabbatay róchá, wati mardénchokkán sonnata kanét. 23 Nun agan pa Mussáyá Sharyatay napróshagá shomá Shabbatay róchá mardénchokkán sonnata kanét, chiá mani sará zahr geptagét, ke Shabbatay róchá yak mardomé pa sarjami drahbakshion kortag? 24 Záherá macháret o shawr maborrét, wati hokm o shawrán pa ensáp bekanét.”

Báren, Issá hamá Masih ent?

‡ 6:61 6:61 Mára, bezán mahsus kanag. § 6:64 6:64 Dróhag, bezán pa repk rad dayag, Arabi o Pársái “khiánat”.

* 6:65 6:65 Albat, báyd ent bezánén Hodáay wáhag esh ent ke sajjahén mardom Issáyá kerrá byáyant. Bechár: Pa Timutáusa Pulosay awali kágad, bahr 2, band 4. * 7:2 7:2 Kápar, kápar, kapar.

²⁵ Gorná Urshalimay lahtén mardom gwashagá at: “É hamá naent ke áiy koshagay randá ant? ²⁶ Bechárét, tachkátachk o sarzáherá habar kanagá ent o áiy heccha nagwashant, baren rájay sarók deljam butagant ke é hamá wádah dátágén Masih ent? ²⁷ Má zánén ke é mard cha kojám hand o damagá ent, bale wahdé Masih jáha jant, hechkasa nazánt á cha kojá kayt.” ²⁸ Paméshká, wahdé Issáyá mazanén parasteshgáhay tahá sabaka dát, gón borzén tawaré gwashti: “Shomá maná pajjáha kárét o zánét ke cha kojá án, bale man watsar nayátkagán, mani rah dayók hamá rástén Hodá ent o shomá áiy nazánét. ²⁹ Man áiy zánán, chiá ke cha áiy némagá átkagán o hamáiyá maná ráh dátág.” ³⁰ Hamé wahdá, áyán lóthet Issáyá dazgir bekanant, bale hechkasá áiy némagá dast nashahárt, parchá ke angat áiy wahd narasetagat. ³¹ Bale bázénéá áiy sará imán áwort o gwasht: “Wahdé Masih jáha jant, cha é mardá géshteren mójezah o ajabbatén neshánia kárit?”

Issáy bandi kanagay kóshesh

³² Á gapp o habar ke mardomán chérokái Issáyá báravá gwashtant, Parisián eshkotant. Gorná mazanén dini péshwá o Parisián pa Issáyá dazgir kanagá, parasteshgáhay sepáhig rawán dátant. ³³ Á wahdi Issáyá gwasht: “Man pa yak kammokén wahdéá shomay nyámá án o randá wati rah dayókay kerrá rawán. ³⁴ Shomá mani shóházá gardét, bale maná wadi korta nakanét o á jáhá ke mana rawán, shomá átka nakanét.” ³⁵ Gorná Yahudián gón yakdegará gwasht: “Kojá rawaga lóthit ke má áiy dar gétka nakanén. Baren, hamá Yahudiáni kerrá rawt, ke Yunániáni nyámá sheng o sháng ant o Yunánián ham sabaka dant? ³⁶ É habar ke á gwasht: ‘Shomá mani shóházá gardét, bale maná wadi korta nakanét’ o ‘á jáhá ke mana rawán shomá átka nakanét,’ áiy é habaray maksad chi ent?”

Zendáp

³⁷ Aiday áheri o masterén róchá, Issá óstát o pa borztawári gwashti: “Agan kasé tonnig ent, mani kerrá byayt o áp benóshit. ³⁸ Hamá dhawlá ke Hodáay Pákén Ketába gwashtit, harkas ke mani sará báwar bekant, shahjóáni rawánén zendáp cha áiy daruná rombit o tachána bit.” ³⁹ É habar áiy Hodáay Pákén Ruhay báravá gwashtant ke báiy ent

áiy báwarmandán dayag bebit. Bale Issá angat pa shán o shawkat narasetagat, paméshká taningah Pákén Ruh bakshag nabutagat.

Mardománi nátepáki

⁴⁰ Gón é habaráni eshkonagá, lahtén mardom gwashagá at: “Pa del, é mard hamá wádah dátágén nabi ent.” ⁴¹ Dega lahtén gwashagá at: “É Masih ent.” Bázénéá chosh ham gwasht: “Masih cha Jalilá jáha jant? ⁴² Záná, Pákén Ketába nagwashit ke Masih báiyad ent cha Dáuday nasl o padréchá bebit o cha áiy shahr, Bayt-Lahemá, byayt?” ⁴³ Hamé dábá mardománi nyámá nátepákié kapt. ⁴⁴ Lahténá á dazgir kanag lóthet, bale hechkasá áiy némagá dast nashahárt.

Yahudi sarókáni nábawari

⁴⁵ Randá, parasteshgáhay sepáhig per tarretant o mazanén dini péshwá o Parisiáni kerrá átkant. Áyán cha sepáhigán jost kort: “Shomá chiá Issá gón wat nayáwortag?” ⁴⁶ Sepáhigán gwasht: “Tán é wahdi hechkasá é marday dhawlá habar nakortag.” ⁴⁷ Parisián gwasht: “Shomá ham gomráh butagét? ⁴⁸ Cha kawmay sarók o Parisián yakkéá áiy sará báwar kortag? ⁴⁹ Bale anchosh ent, mardománi á romb ke cha Sharyatá násarpad ent, nálat butagé.” ⁵⁰ Nikudimusá, ke wat cha Parisián yakké at o péshá Issáyá kerrá átkagat, gwasht: ⁵¹ “Baren, Sharyat mára ejázata dant ke kaséay habaráni eshkonag o káráni zánagá pésar, áiy mayárig bekanén?” ⁵² Áiy passawá gwashtesh: “Taw ham cha Jalilay mardomán ay? Wat patth o pól kan o bechár, hechbar nabié cha Jalilá jáha najant.” ⁵³ Randá, á sajjahén wati lógán shotant.‡

8

Zenahkárén janénéay bakshag

¹ Bale Issá Zaytunay kóhá shot. ² É dega sabáhá, padá mazanén parasteshgáhá átk. Mardom áiy chapp o chágerdá mocch butant. Issá nesht o áyáni sabak dayagá goláesh but. ³ Hamé wahdá Sharyatay zánóger* o Parisián, janéné mardománi nyámá áwort ke zenáay wahdá gerag butagat. ⁴ Gón Issáyá gwashtesh: “Oo ostád! É janén zenáay sará gerag butag. ⁵ Sharyatay tahá, Mussáyá mára hokm dátág ke é paymén janén báiyad ent sengsár kanag bebant.† Bale taw

† 7:42 7:42 Samuil Dágaray Domi Ketáb 7:12 o rand; Miká Nabiy Ketáb 5:2. ‡ 7:53 7:53 Lahtén kwahnén daznesbeshá, bahr 7:53 beger tán 8:11 nést. * 8:3 8:3 Sharyatay zánóger; bezán dini álem o Mussáyay Sharyatay zántkár. † 8:5 8:5 Láwián 20:10; Sharyatay Domi Rahband 22:22.

ché gwashay?" ⁶ Áyán lóthet Issá chizzé begwashit tán áiá dámá dawr bedayant o mayárig bekanant, bale Issá nesht o gón lankoká zeminay sará chizzé nebisagá lagget. ⁷ Gón kast o kénagé lóthetesh ke á passaw bedant. Gorhá Issáyá wati sar borz kort o gwashti: "Agan áiá sengsár kanaga lóthét, awali sengá báyard ent hamá bejant ke áiá wat hech gonáh nakortag." ⁸ Padá nesht o zeminay sará chizzé nebisagá goláesh but. ⁹ Gón é habaráni eshkonagá, kawmay peshwá, awalá pirén o randá sajjahén, dar kapt o shotant. Tahná Issá o hamá janén pasht kaptant. ¹⁰ Nun Issá óshát o gón janéná gwashti: "Oo bánok! Mardom kojá shotant? Pa tai mayárig kanagá yakké ham namant?" ¹¹ Janéná gwasht: "Na wájah! Kass namant." Issáyá gwasht: "Man ham tará mayáriga nakanán, beraw, bale dega baré gonáh makan."

Issá jahánay rozhn ent

¹² Issáyá padá gón mardomán gwasht: "Man jahánay rozhn o nur án. Kasé ke mani randgiriá kant, tahárokíá gesar o sargardána nabit, zenday rozhnáiy wáhonda bit." ¹³ Parisián gón áiá gwasht: "Taw wati bárawá wat sháhedia dayay, gorhá tai sháhedia arzesh o ehtebáre nést." ¹⁴ Issáyá áyáni passawá gwasht: "Man pa wati jendá toré wat sháhedi beadán, mani sháhedia ehtebár hast, chiá ke mana zánán cha kojá átkagán o kojá rawán, bale shomá nazánét man cha kojá átkagán o kojá rawán. ¹⁵ Shomá gón ensáni chammé chárét o shawr o hokma borré. Bale man hechkaséay bárawá shawra naborrán. ¹⁶ Agan shawré ham beborrán, mani hokm o shawr barhakkén shawré bit, chiá ke é káray tahá tahná naán, hamá Pet ke maná ráhi dátag gón man hamráh ent. ¹⁷ Shomay Sharyatá é ham nebisag butag ke do mardomay gwáhiá ehtebár hast. ¹⁸ Yakké mani jend ent ke pa wat sháhedia dayán, domi hamá Pet ent ke maná ráhi dátag." ¹⁹ Áyán gwasht: "Tai pet kojá ent?" Issáyá passaw dát: "Shomá na maná zánét o na mani Petá, agan shomá maná bezántén, mani Petó ham zántagat." ²⁰ Issáyá é habar hamá wahdá kortant ke mazanén parasteshgáhá, hayráti zarráni pétiay[§] nazziká, dars o sabak dayagá at. Kasséa pa áiy dagir kanagá dast nashahárt, chiá ke angat áiy wahd narasetagat.

Á jáhá ke mana rawán, shomá átká nakanét

²¹ Padá Issáyá gón áyán gwasht: "Mana rawán o shomá mani shóházá gardét, bale wati gonáháni tahá merét o á jáhá ke mana rawán, shomá átká nakanét." ²² Yahudi gón yakdomiá gwashagá laggetant: "Wahdé gwasht: 'Á jáhá ke mana rawán shomá átká nakanét,' cha eshiá áiy maksad chi ent? Balkén lóthit watá bekoshit?" ²³ Issáyá gón áyán gwasht: "Shomá cha é jahli jaháná ét o man cha borzádi jaháná, shomá cha é donyáyá ét o man cha é donyáyá naán. ²⁴ Paméshká shomará gwashán ke wati gonáháni tahá merét. Agan imán mayáret *Man Hamá Án* ke gwashán, wati gonáháni tahá merét." ²⁵ Áyán jost kort: "Taw kay ay?" Issáyá passaw dát: "Man hamá án ke cha peshá ham shomará gwashton. ²⁶ Maná shomay bárawá bázén chizzé pa gwashag o shawr borragá* hastent, bale mani rah dayók hamá rástén ent o man har chizzé ke cha áiá eshкотag pa jaháná darshána kanán." ²⁷ Áyán nazánt Petay bárawá habar kanagá ent. ²⁸ Paméshká Issáyá gwasht: "Wahdé shomá Ensánay Chokk cha zeminá chest kort, gorhá zánét ke *Man Hamá Án* o watsar káré nakanán, hamá dhawlá ke Petá sój dátag, hamá dhawlá habara kanán. ²⁹ Mani rah dayók gón man ent, áiá maná tahná o éwak naeshtag, chiá ke man modám hamá kárána kanán ke áiá gal o shádána kanant." ³⁰ Cha é habaráni eshkonagá, bázénéá Issáyá sará báwar kort.

Golámi o ázáti

³¹ Randá, Issáyá gón hamá Yahudián ke áiy sará báwarmand butagatant, gwasht: "Agan mani habaráni sará bóshét, pa del mani morid ét. ³² Á wahdi rásti zánét o rásti shomará ázáta kant." ³³ Áyán gwasht: "Má Ebráhémay awlád én o hechbar kaséay golám nabutagén. Gorhá taw chóna gwashay ke 'shomá ázáta bét?'" ³⁴ Issáyá gwasht: "Báwar kanét, á kas ke gonáha kant, gonáhay bandig o golám ent o ³⁵ golám dáemá wájahay lógá namánit, bale chokk dáemá mánit. ³⁶ Gorhá, agan Chokk shomará ázát bekant pa rásti o pakká ázáta bét. ³⁷ Zánán ke shomá Ebráhémay awlád ét, bale paméshká ke mani sabakán shomay delá jágah nést, mani koshagay randá ét. ³⁸ Man hamá chizzáni bárawá gappa kanán ke wati Petay bárgáhá distagant o shomá hamá chizzáni sará kára kanét ke cha wati petá sabak gektant."

‡ 8:17 8:17 Sharyatay Domi Rahband 19:15. Yuhanná 5:31 o rand ham é habaray bárawá ent. § 8:20 8:20 Péti, bezán sanduk. * 8:26 8:26 Shawr borrag, bezán paysalah kanag.

³⁹ Áyán darráent: “May pet Ebráhém ent.” Issáyá gón áyán gwasht: “Agan shomá Ebráhémay chokk buténét, hamáiy ráhó zortagat. ⁴⁰ Shomá zánét, man hamá rásti ke cha Hodáyá eshkotag gón shomá gwasht. Bale angat mani koshagay randá ét. Ebráhémá choshén kár nakortagat. ⁴¹ Shomá wati petay kárán barjáha dárét.” Áyán gwasht: “Má bépet o kíhorr naén, márá yak peté hast, á ham Hodáay jend ent.” ⁴² Issáyá gwasht: “Agan Hodá shomay pet butén, shomá maná ham dóst dáshtagat, chiá ke man cha hamáiy némagá átkagán o shomay nyámá án. Man watsar nayátkagán, hamáiy maná dém dátag. ⁴³ Pa ché mani habarán sarkecha nawarét? Paméshká ke shomárá é habaráni eshkonagay twán nést. ⁴⁴ Shomá wati pet, bezán eblisay chokk ét o hamáiy morád o wáhagáni sará kár kanaga lóthét. Á cha bon o béhá hónigé o cha rástíya dur o zebahr[†] ent, chiá ke áiyá hech rásti mán nést. Wahdé dróga bandit, wati bon o béhá rawt, chiá ke drógbandé o sajjahén drógáni pet ent. ⁴⁵ Bale paméshká mani sará bawara nakanét ke rástíya gón shomá gwashán. ⁴⁶ Cha shomá kay maná gonáhé per basta kant? Gorhá, agan man rásténa gwashán, pa ché bawara nakanét? ⁴⁷ Á kas ke Hodái ent, Hodáay habará gósha dárít. Shomá Hodáay habará gósha nadárét, chiá ke Hodái naét.”

Issá o Ebráhém

⁴⁸ Yahudián áiyá passawá darráent: “Má nagwasht ke taw cha Sámerián ay o tará jenn per ent?” ⁴⁹ Issáyá gwasht: “Maná jenn per nést, wati Petá báz ez-zata dayán, bale shomá maná béezzata kanét. ⁵⁰ Man pa wat mazania nalóthán, á degaré ke maná sharap o mazania dant o wat dádrasia kant. ⁵¹ Allam bezánét agan kasé mani habará begipt, hechbara namerit.” ⁵² Yahudián gón áiyá gwasht: “Nun márá bawar ent ke tará jenn per. Ebráhém o sajjahén nabi mortant, bale taw gwashay: ‘Harkas mani habará bezurit hechbara namerit.’ ⁵³ Záná, taw cha may pet Ebráhémá master ay? Á mort o sajjahén nabi ham mortant. Taw kay ay?” ⁵⁴ Issáyá passaw dát: “Agan man watá wat satá bedayán, é satáyá arzeshé nést, é mani Pet ent ke maná mazani o shawkata bakshít, hamá ke shomá áiyá wati Hodá zánét. ⁵⁵ Angat áiyá nazánét o pajjáha nayárét, bale man áiyá zánán. Agan begwashén ke áiyá nazánán, shomay dhawlá drógbanda bán, bale man áiyá zánán o har chizzé ke á gwashit mana

kanán. ⁵⁶ Shomay pet Ebráhém, pa hamé ométá gal o shádán at ke mani róchá be-gendiit. Áiyá dist o delshát but.” ⁵⁷ Yahudián gwasht: “Tará angat panjáh sál ham nabít, gorhá chón taw Ebráhém distag?” ⁵⁸ Issáyá gwasht: “Báwar kanét, *Man Hamá Án* ke cha Ebráhémá pésar butagán o hastán.” ⁵⁹ Áyán pa Issáay janagá seng o dhók chet, bale á cha mardománi chammá dur o andém but, mazanén parasteshgáhi esht o shot.

9

Pédáeshi kóréay drahbakshi

¹ Cha ráhéa gwazán, Issáyá yak pédáeshi kóre^{*} dist. ² Moridán cha áiyá jost kort: “Oo ostád! É mard chiá kór pédá butag? Wat gonahkár ent yá áiyá pet o mát?” ³ Issáyá passaw dát: “Na áiyá jend gonahkár ent, na pet o mát. Paméshká é dhawlá but ke Hodáay kár o zóráki gón áiyá paddar o záher bebit. ⁴ Tánke róch ent, báyad wati rah dayókay kárán sarjam bekanén, shap ke bit gorhá kass káré korta nakant. ⁵ Man, tán wahdé ke jaháná án, jahánay rozhnái án.” ⁶ Wahdé chosh gwashti, lebzi zeminá dawr dát o cha lebzá geli addh kort, kóray chammán per mosht o ⁷ gwashti: “Beraw, wati chammán Siluháay taláwagá beshód.” (Siluháay maná “dém dátagén” ent.) Gorhá á shot, chammí shoshtant, biná but o átk.

⁸ Randá, hamsáheg o é dega mardom ke á mardesh cha pendhógeriay róchán pajjáh áwortagat, gwashagá laggetant: “É hamá naent ke neshtagat o pendhagá at?” ⁹ Lahténá gwasht: “Hamá ent.” Dega lahténá gwasht: “Áiyá hamrang o ham-dróshom ent.” Á wat gwashagá at: “Man hamá mardom án.” ¹⁰ Jostá atant: “Gorhá tai chamm chón biná butant?” ¹¹ Gwashti: “Hamá mard ke námi Issá ent, áiyá gel tarr kort, mani chammán per mosht o gwashti ke Siluháay taláwagá berawán o chammán beshódán. Man chamm shoshtant o biná bután.” ¹² Gwashtesh: “Á mard kojá ent?” Gwashti: “Mana nazánán.”

Pédáeshi kór o Parisiáni jost o pors

¹³ Hamá mard ke pésará kór at Parisiáni kerrá bortesht. ¹⁴ Shabbatay róch at ke Issáyá gel jórhéntagat o áiyá chamm biná kortagatant. ¹⁵ Nun Parisiáni ham cha áiyá jostá atant: “Taw chón biná butay?” Mardá gwasht: “Áiyá mani chamm gel per moshtant, man shoshtant o nun gendagá án.” ¹⁶ Lahtén Parisiáni gwasht: “É mard cha Hodáay némagá nayátkag, parchá ke Shabbatay rahbanday sará kára nakant.”

[†] 8:44 8:44 Zebahr, bezán bébahr. * 9:1 9:1 Pédáeshi kór, bezán mádarzádén kór.

Dega lahténá gwasht: “Gonahkárén mardomé chón é dhawhlén ajabbatén nesháni pésh dáshta kant?” Á watmánwat kassh o chilléá kaptant. ¹⁷ Padá cha hamá mardá jostesh kort ke pésará kór at: “É tai chamm atant ke áia biná kortant, nun taw áiaý bárawá ché gwashay?” Gwashti: “Nabié.”

¹⁸ Yahudián báwar nakort ke á mard kór butag o annun biná ent, paméshká áiaý pet o mátesh áwortant. ¹⁹ Cha áyán jostesh kort: “É mard shomay chokk ent, hamá ke shomá gwashét pédaéshi kóré at? Gorhá nun chóna gendit?” ²⁰ Pet o mátá áyáni passawá gwasht: “Má zánén ke may chokk ent o kór pédá butag. ²¹ Bale nazánén nun chóna gendit o kayá biná kortag. Cha áiaý jendá jost begerét, rostag o tamánén mardé, wati habará wata kant.” ²² Áiaý pet o mátá cha Yahudián torset, paméshká é dhawlá passawesh dát. Parchá ke Yahudián cha péshá shawr kortagat, harkas bemannit ke Issá Masih ent, áia cha kanisah o parasteshgáhán dara kanant. ²³ Paméshká á marday pet o mátá gwasht ke “cha áiaý jost begerét, á wat rostag o tamánén mardé.”

²⁴ Domi randá, á mard ke pésará kór butagat padá áwort o gwashtesh: “Pa Hodáay námá sawgend bwar ke rásta gwashay, má zánén ke é mard, Issá, gonahkáré.” ²⁵ Áiaý gwasht: “É mard gonahkáré yá na, mana nazánán, tahná yak chizzé zánán, ke man kór butagán o nun biná án.” ²⁶ Áyán jost kort: “Gón taw ché korti? Chón tai chammí biná kortant?” ²⁷ Passawí dát: “Man annun gón shomá gwasht, shomá gósh nadásht, pa ché lóthét padá beshkonét? Zána, shomá ham lóthét áiaý morid bebét?” ²⁸ Gorhá á biná butagén mardesh zá o zakat kort o gwashtesh: “Taw wat áiaý morid ay, má Mussáay morid én. ²⁹ Má zánén ke Hodáay gón Mussáay habar kortag, bale é marday bárawá nazánén ke cha kojá átkag.” ³⁰ Nun á mardá áyáni passawá gwasht: “É ajabén habaré, áia maní chamm biná kortagat o shomá nazánét á cha kojá átkag! ³¹ Máshomá sajjahéna zánén ke Hodá gonahkáráni dwáya gósha nadárit, hamáiaý dwáya gósha dárit ke Hodádóste o áiaý wáhagáni sará kára kant. ³² Cha jahánay jórhénagá beger tán maróchi, eshkonag nabutag ke yakké pédaéshi kóré biná bekant. ³³ Agan é mard cha Hodáay némagá mayátkén, hech choshén kári korta nakort.” ³⁴ Áiaý passawá gwashtesh: “Taw ke wat gonáhay chokk ay, mará sabaka dayay?” Gorhá á mardesh dar kort.

Kórdelán

³⁵ Wahdé Issáyá eshкот biná butagén mardesh galléntag, á mardi dar gétk o gwashti: “Tará Ensánay Chokkay sará báwar ent?” ³⁶ Mardá darráént: “Oo wájah! Maná begwash, á kay ent ke áiaý sará báwar bekanán?” ³⁷ Issáyá gwasht: “Taw á distag. Hamá ent ke gón taw habar kanagá ent.” ³⁸ Gwashti: “Oo Hodáwand! Imánon áwort” o Issáyá pádán kapt. ³⁹ Gorhá Issáyá gwasht: “Man pa hokm borrag o dádrasiá é donyáya átkagán, tánke kór biná bebant o biná kór.” ⁴⁰ Cha Parisián lahtén ke áiaý chapp o chágerdá atant é gappesh eshкот o gwashtesh: “Tai maksad esh ent ke má kór én?” ⁴¹ Issáyá gwasht: “Agan kór buténét shomárá mayaré per néstat, bale paméshká angat mayárig ét ke gwashét: ‘Má biná én.’”

10

Nékén shopánk

¹ “Báwar kanét, agan kasé cha pasáni gwásh o wárhay dapá mapoterit o cha dega némagé kopp bekant, bezán dozz o rahzané. ² Bale á kas ke cha gwáshay dapá rawt, pasáni shopánk ent. ³ Negahpán, gwáshay dapá pa áiaý pacha kant o pas áiaý tawárá eshkonant. Á wati pasán pa nám gwánk o tawára jant o áyán dhanná bárt. ⁴ Wahdé wati pasán dhanná bárt, wat pésarara bit o pas áiaý randá kapant, chiá ke áiaý tawárá pajjáha kárant. ⁵ Bégánagáni randá nakapant, cha áyána tachant, chiá ke bégánagáni tawárá pajjáha nayárant o nazánant.” ⁶ Issáyá, é mesál pa áyán pésh kort, bale mardomán áiaý maksad sarkech nawárt.

⁷ Gorhá padá gwashti: “Báwar kanét, man pasáni gwáshay dap o darwázag án. ⁸ Á sajjahén ke cha man o pésar átkagant dozz o rahzan atant* o pasán áyáni tawár gósh nadásht. ⁹ Man darwázag án, harkas ke cha maní ráhá begwazit, rakkit. Tóká rawt yá dhanná, pa charágáhe sará bit. ¹⁰ Dozza kayt tán dozzi bekant, bekoshit o tabáh bekant, man átkagán ke mardomán zendmán berásit o sarjamiá áiaý wáhond bebant.

¹¹ “Man nékén shopánk án, nékén shopánk wati sáhá pa pasán nadra kant. ¹² Bale kasé ke pa mozz kára kant, pasáni wáhond naent. Wahdé gendit ke gork dém pa pasán pédák ent, áyán yalaha kant o tachit. Á wahdí, gork pasáni sará hamlah o orosha† bárt o áyán sheng o shángá kant.

* **10:8** 10:8 Issáyá maksad hamá dagábázén sarók atant ke mardomána répénant. † **10:12** 10:12 Orosch, bezán hamlah.

13 Á tachit, chiá ke pa mozz kára kant, pasáni hayáldáriá nakant.

14 “Man nékén shopánk án, man wati pasán jáha kárán o á ham maná zánant, 15 hamá dhawlá ke Pet maná zánt o man Petá zánán. Man wati sáhá pa pasán nadra kanán. 16 Maná dega pas ham hast, ke cha é ramagá naant,[‡] báyard ent áyán ham byárán. Á mani tawará eshkonant o yak ramag o yak shopánka bant. 17 Pet maná dósta dárít, chiá ke man wati sáhá nadra kanán ke padá wati ján o zenday wáhond bebán. 18 Hechkas mani sáhá cha man gepta nakant, man gón wati hobb o wáhagá áia nadra kanán. Maná wati sáhay dayagay ehtiár watá gón ent o padá áiy per tarrénagay master ham wat án. É hokm, maná Petá dátag.”

19 É habaráni bárawá, padá Yahudiáni nyámá nátepáki kapt. 20 Bázéné gwashagá at: “Áia jenné per, ganóké, pa ché áiy habarán gósha dárét.” 21 Á dega gwashagá atant: “Kaséá ke jenn per ent, é dhawlén gapp jata nakant. Jenn kórán biná korta kant?”

Yahudi Issáyá namannant

22 Wahdé Urshalimá, mazanén parasteshgáhay shosht o shód o wapkay[§] aid átk, zemestán at. 23 Issáyá mazanén parasteshgáhá, Solaymánay péshjáha* kadama jat. 24 Yahudi áiy chapp o chágerdá mocch but o gwashagá atant: “Tán kadén mára é dhawlá shakkay tahá dáray? Agan taw Masih ay, rást o pakká begwash.” 25 Issáyá gwasht: “Man shomará gwashtag, bale báwara nakanét. Á kárán ke man cha Petay némagá kanán wat pa man gwáhia dayant. 26 Bale shomá ke mani pas naét, báwara nakanét. 27 Mani pas mani tawará eshkonant, man áyán jáha kárán o mani randgiriá kanant. 28 Man áyán namiránén zenda bakshán o á hechbara namerant. Kass áyán cha man pach gepta nakant. 29 Hamá Pet, ke é maná bakshetaganti, cha sajjahénán master ent o hechkas áyán cha mani Petay dastá pach gepta nakant. 30 Man o mani Pet yakk én.”

31 Padá Yahudián dhók chet ke áia sengsár bekanant. 32 Issáyá gón áyán gwasht: “Man cha Petay némagá bázén nékén káré kortag, pa kojám kára maná sengsára kanét?” 33 Yahudián darráént: “Pa nékén karéá tará sengsára nakanén, pa tai koprán é kára kanén. Taw bani ádamé ay bale gwashay: ‘Man Hodá

án.’” 34 Issáyá gwasht: “Shomay Sharyatá nayátkaq ke Hodáyá gwashtag: ‘Shomá cha hamá shawr borrókén[†] hodáyán ét?’”

35 Agan á mardom ke Hodáay habar pa áyán rasetag, ‘hodá’ gwashag butagant o zánén ke Hodáay Pákén Ketáb hechbara nakapit o nákára nabit, 36 gorhá maná ke Petá gechén kortag o é jaháná rawán dátag, chón kopray bohtámá[§] janét? Á ham tahná pa é habará ke man gwash-tag: ‘Hodáay Chokk án.’ 37 Agan man wati Petay kárán makanán, pa man imán mayaré. 38 Bale agan áyáni sará kára kanán, toré agan pa man imán mayaré, pa mani kárán imán byaré. Á wahdi, sarkecha warét ke Pet mani jesm o jáná ent o man áiy arwáh o jabiná.” 39 Gorhá lóthetesh padá áia dazgir bekanant, bale Issá cha áyáni dazrasá dur but.

40 Randá cha Ordonay kawrá gwast o hamá jágahá shot o mant ke pésará Yahyáyá ódá pákshódi dátagat. 41 Bázén mardomé áiy Kerrá átk o gwashtesh: “Yahyáyá hech mójezah o ajabbatén nesháni pésh nadásht, bale é marday bárawá har chizzé ke gwashti rást ent.” 42 Ódá bázén mardoméá Issáyá sará imán áwort.

11

Ilázaray mark

1 Bayt-Anyáay métagá, Ilázar námén mardé nájórh at. Bayt-Anyá, Maryam o áiy gohá Martáay métag at. 2 Maryam hamá at ke Hodáwandén Issáyá pádi atr per moshtant o gón wati mudán hoshki kortant, annun áiy brát Ilázar nájórh at. 3 Áiy gohárán pa Issáyá kolaw kort: “Oo Hodáwand! Tai dóst nádráh ent.” 4 Wahdé Issáyá é habar eshkot gwashti: “É nádráhi áia dém pa marká nabárt, pa Hodáay shán o shawkatá yak neshánié bit, tánke Hodáay Chokk ham cha é ráhá pa mazani o shawkat berasit.” 5 Issáyá, Martá o áiy gohár o Ilázar dósta butant.

6 Wahdé cha Ilázaray nájórhia sahig but, dega do róch hamá jáhá ke dashtagati mahtal but. 7 Gorhá gón moridán gwashti: “Byáét padá dém pa Yahudiahá berawén.”

8 Moridán gwasht: “Oo ostád! É habará dér nagwastag ke Yahudián lóthet tará sengsár bekanant. Padá hamódá rawaga lóthay?” 9 Issáyá passaw dát: “Róchay rozhnái dwázdah sáhat naent? Kasé ke róchá ráha rawt nalakoshit o thagala

‡ 10:16 10:16 Asligén Yunáni nebeshtánka gwasht: “cha é gwáshá naant”. § 10:22 10:22 Wap^k, bezán chizzé ke pa Hodáyá gishshénaq bit. * 10:23 10:23 Péshjáha, bezán péshgáh, lógay chárdiwál, sahn. † 10:34 10:34 Shawr borrók, bezán paysalah kanók.

‡ 10:34 10:34 Zibur 82:6. É habaray maná esh ent ke Hodái shawr borragay ehtiár mardomán dayag butag. § 10:36 10:36 Bohtám, bezán malámat, tohmat.

nawárt, chiá ke jahánay rozhnáíá gen-dit. ¹⁰ Bale agan kasé shapá ráh berawt lakoshit, chiá ke áíá hech rozhnáíé démá nést.” ¹¹ É habarán o rand, Issáyá gwasht: “May dóstén Ilázar waptag, bale mana rawán o áíá páda kanán.” ¹² Moridán gwasht: “Oo Hodáwand! Agan wáb ent, allamá dráha bit.” ¹³ Issáyá áíay markay bárawá habar kort, bale áyán hayál kort ke Ilázar anchosh waptag o wáb ent. ¹⁴ Á wahdí Issáyá sarkech dátant ke “Ilázar mortag. ¹⁵ Nun pa shomaygi shádmán án ke ódá nabutagán. Pa ché ke nun báwar korta kanét. Byáét, áíay gwará rawén.” ¹⁶ Tumá ke áesh “Járhó”^{*} náméntagat, gón á dega moridán gwasht: “Byáét, má ham berawén o gón áíá hór bemerén.”

Issá zendmán o áherat ent

¹⁷ Wahdé Issá ódá átk o raset, sahi but chár róch ent ke Ilázar kabr kanag butag. ¹⁸ Bayt-Anyá tán Urshalimá, kesás say kilumitar[†] ent. ¹⁹ Bázén Yahudié, Martá o Maryamay Kerrá pa áyáni brátay porsá átkagat. ²⁰ Wahdé Martá sahi but ke Issá pédák ent, áíay peshwáziá shot, bale Maryam mant. ²¹ Martáyá gón Issáyá gwasht: “Oo Hodáwand! Agan taw edá buténay, mani brát namortagat. ²² Bale angata zánán, har chizz ke taw cha Hodáyá belóthay tará dant.” ²³ Issáyá gwasht: “Tai brát padá zendaga bit.” ²⁴ Martáyá gwasht: “Mana zánán ke áherzamáná zendaga bit.” ²⁵ Issáyá gwasht: “Man zendmán o áherat án. Agan kasé mani sará imán byárit toré bemerit, padá ham zendaga bit. ²⁶ Harkas ke zendag ent o mani sará báwara kant, hechbara namerit. É habará báwara kanay?” ²⁷ Martáyá gwasht: “Haw mani Hodáwand! Maná báwar ent ke taw Masih ay, Hodáay hamá Chokk ay ke báyad ent é jaháná byayt.”

Issáyá gréwag

²⁸ Cha é gappáni gwashagá o rand, Martá shot wati gohár Maryami tawár kort o pa halwaté gwashti: “Ostád átkag o tará lóthit.” ²⁹ Wahdé Maryamá é eshкот, hamá damáná chest but o Issáyá Kerrá shot. ³⁰ Issá angat á métagá narasetagat o hamódá at ke Martá áíay gendagá shotagat. ³¹ Hamá Yahudi ke Maryamay lógá atant o áíá tasallá dayagá atant, wahdé distesh ke á pa eshtápi pád átkag o cha lógá dar áyagá ent, áíay randá kaptant. Gón wá gwashtesh: “Balkén pa gréwagá kabray sará rawt.”

³² Bale Maryam hamódá shot o sar but ke Issá ódá at o á disti. Nun Issáyá padán kapt o gwashti: “Oo Hodáwand!

Agan taw edá buténay, mani brát namortagat.” ³³ Wahdé Issáyá Maryam gón á Yahudián ke áíay hamráh atant gréwán dist, cha delá áhé kasshet o sakk padard but. ³⁴ Gwashti: “Shomá Ilázar kojá kabr kortag?” Gwashtesh: “Oo Hodáwand! Byá o bechár.” ³⁵ Cha Issáyay chammán ars retkant. ³⁶ Yahudi gwashagá atant: “Bechárét chenkadard dósti butag.” ³⁷ Cha áyán lahtená gwasht: “É mard ke kóray chammi biná kortant, Ilázari cha marká rakként nakort?”

Ilázaray zendag bayag

³⁸ Randá, Issá anchosh ke cha delá áh kasshagá at, kabray sará átk. Kabr, yak gáre at ke dhóké áíay dapá ér at. ³⁹ Issáyá gwasht: “Dhóká dur kanét.” Ilázaray gohár Martáyá gwasht: “Oo wájah! Áíay marká chár róch gwastag o bóa kant.” ⁴⁰ Issáyá passaw dát: “Man nagwasht agan tará imán bebit, Hodáay shán o shawkatá genday?” ⁴¹ Gohá dhókesh cha kabray dapá dur kort, Issáyá ásmánay némagá cháret o gwashti: “Oo Pet! Tai shográ gerán ke mani habaret eshкот. ⁴² Man zánt ke taw modám mani habará gósha dáray, bale é habaron pa á mardomán gwasht ke edá óshátátagant, tán báwar bekanant ke taw maná rawán dátag.” ⁴³ Cha é habarán o rand, Issáyá gón borzén tawaré gwánk jat: “Ilázar! Dar kap.” ⁴⁴ Hamá mordag, ke dast o pádi kaponá atant o démi dazmáléá póshetagat, dhanná dar átk. Issáyá gwasht: “Áíá pach kanét, belléti ke rawt.”

Issáyá kóshay mandr o pandal

⁴⁵ Maryamay gwará átkagén bázén Yahudián, wahdé Issáyá é kár dist, áíay sará imánesh áwort. ⁴⁶ Bale lahtén, Parisiáni Kerrá shot o Issáyay kortagén káray hálesh bort o sar kort. ⁴⁷ Mazarén dini peshwá o Parisián wati sarókáni diwánay básk lóthetant o gwashtesh: “Má ché kanagá én? É mard bázén mójezah o ajabbatén nesháni pesh dáragá ent. ⁴⁸ Agan áíá hamé dhawlá yalah bedayén, sajjahén áíay sará báwara kanant, á wahdí Rumia káyant o may kawm o mazarén parasteshgáhá gerant.” ⁴⁹ Cha áyán, Kiápá námén mardéá, ke á sálá masterén dini peshwá at, gwasht: “Shomá cha bon o béhá chizzé nazánét. ⁵⁰ Nazánét ke pa shomá, sarjamén kawmay tabáhiay badalá, sharter hamesh ent ke kawmay jáhá yak mardomé bemerit.” ⁵¹ É gapp, áíá watsar nagwasht, chiá ke á sálá, Kiápá masterén dini peshwá at, áíá peshgói kort ke Issá báyad ent pa kawmá bemerit,

^{*} **11:16** 11:16 Bezán Tumáyá járhé butag. [†] **11:18** 11:18 Asligén Yunáni nebeshtánka gwasht: “pánzdah stádios”.

Yak stádios 190 mitaray kesásá ent.

52 tahná pa á kawmá na, pa Hodáay sajjahén sheng o shángén chokkán tán áyán yakjáh o yakráh bekant. 53 Cha á róchá o rand, áiy koshagay band o bastesh bongéj kort. 54 Cha ed o rand, dega baré Issáyá watá Yahudiáni nyámá záher nakort. Gyábánay nazziká, Epráim námén shahréá, gón wati moridán shot o nesht.

55 Yahudiáni Sargwazay aid nazzik at o bázén mardomé cha mol kay sajjahén hand o damagán, Urshalimá átkagat ke cha aidá pésar pákizagiay rasmán purah bekanant. 56 Á Issáy jost o porsá atant o mazanén parasteshgáhá gón yakdegará gwashagá atant: “Báren, é aidá nayayt? Shomá ché gwashét?” 57 Bale mazanén dini peshwáyán o Parisián hokm kortagat, harkasé ke bezánt Issá kojá ent, hál bedant tán áia dazgir bekanant.

12

Maryam Issáy pádán charpa kant (Mattá 26:6-13; Markás 14:3-9)

1 Cha Sargwazay aidá shash róch pésar, Issá Bayt-Anyáyá shot ke Ilázaray lóg hamódá at, hamá Ilázar ke cha mordagán zendag kortagati. 2 Áyán, pa Issáyá shámé jórh kortagat, Martáyá hezmata kort o Ilázar gón mehmánán Issáyá kashá parzónagay* sará neshtagat. 3 Á wahdi, Maryamá ném táséay kesásá,† sombolay‡ gehter o gránbaháén atr áwort, Issáy pádán per mosht o pád gón wati mud o malgóran hoshk kortant. Atray wasshén bó, á lógay har kondhá tálán but.

4 Hamé wahdá Yahudá Eskaryutiá, ke cha Issáy moridán at o pa hamé zuttán, Issái dróhagi o dozhmenáni dastá dayagi at, gwasht: 5 “Parchá é atr pa sésad dinará bahá nabut o zarr, garib o nézgáran dayag nabutant?” 6 Áia é habar pa bazzagén mardománi gamwáriá nagwasht, paméshká gwashti ke á wat Issáy rombay kelitdár§ at o dozzé at. Áia harwahd cha zarturagá chizzé pa wata zort. 7 Issáyá gwasht: “Maryamay kára kár madaré, áia é rógen pa mani kabr kanagay tayáriá ér kortagant. 8 Garib o nézgár modám shomay Kerrá hast, bale man harwahd gón shomá gón naán.” 9 Cha Yahudián bázénéá, wahdé eshkot ke Issá ódá ent, tahná Issáy didará nayátkant, Ilázaray gendagá ham átkant ke zendag butagat. 10 Paméshká mazanén dini peshwáyán Ilázaray kóshay

shawr ham borret. 11 Chiá ke áiy sawabá, bázén Yahudié cha áyán per tarretagat o Issáy sará báwarmand butagat.

Pa Issáy wasshátka

(Mattá 21:1-11; Markás 11:1-11; Luká 19:28-40)

12 É dega róchá, mazanén rombé ke pa aidá átkagat, wahdé zántesh Issá Urshalimay ráhá ent, 13 gón maccháni sarsabzén piss h o takán,* pa Issáy peshwáziá dar átk. Kukkáresha kort:

“Hushiáná,†

Esráilay bádsháhá mobáarak bát ke pa Hodáwanday námá kayt.”‡

14 Issáyá korragén haré dar gétk o áia swár but, anchosh ke Hodáay Pákén Ketába gwasht: 15 “Oo Sahyunay Jenek! Nun mators. Tai bádsháh korragén haréay poshtá neshtag o pédák ent.”§

16 Awalá é chizzáni maksad pa moridán pakká naat, bale randá ke Issá pa wati mazani o shawkatá raset, morid yát o tránagá kaptant ke é chizz áiy bárawá nebisag butagat o mardomán ham gón áia anchosh kort. 17 Wahdé Issáyá Ilázar tawár jat o cha kabrá zendag dar áwort, bázéné hamódá at. Áyán pa wati distagén o eshkotagénán sháhedia dát. 18 Á mazanén romb, pa é háterá Issáyá peshwáziá átkagat, ke eshkotagatesh Issáyá é mójezah o ajabbatén nesháni záher kortag. 19 Parisián gón yakdegará gwasht: “Bechárét, máshomá hechh nakanagá én, sajjahén donyá áiy ráhá ent.”

Gón Issáyá Yunániáni gendok

20 Gón é mardomán ke aiday róchán pa parasteshá Urshalimá átkagatant, lahtén Yunáni ham gón at. 21 Á Piliposay Kerrá átkant. Pilipos Jalilay shahr Bayt-Saydáay mardomé at. Gón áia gwashtesh: “Wájah! Má lóthén Issáyá begendén.” 22 Pilipos shot o é habari gón Andriásá gwasht. Á doén shotant o Issáesh hál dát. 23 Issáyá áyáni passawá gwasht: “Á wahd átkag ke Ensánay Chokk pa wati shán o shawkatá berasit. 24 Allam bezánét, agan gandomay dánag hákay chérá marawt o mamerit, hechbar cha yak dánagá géshtera nabit, bale agan kall bebit bázén dánagé kárit. 25 Harkasá ke wati zend dóst ent, áia bhéhénit o harkas ke é jaháná cha wati zendá sara gwazit, á wati sáh o jáná

* 12:2 12:2 Parzónag, bezán soprah. † 12:3 12:3 Asligén Yunáni nebeshtánka gwasht: “yak litrá”, bezán kesás sésad gerám. ‡ 12:3 12:3 Sombol, washbóén gol o pollé. § 12:6 12:6 Kelitdár, bezán hazánagay hesábdár o sambálók. * 12:13 12:13 Tak, bezán macchay tarrén lothh ke piss h per enti. † 12:13 12:13 Hushiáná, bezán “mára annun berakkén”. ‡ 12:13 12:13 Zabur 118:26. § 12:15 12:15 Zakaryá Nabiay Ketáb 9:9. Sahyun yak kóhé, ke Urshalimay shahray bonred é kóhay sará ér kanag butag. Sahyunay Jenek, bezán Urshalimay jahmenéndén mardom.

rakkénit o pa namiránén zendá sara bit.
²⁶ Agan kasé lóthit mani hezmatá bekant, báyard ent mani randgiriá bekant. Har jáh ke man án, mani hezmatkár hamódá gón man ent o agan kasé mani hezmatá kant, mani Pet áia washnáma kant.

Wati markay bárawá Issáay habar

²⁷ “Annun mani del bétáhir* o jalájósh ent, ché begwashán? Bárén begwashán: ‘Oo mani Pet! Maná cha é sáhatá be-rakkén?’ Na, habar esh ent ke mani áyagay morád o maksad hamé wahd o damán butag. ²⁸ Oo Pet! Wati námá mazani o shawkat beday.” Hamé wahdá, borzén tawaré cha ásmáná rost ke gwashti: “Shán o mazonion dátog o angat ham dayán.” ²⁹ Rombé mardom ke ódá óshtátogat, gón é tawáray eshkonagá gwashagá laggetant: “Granday tawár at,” á degarána gwasht: “Préshtagéá gón áia gapp kort.” ³⁰ Issáyá gwasht: “É tawár, pa man na, pa shomaygi átk. ³¹ Annun é jahánay dádrasiay wahd ent o jahánay náláhekén sardár Shaytán, dhanná dar kanaga bit. ³² Wahdé cha zeminá chest kanaga bán, sajjahén mardomán wati némagá kasshán.” ³³ Issáyá é habar pa hamá dhawléen markéá gwasht ke áiy entezár o wadará at.

³⁴ Mardomán darraént: “Sharyata gwashit ke Masih tán abad gón má mánit. Gorrhá taw chóna gwashay ke ‘Ensánay Chokk chest kanaga bit’? Ensánay é Chokk kay ent?” ³⁵ Issáyá gwasht: “Tahná yak gwandhén wahdéá rozhnái gón shomá gón ent. Tán wahdé ke é rozhnái gón shomá gón ent, gám janán demá berawét. Chosh mabit ke tahárokí shomay sará báládest bebit o shomará prósh bedant. Kasé ke tahárokíá ráha rawt, nazánt kojá rawt. ³⁶ Tánke shomará rozhnái gón ent, rozhnay sará imán byáret ke rozhnáiy chokk bebét.” Issáyá é gwasht o cha áyáni nyámá shot o chérandém but.

Yahudiáni nábawári

³⁷ Gón Issáay é bázén mójezah o ajabatén neshánián, angat ham áyán imán nayáwort, ³⁸ tánke Eshayá nabiy habar purah o sarjam bebit, ke áia gwashtagat: “Oo Hodáwand! May kolaw kayá báwar kortag o Hodáwanday wák o kodrat[†] pa kayá záher butag?”* ³⁹ Gorrhá áyán báwar kort nakort, chiá ke Eshayáyá angat ham gwashtagat:

⁴⁰ “Áyáni chammi kór o deli sakk mohr kortagant

*tán gón chammán magendant,
 gón delán sarkech mawarant o
 dém pa man per matarrant,
 tánke áyán dráh bekanán.”*§

⁴¹ Eshayáyá Issáay mazani o shawkat dist, paméshká áiy bárawá é habari kort. ⁴² Angat ham Yahudiáni bázén sarókán imán áwort. Bale cha hamé torsá ke Parisi áyán cha kanisah o parasteshgáhán dar makanant, námésheha nagept. ⁴³ Chiá ke áyán, ensánay dátogén ezzat o satá cha Hodáay dátogén ezzat o satáyá géshter dósta but.

⁴⁴ Gorrhá Issáyá gón borzén tawaré gwasht: “Harkas mani sará báwar bekant, na tahná mani sará, mani rah dayókay sará ham báwara kant. ⁴⁵ Harkas maná gendit, mani rah dayóká ham gendit. ⁴⁶ Man é jahánay átkagén rozhnái án, tán harkas ke mani sará báwar bekant, tahárokíá mamánit. ⁴⁷ Bale agan kasé mani habarán beshkont o áyáni sará kár makant, angat ham man áiy bárawá shawr o hokmé naborrán. Chiá ke man pa jahánay mayárig kanagá nayátkagán, pa jahánay rakkénagá átkagán. ⁴⁸ Shawr borróké hast, tán harkas ke maná cha wat besendit o mani habarán mamannit, áia mayárig bekant. Mani gwashtagén gapp o habar, jost o porsay róchá áia mayáriga kanant. ⁴⁹ Chiá ke man watsar gapp o habar nakortag, hamá Petá ke maná rawán dátog, hokmi kortag ke ché begwashán o chón habar bekanán. ⁵⁰ Zánán ke áiy hokm o parmán, namiránén zend ent. É chizzán ke mana gwashán, hamá chizz ant ke Petá maná gwashtagant.”

13

Issá moridáni pádana shódit

¹ Sargwazay aidá yak o do róch pasht kaptagat, Issáyá zánt áiy hamá sáhat o damán átkag ke báyard ent é jaháná yalah bedant o Petay kerrá berawt. Áia wati morid, é jaháná mehr dátogant o tán wati omray áheri damáná, pa del dósta dáshtant.

² Shámay wahd at o Shaytáná cha péshá Shamunay chokk, Yahudá Eskaryutiay del áshopéntagat* ke Issáyá bedróhit o dozhmenáni dastá bedant. ³ Issáyá zánt ke Petá sajjahén chizz Chokkay dastá dátogant, Chokk cha Hodáay némagá átkag o hamáiy kerrá rawt. ⁴ Cha parzónogay sará pád átk, kabáhi[†] kerré esht o lánkigé sréná basti. ⁵ Nun dasshódé

* 12:27 12:27 Bétáhir, bezán náarám, békarár. † 12:38 12:38 Asligén Yunáni nebeshtánka gwasht: “Hodáwanday dast”. ‡ 12:38 12:38 Eshayá Nabiy Ketáb 53:1. § 12:40 12:40 Eshayá Nabiy Ketáb 6:9 o rand. * 13:2 13:2 Áshopénag, bezán pád kanag, tahrík kanag. † 13:4 13:4 Kabáh, bezán jobbah.

zorti, moridáni pádi shoshtant o gón hamá lánkigá hoshk kortant. ⁶ Wahdé Shamun Petrosay bárig raset, áia gwasht: “Oo Hodáwand! Taw mani pádán shódaga lóthay?” ⁷ Issáyá passaw tarrént: “Annun taw nazánay man ché kanán, randá sarkecha waray.” ⁸ Petrosá gwasht: “Man hechbara naylán taw mani pádán beshóday.” Issáyá gwasht: “Agan tará mashódán,‡ cha man tará hech wandh o bahré narasit.” ⁹ Shamun Petrosá gwasht: “Oo wájah! Agan chosh ent, tahná mani pádán na, mani sar o dastán ham beshód.” ¹⁰ Issáyá gwasht: “Hamá kasá ke pákshódi kortag, áia abéd cha pádán dega hech shosht o shóday hájat nést. Á sará tán páda, sapá o sallah ent. Shomá pák ét, bale sajjahén na.” ¹¹ Chiá ke Issáyá zánt kay áia dróhit, paméshká gwashti: “Shomay rombay tahá, sajjahén pák naant.”

¹² Sajjahénáni pádáni shódagá rand, wati kabáhi gwará kort o parzónagay sará nesht o gwashti: “Shomá zánét man pa shomá ché kort?” ¹³ Shomá maná ostád o Hodáwanda zánét o tawára kanét o rást ham gwashét, man hamá án. ¹⁴ Agan man shomay Hodáwand o ostád án o shomay pádon shoshtagant, shomá ham báyard ent yakdegaray pádán beshódét. ¹⁵ Man shomára mesále pésh kort, tán hamá dhawlá ke man gón shomá kort, shomá ham bekanét. ¹⁶ Shomára rásténa gwashán, hech golám cha wati wájahá o hech kásed cha wati rah dayóká master naent. ¹⁷ Nun ke shomá eshiá zánét, bahtáwar ét agan kári bebandét. ¹⁸ É chizzán ke gwashán pa shomá sajjahénán naant. Á ke man gechéen kortagant, áyána zánán o pajjáha kárán. Bale Pákén Ketábay é péshgói báyard ent sarjam bebit, *á kas ke gón man hamkásag at, mani badwáh ent o mani déma óshtátag.* § ¹⁹ Annun cha é kára pésar shomára gwashán ke wahdé chosha bit, gorhá bezánét ke *Man Hamá Án.* ²⁰ Báwar kanét, harkas hamáia ke man rawán dátag wasshátk bekant o sharap bedant, bezán maná sharapi dátag o harkas maná sharap bedant, bezán mani rah dayóki sharap dátag.”

Dazgir bayagay péshgói

(Mattá 26:20-25; Markás 14:17-21; Luká 22:21-23)

²¹ Wahdé Issáyá é gwasht, cha ruh o daruná sakk padard but o gón pakkái gwashti: “Báwar kanét, cha shomá yakké maná dróhit o dozhmenáni dastá dant.”

²² Moridán nazánt kai bárawá é habará gwashagá ent o gón shakk o shohbah yakdegaresh cháret. ²³ Cha moridán yakké ke Issáyá báz dóst at, áia y Kerrá neshtagat. ²⁴ Paméshká Shamun Petrosá hamá morid eshárah kort ke wájahá jost bekant, baren kai bárawá gapp kanagá ent? ²⁵ Gorhá á morid nazzikter kenzet o cha Issáyá josti kort: “Oo Hodáwand! Á kay ent?” ²⁶ Issáyá passaw dát: “Á hamá ent ke man chondhé nán kásagá pera janán o áia dayán.” Gorhá náni per jat o Shamun Eskaryutiay chokk, Yahudáyará dáti. ²⁷ Anchosh ke Yahudáyá lonkah dastá kort, Shaytán áia y pósta potert. Nun Issáyá gón áia gwasht: “Zutt kan! Har káre ke tará kanagi ent bekan.” ²⁸ Bale cha parzónagay saray neshtagén mar-domán, hechkasá nazánt ke gón é habará áia y maksad chi ent. ²⁹ Lahténá gomán kort pa é háterá ke Yahudá zarturagay zemmahwár ent, Issáyá gwasht ke be-rawt o harché pa aida pakár ent begipt, yá nézgáran chizzé bedant. ³⁰ Anchosh ke Yahudáyá lonkah zort, dhanná dar kapt. Shap at.

Nókén hokm

³¹ Yahudá ke dar kapt, Issáyá gwasht: “Ensánay Chokk pa mazani o shawkat sar but. Hodáyá ham cha áia y némagá shawkat raset. ³² Agan Hodáyá cha áia y némagá shawkat rasetag, Hodá ham áia mazania dant o é mazani o shawkat ham hamé zutti bongéja bit. ³³ Oo mani chokkán! Angat tán gwandhén wahdéa gón shomá gón án. Randá mani shóháza gardét. Hamá dhawlá ke gón Yahudián gwashton, gón shomá ham gwashán: Á jáhá ke mana rawán, shomá átka nakanét. ³⁴ Shomára nókén hokmé dayán: yakdegará dóst bedarét. Anchosh ke man shomára dóst dáshtag, shomá ham yakdomia dóst bedarét. ³⁵ Agan gón yakdegará mehr bekanét, gorhá sajjahéna zánant ke mani morid ét.”

Petrosay enkáray péshgói

(Mattá 26:33-35; Markás 14:29-31; Luká 22:33-34)

³⁶ Shamun Petrosá gwasht: “Oo Hodáwand! Kojá raway?” Issáyá passaw dát: “Anchéen jágahé rawán ke taw annun gón man átka nakanay. Bale randterá káay.” ³⁷ Petrosá gwasht: “Oo Hodáwand! Annun pa ché gón taw átka nakanán? Man wati sáha pa taw nadra kanán.” ³⁸ Issáyá gwasht: “Báren, taw pa man wati sáhay nadr kanagá tayár ay? Báwar kan,

‡ 13:8 13:8 Edá shódagay maná ruhánién pák o palgári ham buta kant. § 13:18 13:18 Zabur 41:9.

cha korósbángá pésar, say randá mani pajjáha áragá enkára kanay o namannay.

14

Issá dém pa Hodáyá yakkén ráh ent

¹ “Shomay del negrán o bétáhir mabit, Hodáay sará báwar kanét, pa man ham imán byáret. ² Mani Petay lógá bázén báné* hast. Agan é dhawl mabutén shomará gwashton, mana rawán tán pa shomá jágahé tayár kanán. ³ Bale nun agan man pa shomay jágahay tayár kanagá rawán, padá káyán o shomará gón wata barán, tán shomá ham hamódá gón man yakjáh bebét. ⁴ Shomá zánét ke man kojá rawán o ráhá ham balad ét.”

⁵ Tumáyá gwasht: “Oo Hodáwand! Má nazánén taw kojá raway, gorhá ráhá chón bezánén?” ⁶ Issáyá gwasht: “Ráh man án. Rásti o zend bakshók ham man án. Hechkas bé man Petay kerrá átka nakant. ⁷ Agan shomá maná bezántén, mani Petó ham zánt.† Bale cha ed o rand, shomá áiá zánét o á distagó.” ⁸ Piliposá gón áiá gwasht: “Oo Hodáwand! Petá márá pesh bedár, pa má hamé bass ent.” ⁹ Issáyá gwasht: “Oo Pilipos! É bázén wahdá man gón shomá hamráh án o taw angat maná nazánay? Harkasá ke maná distag, mani Peti ham distag. Gorhá chóna gwashay: ‘Petá márá pesh bedár’? ¹⁰ Báwara nakanay ke man Petay arwáh o jabiná án o Pet manigá? É habarán ke gón shomá gwashán mani naant, hamá Petayg ant ke mani jesm o jáná ent. Hamá ent ke é kárána kant. ¹¹ Mani é habará bemannét ke man Petay jabiná án o Pet manigá. Agan báwara nakanét, hamá káráni sará imán byáret ke shomá cha man distagant. ¹² Báwar kanét, harkas ke mani sará imán byárit, harché ke mana kanán, á ham korta kant. Masterén kár ham kant, chiá ke man Petay kerrá rawán o ¹³ harché ke pa mani námá belóthét, á wáhagá sarjama kanán, tánke Chokk wati Petá shán o shawkat bedant. ¹⁴ Agan chizzé pa mani námá belóthét, pa shomá sarjam o tayára kanán.

Hodáay Pákén Ruhay ráh dayagay wádah

¹⁵ “Agan shomá maná dósta dárét, mani hokmá ham pa del o jána mannét. ¹⁶ Gorhá man wat cha Petá lóthét o á shomará dega posht o panáhé dant ke modám shomay nyámá bemánit. ¹⁷ Bezán é rástiy hamá Ruh ent ke jahán eshiá

manneta nakant, chiá ke nagendit o pajjáhia nayárit. Bale shomá eshiá pajjáha kárét, chiá ke shomay kerrá mánit o shomay del o daruná bit. ¹⁸ Shomará yatim o chórawa nakanán, shomay kerrá pera tarrán. ¹⁹ Kammén wahdéá rand, jahán dega baré maná nagendit, bale shomá maná gendét. Man zendag án, paméshká shomá ham zendaga mánét. ²⁰ Á róchá zánét ke man Petay arwáh o jabiná án o shomá manigá o man shomaygá. ²¹ Á kasá ke mani hokm gón ent o á hokmáni sará kára kant, hamá maná dósta dárít. Á ke maná dósta dárít, á mani Petá ham dósta bit. Maná ham á dósta bit o watá pa áiá paddara kanán.”

²² Yahudá Eskaryutiá na, á domi Yahudáyá jost kort: “Oo Hodáwand! Pa ché watá pa má paddara kanay bale pa jaháná nakanay?” ²³ Issáyá passaw tarrént: “Á kas ke maná dósta dárít, hamá habaráni sará kára kant ke man gwashtagant o á ham mani Petá dósta bit. Man o Pet áiy kerrá rawén o gón áiá mánén. ²⁴ Á kas ke maná dósta nadárit, mani habaráni sará kára nakant. É habarán ke shomá cha mana eshkonét mani naant, hamá Petayg ant ke maná ráhi dátag. ²⁵ É habaron hamá wahdá gwashtant ke angat shomay nyámá án. ²⁶ Bale shomay posht o panáh, hamá Pákén Ruh ent ke Peti pa mani námá rawána kant. Á, sajjahén chizzán shomará sója dant. Hamá habar ke man gón shomá gwashtagant, shomará áyáni yat o tránagá perrénit.

²⁷ “Man shomará deljami o ásudagiya dayán, wati árami o ásudagiya shomará bakshán. Jaháná é wák o twán nést hamá ásudagiya shomará bedant ke mana dayán. Negrán o deltaparkah‡ mabét. ²⁸ Shomá eshкот man gwasht ke rawán, bale padá shomay kerrá pera tarrán. Agan man shomará dósta buténán, cha é habará shádána butét ke man Petay kerrá rawán, chiá ke Pet cha man master ent. ²⁹ Paméshká, cha é káray sarjam bayagá pésar gwashton ke wahdé chosha bit, imán byáret. ³⁰ Cha ed o rand, gón shomá báz habara nakanán, chiá ke é jahánay náláhekén sardár, Shaytána kayt. Áiá mani sará hech wák o zóré nést. ³¹ Man bass hamá kárána kanán ke Petá maná hokm kortag, tán jahán bezánt ke maná Pet dóst ent. Pád áét, cha edá berawén.

* 14:2 14:2 Bán, bezán kóthi, kamrá, otág. † 14:7 14:7 Lahtén daznebeshtá átkag: “Agan shomá maná zántag, mani Petá ham zánta kanét.” ‡ 14:27 14:27 Deltaparkah, bezán paréshán, deltrakk.

15

Anguray asligén drachk

¹ “Man anguray asligén drachk án o mani Pet bágpan ent. ² Mani har thálé ke bar mayárit, áia goddhit o har thálé ke gránbara bit, áia pák o sallaha kant ke géshter nibag byárit. ³ Shomá gón mani habarán pák butagét. ⁴ Shomá mani jesm o jáná bemánét o man shomaygá. Hamá dhawlá ke agan thálé gón drachká hór mabit, bara nadant, shomá ham agan gón man hór mabét bar dáta nakanét. ⁵ Man drachk án o shomá thál ét. Harkas ke gón man bemánit o man gón áia, bázén nibagé kárit, chiá ke shomá cha man jetá hech káré korta nakanét. ⁶ Agan kasé gón man mamánit, yak tháléay dhawlá dawr dayaga bit o hoshka tarrit. Mardom hoshkén thálán moccha kanant o sóchant. ⁷ Agan mani jesm o jáná bemánét o mani habar shomay delá benendant, harché ke belóthét, shomay wáhag sarjama bant. ⁸ Mani Petá gón hamé kára shán o shawkata rasit ke shomá bázén bar o nibagé byáret o mani morid bebét.

⁹ “Hamá dhawlá ke Petá maná dóst dáshtag, man ham shomára hamá paymá dóst dáshtag. Mani mehráni sáhegá bemánét. ¹⁰ Agan mani hokmáni sará kár bekanét, mani mehráni tahá mánét, anchosh ke man wati Petay hokmáni sará kár kortag o áia mehráni tahá émen neshtagán. ¹¹ É habaron gón shomá paméshká gwashtant, tánke mani shádmániay wáhond bebét o shomay shádmáni sarjam bebit. ¹² Mani hokm esh ent ke shomá gón yakdegará mehr bekanét, hamá dhawlá ke man gón shomá mehr kortag. ¹³ Cha eshiá masterén mehr nést ke mardom wati sáhá pa dóstá nadr bekant. ¹⁴ Agan shomá mani hokmáni sará kár bekanét, mani dóst ét. ¹⁵ Cha ed o rand shomára golám o bandaha nagwashán, chiá ke goláma nazánt wájah ché kant. Paméshká man shomára wati dóst zánt, ke harché cha Petá eshкот, gón shomá gwashton. ¹⁶ Shomá maná gechéen nakortag, man shomára gechéen kortag o rawán dátag ke berawét o nibag byáret, abadmánén nibag. Á wahdi, harché pa mani námá cha Petá belóthét, shomára dant. ¹⁷ Mani hokm pa shomá hamesh ent: Yakdegará dóst bedarét.

Donyáy bézári

¹⁸ “Agan donyá cha shomá naprata kant, bezánét ke pésará cha man ham naprati kortag. ¹⁹ Agan shomá é donyái mardom buténét, donyáyá ham shomára watigáni dhawlá dosta dásht. Bale paméshká ke

shomá donyái naét o man shomára cha é donyáyá gechéen kortag o dar chetag, nun donyá cha shomá bézár ent. ²⁰ Cha é habará béhayál mabét ke man gón shomá gwashtagat: ‘Golám cha wájahá mastera nabit.’ Agan áyan maná ázár dátag, shomára ham ázára dayant. Agan mani habaresh zortag, shomay habará ham zurant. ²¹ Pa mani námaygi gón shomá é dhawlá kanant, chiá ke mani rah dayóka nazánant. ²² Agan man mayátkénán o gón áyan é habar makorténant, á bémayár atant. Bale annun áyan, pa wati gonáhán hech ozré nést. ²³ Harkas ke cha man naprata kant, cha mani Petá ham naprata kant. ²⁴ Agan áyani nyámá á kár man makorténant ke cha degaráni was o wáká dar ant, bémayár atant. Bale nun, áyan é kár distagant o angat cha man o mani Petá naprata kanant. ²⁵ Áyani Sharyatay é habar ke gwashit, ‘*bé sawab cha man napratesh kortag*,’* é dhawlá rást o paddar but. ²⁶ Bale wahdé shomay hamá posht o panáha kayt, bezán rástiyá Pákén Ruh ke áiy sarchammag Pet ent o mani cha Petay némagá rawána kanán, hamá mani bárawá gwáhia dant. ²⁷ Shomá ham mani gwáh o sháheda bét, chiá ke cha hamá bongejá gón man gón butagét.

16

¹ “É chizzon gón shomá gwashtant ke shomá mathagalét o rad mawarét. ² Bezánét ke shomára cha parastesgháh o kanisahán dara kanant. Yak wahdé kayt, á kas ke shomára koshit, gomána kant gón wati é kára pa Hodáyá hezmata kant. ³ É karán gón shomá kanant, chiá ke na Petá zánant o na maná. ⁴ É habaron shomára paméshká gwashtant ke wahdé chosh but, mani gwashtagén habaráni hayál o tránagá bekapét. É chizzon cha awalá gón shomá nagwashtant, chiá ke man wat gón shomá gón atán.

Hodáay Pákén Ruhay kár

⁵ “Annun wati rah dayóky kerrá rawán bale cha shomá hechkas josta nakant ke ‘kojá raway?’ ⁶ Shomay del cha gamá porr but, chiá ke man é habar gón shomá gwashtant. ⁷ Bale rásténa gwashán ke mani rawag pa shomá sharter ent. Chiá ke agan marawán, shomay posht o panáh shomay nyámá nayayt, bale mana rawán o áia pa shomá rawána kanán. ⁸ Wahdé á kayt, jaháná gonáh o pahrézkári o adl o hokmay bárawá sahig o mayáriga kant. ⁹ Gonáhá pésha dárit, chiá ke mani sará imánesh nayáwort; ¹⁰ pahrézkáriá pad-dara kant, chiá ke man Petay kerrá rawán

* 15:25 15:25 Zabur 35:19; 69:4.

o shomá dega baré maná nagendét; ¹¹ adl o hokmá pajjárénit, chiá ke é jahánay náláhekén sardár, Shaytán mayárig kanag butag. ¹² Bázén chizzé hast ke báyard ent gón shomá begwashán, bale shomará é wahdi áyáni eshkonagay wák o twán nést. ¹³ Á ke rástiyá Ruh ent, kayt. Á shomará pa sarjamén rástíá rahdarbaria kant. Parchá ke watsar chizzé nagwashit, tahná cha hamá chizzán habara kant ke eshkont o shomará cha démá áyókén chizzán sarpada kant. ¹⁴ Á mani shán o shawkatá paddara kant, chiá ke har hál o habaré ke cha mana gipt, shomará sahiga kant. ¹⁵ Harché ke mani Petá hast, manig ent. Paméshká gwashton ke Pákén Ruh cha mana gipt o shomará sahiga kant.

Gam o shádehi

¹⁶ “Kammén wahdéa rand, maná nagendét bale padá, kammoké randterá maná gendét.” ¹⁷ Gorchá cha moridán lahténá gón yakdegará gwasht: “Chiá gwashtit: ‘Kammén wahdéa rand, maná nagendét bale padá, kammoké randterá maná gendét,’ yá é habar ke á gwashtit: ‘Petay Kerrá rawán,’ áiyay maksad chi ent?” ¹⁸ Á watmánwat gwashagá atant: “É ‘gwandhén wahd’ ke áiyay bárawá habara kant, chi ent? Má nazánén ché gwashtit?”

¹⁹ Issáyá zánt ke é bárawá cha man jost kanaga lóthant. Gorchá gwashtit: “Shomá mani hamé habaray bárawá gón yakdomiá jost o porsá ét ke man shomará gwasht: ‘kammén wahdéa rand dega baré maná nagendét, bale padá, kammoké randterá maná gendét. Shomay gapp o trán hamé bárawá at?’” ²⁰ Báwar kanét o bezánét ke shomá arsa réché o yak gam o andóhéa kapét, bale jahán shádehia kant. Shomá gamnák o porsiga bét, bale shomay é gam pa shádmániá badala bit. ²¹ Yak janéné wati chellagiay wahdá darda kasshit, bale anchosh ke nonnok pédá bit, wati dardána shamóshit, paméshká ke nókén ensáné pédá butag. ²² Shomá ham annun, hamé dhawlá gamnák ét, bale shomará padá gendán. Á wahdi, shádmána bét o shomay wasshián hechkas pach gepta nakant. ²³ Á róchá dega chizzé cha man josta nakanét. Báwar kanét, harché pa mani námá cha Petá belóthét, shomará dant. ²⁴ Tán é wahdi shomá chizzé pa mani námá nalóthettag, belóthét tán shomará berasit o shomay shádmáni sarjam o sarréché bebit.

Jahánay sará báládsti

²⁵ “Tán é wahdi, man gón shomá pa ráz o ramz habar kortag, bale wahdé kayt ke dega pa ráz o ramz habara nakanén, tachk

o paddar Petay bárawá gón shomá habara kanán. ²⁶ Wahdé á rócha kayt, shomá mani námá gerét o cha Hodáyá lóthét o mana nagwashán ke pa shomá cha Petá lóthán. ²⁷ Pet wat shomará dósta dárit, chiá ke manó dóst dáshtag o mannetagó ke man cha Hodáay némagá átkagán. ²⁸ Man cha Petay Kerrá átkag o é jaháná sar butagán, annun é jaháná yalaha kanán o Petay gwará rawán.” ²⁹ Moridán gón áiyá gwasht: “Nun róshen o pakká, bé ráz o ramz habar kanagá ay. ³⁰ Nun deljam én ke taw sajjahén chizzána zánay o tará hech zalurat naent kasé cha taw josté bekant. Paméshká mará báwar ent, taw cha Hodáay némagá átkagay.” ³¹ Issáyá passaw dát: “Nun shomará báwar ent. ³² Bechárét, yak wahd o sáhaté kayt o á wahd cha hamé annun bongéj butag, shomá sajjahén sheng o shángá bét o harkas wati ráh rawt. Maná tahná o éwak yalaha dayét, bale angat tahná naán, chiá ke mani Pet gón man gón ent. ³³ É chizzon shomará gwashtant ke gón man hór bayagá shomará sohl o ásudagi berasit. Jaháná shomará dard o ranja rasit, bale matorsét o delér bebét chiá ke man é jahánay sará sóbén* bután.”

17

Pa moridán dwáhayr

¹ Cha é habarán o rand, Issáyá dém pa ásmáná cháret o gwashtit: “Oo Pet! Á wahd o sáhat rasetag, wati Chokká shán o shawkat beday tánke Chokk tará ezzat o shán bedant. ² Taw sajjahén mardománi ehtiár áiyay dastá dátay, tán hamá mardom ke taw áiyará bakshetagant, áyán namiránén zend bedant. ³ Oo yakk o barhakkén Hodá! Namiránén zend hamesh ent ke á tará bezánant o tai rawán dátaygén Issá Masihá pajjáhy byárant. ⁴ Á kár ke taw mani zemmah o ogdahá eshtagat, man sarjam kort o jaháná tai mazani o shawkat záher o paddar kort. ⁵ Oo Pet! Annun maná wati bárgáhá shán o shawkat beday, hamá shawkat ke maná cha é jahánay jórhénagá pésar tai Kerrá butag.

⁶ “Man tai nám, gón áyán pajjárént ke taw cha é jaháná gechént kortag o mani dastá dátaygant. Á taig atant o taw maná dátant. Áyán tai habaráni sará kár kortag. ⁷ Annun áyán zánt, á chizz ke taw maná dátaygant, pa rástí cha tai némagá ant. ⁸ Chiá ke á habar ke taw maná gwashtag man pa áyán sar kortant o áyán ham mannet. Nun áyán pa del zánt ke man cha

* 16:33 16:33 Sóbén, bezán péróz, kámyáb.

tai némagá átkagán o báwara kanant ke taw maná rawán dáttag.

⁹ “Man pa áyán dwá kanán, pa sajjahén jaháná na. Man pa á mardomán dwá kanán ke taw mani dastá dáttagant, chiá ke taig ant. ¹⁰ Á ke manig ant, á sajjahén taig ant, á ke taig ant, manig ant o mani shán o shawkat cha áyán záher o paddar but. ¹¹ Man cha ed o rand é jaháná namánán, bale á angat jaháná ant o man tai kerrá káyán. Oo pákén Pet! Gón hamá námay zór o twáná ke taw maná dáttag, áyáni negahpániá bekan tánke yakk bebant, hamá warhá ke má yakk én. ¹² Tán wahdé ke man gón áyán butagán, gón hamá námay zór o twáná ke taw maná dáttag, áyáni negahpánion kortag. Cha áyán yakké ham tabáh o halák nabut, abéd cha hamá yakkéná, ke wat halákatay láhek at, tán hamá chizz purah o sarjam bebit ke Pákén Ketába gwashit.

¹³ “Annun tai gwará káyán. Cha jahánay yalah dayagá pésar, é habarána gwashán tánke á cha mani shádmániá sarréché bebant. ¹⁴ Man tai habar pa áyán rasént. Paméshká ke á, é donyái naant donyá cha áyán naprata kant, anchosh ke man é donyáié naán. ¹⁵ Tai bárgáhá é dwáyá nakanán ke áyán cha donyáyá bebar, dwá kanán ke áyán cha sherr o Shaytáná berakkén. ¹⁶ Hamá dhawlá ke man é donyáié naán, á ham naant. ¹⁷ Áyán gón wati rástíá pák bedár, tai habar rásti ent. ¹⁸ Hamá dhawlá ke taw maná jaháná rawán dát, man ham á, jaháná rawán kortant. ¹⁹ Annun pa hamáyánigi watá gón páki o palgári tai sepordaha kanán, tánke á ham gón rástíá palgár o Hodáay sepordah bebant.

²⁰ “Tahná pa eshán dwá nakanán, pa á mardomán ham dwá kanán ke cha esháni kolaw o gwáhiá mani sará imána kárant, ²¹ tánke á sajjahén yakk bebant. Oo Pet! Hamá dhawlá ke taw mani arwáh o jabiná ay o man taigá, á ham gón má bebant o jahán imán byárit ke taw maná rawán dáttag. ²² Á mazani o shawkat ke taw maná dáttagat man áyáná dát o rasént tánke á yakk bebant, hamá dhawlá ke má yakk én, ²³ man áyáni jesm o jáná bemánán o taw manigá, tánke á cha hamsetki o yakdeliá sarréché bebant. Á wahdi, jahána zánt ke taw maná rawán dáttag o anchosh ke taw maná dóst dáshtag, áet ham dóst dáshtagant.

²⁴ “Oo Pet! Mani wáhag esh ent, á ke taw maná bakshettagant hamódá ke man án, gón man hamódá yakké bebant, tán hamá

shawkatá begendant ke taw maná bakshettag, chiá ke cha jahánay jórh bayagá pésar ham, taw maná dóst dáshtag. ²⁵ Oo ádelén Pet! Harchont ke jaháná tará nazánt o pajjáh nayáwort, man tará zánt o pajjáh áwort. Nun é ham zánant ke taw maná rawán dáttag. ²⁶ Man tai nám gón áyán pajjárént o angat ham pajjárénáni, tán hamá mehr ke tará pa man hastent, áyáni del o jáná ham bebit o man áyáni del o jáná bebán.”

18

Issáy dazgir kanag

(Mattá 26:47-56; Markás 14:43-50; Luká 22:47-53)

¹ Cha é habarán o rand, Issá gón wati moridán Kedrunay daragay* á dastá shot. Odá yak bágé hastat, Issá o áiy morid hamódá shotant. ² Yahudáyá, ke áiy dróhók† at, á jágah zánt, chiá ke Issá o áiy morid géshter hamódá shotant. ³ Gorhá, Yahudáyá hokumati pawji gón parasteshgáhay sepáhigán, ke cha mazanén dini péshwá o Parisiáni némagá rawán dayag butagatant, zort o hamá bágá bortant.‡ Áyán mashal o kandhil o seláh gón at. ⁴ Issáyá zánt ke áiy sará chónén káre kapagi ent, démá shot o josti kort: “Kayá shóháza kanét?” ⁵ Gwashtesh: “Issá Náseriay padá gardén.” Passawi dát: “Man Án!” Yahudá, Issáy dróhók ham hamódá at. ⁶ Wahdé Issáyá gwasht: “Man án,” á poshtá kenzán kenzán zeminá kaptant. ⁷ Padá gwashti: “Kai randá gardét?” Áyán gwasht: “Issá Náseriay.” ⁸ Issáyá darráént: “Man shomárá gwasht: Man án. Agan mani randá gardét, eshán bellét ke rawant.” ⁹ Issáyá é gwasht tán áiy pésarigén habar sarjam bebit: “Á ke taw maná dáttagant, cha áyán kass tabáh o halák nabut.”§ ¹⁰ Á wahdi, Shamun Petrosá ke zahmé gón at kasshet o masterén dini péshwáay nawkaray rástén góshi gón zarbaté sest. Nawkaray nám Malkus at. ¹¹ Issáyá gón Petrosá gwasht: “Wati zahmá jotká* kan! Á jámá nósh makanán ke Petá maná dáttag?”

Issá masterén dini péshwáay dém pa démá

(Mattá 26:57; Markás 14:53; Luká 22:54)

¹² Gorhá hokumati pawji o áyáni sarmaster o Yahudi sepáhigán, Issá dazgir kort o mohr o mohkam bast. ¹³ Issáesh pésará Hannáay kerrá bort, ke á Kíápáay

* **18:1** 18:1 Darag, bezán wádi, gwatr. † **18:2** 18:2 Dróhók, bezán hamá ke wati hamráhá rada dant o bahá kant.

‡ **18:3** 18:3 Bezán Yahudá at ke é kári kort. § **18:9** 18:9 Bechár: Yuhannáay Enjil 6:39. * **18:11** 18:11 Jotk, bezán zahm yá kárchay jeld, pósh, nyám.

janay pet at. Kiápá á sálá, masterén dini pëshwá at. ¹⁴ É hamá Kiápá at ke gón Yahudián gwashtagati: “Kawmay jáhá, yak mardoméay merag gehter ent.”

Petrosay enkár

(Mattá 26:69-70; Markás 14:66-68; Luká 22:54-57)

¹⁵ Shamun Petros o dega moridé Issáay padá rawán but o shotant. Á dega moridá gón masterén dini pëshwáyá pajjáróki hastat, paméshká gón Issáyá masterén dini pëshwáyá pëshjáhá potert. ¹⁶ Bale Petros dhanná darwázagay nazziká óshtátogat. Gorhá á morid ke gón masterén dini pëshwáyá pajjárók at, dhanná dar átk, darwázagpánén móleday góshá chizzé gwashti o Petrosi tóká bort. ¹⁷ Á móledá Petrosay némagá dém tarrént o gwashti: “Záná, taw cha é marday moridán naay?” Áiá gwasht: “Na, naán!” ¹⁸ Hezmatkár o sepáhigán ásé rók kortagat, chiá ke hawá sárt at. Ásay kerrá óshtátogatant o dast tápagá atant. Petros ham áyáni kerrá óshtátogat o watá tápagá at.

Cha Issáyá jost o pors

(Mattá 26:59-68; Markás 14:55-65; Luká 22:63-71)

¹⁹ Masterén dini pëshwáyá cha Issáyá, áiy morid o tálim o sabakáni bárawá lahtén jost o pors kort. ²⁰ Issáyá passaw dát: “Man sajjahénáni démá róshen o pakká gapp o habar kortag. Modám kanisahán o mazanén parasteshgáhá, hamódá ke sajjahén Yahudi moccha bant, dars o sabakon dátog o hechbar panáh o chérokái chizzé nagwashtagon. ²¹ Gorhá chiá cha man josta geray? Cha hamáyán jost beger ke mani gapp o habarash eshкотagant. Á zánant man ché gwashtag.” ²² Issáyá ke é habar kortant, yak sepáhigé ódá óshtátogat, Issái shahmáté jat o gwashti: “Masterén dini pëshwáyá é dhawlá passawa dayay?” ²³ Issáyá darráént: “Agan man radén habaré kortag, maná mayárig bekan, agan ráston gwashtag, pa ché janay?” ²⁴ Gorhá Hannáyá Issá dast bastaká, masterén dini pëshwá, Kiápáay kerrá dém dát.

Petros angat Issáyá namannit

(Mattá 26:71-75; Markás 14:69-72; Luká 22:58-62)

²⁵ Shamun Petros hamódá óshtátogat o dast tápagá at. Lahténá gwasht: “Záná, taw cha áiy moridán naay?” Áiá namannet o gwashti: “Na, naán.” ²⁶ Cha masterén dini pëshwáyá hezmatkárán yakké, hamá marday syád at ke Petrosá áiy

gósh borretagat. Áiá gón Petrosá gwasht: “Man wat tará gón áiá hamá bágá nadist?” ²⁷ Petrosá padá ham namannet. Hamá damáná, korósá báng dát.

Issá Pilátusay démá

(Mattá 27:11-26; Markás 15:1-15; Luká 23:1-5; 23:13-25)

²⁸ Sabáhá máhallah, Issáesh cha Kiápáay kerrá Rumay wáliay kalátá bort. Yahud, á kalátá nashotant ke nápák mabant o Sargwazay aiday waráká wárt bekanant. ²⁹ Gorhá Pilátus átk o cha áyán josti kort: “É marday sará shomay bohtám chi ent?” ³⁰ Áyán passaw tarrént: “Agan mayárig mabutén má tai kerrá nayáwort.” ³¹ Pilátusá gwasht: “Eshiá bebarét o gón wati Sharyatá pa eshiá hokm o shawré beborrét.” Yahudián gwasht: “Mará kasséay koshagay hakk o ehtiár nést.” ³² Áherá, hamá dhawlá ke Issáyá wati markay bárawá gwashtagat, hamá dáb but.

³³ Randá Pilátus, wati kóth o kalátá shot o Issái hamódá lótháént o gwashti: “Haw! Taw Yahudiáni bádsháh ay?” ³⁴ Issáyá gwasht: “É tai jenday gapp o habar ent yá tará é dhawlá gwashtagesh?” ³⁵ Pilátusá gwasht: “Záná, man Yahudié án? Tai wati kawm o mazanén dini pëshwáyán tará mani kerrá áwortag. Chiet kortag?” ³⁶ Issáyá passaw dát: “Mani bádsháhi, donyái bádsháhié naent. Agan mani bádsháhi donyái bádsháhié butén, mani hezmatkárán janga kort tánke Yahudiáni dastá makapán. Bale mani bádsháhi donyái naent.”

³⁷ Pilátusá gwasht: “Acha, taw bádsháhé ay?!” Issáyá gwasht: “Taw wat gwashagá ay ke man bádsháhé án. Man pédá butag o donyáyá átkagán ke pa rástíá gwáhi bedayán. Harkasá ke rásti dósta bit, mani habarán gósha dárít.” ³⁸ Pilátusá darráént: “Rásti chi ent?” Eshiy gwashagá o rand, Pilátus padá Yahudiáni kerrá shot o gwashti: “Man pa é mardá hech mayaré nagendán. ³⁹ Bale gón shomay rasmá, man Sargwazay aiday róchá, yak bandigé pa shomá ázáta kanán. Lóthét Yahudiáni bádsháhá pa shomá ázát bekanán?” ⁴⁰ Á sajjahénán kukkár kort: “Na, áiá nalóthén! Bárábásá ázát kan!” Bárábás, yak yágié at.

19

Yahudiáni kénag o Pilátusay dodeli
(Mattá 27:27-31; Markás 15:16-20)

¹ Á wahdi, Pilátusá hokm dát Issáyá shallák o hayzarán bejanant. ² Pawjián

* 19:2 19:2 Jamu, rangé ke Pársiá banafsh o Orduá banafshi gwashtanti.

cha dhangar o konthagán tájé jórhént o Issáay sará ér kort, bádsháhi jamurangén* kabáhé ham gwará dátesh. ³ Áiay Kerrá áyán o gwashán antant: “Drud o drahbát,† oo Yahudiáni bádsháh!” Shahmátesh ham jat. ⁴ Pilátus padá Yahudiáni Kerrá átk o gwashti: “Bechárét, shomay Kerrá káráni tán bezánét ke man pa áiá hech mayaré nagendán.” ⁵ Issá ke áiá konthagén tájé sará o jamurangén kabáhé gwará at, dhanná dar átk. Pilátusá gwasht: “Bechárét, é mard hamedá ent!” ⁶ Wahdé mazanén dini peshwáyán o áyáni sepáhigán á dist, kukkáresh kort: “Salibi kassh! Salibi kassh!” Pilátusá gwasht: “Shomá wat áiá salib bekasshét. Man hech warhén mayaré pa áiá nagendán.” ⁷ Yahudián gwasht: “Mára Sharyaté has- tent ke áiay rahbandáni redá,‡ báyd ent koshag bebit, chiá ke gwashtagi: ‘Man Hodáay Chokk án.’”

⁸ Wahdé Pilátusá é eshкот, cha peshá géshter torsi delá nesh. ⁹ Wati kóth o kalátá shot o cha Issáyá josti kort: “Taw cha kojá ay?” Issáyá passaw nadát. ¹⁰ Pilátusá gwasht: “Maná passawa na-dayay? Taw nazánay ke tai ázáti o salib kasshagay ehtiár mani dastá ent?” ¹¹ Issáyá passaw dát: “Agan Hodáyá tará é ehtiár madátén, mani sará tará hech wák o ehtiáré néstat. Bale, hamá ke tai dastá dáti, géshter mayárbár ent.” ¹² Cha ed o rand, Pilátusá áiay ázát kanagay johda kort, bale Yahudián kukkára kort: “Agan é mardá ázát bekanay, Kaysaray dózwáh naay. Harkas watá bádsháh bezánt o belékit, Kaysaray dozhmen ent.”

¹³ Wahdé Pilátusá é eshкот, Issái dhanná áwort o wat yak jáhé pa hokm kanagá nesht ke áiá “Sengparsha” gwashant, pa Árami zobáná “Jabbátá” bit. ¹⁴ Sargwazaytayáriay róchay némróchá,§ Pilátusá gón Yahudián gwasht: “Bechárét, shomay bádsháh hamedá ent!” ¹⁵ Bale áyán kukkár kort: “Gári kan! Gári kan! Salibi kassh!” Pilátusá gwasht: “Pakká shomá lóthét ke shomay bádsháhá bekoshán?” Mazanén dini peshwáyán gwasht: “Cha Kaysará abéd, márá dega bádsháhé nést.” ¹⁶ Áherá, Pilátusá Issá pawjiáni dastá dát ke áiá salibay sará bedranjant. Gorhá áyán Issá bort.

Issá o salib
(Mattá 27:32-37; Markás 15:21-26; Luká 23:32-38)

¹⁷ Issáyá salibay konth baddhá at o “Kámpól” námén jágahéá bortesh, ke

Árami zobáná “Joljotá” gwashaga bit. ¹⁸ Hamódá áesh zort o salibay sará dratk. Gón áiá dega do mardomesh ham salib kasshet, yakké rástén o domi chappén némagá. Issá, á doénáni nyámá at. ¹⁹ Pilátusay hokmá, mayárnámagé nebeshtesh ke salibay sará dran jag bebit o á nebeshtag é dhawlá at “Issá Náseri - Yahudiáni bádsháh.” ²⁰ Cha Yahudián bázénéá é mayárnámag wánt, chiá ke Issáay salib kasshagay jágah cha shahrá dur naat o pa Ebráni, Látini o Yunáni zobánán nebisag butagat. ²¹ Paméshká, Yahudiáni mazanén dini peshwáyán gón Pilátusá gwasht: “‘Yahudiáni bádsháh’ manebis, benebis ke é mardá gwashtag ‘man Yahudiáni bádsháh án.’” ²² Pilátusá gwasht: “Harché ke man nebeshtag, nebeshtagon.”

²³ Cha salib kasshagá rand, pawjián Issáay pocch zortant, chár bahrá bahr kortant o har yakkéá yak bahré zort. Bale Issáay yak dazgwápén jámagé mant, ke áiá hech cháké néstat, sarjam o yakgwáp at. ²⁴ Gorhá áyán gón wat gwasht: “Byáét eshiá naderrén, eshiay sará pála* janén, bechárén báren kay katthit?” Hamá dáb ke Hodáay Pákén Ketába gwashit, hamá dhawlá but:

*“Mani pocchesh wati
nyámá bahr kortant o
jámagay sará
pál jatesh.”†*

Pawjián ham hamé kár kort.

²⁵ Salibay nazikká Issáay mát, gón wati gohá, Kliupásay jan Maryam o Maryam Majdaliahá óshtátogat. ²⁶ Wahdé Issáyá wati mást dist ke hamá dóstén moriday Kerrá óshtátog, gón m átá gwashti: “Oo bánok! É tai chokk ent.” ²⁷ Randá gón wati moridá gwashti: “É tai mát ent.” Á moridá, cha hamá sáhatá rand Maryam wati lógá bort.

Issá sáha dant
(Mattá 27:45-50; Markás 15:33-37; Luká 23:44-46)

²⁸ Nun Issáyá dist ke sajjahén chizz sarjam butagant o paméshká ke Pákén Ketábay habar sarjam bebant, gwashti: “Tonnig án.”‡ ²⁹ Cha troshén sharábá porren kunzagé ódá ér at. Áyán yak espanjé zort o sharábén kort, dáréay sará bast o Issáay lonthán per mosht. ³⁰ Wahdé Issáyá sharáb dap jat, gwashti: “Halás but!” Randá sari jah! ér áwort o sáhi dát.

Issáyá nayzaha janant

† 19:3 19:3 Drud o drahbát, bezán salám o alayk. ‡ 19:7 19:7 Redá, bezán motábeká. § 19:14 19:14 Asligén Yunáni nebeshtánka gwashit: “shashomi sáhatay wahd”. * 19:24 19:24 Pál, láthari, bay o shartbandi. † 19:24 19:24 Zabur 22:18. ‡ 19:28 19:28 Bechár: Zabur 22:15; 69:21.

³¹ Á róch, Jomah o Sargwazay aiday tayári geragay róch at. Paméshká Yahudiání nalóthet dár kasshetagéáni jón o jasad, á mazanén Shabbatay róchá salibay sará lónján bebant. Paméshká cha Pilátusá lóthetesh á sayénáni thángán bepróshant o cha salibáni sará ér begéjant. ³² Gorchá pawji déma átkant o á doénáni pádesh prósttant ke gón Issáyá salib kasshag butagatant. ³³ Issáyá kerrá ke átkant, distesh sáhi dátag. Paméshká áiy pádesh naprósttant. ³⁴ Bale cha pawjián yakkéá, nayzahé Issáyá pahlugá jat o hamá damáná cha áiy jóná hónáp dar átk. ³⁵ Á kas ke wat é chizzáni sháhed butag, é habarána gwashit o áiy sháhedí rást ent. Á zánt ke rásténa gwashit tán shomá imán byáret. ³⁶ É kár, hamá dhawlá but tán Pákén Ketábay habar sarjam bebit ke gwashit: “Áiy hech haddhé próshaga nabit.”[§] ³⁷ Pákén Ketáb, dega yak jágahé ham gwashit: “Á hamá kasá chárant ke nayzahesh jatag.”*

Issáyá kabr o kapon

(Mattá 27:57-61; Markás 15:42-47; Luká 23:50-56)

³⁸ Randá, Issop námén mardé ke Arimátiáy shahray nendók at o cha Yahudiáni torsá chérokái Issáyá morid at, Pilátusay kerrá shot o Issáyá jónay baragay ejázati lóthet. Pilátusá ejázat dát o áiy jón bort. ³⁹ Nikudimus, hamá ke awali randá yak shapé Issáyá gendagá shotagat, átk o gón wat lahtén hór o hawáren morr o aud o karzarwáhi áwort, ke si kiluay kesásá[†] atant. ⁴⁰ Nun áyán Issáyá jón zort o Yahudiáni kabr o kaponay dód o rabédagáni redá, gón washbóen dárúan lilomén[‡] godéá patát. ⁴¹ Hamá salibay nazziká yak bágé at ke ódá nókén kabré hastat o angat kasé áiy tahá kabr nabutagat. ⁴² Yahudiáni tayáriay róch at o kabr ham hamá nazziká at, paméshká Issáyá jónesh hamódá kabr kort.

20

Háligén kabr

(Mattá 28:1-10; Markás 16:1-8; Luká 24:1-12)

¹ Haptagay awali róchá, bezán Yaksham-behay sabáhá máhallah ke angat tahár at, Maryam Majdaliah kabray sará shot o disti hamá dhók ke kabray dapá at, cha kabrá dur kanag butag. ² Á pa maydán, Shamun Petros o Issáyá hamá moriday kerrá átk ke Issáyá báz dóst at. Gwashti: “Wájahesh

cha kabrá bortag, bale nazánén kojá éresh kortag.” ³ Gorchá Petros o á dega morid ráh septant o dém pa kabrá shotant. ⁴ Har doénán maydán kort, bale á dega morid cha Petrosá gwast o cha áiy pésar kabray sará raset. ⁵ Sari jahl kort o kabray tahá cháreti. Lilomén godi distant, bale wat kabray tahá nashot. ⁶ Randá Shamun Petros raset o kabray tahá shot. Áiy ham dist ke kapon hamódá ent. ⁷ Á dazmál ke Issáyá sará bastagat kaponay kerrá naat, pétkagat o kammé durter yak kerréá ér at. ⁸ Randá, á morid ke pésará kabray sará rasetagat kabray tahá shot, disti o imáni áwort. ⁹ Chiá ke áyán, tán á wahdí Pákén Ketábay habar sarkech nawártagat ke Issá báyd ent cha mordagáni nyamá jáh bejant. ¹⁰ Gorchá á doén morid, wati lógán per tarretant.

Issá pa Maryam Majdaliahá paddara bit

(Markás 16:9-11)

¹¹ Maryam cha kabrá dhann óshtátagat o gréti. Hamá dhawlá ke gréwagá at, sari jahl kort o kabray tóká cháreti. ¹² Hamódá ke Issáyá jón ér butagat, do espétpóshén préshtagi dist, yakké sarunán neshtagat o á dega páduán. ¹³ Áyán gwashit: “Oo janén! Taw pa ché gréwagá ay?” Passawi dát: “Mani wájahesh bortag o nazánén kojá éresh kortag.” ¹⁴ Wahdé é gwashti, chakki tarrént o Issái dist hamódá óshtátagat, bale pajjáhi nayáwort. ¹⁵ Issáyá gón áiy gwashit: “Oo bánok! Chiá gréwagá ay? Kai padá garday?” Maryamá hayál kort balkén bágpán ent. Gwashti: “Oo wájah! Agan taw bortag, maná begwash kojáet eshtag ke man áiy bebarán.” ¹⁶ Issáyá passaw dát: “Oo Maryam!” Maryamá chakk tarrént o Árami zobáná gwashti: “Rab-buni!” (Bezán: Oo mani ostád.) ¹⁷ Issáyá gwashit: “Maná dast majan, chiá ke angat Petay kerrá borzád nashotagán, bale mani brátáni kerrá beraw o áyán begwash ke annun dém pa wati Petá o shomay Petá, wati Hodáyá o shomay Hodáyá borzáda rawán.” ¹⁸ Maryam Majdaliah moridáni kerrá shot o mestági dát: “Man Hodáwand dist.” Gorchá Issáyá kolawi pa áyán bort o sar kort.

Issá pa moridán paddara bit

(Luká 24:36-43)

¹⁹ Hamá Yakshambehay shapá, wahdé morid cha Yahudiáni torsá lógéay tahá mocch atant ke darwázagi kobl atant, Issá átk, áyáni nyamá óshtát o gwashti:

§ 19:36 19:36 Dargwaz 12:46. * 19:37 19:37 Zakaryá Nabiay Ketáb 12:10. † 19:39 19:39 Asligén Yunáni nebeshtánka gwashit: “sad litrá”, bezán kesás sésad gerám. ‡ 19:40 19:40 Lilom, goday tahré ke Engréziá “linen” gwashaga bit.

“Shomará sohl o émeni sar bát.”²⁰ É habaráy gwashtagá rand, wati dast o pahlugí áyaná pësh dáshtant. Wahdé moridán Hodáwand dist, báz gal o shádán butant.²¹ Issáyá padá gwasht: “Shomará sohl o émeni sar bát. Hamá dhawlá ke Petá maná ráh dátag, man shomará rawána kanán.”²² Cha é habará rand, Issáyá morid dam jatant o gwashti: “Hodáay Pákén Ruhá begerét o wati delá jágah bedayét!”²³ Agan kaséay gonáhán bebakshét, bakshaga bant, áyan ke nabakshét, bakshaga nabant.”

Issá o Tumá

²⁴ Cha dwázdahén moridán yakké, Tumá ke áesh “Járhó” náméntagat, Issáyá áyagay wahdá gón áyan gón naat.²⁵ Paméshká wahdé á dega morid gwashtagá atant: “Má Hodáwand distag,” áia gwasht: “Man tán áiyay dastán, méhání thappá magendán, tánke wati lankoká, méhání thappá o dastá áiyay pahlugá ér makanán, báwara nakanán.”

²⁶ Hasht róchá rand, wahdé morid padá yakjáh butant, Tumá ham gón at. Lógay dap band at, bale angat ham Issá gwast o áyani nyámá óshtát o gwashti: “Shomará sohl o émeni sar bát.”²⁷ Nun gón Tumáyá gwashti: “Wati lankoká edá byár, mani dastán bechár, wati dastá mani pahlugay sará ér kan o cha ed o rand béimán mabay, imándár bay.”²⁸ Tumáyá gwasht: “Oo mani Hodáwand, oo mani Hodá!”²⁹ Issáyá gwasht: “Taw paméshká imán áwort ke maná distet. Bale bahtáwar hamá ant ke maná nagendant o imána kárant.”

É Ketábay nebisagay maksad

³⁰ Issáyá wati moridáni démá, dega bázén mójezah o ajabbatén nesháni pësh dáshtag ke é Ketábá nebisag nabutagant.³¹ Bale haminchok nebisag butag tán shomá báwar kanét ke Issá, Masih ent o Hodáay Chokk, tánke imán byárét o áiyay námay sará namiránén zenday wáhong bebét.

31

Issá pa hapt moridá paddara bit

¹ Chizzé wahdá rand, Teberiahay mazangwarmay kerr o gwarán, padá Issáyá watá pa moridán paddar kort. Áiyay záher bayag é dhawlá at ke ² Shamun Petros o hamá Tumá ke “Járhó” náméntagatesh o Natnáil ke cha Jalilay métag Kánáyá at, gón Zebdiay do chokk o dega do moridá hamodá atant. ³ Shamun Petrosá gón áyan gwasht: “Man máhigiriá

rawán.” Áyan gwasht: “Má ham káén gón.” Gorhá ráh geptant o bójigá neshtant, bale á shapá chizzé nageptesh. ⁴ Sabáh ke but, Issá tayábá* óshtátagat, bale moridán pajjásh nayáwort. ⁵ Issáyá gón áyan gwasht: “Oo chokkán! Shomará máhigé chizzé gón ent?” Áyan passaw dát: “Na.” ⁶ Gwashti: “Dámá bójigay rástén némagá dawr dayét, ódá máhig gepta kanét.” Áyan anchosh kort o haminkadar máhigesh gept ke damesh dém pa bójigá kasshet nakort. ⁷ Gorhá hamá moridá ke Issáyá báz dóst at, gón Petrosá gwasht: “É Hodáwand ent!” Shamun Petros jándar at, wahdé é habari eshкот, wati pocchi gwará kortant o ápa koppi kort. ⁸ Á dega morid mán bójigá, hoshkiay némagá átkant o porrén damesh kasshakán kort, chiá ke cha tayábá sad gámá† durter naatant.

⁹ Wahdé hoshkiá sar butant, rókén jal o eshkaráni sará, máhig o kammoké nánesh dist. ¹⁰ Issáyá gón áyan gwasht: “Cha hamé máhigán kammoké byárét ke an-nun shomá geptagant.” ¹¹ Shamun Petros bójigá shot, dámé ke cha yaksad o panjáh o say mazanén máhigá porr at dém pa hoshkiá kassheti, máhigán dám ham nadertagat. ¹² Issáyá gwasht: “Byáét warag bwarét!” Cha moridán yakkéá ham tahm o joryat nakort cha Issáyá jost begipt: “Taw kay ay?” Áyan zánt ke é Hodáwand ent. ¹³ Gorhá Issá démá átk, nání zort o áyaná dáti, hamé dhawlá máhigi ham bahr kortant. ¹⁴ Cha wati zendag bayag o jáh janagá rand, é saymi bárig at ke Issá pa moridán záher but.

Issá o Petros

¹⁵ Ragbandá‡ rand, Issáyá gón Shamun Petrosá gwasht: “Oo Shamun, Yuhannáay chokk! Tai mehr pa man cha eshán géshter ent?” Petrosá gwasht: “Oo Hodáwand! Taw zánay ke tará dósta dárán.” Issáyá gwasht: “Acha, mani gwaragán bechárén.” ¹⁶ Domí randá gwashti: “Oo Shamun, Yuhannáay chokk! Bárén, maná dósta dáráy?” Petrosá gwasht: “Oo Hodáwand! Taw zánay ke maná dóst ay.” Issáyá gwasht: “Gorhá mani pasáni delgóshá bedár.” ¹⁷ Saymi bará gwashti: “Oo Shamun, Yuhannáay chokk! Bárén, maná dósta dáráy?” Paméshká ke saymi bará josti kort: “Maná dósta dáráy?” Petros molur o delranj but o gwashti: “Oo mani Hodáwand! Taw wat har chizzá zántkárter ay, taw zánay ke maná dóst ay.” Issáyá gwasht: “Mani pasán bechárén.” ¹⁸ Tará rásténa gwasán, wahdé warná atay, srén bastagat o har

* 21:4 21:4 Tayáb, bezán daryáay kerr, sáhel. † 21:8 21:8 Asligén Yunáni nebeshtánka gwasht: “dosad dast”. Yak dast ném mítar ent. ‡ 21:15 21:15 Ragband, bezán náshtá, arazband.

jáh ke lóthetet, shotay. Bale wahdé pira bay, dastán drája kanay o degaré tai sréná bandit o tará anchén jáhé bárt ke nalóthay.”¹⁹ Gón é habarán, Issáyá pa hamá marká eshárah kort ke randá Petros gón áia Hodáay námá shán o shawkat dayagi at. Gorhá gwashti: “Mani randgiriá bekan.”

²⁰ Petrosá chapp o chágerd cháret o disti hamá morid ke Issáyá báz dóst ent cha poshtá pédák ent, hamá ke shám waragay wahdá, Issáay nazziká kenzetagat o cha áia josti kortagat: “Oo Hodáwand! Á kay ent ke tará dróhit o dozhmenáni dastá dant?”²¹ Wahdé Petrosay chamm pa á moridá kapt, cha Issáyá josti kort: “Oo Hodáwand! Áiay ásar o ákebat ché bit?”

²² Issáyá gwasht: “Agan mani razá é bebit ke tán mani áyagay wahdá á bemánit, tai che káré harába bit? Taw mani randgiriá bekan.”²³ Gorhá moridáni nyámá[§] é habar tálán but ke balkén á morid hechbara namerit. Bale gapp esh ent, Issáyá nagwashtagat ke á namerit, tahná gwashtagati: “Agan mani razá é bebit ke tán mani áyagay wahdá á bemánit, tai che káré harába bit?”²⁴ É hamá morid ent ke é chizzi nebeshtagant o pa áyáni rásti o pakká bayagá gwáhia dant. Má zánén ke áiay sháhedi rást ent.

Godghi habar

²⁵ Albat, Issáyá dega bázén kár kortagat. Agan á sajjahén nebisag buténant, mani hayálá sajjahén donyáyá pa á ketábán jágah néstat.

[§] 21:23 21:23 Asligén Yunáni nebeshtánka gwasht: “brátáni nyámá”.

Kásedáni Kár Kásedáni Káray pajjár

É ketábay nebisók hamá Luká ent ke Enjili nebeshtag o wat dáktaré at. Kásedáni Káray ketáb, Issáay zendag bayag o jáh janagay sargwastay báravá áiay moridáni chamdistén gwáhiá dant. Wahdé Issá Masih, salibay sará dranjang o koshtag but, áiay moridán torset o pa wati rakkénagá chér butant. Bale Issáay markay saymi róchá, áyán Issá wati nyámá zendaká dist. Haw! Issá Masih zendag butagat. Démterá, é ketáb péscha dárít ke Pákén Ruh che paymá gón áyán hór but o áyán Urshalimá beger tán Rumá Issáay wasshén mestág pa mardomán rasént.

Kásedáni káray tahá, Issáay goddhi hokm o parmán, áiay ásmáná rawag, Urshalimá kelisáay bongéj, Yahudiah o Sámerahay damagán Hodáay kolaway sheng bayag, Issáay sará Pulosay báwramand bayag o darkawmáni nyámá Issáay kolaway rasénagay hál nebisag butagant. Cha eshán o abéd, Pulosay kár o kerd, áiay awali mestági sapar, Urshalimay diwán, Pulosay domi o saymi mestági sapar o áiay bandijáhá gwázentagén wahdán kessah ham mán ant. Luká wat ham baré baré é sát o saporán gón at. Pa mesálé, gappáni tahá chosha gwashit: “má pa Makduniahay rasagá eshtáp kort” (16:10).

Kásedáni Káray ketáb péscha dárít ke ketábay awali bahrá (1:8) átkagén é habar chón sarjam but ke gwashit: “...wahdé Pákén Ruh shomay delána nendit, shomárá was o wáka rasit o Urshalimay shahrá, Yahudiah o Sámerahay damagán, tán sarjamén donyáay goddhi marz o simsarán ham, pa man sháhedia dayét o mani wasshén mestágá rasénét.”

Hodáay Pákén Ruhay ér kapagay kaw!

¹ Oo wájah Tiupilos! Wati awali ketábay tahá, Issáay káráni bongéjá beger ² tán hamá róchá ke dém pa ásmáná barag but, har káré ke áiá kortagat o har tálimé ke áiá dátatagat, man tará sahig kort. Issáay pa wati kásediá, lahtén mardom pésará gehén kortagat o cha Hodáay Pákén Ruhay némagá hokmi dátatagant o gwashtagatanti ke áyáni kár chi ant. ³ Markay sakkiaay saggagá rand, wati

kásedáni démá záhera but o gón bázén gwáhián paddaria* kort ke cha mordagáni nyámá† zendag butag o jáhi jatag. Áiá, tán chel róchá watá kásedáni démá záhera kort o gón áyán Hodáay bádsháhiay báravá habaria kort. ⁴ Yak randé ke gón áyán hóríg neshtag o warák waragá at, hokmi dátant: “Cha Urshalimay shahrá dhann marawét, Petay‡ wádah dátatagén Pákén Ruhay wadár o entezará bebét ke shomá áiay báravá pésará ham cha man eshкотag. ⁵ Yahyáyá mardom gón ápá pákshódi dátatagant, bale Petay wádah esh ent ke lahtén róchá o rand shomá cha Hodáay Pákén Ruhá pákshódi dayaga bét.”

Issá ásmáná rawt

⁶ Wahdé morid Issáay kerrá mocch butant, cha áiá jostesh kort: “Oo Hodáwand! Bárén á wahd hamesh ent ke taw bádsháhiá padá pa Esráilá pera tarrénay?” ⁷ Passawi§ dát: “Á wahd o zamánag ke Petay dastá ant o áiá wat gishhéntagant, shomárá pa áyáni zánagá káré nést. ⁸ Bale wahdé Pákén Ruh shomay delána nendit, shomárá was o wáka rasit o Urshalimay shahrá, Yahudiah o Sámerahay damagán, tán sarjamén donyáay goddhi marz o simsarán ham, pa man sháhedia dayét o mani wasshén mestágá rasénét.” ⁹ Cha é habaráni gwashagá rand, áyán dist ke Issá ásmáná barag but o jambaré* á cha moridáni démá chér o andém kort. ¹⁰ Wahdé Issá dém pa ásmáná rawagá at, moridáni chamm ásmánay némagá sakk atant, anágat† distesh do espétposhén mard áyáni kerrá óshátatag. ¹¹ Áyán gwasht: “Oo Jalili wájahán! Shomá chiá edá óshátatag o ásmánay némagá chárágá ét? Issá cha shomay nyámá chest kanag o ásmáná barag butag, bale anosh ke shomá rawagá distag, hamé dhawlá yak róché padá cha ásmáná pera tarrít o kayt.”

Yahudáay jágahay porr kanag

¹² Gorhá Issáay morid, cha Zaytunay kóhá per tarret o Urshalimá átkant. É kóh, cha Urshalimá yak Shabbati róchéay duriá‡ ent. ¹³ Wahdé shahrá rasetant, hamá borzádi báná§ shotant ke pésará hamódá butagatant. É mocchiaay mardománi nám esh atant: Petros, Yuhanná, Ákub, Andriás, Pilipos, Tumá, Bartulumá,

* **1:3** 1:3 Paddar, bezán záher; áshkár. † **1:3** 1:3 Nyámá, bezán myáná, darnyámá, tahá, tóká. ‡ **1:4** 1:4 Pet hamá labz ent ke Issá Masihá pa Hodáyá kár bastag, bale jesmáni dhawl o dróshomá na. Hodá may sajjahénáni ásmáni Pet ent. § **1:7** 1:7 Passaw, bezán jwáb. * **1:9** 1:9 Jambar, bezán abr. † **1:10** 1:10 Anágat, bezán yak anágat, achának, nágahán. ‡ **1:12** 1:12 Shabbati róch hamá Shambéhi róch ent. Shambéhay róchá, durén ráhéá rawag rawá naat, tahná kesás yak kilumitar rawá at. § **1:13** 1:13 Bán, bezán kóthi, kamrá, otág.

2

Mattá, Halpiay chokk Ákub, sarmachárén Shamun* o Ákubay chokk Yahudá. ¹⁴ Gón áyán Issáay brát, áiy mát Maryam o dega lahtén janén ham gón at. Á sajjahén hamdel o hamsetk o har wahdá gón zegr o dwáyá delgósh o dazgath atant.

¹⁵ Hamá róchán yak róché, Petros Issáay báwarmandáni nyámá,† ke kesás yaksad o bist mardom atant, pád átk o ¹⁶ gwashti: “Oo brátán! Hodáay Pákén Ketábay tahá, harché ke Pákén Ruhá Issáay dazgir kanókáni rahshón, Yahudáay bárawá cha Dáuday zobáná pëshgói kortagat, allamá purah o sarjam bayagi at. ¹⁷ Yahudá cha may romb o thóliá at o é hezmatkária sharikdár at.” ¹⁸ Áiá cha wati gandahén káray mozzay zarrán dhagaré pa bahá gept o hamódá dém pa chér kapt o lápi trakket o róti dar átkant. ¹⁹ Urshalimay sajjahén mardomán é hál eshkot o áyán, é dhagáray nám wati zobáná “Hakeldámá” bezán “Hónay dhagár” per bast.

²⁰ Petrosá habar kanáná gwasht: “Zaburay ketábá nebeshtah ent:

‘áiy lóg o jágah haráb o wayrán bát,

ódá hechkas jahmenend[§] mabát.*[§]*

*‘áiy ogdah o zemmahwári degaréa berasát.**

²¹⁻²² Paméshká báyard ent anchén mardomé gechén kanag bebit ke Hodáwandén Issáay áyag o rawagay sajjahén wahdá gón má gón butag, bezán cha Yahyáay dastá Issáay pákshódiá beger, tán hamá róchá ke á cha may nyámá chest kanag but. Á báyard ent gón má horigá, Issáay jáh janagay† gwáhiá bedant.”

²³ Gorchá do kasay námesh pësh kort, yakké Issop Barsábá at ke Yustus ham gwashtesh o á dega Mattiás at. ²⁴ Randá, é dhawlá dwá kort o gwashtesh: “Oo Hodáwand! Taw harkasay delay hálá zánay, nun wat pa má paddar kan ke cha é doénán kojámiet gechén kortag ²⁵ tán é hásén kásediay zemmahwária wati kópágán bezurit, hamá hezmat ke Yahudáay yalah dát o hamódá shot ke áiy béhi jágah at.” ²⁶ Gorchá, á doénáni sará pál‡ jatesh o Mattiásay nám dar átk. É dhawlá, á gón hamá rombay yázdahén hásén kásedán hór kanag but.

Hodáay Pákén Ruhay ér kapag

¹ Wahdé Pentikástay* róch átk, sajjahén yakjáh mocch atant. ² Anágat cha ásmáná yak anchén tawaré átk ke gwashay trondén gwaté at o hamá lóg ke á ódá neshtagatant gwátá mán patát. ³ Áyán bázén áspaymén shahm o shamálah dist ke zobánok dayán har yakkéay sará ér neshtant. ⁴ Á sajjahén, cha Hodáay Ruhá porr butant o anchosh ke Pákén Ruh áyán wák o twán bakshagá at, dhanni zobánán habar kanagá laggetant.

⁵ Á róchán, ásmánay chérá har molk o har kawmay Hodádóstén Yahudi, Urshalimá jahmenend atant. ⁶ Wahdé é tawár chest but, bázén mardomé yakjáh mocch but o hayrán o habakkah mant, chiá ke harkas cha moridáni dapá wati jenday zobáná eshkonagá at. ⁷ Gorchá, pa bah mánagi† o hayráni gwashtesh: “Bárén, é ke habar kanagá ant Jalili naant? ⁸ Gorchá che paymá má sajjahén, cha áyáni dapá wati máti zobáná eshkonagá én!?” ⁹ Má, cha Párs, Mád o Ilám, cha Baynolnahrayn, Yahudiah, Kápádukiyah, Pontus o Ásiáyá,‡ ¹⁰ cha Prijiah, Pampilih o Mesrá én, cha Libiáyay hamá hand o damagán ke Keriniay nazziká ant o anchosh cha Rumá átkagén mardom én, ¹¹ Yahudi o darkawmén§ Yahudi butagén mardom, Kriti o Arab ham. Má sajjahén eshkonagá én ke may zobáná, Hodáay mazanén kárán darshána kanant.” ¹² Gorchá pa hayráni cha yakdomiá jostesh kort: “É kár o habaráni máná chi ent?” ¹³ Bale lahtén pa malandh o maskará gwashagá at: “Sharábá mast o malár kortagant.”

Petros mocchiay démá trána kant

¹⁴ Á wahdi, Petros gón á dega yázdahénán pád átk o pa borztawári gón áyán gwashti: “Oo Yahudián o Urshalimay jahmenendán! Sarpad bebét o mani habarán delgósh kanét. ¹⁵ É mardom, á dhawlá ke shomá hayála kanét, mast naant. Angat sáhat sabáhay noh* ent. ¹⁶ É hamá hál o habar ent ke Yuil nabíá é dhawlá pëshgói kortag.

* **1:13** 1:13 Bázéné gomána kanant ke sarmacháray máná esh ent: Shamun Yahudiáni yak dini syási párthiéay bask butag ke Rumiáni démá óshátatag. † **1:15** 1:15 Asligén Yunáni nebeshtánka gwasht: “brátáni nyámá.” “Brátay” máná har báwarmand ent, mardén o janén. ‡ **1:20** 1:20 Jahmenend, bezán jágahéay neshtagén mardom, sáken, ábád. § **1:20** 1:20 Zabur 69:25. * **1:20** 1:20 Zabur 109:8. † **1:21-22** 1:21-22 Jáh janag, bezán cha wati jáhá anáगतén pád áyag, Arabi o Pársiá “qiám, rastákhiz”. ‡ **1:26** 1:26 Pál, bezán láthari, bay o shartbandi. * **2:1** 2:1 Pentikást, bezán rón o móshay aid. † **2:7** 2:7 Bah mánag, bezán sakk hayrán bayag, boh bayag. ‡ **2:9** 2:9 Á wahdá, Ásiáyay máná annugén Torkiahay rónendi némag at. § **2:11** 2:11 Darkawm, bezán á ke Yahudi naant. * **2:15** 2:15 Asligén Yunáni nebeshtánka gwasht: “Róchay saymi sáhat”. Yahudiáni róchay hesáb, sáhat sohbay shashá bongéja but.

17 *Hodá gwasht: "Goddhi róchán sajjahén mardomán cha wati Ruhá sarrécha kanán. Shomay jenek o bachak paygambaria kanant, shomay warná elháma gerant o pirén, wába gendant.*

18 *Á róchán, wati golám o móledán cha wati Ruhá sarrécha kanán o á ham paygambaria kanant.*

19 *Borzád mán ásmáná mójezah o ajekkái'o jahlád mán zeminá ajabbatén nesháni pésha dárán, hón o ás o mojén dutt.*

20 *Cha Hodáwanday porshawkatén róchay rasagá pésar, róch tahárdém o máh hónchaka bit.*

21 *Á róchá, harkas Hodáwanday námá begipt, rakkít."* †

22 "Oo Esráilián! Delgósh kanét. Anchosh ke shomá wata zánét, Hodáyá shomay nyámá mójezah o ajekkái o ajabbatén nesháni cha Issá Náseriay némagá záher o paddar kort o é dhawlá pa áia gwáhi dáti. 23 É mard gón Hodáay péshzánti o gishshéntagén shawrá shomay dastá dayag but o shomá gón bédináni komaká salibay sará dratk o kosht. 24 Bale Hodáyá cha mordagán zendag kort o cha markay ranj o azábá rakként, Š chiá ke nabuteni at mark áia wati panjagáni tahá bedárit, 25 hamá dába ke Dáudá áiy bárawá péshgói kortag o gwashtag; 'Man modám Hodáwand wati dém pa demá distag, á mani rástén pahnátá ent, cha hamé sawabá mana nalarzán o nathagalán.

26 *Paméshká, delon wassh o zobán shádán ent. Jesm o jánon mán ométay kalátá áráma gipt,*

27 *chiá ke taw maná mordagáni jaháná yalaha nakanay o wati hamá Pákéná sarhag o pussagá naylay.*

28 *Taw maná zenday ráh sój dátagant o wati pahnátá maná cha shádmániá sarrécha kanay.**

29 "Oo brátán! Man pa deljami shomárá gwashán ke may bonpirok Dáud mort, kabr o kapon but o áiy kabr tán maróchi may gwará hastent. 30 Bale á paygambaré at o zántagati Hodáyá sawgend wártag o kawl kortag ke cha áiy naslá yakkéá, áiy bádsháhiy tahtay sará nádénit. 31 Dáudá cha péshá, áyóké nesháni róch distagatant o Masihay jáh janagay

bárawá gwashtagati ke á na mordagáni jaháná yalah kanaga bit o na áiy jóna sarhit o pussit.† 32 Hodáyá Issá Masih zendag kort o má sajjahén é rástiy sháhed én. 33 Á, Hodáay rástén némagá borzád barag but. Cha Petá, wádah dátagén Pákén Ruh áia raset o hamá dhawlá ke shomá gendag o eshkonagá ét, nun Pákén Ruhi békesás‡ bakshetag. 34 Chiá ke Dáud wati ásmáná borzád nashot, bale gwashtagi: 'Hodáwandá gón mani HodáwandáŠgwasht, "mani rástén némagá benend 35 tán hamá wahdá ke tai dozhmenán tai pádáni chéray padag o chárchóbahé bekanán." *'

36 "Paméshká, Esráilay sajjahén kawm allam bezánt, hamá Issá ke shomá salib kasshet, Hodáyá Hodáwand o Masih kortag." 37 Wahdé mardomán é habar eshkontant, báz del padard butant o gón Petros o á dega kásedán gwashtesh: "Oo brátán! Má chón bekanén?"

38 Petrosá gón áyán gwasht: "Cha wati gonáhán pashómán bebét† o cha shomá harkas Issá Masihay námá pákshódi bekant, tán Hodá shomay gonáhán bebakshít. Á wahdá shomará Hodáay Pákén Ruh, tohpah o thékia rasit. 39 Hodáwanday é labz o kawl éwak o tahná pa shomá naent, pa shomay chokk o óbádag o á dega durén hand o damagáni hamá mardomán ent ham, ke may Hodáwandén Hodá áyán wati Kerrá tawára kant."‡

40 Petrosá, á, pant o sój dayáná kaddhanŠ kort o gwashtant: "Watá cha é gomráhén nasl o padréchá berakkénét."

41 Gorhá, hamáyan ke áiy kolaw o paygám zort, pákshódi ham kort o á róchá, kesás say hazár mardom gón báwarmandán hór but. 42 Áyán, pa kásedáni dars o sabaká, pa sharikdárén

zendá, pa nánay bahr kanag* o pa dwáyá, watá nadr kort. 43 Sajjahénáni delá bimm o torsé nesht o cha kásedán mójezah o ajabbatén nesháni záher o paddara but.

Báwarmandáni sharikdárén zend

44 Sajjahén báwarmand, gón yakdegará hór o sajjahén mál o hastiá sharikdár atant. 45 Áyán wati mál o melkat bahá o nadra kort o harkasay garaz o zaluratáni sará, sajjahénáni nyámá bahra kortant. 46 Á, har róch gón hamdeli, mazanén

† 2:19 2:19 Ajekkái, bezán mójezah, hayrán kanóké nesháni kár.

‡ 2:21 2:21 Yuil Nabiay Ketáb, bahr 2, band 28-32.

§ 2:24 2:24 Rakkénag, bezán neját dayag, bacché nag.

* 2:28 2:28 Zabur 16:8-11. † 2:31 2:31 Zabur 16:10.

‡ 2:33 2:33 Békesás, bezán sakk báz, béandázah, béhesáb.

§ 2:34 2:34 "Mani Hodáwand" bezán Issá Masih.

* 2:35 2:35 Zabur 110:1. † 2:38 2:38 Pashómán bayag, bezán tawbah kanag. ‡ 2:39 2:39 Albat, báyard bezánén

Hodá sajjahén mardomán wati Kerrá lóthit. § 2:40 2:40 Kaddhan, bezán mohrén tákid, hokm. * 2:42 2:42 Pa

Issáy goddhi shámáy yátmáná, áiy báwarmand nán o sharáb bahra kanant.

parasteshgáhá moccha butant o wati lógan ham pa wasshi o delsetki nánesh bahra kort o hórígá warákesha wárt. ⁴⁷ Hodáesh satá o saná kort o sajjahén mahluká á dóst atant. Hodáwand ham róch pa róch rakkéntagén mardomán géshá cha géshter kanán at.

3

Petros drahbakshia kant*

¹ Yak róché, nohomi sáhatay† zegr o dwáay wahdá, Petros o Yuhanná mazanén parasteshgáhá rawagá atant. ² Hamá wahdá, lahtén mardom yak pédaeshi langéá‡ arágá at. Mardomán é lang har róch, mazanén parasteshgáhay “Zébá” námén darwázagay dapá wápént tán cha parasteshgáhay rawókén mardomán pendhagé begipt. ³ Wahdé áia Petros o Yuhanná parasteshgáhay rawagá disant, cha áyán pendhagi lóthet. ⁴ Petros o Yuhannáya wati chamm áiará sakk dátant. Petrosá gwasht: “May némagá bechár.” ⁵ Langén marday chamm pa é ométá sakk atant ke chizzé dayanti. ⁶ Gorhá Petrosá gwasht: “Maná zarr o sohr nést bale harché ke maná hast, tará dayán. Issá Masih Náseriay námá, pád á, ráh ger.” ⁷ Nun áiy rástén dasti gept o óshtarénti. Hamá damáná áiy pád o pádáni mocch, tayár o zórmand butant. ⁸ Jáh serret o wati pádáni sará óshatá, ráh gept o traddán o kopp kanán o Hodáyá sepat o saná kanána, gón áyán parasteshgáhá shot. ⁹ Sajjahén mardomán á dist ke Hodáyá sepat o saná kanána, wati pádáni sará rawagá ent. ¹⁰ Zántesh é hamá ent ke pésará, parasteshgáhay “Zébá” námén darwázagay dapá pa pendhagá neshtagat. Nun cha é kára ke gón áia butagat mardom hayrán o habakkah mantant.

Petrosay kolaw

¹¹ Á mard cha Petros o Yuhannáya hecch jetá nabut. Nun sajjahén mardom Solaymánay peshjáhá, § gón hayrán tachán dém pa áyán átkant. ¹² Petrosá ke chosh dist, gón áyán gwashti: “Oo Esráilián! Cha é kára, pa ché inkadar hayrán o habakkah mantagét? Chiá chammó pa má sakk ant? Gwashay záná, má gón wati jenday twán o pahrézkáriá é mard dráh o tayár kortag. ¹³ Ebráhém, Eshák o Ákubay Hodá, bezán may pet o pirokání Hodáyá, wati hezmatkárén Issá shán o shawkat dát, hamá ke shomá geráent o kósharént o

Pilátusay démá á namannet, harchont ke Pilátusá áiy ázát kanagay shawr kortagat. ¹⁴ Bale shomá á ‘Pák o Nékén’ namannet o áiy jáhá pa yak hónigéá ázátí lóthet. ¹⁵ Shomá zendmánay sarchammag kosht, bale Hodáyá á cha mordagáni nyámá zendag kort o jáh janáent o má eshiay sháhed én. ¹⁶ É mardá gendagá ét o zánét. Cha Issáay námay saray báwarmandiá, áia wák o twán rasetag. Haw! Issáay nám o áiy sará báwarmandiá, é mard shomay démá sarjamá dráh kortag.

¹⁷ “Nun, oo brátán! Mana zánán ke shomayg o shomay kamasháni kár o kerd, cha názántiá at. ¹⁸ Bale Hodáyá harché ke cha sajjahén nabiáni zobáná peshgói kortagat é dhawlá purah o sarjam kort. Á peshgói esh ent ke áiy Masih, ranja kasshit. ¹⁹ Nun cha wati gonáhán pashómán bebét o dém pa Hodáyá wátarr bekanét* tán shomay gonáh o mayár shódag bebant, ²⁰ cha Hodáwanday némagá shomará gég o ásudagén wahd o róch berasit o Hodá, Masih bezán Issáyá, ke pa shomá gechén kanag butag, rawán bekant. ²¹ Á báyd ent ásmáná bemánit tán hamá wahdá ke har chizz nóksará wati jáhá per betarrit, hamá dhawlá ke Hodáyá cha kwahnén zamánagán pákén nabiáni zobáná gwashtag. ²² Mussáyá gwashtag: ‘Shomay Hodáwandén Hodá, cha shomay brátáni nyámá pa shomá mani dhawlén paygambaré gechéna kant, báyd ent shomá áiy sajjahén habarán bemannét. ²³ Kasé ke é paygambaray habaráni sará delgósh makant, cha kawmá sendag o dar kanaga bit.’†

²⁴ “Cha Samuila o rand, sajjahén nabián é rócháni bárawá peshgói kortag. ²⁵ Shomá nabiáni poshtpad o hamá ahd o kawlay mirás barók ét ke Hodáyá gón shomay pet o pirokán kortagat, wahdé gón Ebráhémá gwashti: ‘Zeminay sajjahén kawm o kabilah cha tai nasl o poshtpadá barkata gerant.’‡ ²⁶ Hodáyá wati hezmatkár gechén kort o pésará shomay gwará rawán dát tán shomará barkat bedant o har yakkéá cha áiy haráb o gandahén ráhá per betarrénit.”

4

Petros o Yuhanná sarókáni diwánay démá

¹ Petros o Yuhanná angat gón mardomán habar kanagá atant ke dini peshwá,

* 3: 3:0 Drahbakshi, bezán dráhi o salámatiy bakshag, Arabi o Pársiá “shafá”. † 3:1 3:1 Bezán bégáhay sáhat sayá. ‡ 3:2 3:2 Pédaeshi lang, bezán mádarzadén lang. § 3:11 3:11 Peshjáh, bezán peshgáh, lógay chárdiwál, sahn. * 3:19 3:19 Wátarr kanag, bezán per tarrag. † 3:23 3:23 Sharyatay Domi Rahband, bahr 18, band 15, 18, 19. ‡ 3:25 3:25 Pédaesh, bahr 12, band 3.

mazanén parasteshgáhay negahpánén sepáhigáni master o Saduki* ódá átk o rasetant. ² Á, cha é habará sakk nárázá atant ke kásedán mardom dars o sabaka dát o járesha jat ke “cha Issáay nám o ráhá mordag padá zendaga bant.” ³ Petros o Yuhannáesh geptant, béwahd o bégáh at, paméshká tán é dega róchá bandigesh kortant. ⁴ Bale bázéné ke áyáni kolaw o paygámesh eshкотagat báwarmand but o cha áyán kesás panch hazár mardén atant.

⁵ É dega róchá, Yahudiáni master, kamásh o Sharyatay zánóger† Urshalimá mocch butant. ⁶ Gón áyán masterén dini pëshwá Hanná o áiy hamráhiá Kiápá, Yuhanná, Eskandar o masterén dini pëshwáay sajjahén kothom o hándán gón atant. ⁷ Áyán Petros o Yuhanná ósh tárént o jost geptant: “Shomá gón kojám zór o wáká yá gón kai námá é kár kortag?” ⁸ Gorrhá Petros cha Hodáay Pákén Ruhá sarréché but o gwashti: “Oo kawmay sarók o kamáshán! ⁹ Agan maróchi é sawabá cha má jost o pors bayagá ent ke má pa lang o mondhnén mardéá néki kortag o josta kanét ke á chón dráh butag, ¹⁰ gorrhá shomá sajjahén o Esráilay drostígén kawm bezánét, é mard ke dráh o tayár shomay démá ósh tátag, cha Issá Masih Náseriay námay barkatá dráh butag. Shomá Issá salib kasshet o kosht, bale Hodáay cha mordagáni nyámá zendag kort. ¹¹ Issá

hamá seng ent ke shomá, bánbandén ostáyán, †pasond nakort o chagal dát,

*bale á seng, bonhesht †but.**

¹² Cha áiyá abéd† dega rakkénóké nést, chiá ke ásmánay chérá, Issáay námá abéd, mardomán dega námé dayag nabutag ke gón áiyá má rakkét bekanén.”

¹³ Áyán ke Petros o Yuhannáay deléri o bahádorri dist o zántesh ke á návánenadah o ámién mardom ant, hayrán butant. Randá pajjáhesh áwortant, ke á Issáay hamráh butagant. ¹⁴ Bale pa é sawabá ke á dráh butagén mard áyáni kerrá ósh tátagat, chízzé gwashtesh nakort. ¹⁵ Paméshká áesh cha hakdiwáná‡ dhann rawagay hokm dát o wat pa shawr o saláhá neshtant. ¹⁶ Watmánwatá gwashtesh: “Gón é mardomán ché bekanén? Chiá ke Urshalimay sajjahén jahmenenda zánant esháni dastá yak anchén mójezahé záher

butag ke namannaga nabit. ¹⁷ Bale chosh ham mabit ke é habar mardománi nyámá géshter sheng o tálán bebit. Báyard ent áyán betorsénén ke dega baré pa Issáay námá gón hechkasá habar makanant.”

¹⁸ Petros o Yuhannáesh padá lóhter o hokm dátant ke hechbar Issáay námá chízzé magwashant o dars o sabak madayant. ¹⁹ Áyán passaw dát: “Wat shawr bekanét, shomay habaray zurag sharter ent yá Hodáay? ²⁰ Bale má cha wati distagén o eshкотagénáni paddar o darshán kanagá watá dáshta nakanén.” ²¹ Gorrhá cha géshterén torsénag o pátráp. § dayagá rand, áesh yalah dátant. Pa áyáni sezá dayagá sharrén ráhé nadistesh, chiá ke gón é ajabbatén káray gendagá sajjahén mardomán Hodá satá kort o sárhát.* ²² Á mard ke gón é mójezahá dráh butagat, omri chel sálá gésht at.

Báwarmandáni dwá

²³ Ázát bayagá rand, Petros o Yuhanná wati hamráháni kerrá shotant o áesh cha mazanén dini pëshwá o kawmay kamásháni gwashtagén habarán sahgel kortant. ²⁴ Áyán ke eshкот, yakdel o hamtawár Hodáay bárgáhá dwá kort o gwashtesh: “Oo zórakén Hodáwand, ásmán o zemin o daryáay adhd kanók o har chízzé ke áyáni tahá ent! ²⁵ Taw wat gón Pákén Ruhay elháma cha may bonpirok, wati hezmatkárén Dáuday zobáná gwasht:

‘Á dega kawm pa ché shóresha kanant o ráj chiá mopt o náhudagén pandalá† sázant?’

²⁶ *Jahánay bádsháh tayára bant o hákem yakjáh mocch, Hodáwand o áiy Masihay helápá ósh tant.’ ‡*

²⁷ “Pa rásti, hamé shahrá Hirudis, Pontius Pilátus, á dega darkawmén mardom o Bani Esráilay sajjahén kawm o kabilah hamdast butant o tai pákén hezmatkár Issáay helápá pád átkant, hamá Issá ke taw gón rógen per moshagá pa bádsháhiá gechént kortagat. ²⁸ Áyán gón wati é kárá, tai wák o wáhag ke taw cha pëshá gisshéntagat, purah o sarjam kort. ²⁹ Oo Hodáwand! Nun esháni pátrápáni némagá bechár o wati hezmatkárén komak bekan tánke tai habarán pa mazanén bahádorri o natorsi darshán bekanant. ³⁰ Wati pákén hezmatkár Issáay námá, pa drahbakshi o mójezah o ajabbatén

* **4:1** 4:1 Saduki, cha Yahudiáni dini sarókán yak thólié at. † **4:5** 4:5 Sharyatay zánóger, bezán dini álem o Mussáay Sharyatay zántkár. ‡ **4:11** 4:11 Bánbandén ostá hamá ent ke lógay bandagá zántkár ent. § **4:11** 4:11 Bonhesht, bezán lógay awali hesht yá seng. * **4:11** 4:11 Zabur 118:22. † **4:12** 4:12 Abéd cha, bezán gayr cha. ‡ **4:15** 4:15 Hakdiwán, bezán ámidges, dádgáh. § **4:21** 4:21 Pátráp, bezán tahdid, damki. * **4:21** 4:21 Sárháyag, bezán satá kanag. † **4:25** 4:25 Pandal, bezán repk, mandr, makr. ‡ **4:26** 4:26 Zabur 2:1-2.

neshániáni paddar kanagá, wati dastá shahár day.”

³¹ Cha áyáni dwáyá rand, á jágah ke ódá mocch atant larzet, sajjahén cha Pákén Ruhá sarréché butant o Hodáay habaresh pa deléri darshán kort.

Báwarmandáni sharikdári

³² Sajjahén báwarmand yakdel o yakján atant, hechkasá wati mál o hasti tahná watiga nazánt o sajjahén chizzán sharikdár atant. ³³ Kásedán gón mazanén wák o tágaté pa Hodáwandén Issáay jáh janagá gwáhia dát o gón á sajjahénán Hodáay mazanén rahmat gón at. ³⁴ Cha áyán hechkas mohtáj naat, chiá ke harkasá lóg yá dthagaré hastat baháia kort o ³⁵ zarri kásedáni demá éra kortant. Áyán é zarr pa sajjahénán, harkasay garaz o zaluratáni sará bahra kortant. ³⁶⁻³⁷ Issop námén mardéá ham dthagaré hastat, bahái kort, zarri áwort o kásedáná dátant. Á Kebresié at o cha Láwiáni kabilahá at. Kásedán áiy nám Bárnábá kortagat, bezán “delbaddhiay[§] chokk”.

5

Hannániá o Sapirah

¹ Hannániá námén mardéá o áiy Sapirah námén janá ham wati dthagaré bahá kort. ² Hannániáyá gón janay sahigiá zarráni yak bahré pa wat dásht o á dega, kásedáni demá ér kortant. ³ Petrosá gwasht: “Oo Hannániá! Chiá Shaytán tai delá chó potert ke gón Hodáay Pákén Ruhá dróget bast o cha melkay zarrán bahré pa wat ér kort?” ⁴ Záná, dthagár cha baháyá pésar tai jenday naat? Cha baháyá rand, zarr tai dastá naatant? Pa ché wati delá shawret kort ke chosh bekanay? Taw gón mardomán na, gón Hodáyá dróg bast.” ⁵ Wahdé Hannániáyá é habar eshкотant, zeminá kapt o sáhi dát. Harkasá ke é habar eshкот, áiy delá baláhén torsé nesht. ⁶ Gorrhá warná demá átkant, jónay kapon kanagá rand, dhanná bort o kabresh kort.

⁷ Kamm o gesh say sáhatá rand, áiy jan ke cha é sargwastá sahig naat, átk o raset. ⁸ Petrosá cha áia jost kort: “Maná begwash, shomá dthagár ke bahá kort, eshiay kimmat hamesh at?” Sapirahá passaw dát: “Haw, kimmati hamesh at.”

⁹ Petrosá gwasht: “Chiá pa Hodáwanday Ruhay chakkásagá* gón yakdegará hamdast butét? Bechár, hamáyán ke tai mard kabr kort annun darwázagay dapá ant o tará ham dhanná barant.” ¹⁰ Janén, hamá

damáná Petrosay pádáni demá kapt o sáhi dát. Wahdé warná átkant, distesh ke á ham mortag. Dhanná bortesh o marday Kerrá kabresh kort. ¹¹ Cha é habaráni eshkonagá, sajjahén báwarmand† o á dega mardománi nyámá mazanén tors o bimmé kapt.

Kásed drahbakshia kanant

¹² Cha kásedáni dastá, mardománi nyámá bázén ajabbatén nesháni o ajekkái záher o paddara but. Sajjahén báwarmand, gón hamdeli o hamsetki Solaymánay peshjáhá moccha butant. ¹³ Báwarmand, mardománi gwará báz ezzatmand atant, bale cha á degarán kaséá é del o joryat néstat ke gón áyán hór bebit. ¹⁴ Angat, Hodáwanday sará báwarmandén janén o mardén, róch pa róch gesh bayán atant o gón áyán hawára butant. ¹⁵ Tantaná‡ mardomán wati nádráh, taht o nepádáni sará wápént o rahsarána áwortant, tán Petros cha ráhá ke gwazit, toré áiy sáheg ham pa lahténá bekapit. ¹⁶ Urshalimay Kerr o gwaray shahráni mardom ham romb rombá átkant, nádráh o cha palitén ruhán ranj distagén mardomesha áwortant o sajjahén dráha butant.

Kásedán jéla kanant

¹⁷ Masterén dini peshwá o áiy sajjahén hamráh ke Sadukiáni thóliay básk atant, pa hasadd o konnat pád átkant. ¹⁸ Kásedesh gept o bandijáhá jél kortant. ¹⁹ Bale shapá yak wahdé, Hodáwanday preshtagéá bandijáhay darwázag pach kortant o á cha jéla dar áwortant o gwashti: ²⁰ “Berawét mazanén parasteshgáhá bóshtét o é nóken zenday sarjamén kolaw o paygámá mardomán berasénét.” ²¹ Gorrhá, hamá dábá ke áyáná gwashag butagat, bángwáhá parasteshgáhá shotant o mardománi sabak dayagá laggetant. Wahdé masterén dini peshwá o áiy hamráh átkant, sarókáni diwánay básk o Esráilay sajjahén kamáshesh lóthetant o dega lahtén mardomesh rawán dát tán kásedán cha jéla byárant. ²² Bale áyáni rah dátagén mardom bandijáhá ke shotant, kásedesh nadistant. Per tarret o hálesh dátant ke ²³ “bandijáhay darwázag mohr bastagatant, negahpán ham darwázagáni demá óshtátagatant, bale má darwázag ke pach kortant, jéla hechkas nadist.” ²⁴ Gón é habaray eshkonagá, parasteshgáhay negahpánén sepáhigáni sarók o mazanén dini peshwá

§ 4:36-37 4:36-37 Delbaddhi, bezán tasallá, ométwári. gerag. † 5:11 5:11 Asligén Yunáni nebeshtánka gwasht: “sajjahén kelisá”. ‡ 5:15 5:15 Tantaná, bezán hattá, tán é haddá ke.

* 5:9 5:9 Chakkásag, bezán ázmáesh kanag, emteháan

sakk hayrán o pegrig butant ke bárén é káray ásar o ákebat nun ché bit.

²⁵ Hamá wahdá yakké átk o háli dátant: “Bechárét, á ke shomá bandig kortagatant, parasteshgáhá mardomán dars o sabak dayagá ant.” ²⁶ Gorhá parasteshgáhay negahpánáni sarók gón wati sepáhigán shot o kásedesh gept o áwortant, bale pa zór na, chiá ke torsetesh “chó mabit mardom márá sengsár bekanant.” ²⁷ Kásedesh áwort o sarókáni diwánay démá óstáréntant. Nun masterén dini pëshwáyá cha áyán jost gept: ²⁸ “Má hokm nakortagat dega baré pa é námá mardomán dars o sabak madayét? Bale shomá Urshalimay sarjamén shahr gón wati tálimán porr kortag. Lóthét á marday hóná may gádená beladdhét?” ²⁹ Petros o á dega kásedán passaw dát: “Báyad ent cha ensánán géshter, Hodáay mannók bebén.” ³⁰ Issá, ke shomá salib kasshet o kosht, may pet o pirokáni Hodáyá padá zendag kort, ³¹ wati rástén némagá nádént o sarók o rakkénók kort, tánke Esráilay kawmá pashómáni o gonáháni pahelliay móh berasit. ³² Má é habaráni sháhéd én. Pákén Ruh, ke Hodáyá wati báwarmandáná bakshettag ham é habaráni gwáhiá dant.

³³ Gón é habaráni eshkonagá, diwánay básk anchosh zahr geptant ke pa áyáni koshagá pád átkant. ³⁴ Bale Gámályál námén Parisié ke Sharyatay ostád o sarókáni diwánay básk o sajjahén mardománi chammán sharapdären mardé at, diwáná pád átk o hokmi kort: “É mardán yak damané dhanná bebarét.” ³⁵ Gorhá gwashti: “Oo Esráilián! Hozzhár bét ke shomárá gón é mardomán ché kanagi ent. ³⁶ Kammé wahdá pésar ham Tiudás námén mardéá jáh jat o watá mazanmardé zánti, chársadé mardom áiyay hamráh but. Bale á koshag but o áiyay hamráh sest o séd[§] butant o hecch nabut. ³⁷ Cha áiy rand, Yahudá námén Jalili mardéá, mardomshomáriay róchán jáh jat, áshóp kort o lahtén mardomi gón wat tarrént, bale á ham koshag but o hamráhi sheng o sháng butant. ³⁸ Annugén jáwaráni bárawá, mani shawr gón shomá hamesh ent ke cha é mardomán dast bekasshét o eshán yalah bedayét. Chiá ke agan esháni é kár o maksad cha ensánáni némagá ent, béshakk pa sara narasit. ³⁹ Bale agan cha Hodáay némagá ent, shomá eshán dáshta nakanét. Gorhá bezánét ke á wahdá shomay jang gón Hodáyá bit.”

[§] 5:36 5:36 Sest o séd, bezán sheng o sháng, tak o park. dód o rabédagay randgir atant o áyáni zobán Yunáni at. “wazífah”. † 6:9 6:9 Yahudiáni parasteshgáháni nám

Áiyay habaresh mannet, ⁴⁰ kásedesh lóthet o áwortant, latth o kotht kanáént o makan kortant ke pa Issáay námá dega baré habar makanant. Nun yalahesh dátant. ⁴¹ Káséd, gal o shádehi kanán, cha diwánay démá dar kaptant, chiá ke áyán é láheki rasetagat pa Issáay námá béezzati begendant. ⁴² Áyán mazanén parasteshgáh o lógáni tahá, cha é mestágay tálán kanagá ke Issá hamá Masih ent, hechbar dasta nakasshet.

6

Pa hezmatkáriá hapt mardomay gechén kanag

¹ Hamá róchán ke morid géschá cha géshter bayán atant, Yunáni Yahudi* cha Ebráni Yahudián gelagdár atant ke har róchigén ward o warákay bahr kanagá, áyáni janózámán chizzé narasit. ² Dwázdahén kásedán, sajjahén morid lóthetant o gwashtesh: “É habar sharr naent ke má ward o warákay wandh o bahr kanagay káráni sawabá, cha Hodáay Pákén Habaray hezmatkáriá nádelgósh bebén. ³ Paméshká, oo brátán! Cha wat hapt anchén néknámén mardom gechén bekanét ke cha Pákén Ruh o Hodái zánt o zánagá sarréché bebant tán é zemmah o dhobbahá† hamáyáni kópagá beladdhén o ⁴ wat pa dwá o Hodáay Pákén Habaray hezmatkáriá dazgath bebén.” ⁵ É shawr, sajjahénén dóst but o é mardomesh gechén kortant: Estipán ke cha imán o Pákén Ruhá porr at, Pilipos, Prukuros, Nikánur, Timun, Párminás o Antákiahay Yahudi butagén báwarmand Nikulás. ⁶ É mardomesh kásedáni démá áwort o pësh kortant. Kásedán pa áyán dwá kort o dast baddhá jatant. ⁷ É dhawlá Hodáay Pákén Habar mardománi nyamá tálán but o Urshalimá morid sakk zutt géschá cha géshter bayána butant. Bázén dini pëshwáé ham é báwaray mannóger but.

Estipánay dazgir kanag

⁸ Estipán cha Hodáay rahmat o zórá porr at o áiy mardománi nyamá mazanén mójezah o ajabbatén nesháni démá áwort, ⁹ bale cha Yahudiáni yak kanisahéá ke námi “Ázát Butagén Golámáni Kanisah”‡ at, lahtén mardom cha áiy nárazá at. Á cha Kerini o Eskandariahay shahr o Kilikiah o Ásiáay damagán atant o gón Estipáná dapjáká laggetant. ¹⁰ Bale Estipán gón anchén Ruh o zántéá habar kanagá at ke áiy démá óstátesh nakort. ¹¹ Gorhá lahtén

* 6:1 6:1 Yunáni Yahudi, hamá Yahudi atant ke Yunáni

† 6:3 6:3 Dhobbah, bezán ogdah, zemmah, Arabi o Pársiá “kanisah” ent.

mardomesh rad dát tán begwashant: “Má eshкотag Estipáná Mussá o Hodáay báravá kopr kortag.”¹² Áyán, mardom o kawmay kamásh o Sharyatay zánóger shóréntant o Estipánesh gept o kasshakán, sarókani diwáná pësh kort.¹³ Drógén gwáh o sháhedesh áwort, áyán sháhedi dát o gwasht: “É mard Hodáay pákén lóg o Sharyatay helápá, cha bad o náráshén habar kanagá hechbar dasta nakasshit.¹⁴ Má wat eshkot, gwashti: ‘Issá Náseri é jágahá karójit o á rasm o rawáján badala kant ke Mussáyá pa má eshtagant.’”

¹⁵ Diwánay sajjahén nendókán chamm pa Estipáná sakk dátagatant o distesh áiy dem, préshtagéay démay dhawlá ent.

7

Estipánay trán

¹ Masterén dini pëshwáyá cha Estipáná jost kort: “Bárén, é tohmat rást ant?”

² Estipáná passaw dát: “Oo pet o brátán! Delgósh kanét:

Ebráhémay báravá

“Porshawkatén Hodá, hamá wahdá may bonpirok Ebráhémay démá záher but ke á angat Baynolnahrayná at o Harráná jahmenend nabutagat.³ Gón áiyá gwashti: ‘Wati sardhagár o ráj o kawmá bell o hamá molká beraw ke man tará pëshia dárán.’⁴ Áiyá Kaldániáni molk yalah dát o Harráná shot. Cha petay marká o rand, Hodáay á cha ódá hamé molká áwort ke annun shomá neshtagét.⁵ Edá, Hodáay áiyárá hech mirás o melkat nadát, yak bechillé zemini ham nadát, bale labzi kort ke áiyay nasl o padréch é sardhagáray hodábonda* bit. Hodáay é habar hamá wahdá kort ke Ebráhémá angat chokk néstat.⁶ Gón áiyá chosh gwashti: ‘Tai chokk o óbádag anchéen molkéá ke áyáni watig naent, darámad o bégánaga bant o tán chársad sálá, degaráni chérdastiá golám o bézzat kanaga bant.’⁷ Chosh ham gwashti: ‘Hamá kawm ke áyán wati golám o chérdasta kant, man áyán sezá dayán. Padá cha á molká dara káyant o hamé jágahá maná parastesha kanant.’⁸ Hodáay gón Ebráhémá áhd o kararé bast ke áiyay nesháni mardénchokkání sonnat kanag ent. Paméshká, wahdé Ebráhémá Eshákén chokk but, hashtomi róchá sonnati kort. Hamé dhawlá Esháká wati chokk Ákub o Ákubá wati dwázdahén chokk, ke may kawmay kabilaháni bonpirok ant, sonnat kortant.

* 7:5 7:5 Hodábond, bezán wájah, wáhond, málek, sáheb. † 7:10 7:10 Katthag, bezán nap o sudd kanag, dastá árag. ‡ 7:11 7:11 Dhokkál, bezán kaht, hoshksáli. § 7:14 7:14 Kahól, bezán hánwár, hánwádah (yak lógéay nánwár). * 7:24 7:24 Démpáni, bezán wati rakkénagay johd. Arabi o Pársái “defá”.

Issopay báravá

⁹ “Ákubay chokk, gón wati brátén Issopá pa hasadd o konnat kaptant. Brátán Issop goláméay dhawlá bahá kort o Mesrá barag but, bale Hodá Issopay hamráh at o¹⁰ cha sajjahén sakki o sórián rakkénti. Hodáay á, haminchok láheki o zánt o zánag dát ke Mesray bádsháh, Perawmay mehr o ehřebári pa wat katthet† o Perawná á wati sarjamén molk o melkatay kármaster kort.¹¹ Randá sajjahén Mesr o Kanána dhokkálé‡ kapt ke cha áiyá mardomán mazanéen sakki o sóri raset o may pet o pirénán hech ward o waráké nabut.¹² Wahdé Ákubá zánt ke Mesrá dán o gandoma rasit, may pet o piroki awali bará pa ward o warákay gerag o áragá hamódá ráh dátant.¹³ Á, domi randá ham Mesrá shotant o é randá Issopá watá gón wati brátán paddar o pajjárók kort. Perawn ham Issopay kawm o kothomay báravá sahig but.¹⁴ Gorrhá Issopá pa wati pet Ákubá kolaw ráh dát ke á gón wati sarjamén kahól§ o hándaná ke haptád o panch mardom atant, beladdhit o Mesrá byayt.¹⁵ É dhawlá, Ákub Mesrá shot o hamódá á o may pet o pirok bérán butant.¹⁶ Áyáni jón cha ódá árag o Shekémay shahrá, hamá kabrá kall kanag butant ke Ebráhémá cha Hámóray chokkán pa chizzé zarrá bahá geptagat.

¹⁷ “Wahdé gón Ebráhémá, Hodáay dátagén kawlay sarjam bayagay wahd nazzik but, Mesrá may mardom báz géshter butant.¹⁸ Á wahdá, Mesray bádsháh degaré but o Issopay báravá hecchi nazánt.¹⁹ Áiyá may kawm rad dát o répént, may pirénáni sará báz zolm o zóráki perrént o hojj kortant ke wati nonnokén chokkán, cha lógán dhanná dawr bedayant ke bemerant.

Mussáyá beger tán Solaymáná

²⁰ “Hamé wahdá, Mussá pédá but. Á báz sharrang o dhawldáren chokké at. Tán say máhá wati pet o mátay lógá rost o rodómi kort.²¹ Wahdé dhanná éresh kort, Mesray bádsháh Perawmay jeneká zort o wati jenday chokkay dhawlá ródént o mazan kort.²² Mussáyá Mesriáni sajjahén zánt o zántkári dar bort o pa kerdár o goptará twánmandén mardé but.

²³ “Chel sáli ke but, é pegr o hayálá kapt ke gón wati Bani Esráili brátán gendok bekant.²⁴ Wahdé disti cha áyán yakkéay sará, Mesrié zóráki kanagá ent, Esráiliay

démpánii* kort o béray geragá, á Mesrii jat o kosht. ²⁵ Mussáyá wati delá anchosh hayál kort ke áiyá Esráili brát balkén sarpad bebant ke pa áyáni rakkénagá, Hodá áia kár bandagá ent, bale Esráili sarpad nabutant.

²⁶ “É dega róchá anágat, áia do Esráili watmánwatá merh o jangá dist. Mussá pa áyáni gishshénag o tepák kanagá demá kenzet o gwashti: ‘Oo mardán! Shomá watbrát ét, chiá yakdegará táwánbára kanét?’ ²⁷ Bale hamá ke wati hammolkiay sará zóráki kanagá at, Mussái yak némagé télánk dát o gwashti: ‘Tará kayá may sará hákem o kázi kortag? ²⁸ Bárén, hamá dhawlá ke taw zi á Mesri kosht, mani koshagá ham lákártaget?’ ²⁹ Gón é habaray eshkonagá, Mussá cha á molká dar átk o Midyánay sardhagará darándhéh† but. Hamódá áia do mardénchokk but.

³⁰ “Chel sálá rand, Sináy kóhay gyábáná, préshtagé bon geptagén dhólokéay‡ ásay shahmáni tahá pa Mussáyá paddar but. ³¹ Cha é nedáragay§ gendagá, Mussá hayrán o habakkah mant. Wahdé pa eshiay géshter cháragá nazzikter shot, Hodáwanday tawári é dhawlá eshkot: ³² ‘Man tai pet o pirok Ebráhém, Eshák o Ákubay Hodá án.’ Mussá cha torsá larzagá lagget o áia tahn o joryat nakort á némagé bechárit. ³³ Hodáwandá gwasht: ‘Wati swásán dar kan, é jágah ke taw óshátatagay, pákén jágahé. ³⁴ Man Mesray sardhagará wati mardománi sakkí o sóri distagant, áyáni peryát o zári eshкотagant, pa áyáni rakkénag o ázát kanagá ér átkagán. Byá, nun man tará padá Mesrá rawána dayán.’

³⁵ “Esráilián Mussá namannetagat o gwashtagatesh: ‘Tará kayá may sará hákem o kázi kortag?’ Nun Hodáyá hamá Mussá bon geptagén dhólokay boná préshtagé pesh dásht. É dhawlá, áyáni hákem o rakkénók kort o Mesrá ráhi dát. ³⁶ Hamá at ke cha Mesrá Esráiliáni dar áyagay rahshón but. Hamáia, Mesr o Sohrzeray* tayábá† o tán chel sálá gyábánán mójezah o ajabbatén nesháni pésha dásht. ³⁷ Hamé Mussá at ke gón Bani Esráilián gwashti: ‘Hodá cha shomay brátáni nyámá pa shomá, mani dhawlén

paygambaré gechéna kant.‡ ³⁸ É hamá Mussá at ke gón préshtagá hór, may pet o pirokáni mocchiá gyábáná gón at. Préshtagá Sináy kóhay sará gón áia trán kort o Mussáyá hamódá Hodáay zend bakshókén habar geptant tán áyán pa má sar bekant.

³⁹ “Bale may pet o pirok, pa Mussáyá manmagá razá naatant. Cha áia poshtesh kort o namannet o delesh pa Mesrá bast. ⁴⁰ Áyán, gón Hárúná gwasht: ‘Pa má anchén hodá besách ke may rahbariá bekanant. É Mussá, ke mará cha Mesrá dar áyagay ráhi pesh dáshtag, áia ché butag, má nazánén.’ ⁴¹ Áyán gwaskpaymén yak boté jórh kort o pa wati jórh kortagén botay sharapá, korbánig o shádehi o shádkámi kort. ⁴² Bale Hodáyá wati dém cha áyán tarrént o yalah dátant, bell ke nun máh o róch o estáran parastesh bekanant, hamá dhawlá ke Nabiáni Ketábán nebeshtah ent: ‘Oo Esráilián! Shomá tán chel sálá mán gyábánán pa man hayrát o korbánig kortagat? ⁴³ Na! Shomá “Molukay tambu”§ o wati hodá “Ripánay estár” baddhá bastagant, hamá bot ke shomá pa parasteshá addh kortagatant. Paméshká man shomará cha Bábelay sardhagará hamá dastá, jaláwatan o darándhéha kanán.’

⁴⁴ “Gyábáná ‘Sháhediay tambu*’ may pet o pirokán gón at o hamá paymá addh kanag butagat ke Hodáyá Mussá sój dátagat, bezán hamá nemunahay dhawlá ke áia distagat. ⁴⁵ É hamá tambu at ke may pirénán cha wati bonpirokán rasetagat o Yushahay kamáshi o sarókiá, may pet o pirokán gón wat hamá wahdá áwort ke é molkesh gept o Hodáyá á dega kawm áyáni chammáni demá galléntant o tán Dáuday wahdá, á tambu hamé molká at. ⁴⁶ Dáudá, Hodáyay wasshén wágh o rahmat gón at o lótheti pa Ákubay Hodáyá jágah o hankéné addh bekant, ⁴⁷ bale é Solaymán at ke pa Hodáyá lógé addhi kort. ⁴⁸ Albat, borzén arshay Hodá bani ádamay addh kortagén lógán jágaha nakant, anchosh ke nabia gwashtag: ⁴⁹ ‘Hodáwanda gwashti:

“Ásmán mani taht ent o
zemin mani pádáni chéray padag,

† 7:29 7:29 Darándhéh, bezán jaláwatan. ‡ 7:30 7:30 Dhólok, bezán gyábáni konthagi jarré ke polli espét ant.

§ 7:31 7:31 Nedárag, bezán sayl, tamáshá. * 7:36 7:36 Sohrzer hamá jágah ent ke wahdé Esráili cha Mesrá dar átkant, áyáni demá daryá at o poshtá Perawnay lashkar pédák at. Hodáyá pa áyáni rakkénagá hamé jágahá daryá hoshk kort o ráh pach kort (Dargwaz 13:17-15:21). Bázén zántkáré gwasht ke maróchigén Suéz Kánáláy nazziká ent. † 7:36 7:36 Tayáb, bezán daryáay kerr, sáhel. ‡ 7:37 7:37 Sharyatay Domi Rahband, bahr 18, band 15.

§ 7:43 7:43 Tambu, bezán haymah, gedán. * 7:44 7:44 Sháhediay tambu, gedáné at ke Bani Esráilián Mussáyá zamánagá gón Hodáay hokmá jórhéntagat o hamódá Hodáesh parastesh kortag.

shomá pa man che paymén lógé addh korta kanét
yá ke mani áramjáh kojá bit?

⁵⁰ É sajjahén mani wati dastay addh kortagén naant” †

Estipánay goddhi habar

⁵¹ “Oo sarkash o mánmayátkén[‡] mardomán! Shomay del o gósh sonnat kanag nabutagant. § Wati pet o pirénáni dhawlá, shomá ham modám Hodáay Pákén Ruhay helápá óshétét. ⁵² Kojám paygambar shomay pet o pirénán ázár nadátatag? Shomay pet o pirénán tantaná hamá paygambar ham koshtant ke áyán á ‘Pák o Nékénay’ áyagay péshgói kortagat. Nun shomá áyay jenday dróhók* o hónig ét. ⁵³ Shomá hamá ét ke préshtagán pa shomá Sharyat áwort, bale hechbar namannet o Sharyatay sará káror nakort.”

Estipánay sengsár kanag

⁵⁴ Gón Estipánay habaráni eshkonagá, á sakk zahr septant o pa áiá dantán gadróshagá laggetant. ⁵⁵ Bale Estipáná, ke cha Hodáay Pákén Ruhá sarréché at, ásmánay némagá cháret, gón Hodáay shán o shawkatay gendagá, Issá dist ke Hodáay rástén némagá óshátatag. ⁵⁶ Gwashti: “Ásmáná pach gendagá án o Ensánay Chokk,† Hodáay rástén némagá óshátatag.” ⁵⁷ Áyán gón é habaráni eshkonagá, wati gósh band kortant o kukkáresh kort. Randá, sajjahén hamshawr butant o Estipánay sará hamlah o oroshesh[‡] bort. ⁵⁸ Kasshán kanán, cha shahrá dhann, dar kort o sengsár kanagesh bendát kort. Hamá mardomán ke áyay sará drógén sháhedi dátatag, wati shál o kabáh§ cha gwará dar kort o Shául námén mardéay Kerrá ér kortant. ⁵⁹ Hamá wahdá ke Estipáná sengsár kanagá atant, Estipán dwá kanáná gwashagá at: “Oo Hodáawandén Issá! Pa mani nadrigén sáhay zuragá razámmand bátay.” ⁶⁰ Randá, Estipán kóndhán kapt o pa bortzawári gwashti: “Oo Hodáawand! Eshán pa é gonáhá mayárbár makan.” Gón hamé habaráni gwashagá, sáhi dát.

8

Báwarmandáni sará orosh

¹ Shául cha Estipánay kóshá rázig at. Á róchá, Urshalimaykelisáay sará sakkén ázáré bongéj but. Abéd cha kásedán,

á dega sajjahén báwarmand, Yahudiah o Sámerahay chapp o chágérdá sheng o sháng butant. ² Lahtén Hodádóstén mardomá, Estipán kabr kort o pa áiá mazanén sug o porsé dásht. ³ Bale Sháulá, kelisáay barbád kanag bendát kort. Lóg pa lóga shot, mardén o janén cha lógán dara kort, kasshán kanána bort o jéla kanéantant.

Pilipos Sámerahá kayt

⁴ Hamá báwarmand ke sheng o sháng butagatant, har jáh ke saresha kapt, Issáay wasshén mestágesha rasént. ⁵ Pilipos Sámerahay yak shahréa shot o ódá Masihay kolaway jári jat. ⁶ Wahdé mardománi mocchián Piliposay habar eshkontant o áyay kortagén ajabbatén neshániesh distant, pa áyay habaráni gósh dáragá, géshter delgóshesh kort. ⁷ Bázénéá ke jenn per at, áyáni jenn gón kukkár o chihálán dar átkant, bázén lang o mond hám dráh o wassh butant. ⁸ Paméshká á shahray mardomán báz gal o shádehi kort.

Jádugarén Shamun

⁹ Hamé shahrá, Shamun námén mardé sehr o jádugari kanagá at o Sámerahay mardomi hayrán o ajekkah kortagatant. Áiá batháka jat o gwasht: “Man mazanén mardé án.” ¹⁰ Kasán o mazan, harkasá áyay habar gósha dáshtant o gwashtesh: “É mard Hodáay was o wák ent o ‘Mazanzór’ gwashaga bit.” ¹¹ Mardom paméshká áyay mannóger atant ke báz wahd at cha wati sehr o chambandoki káran, mardomi hayrán kortagatant. ¹² Nun wahdé mardomán Piliposay sará báwar kort, ke á, Hodáay bádsháhiay wasshén mestág o Issá Masihay námá jár janagá at, gorhá mardén o janénán, pákshódia kort. ¹³ Shamunay jend ham báwarmand but o pákshódii kort o har jágah Piliposay hamráha but. Cha distagén ajabbatén nesháni o mójezahán hayrán o habakkaha mant.

¹⁴ Wahdé Urshalimá, kásedán hál raset ke SámeriánHodáay habar mannetagant, gorhá áyán Petros o Yuhanná hamodá ráh dátant. ¹⁵ Wahdé átk o rasetant, pa Sámerián dwáesh kort ke Pákén Ruh áyáni delán bepoterit, ¹⁶ chiá ke Pákén Ruh taningah cha áyán hechkaséay sará ér nayátkagat. Á pa Hodáawandén Issáay námá pákshódi dayag butagatant o bass. ¹⁷ Petros o Yuhannáyá wati dast áyáni baddhá jat o Pákén Ruh áyán raset.

† 7:50 7:50 Eshayá Nabiay Ketáb 66:2. ‡ 7:51 7:51 Mánmayátk, bezán hamá ke kassá namannit. § 7:51 7:51 Edá sonnat kanagay máná ruháni ent, bezán pa á mardomán kármazr kanaga bit ke Hodáay habarána nazurant.

* 7:52 7:52 Dróhók, bezán hamá ke wati hamráhá rada dant o bahá kant. † 7:56 7:56 Dányál nabíá é pernám pa yak hastiéá kár bastag ke á cha ásmáná kayt. Issá Masihá é pernám pa wat zortag tán mardom bezánant ke á cha ásmáná átkag o hamá wádah dátatagén Masih ent. ‡ 7:57 7:57 Orosch, bezán hamlah. § 7:58 7:58 Kabáh, bezán jobbah.

¹⁸ Wahdé Shamuná dist kásed ke dast baddhá janant Pákén Ruh dayaga bit, áiá pa Petros o Yuhannáyá zarr áwort o ¹⁹ gwashiti: “Maná ham é was o wáká bedayét tán harkasá ke dast baddhá janán Pákén Ruh áiá ham berasit.” ²⁰ Petrosá passaw dát: “Tai zarr gón tai hamráhiá gár o gomsár bátant. Chiá ke taw hayál kortag Hodáay dádá pa bahá gepta kanag. ²¹ Tará é hezmatkáriá hech bahr o wandhé nést, chiá ke tai del gón Hodáyá tachk o rást naent. ²² Cha wati é badkáriá pashómán bebay o cha Hodáwandá dwá belóth, balkén Hodá tai delay é sellén hayálá bebakshit. ²³ Man gendagá án, tai del cha zahrápá porr ent o sherr o sheddatay golám o bandig ay.” ²⁴ Shamuná passaw dát: “Shomá cha Hodáwandá pa man dwá belóthét, tán hamá chizz ke shomá gwashtant, yakké ham mani sará makapit.”

²⁵ Petros o Yuhanná, Hodáwanday habaráni sháhedi dayag o sheng kanagá rand, per tarret o Urshalimá shotant. Per tarragay wahdá, ráhá, bázén Sámeri dhéh o kallagán man wasshén mestágesh tálán kort.

Pilipos o Habashi kelitdár

²⁶ Hodáwanday préshtagéá gón Piliposá gwasht: “Pád á, jonubay némagá gyábánay hamá ráhá beger o beraw ke cha Urshalimá dém pa Gazzahá rawt.” ²⁷ Á pád átk o ráh gept. Ráhá, gwahtagén* mardé disti ke Habashahay molká, “Malakah Kandákahay” kelitdár† at. É mard Urshalimá pa zegr o dwáyá shotagat o ²⁸ nun wati arrábahay‡ tahá neshtagat o dém pa wati molká per tarrán, Eshayá nabiy Pákén Ketábá wánagá at. ²⁹ Hodáay Pákén Ruhá gón Piliposá gwasht: “Áiay nazziká beraw o arrábahá hamráh bay.”

³⁰ Pilipos tachán áiay nazziká shot. Eshkoti ke á mard Eshayá nabiy Pákén Ketábá wánagá ent. Piliposá jost gept: “É ketábá ke wánagá ay, eshiá sarpad ham bay?” ³¹ Áiá passaw dát: “Na, tán kasé maná sarpad makant, man chón sarpada bán?” Randá Piliposi lóthet o gón wat nendarént. ³² Á mard, Eshayá nabiy Pákén Ketábay hamá bahrá wánagá at ke é dhawlá gwashtit:

*“Paséay dhawlá ke áiá pa kóshá barant,
áesh pa koshagá bort, anchosh ke
gwarándh, pazhm chenókay démá*

*bétawára bit, hamé dhawlá cha áiay
dapá ham tawaré dar nayátk.*

³³ *Áiay béezzat kanag, naráhén karé at.
Áiay nasl o padréchay bárawá kay
habar korta kant? Chiá ke áiay zend
zeminy sará halás kanag butag.”*§

³⁴ Habashi kelitdará cha Piliposá jost kort: “Maná begwash, báren é nabi kai bárawá habar kanagá ent? Wati bárawá yá dega kaséay?” ³⁵ Gorhá Piliposá cha Hodáay Pákén Ketábay hamé habarán wati gapp o trán bongéj kort o Issá Masihay wasshén mestági pa áiá rasént.

³⁶ Á, ráhá rawán, yak anchén jágahéá rasetant ke ódá ápsaré hastat, kelitdará gwasht: “Bechár, edá áp hastent, parwáh nést man hamedá pákshódi bekanán?”

³⁷ Piliposá passaw dát: “Agan taw pa del o setk báwarmand butagay, pákshódi korta kanay.” Áiá darráént: “Man báwara kanán ke Issá Masih Hodáay Chokk ent.”*

³⁸ Habashi kelitdará hamódá arrábahay dáragay hokm kort, doénán ápá mán dát o Piliposá á pákshódi dát. ³⁹ Wahdé cha ápá dar kaptant, anágat Hodáwanday Ruhá, Pilipos chest kort o bort, Habashi kelitdará padá Pilipos nadist, bale pa gal o shádehi wati ráhi gept. ⁴⁰ Pilipos Ashduday shahrá gendag but, cha ódá tán Kaysariahá shot o ráhá sajjahén shahrán Issáay wasshén mestági sheng kort.

9

Sháulay báwarmandi

¹ Shául, angat Hodáwanday moridán pátráp dayán, áyáni kosht o kóshay chen o lánchá at. Á, masterén dini péshwáay kerrá shot o ² cha áiá lótheti pa Dameshkay shahray kanisaháni sarókan kágadé benebisit ke Sháulá é ehtiár bebit, agan áiá ódá “É Ráhay”* har mannógeré dist, mardéné bebit yá janéné, bandig bekant o Urshalimá byárit. ³ Wati sát o sapará, wahdé Dameshkay shahray nazziká raset, anágat áiay chapp o chágerdá cha ásmáná rozhné drapshet.† ⁴ Shául zemíná kapt o tawaré eshkoti: “Shául, oo Shául! Taw chiá maná ázára dayay?” ⁵ Sháulá jost kort: “O wájah! Taw kay ay?” Passawi dát: “Man Issá án, hamá ke taw áiá ázára dayay. ⁶ Nun pád á o shahrá beraw. Hamódá gwashtant tará che kár kanagi ent.” ⁷ Sháulay hamráh bétawár

* **8:27** 8:27 Gwahtagén, bezán áiay naréng dar kanag butag, anchosh ke gón pábondi gwarándhá kanant. † **8:27** 8:27 Kelitdár, bezán hazanagay hesábdár o sambálók. ‡ **8:28** 8:28 Arrábah, bezán mazanén mansabdáráni hamá gárhi ke aspia kasshant. § **8:33** 8:33 Eshayá Nabiy Ketáb 53:7-8. * **8:37** 8:37 Lahtén daznebeshtá, band 37

nést. * **9:2** 9:2 “É Ráh” pa awali báwarmandáni pajjárénagá hásén námé at. † **9:3** 9:3 Drapshag, shahm janag, rozhná bayag, jalashkag. ‡ **9:7** 9:7 Mámánag, bezán cha tors yá dega sawabéá anchén hálatéá bayag ke habar ham dar mayayt.

o mánánag³ butant. Áyán é tawár eshкот bale hechkesh nadist. ⁸ Shául cha zemíná pád átk, bale wahdé chammi pach kortant hechi maym nakort. Hamráhán dastá gept o Dameshká sar kort. ⁹ Tán say róchá kór but, na ápi wárt o na warák.

¹⁰ Dameshkay shahrá, Hannániá námén moridé jahmenend at. Shobén o elhámeá, Hodáwand pa áia záher but o gwashti: “Oo Hannániá!” Áia jwáb tarrént: “Ji, mani wájah!” ¹¹ Hodáwandá gwasht: “Pád á, hamá damk o kuchahá beraw ke áia ‘Tachkén damka’ gwashant. Ódá Yahudáay lógá beraw o Shául Tarsusiá shóháž kan, ke á dwá kanagá ent. ¹² Sháulá wati shobéná distag ke Hannániá námén mardé kayt, áia dast pera moshit ke padá begendit.” ¹³ Hannániáyá passaw dát: “Oo Hodáwand! Man cha bázénéá eshкотag ke Urshalimá, Sháulá tai báwarmand báz ážár dátagant. ¹⁴ Edá ham gón mazanén dini péshwáyáni ehtiárá átkag ke sajjahén hamá mardomán begipt o bandig bekant ke tai námá gerant.” ¹⁵ Bale Hodáwandá gón Hannániáyá gwasht: “Beraw, man pa wati hezmatkáriá, á gechéen kortag ke darkawm o áyáni bádsháh o Esráiliáni gwará berawt o pa mani námá gwáhi bedant. ¹⁶ Man áia sahiga kanán ke pa mani námá áia chinchok ážár saggagi ent.” ¹⁷ Hannániá shot o hamá lógá raset, Sháuli dast per mosht o gwashti: “Oo mani brátén Shául! Hamá Hodáwand bezán Issá, ke ráhá pa taw záher but, maná ráhi dátag ke taw padá begenday o cha Hodáay Pákén Ruhá porr bebay.” ¹⁸ Hamá damáná, cha áiy chammán kochalpaymén chížé kapt o áiy chammáni rozhn padá átk. Gorhá á pád átk o pákshódii kort. ¹⁹ Ward o waráki wárt, zreng o zórmand but. Lahtén róchá Dameshkay moridáni Kerrá dáshti.

Sháulay báwarmandiay paddari

²⁰ Shául, hamódá Yahudiáni kanisahá shot o jária jat ke Issá Hodáay Chokk ent. ²¹ Harkasá ke áiy habara eshкот, hayrána but o jostia gept: “É hamá mard naent ke Urshalimá Issáay nám gerókáni gár o gomsár kanagay randá at? Edá ham paméshká nayátkag ke Issáay mannógerán begipt o mazanén dini péshwáyáni Kerrá bebárt?” ²² Bale Shául róch pa róch zórmandtera but o gón mohrén dalilán péshia dásht ke Issá, Masih ent o é dhawlá áia Dameshkay Yahudi sarbatag o bépassaw kortant. ²³ Bázén róchán o rand, Yahudián áiy koshtagay shawr kort, ²⁴ bale Shául cha

áyáni pandalá sahig but. Gorhá, áyán shap o róch shahray darwázagáni negahpániá kort tán begerant o bekoshanti. ²⁵ Bale áiy shágerdán lachéáŠ kort o shapá cha shahray diwála, jahlá ér dát.

Shául Urshalimay shahrá

²⁶ Wahdé Shául Urshalimá raset gón moridán hór bayagay johdi kort, bale sajjahénán cha áia torset. Áyán báwar nabut ke Shául pa rásti moridé butag. ²⁷ Bale Bárnábáyá wati hamráh kort o kásedáni Kerrá bort, á sahig kortant ke che paymá Sháulá Dameshkay ráhá Hodáwand distag o Hodáwandá gón áia gapp o trán kortag. Bárnábáyá é hál ham dát ke Sháulá Dameshkay shahrá che paymá gón deléri pa Issáay námá wáz kortag. ²⁸ Randá, Shául Urshalimá gón kásedán har kárá hór but o pa natorsi Hodáwanday námá wázia kort. ²⁹ Gón Yunáni Yahudiáni ham gapp o trána kort. Bale á, Sháulay koshtagay randá atant. ³⁰ Wahdé báwarmandén brát cha é pandalá sahig butant, Sháulesh Kaysariahá bort o cha ódá dém pa Tarsusá ráh dát. ³¹ Gorhá Yahudiah o Jalil o Sámerahay sajjahén damagán, kelisá émen o ásudag but o rost o rodóm kanán at. Báwarmandán, pa Hodátorsí zenda gwázént o gón Pákén Ruhay delbaddhiá róch pa róch géshtera butant.

Iniás o Dorkás

³² Petros sát o sapar kanán at o Loddahay shahray nendókén Hodáay palgártagén* mardománi gwará átk. ³³ Ódá áia Iniás námén mardé dist ke lang o mondth at o hasht sál at ke tahtay báhóth at. ³⁴ Petrosá gón áia gwasht: “Oo Iniás! Issá Masih tará dráha kant, pád á, wati gandalán péch.” Hamá damáná Iniás pád átk o óshtát. ³⁵ Wahdé Loddah o Shárunay mardomán Iniás dist, á ham dém pa Hodáwandá átkant.

³⁶ Yápáay shahrá, moridé hastat ke námi Tabitá at (Yunáni zobáná “Dorkás” gwashaga bit, bezán “ásk”). Á báz nékkáren janéné at o har wahdá néžgarén mardomi komak o madat kortagatant. ³⁷ Hamé róchán nájórh but o mort. Áiy jónesh shosht o lógay borzádi báná ér kort.

³⁸ Yápáay shahr cha Loddahá nazzik at. Wahdé Yápáay nendókén morid sahig butant ke Petros Loddahay shahrá ent, áyán do mardom ráh dát o mennatgiriash kort ke Petros zutt áyáni Kerrá byayt. ³⁹ Petros áyáni hamráh but. Wahdé ódá

§ 9:25 9:25 Lach, bezán mazanén sapté ke bári mána kanant o hará laddhanti. * 9:32 9:32 “Palgártagén” hamá mardom ant ke gón Issá Masihay hóná cha wati gonáhán shódag o pák kanag butag o é dhawlá pa Hodáyá dar chenag butagant.

raset, lógay borzádi báná bortesh. Ódá sajjahén janózám áiy chapp o chágérdá mocch butant o gréwán hamá pocch o jámagesh pésh dáshtant ke Dorkásá wati zendá dótkagatant. ⁴⁰ Petrosá á sajjahén cha báná dar kortant, kóndhán kapt o dwái kort. Randá démi jónay némagá tarrént o gwashti: “Oo Tabitá! Pád á.” Áiá wati chamm pach kortant, Petrosay némagá cháreti o nesht. ⁴¹ Petrosá áiy dast gept o óshtárént, báwarmand o janózámí tawár kortant o Tabitái zendaká áyáni dastá dát. ⁴² É hál, sajjahén Yápáay shahrá sheng but o bázén mardoméá Hodáwunday sará báwar kort. ⁴³ Petros tán lahtén wahdá hamódá Yápáay shahrá gón Shamun námén póst rajókéá† nesht.

10

Korniliusay elhám

¹ Kaysariahay shahrá, Kornilius námén mardé hastat, ke Rumi pawjá, “Itáliái lashkaray” sad mardomay master at. ² Áiy jend o sajjahén kahóli pahrézkár o Hodátors* atant. Áiá nézgárén mardom pa daspachi komaki kortant o modám Hodáay bárgáhá zegr o dwá kanagá at. ³ Yak róché némróchá rand, kesás sáhat sayá,† Hodáay préshtagé pa shobén o elhámi dist ke nazzik átk o gwashti: “Oo Kornilius!” ⁴ Korniliusá gón torsé préshtagay némagá chamm sakk dátant o gwashti: “Ji wájah! Ché gwashay?” Préshtagá passaw dát: “Tai dwá o hayrát yátmánén sawgáté ke Hodáay bárgáhá rasetag. ⁵ Nun wati mardomán Yápáay shahrá rawán kan o yak mardéá, ke námi Shamun ent o Petros ham gwashanti, belóth o byár. ⁶ Á, póst rajókén Shamunay mehmán ent ke lógi tayábay nazziká ent.” ⁷ Wahdé préshtagá wati habar kortant o shot, Korniliusá wati do kárdár o yak pahrézkárén sepáhigé ke áiy hezmatá at, lóthetant, ⁸ gón áyán é sajjahén kessahi kort o dém pa Yápáyá rawán dátant.

Petrosay elhám

⁹ Domi róchá, wahdé har say ráhá atant o Yápáay nazziká rasetant, hamá wahdá némróchá‡ Petros pa dwá kanagá lógay sará sar kapt. ¹⁰ Shodig but o áiy delá warák lóthet. Wahdé waragán tayár kanagá atant, Petrosá shobénag but o gón elhámé disti ¹¹ ke ásmánay dap pach butag o mazanén parzónagpaymén chizzé cha har chárén lambán§ zeminay némagá ér

áyagá ent. ¹² É parzónag cha har paymén chárpádén haywán, már o gój o báli morgá porr at. ¹³ Petrosá tawaré eshкот ke gwashti: “Oo Petros! Pád á, bekosh o bwar.” ¹⁴ Bale Petrosá passaw tarrént: “Na, oo Hodáwand! Man hechbar nápák o palitén warag nawártag.” ¹⁵ Domi randá padá tawár átk o gwashti: “Hamá chizz ke Hodáya pák zántagant, taw áyán sell o nápák mazán.” ¹⁶ Say randá hamé dhawlá but o padá parzónag zutt ásmáná barag but.

¹⁷ Petros hayrán at ke bárén é elhámay máná o maksad chi ent? Hamé wahdá, Korniliusay ráh dátagén mardomán Shamunay lóg shóház kortagat o átkag o lógay darwázagay dapá rasetagatant. ¹⁸ Áyán gwánk* jat o jost kort: “Edá Shamun námén mehmáné hast ke Petros ham gwashanti?” ¹⁹ Petros taningah wati distagén elhámay bárawá pegr kanagá at ke Hodáay Ruhá gón áiá gwasht: “Bechár, say mardom átkag o tai jostá ant. ²⁰ Pád á, jahlá ér kap o pa deljami áyáni hamráhiá beraw, chiá ke á, man rawán dátagant.” ²¹ Petros ér kapt o gón áyán gwashti: “Á ke shomá áiy jostá ét, man án. Shomá chiá átkagét?” ²² Áyán passaw dát: “Má pawji apsar Korniliusay kásed én. Á pahrézkár o Hodátorsén mardomé o sajjahén Yahudi áiy washnámi o bóhériay mannóger ant. Hodáay yak pákén préshtagé gón áiá gwashtag ke pa tai habaráni gósh dáragá tará wati lógá belóthit.” ²³ Petrosá á mardom lógá áwort o mehmán kortant. Domi róchá, áyáni hamráh but o shot. Cha Yápáyá lahtén watbrátén báwarmand ham gón áyán gón kapt o shotant.

Petros o Kornilius

²⁴ É dega róchá, Petros o áiy hamráh Kaysariahá rasetant. Kornilius áyáni rahchár o wadárig at o wati lahtén syád o nazzikén sangati ham lóthetagat. ²⁵ Wahdé Petros áiy lógá átk o raset, Korniliusá wasshátk kort o sojdah kanán áiy pádán kapt. ²⁶ Petrosá óshtárént o gwashti: “Pád á, man ham tai dhawlá ensané án.” ²⁷ Gón áiá habar kanán, Petros lógá shot. Disti ke bázén mardomé mocch butagat. ²⁸ Gón áyán gwashti: “Shomá zánét ke pa Yahudián, gón darkawmán hór o yakjáh bayag rawá naent o áyáni lógán ham narawant. Bale Hodáwandá maná pésh dásht ke hechkaséá nápák o palit mazánán o malékán. ²⁹ Paméshká wahdé taw maná

† **9:43** 9:43 Póst rajók, bezán hamá ant ke cha dalwatáni póstá mashk o é dega chizz jórha kanant. * **10:2** 10:2

Hodátors, bezán darkawmén Yahudi báwarmand. † **10:3** 10:3 Asligén Yunáni nebeshtánka gwasht: “róchay nohomi sáhat”. ‡ **10:9** 10:9 Asligén Yunáni nebeshtánka gwasht: “róchay shashomi sáhat”. § **10:11** 10:11

Lamb, bezán dámon, kerr. * **10:18** 10:18 Gwánk, bezán borzén tawár.

lóthet, man bé chakk o pad átkán. Nun begwash taw maná chiá lóthetag?"³⁰ Korniliusá passaw dát: "Chár rócha bit ke hamé wahdá sáhat sayá,† wati lógá zegr o dwá kanagá atán, anágat yak mardé ke drapshnákén pósháki gwará at, mani démá átk o³¹ gwashti: 'Kornilius! Tai dwá o hayrát yátmánén sawgáté ke Hodáay bárgáhá yát kanaga bit.'³² Nun wati mardomán dém pa Yápáyá rawán kan o hamá Shamuná belóth o byár ke Petros ham gwashanti. Á, póst rajókéen Shamunay mehmán ent ke lógi tayábay nazziká ent.'³³ Man hamá damáná pa tai lóthagá wati kásed ráh dátant, tai mennat sar o chammán ke taw átkay. Nun má sajjahén Hodáay diwáná hór neshtag o wadárig én tán Hodáwanday á sajjahén habarán beshkonén ke tará pa may gwashagá hokmi dátáag."

Petrosay trán

³⁴ Petrosá trán kort o gwasht: "Man nun pa deljami sarpad butagén ke Hodá pa kasséa ru o ryá‡ nakant.³⁵ Kasé ke áiy delá Hodátorsi bebit o pa tachki o rásti kár bekant, Hodáay bárgáh pa áia pach ent, toré cha har kawméa bebit.³⁶ Shomá zánét ke Hodáyá pa Bani Esráilián wati kolaw ráh dát o cha Issá Masihay ráhá, ke sajjahénáni Hodáwand ent, sohl o émeniy mestág dát.³⁷ Chosh ham zánét é kár chónaká cha Yahyáay jár jatagén pákshódiá rand, Jalilá bongéj but o sajjahén Yahudiahá rawáj gept.³⁸ É kár hamesh at ke Hodáyá gón wati Pákén Ruh o zórá, Issá Náseriy sará rógen per mosht.§ É dhawlá á, har jáh ke shot, gón wati nékén kárán, sajjahén á mardom ke Shaytánay bandig atant dráhia kortant, chiá ke Hodá gón áia gón at.³⁹ Má, é sajjahén káráni sháhed én ke áia Urshalimay shahrá o Yahudiahay damagá kortant. Bale salibesh kasshet o koshtesh.⁴⁰ Hodáyá saymi róchá, á zendag o záher kort,⁴¹ bale pa sajjahén mardomán na, pa hamá sháhedán ke áia wat cha péshá gechéen kortagatant, bezán pa má ke Issáay jáh janagá rand, gón áia hór wárt o nóshet.⁴² Áia hokm kort ke má é mestágá pa mardomán jár bejanén o gwáhi bedayén ke á Hodáay gechéen kortagén ent tán zendag o mordagáni kázi bebit.⁴³ Sajjahén paygambar, Issáay bárawá gwáhia dayant, harkas áiy sará

imán byárit, gonáhi áiy námá bakshaga bant."

Pákén Ruh darkawmán ham rasit

⁴⁴ Petros angat habará at, Pákén Ruh, hamá mardománi sará ér átk ke áiy habarán gósh dáragá atant.⁴⁵ Petrosay hamráhiá átkagén báwarmandén Yahudi* hayrán butant ke Hodáay Pákén Ruh, pa darkawmán ham tohpah o théki dayag but.⁴⁶ Chiá ke Yahudián eshкот á, dega zobánán† habar kanagá ant o Hodáay sepat o sanáyá ant. Gorhá Petrosá gwasht:⁴⁷ "Nun ke é mardomán may dhawlá Pákén Ruh rasetag, kasé hast ke eshán cha ápay pákshódiá makan bekant?"⁴⁸ Gorhá hokmi kort ke Issá Masihay námá pákshódi dayag bebant. Randá áyan, cha Petrosá dazbandi kort tán lahtén róchá áyáni gwará bejallit.‡

11

Petrosay bayán o hálrásáni

¹ Sajjahén Yahudiahá, kásed o báwarmandén brátán eshкот ke darkawmén mardomán ham Hodáay habar mannetag.² Wahdé Petros per tarret o Urshalimá átk, Yahudián* áiy sará é iráz gept ke³ "taw sonnat nakortagén darkawmán gwará shotagay o gón áyan yakkén parzónagay sará warag wártag."

⁴ Gorhá Petrosá sajjahén sargwast hamá dábá ke butagat pa red o band, bayán kort o gwashti:⁵ "Man Yápáay shahrá dwá kanagá atán, maná shobénag but o gón elhámé diston ke cha ásmáná mazanén parzónagpaymén chizzé cha har chárén lambán ér áyaná dém pa man pédák ent.⁶ Wahdé man pa delgóshi áiy némagá cháret, diston ke eshiay sará chárpadén dalwat,† wahshién haywán, már o gój o báli morg ant.⁷ Man tawaré eshкот ke gwashti: 'Oo Petros! Pád á, bekosh o bwar.'⁸ Bale passaw dátón: 'Na, oo Hodáwand! Nápák o palitén warag hechbar mani dapá nashotag.'⁹ Domi randá cha ásmáná tawaré átk o gwashti: 'Hamá chizz ke Hodáyá pák zántagant, taw áyan sell o nápák mazán.'¹⁰ Say randá hamé dhawlá but o padá á sajjahén chizz ásmáná barag butant.

¹¹ "Hamá wahdá, say mardom ke cha Kaysariahá pa man ráh dayag butagat, hamá lógay dapá rasetagatant ke má

† **10:30** 10:30 Asligén Yunáni nebeshtánka gwasht: "róchay nohomi sáhat". ‡ **10:34** 10:34 Ru o ryá, bezán park o dark, Arabi o Pársiá "tab'iz". § **10:38** 10:38 Rógen per moshag, bezán pa bádsháhiá gechéen kanag. * **10:45** 10:45 Asligén Yunáni nebeshtánka gwasht: "sonnat kortagén báwarmand". † **10:46** 10:46 "Dega zobánáni" maksad hamá zobán ant ke mardománi watig naant o cha Pákén Ruhay elhámá hamá zobánán habara kanant. ‡ **10:48** 10:48 Jallag, bezán dárag, óshtag, manag. * **11:2** 11:2 Asligén Yunáni nebeshtánka gwasht: "sonnat kortagén", bezán Yahudi mardom. † **11:6** 11:6 Dalwat, bezán haywán.

mehmán atén. ¹² Hodáay Ruhá maná gwasht ke man pa deljami gón áyán berawán. É shashén brát ham mani hamráhiá átkant. Má sajjahén Korniliusay lógá shotén. ¹³ Áiá márá hál dát ke che paymá préshtagé wati lógá distagi. Préshtagé gwashtag: 'Wati mardomán Yápáyá rawán kan o Shamuná belóth o byár ke Petros ham gwashanti. ¹⁴ Áiá pa taw anchén mestágé gón ent, ke cha é mestágá taw o tai sajjahén kahól pahell kanag o rakkénaga bét.'

¹⁵ "Wahdé man wati trán bongéj kort, Pákén Ruh áyáni sará ér átk, anchosh ke may sará awali bará ér átkagat. ¹⁶ Á wahdá man Hodáwandy hamá habaráni hayál o tránagá kaptán ke gwashtagati: 'Yahyáyá mardom gón ápá pákshódi dátagant, bale shomá cha Hodáay Pákén Ruhá pákshódi dayaga bét.' ¹⁷ Paméshká, agan hamá dád o bakshesh ke cha Hodáwandén Issá Masihay saray báwarmandiá márá dayag butagat, Hodáyá áyáná ham dátag, gorhá man kay atán ke Hodáay káráni démá bósháténán."

¹⁸ É habaráni eshkonagá rand, á bétawár butant, Hodáesh satá o saná kort o gwashtesh: "Rást ent ke Hodáyá darkawm ham, pashómániay móh dátagant ke cha wati gonáhán per betarrant o abadmánén zendá berasant."

Antákiahay kelisá

¹⁹ Hamá báwarmand ke cha Estipánay wahd o bárigay ázárán, sheng o sháng butagatant sát o sapor kanán, Pinikiah, Kebres o Antákiahay sardhagárán rasetant, Hodáay habaránimestágá tahná gón Yahudián gwashtagá atant. ²⁰ Bale cha áyán lahténá, ke Kebres o Keriniay mardom atant, Antákiahá átk o é wasshén mestágesh Hodáwandén Issáay bárawá pa Yunánián ham sar kort. ²¹ Hodáwandy dast gón áyán gón at, paméshká bázéné báwarmand but o cha wati kár o ráhán, dém pa Hodáwandá átk. ²² Urshalimaykelisáyá, é hál raset o áyán Bárnábá Antákiahá rawán dát. ²³ Wahdé á ódá raset o Hodáay rahmati dist, gal but o mardomi delbaddhi dátant ke pa del Hodáwandy wapádár o mannók bebant. ²⁴ Bárnábá sharrén mardé at o cha imán o Pákén Ruhá sarréché at. É dábá, dega bázén mardomé Hodáwandy ráhá hawár but.

²⁵ Bárnábá, Sháulay shóházá Tarsusá shot. ²⁶ Wahdé Sháuli dar gétk, gón wat

Antákiahá borti. Ódá é doén, tán sáléá gón kelisáay báwarmandán hór butant o bázén mardomé dars o sabakesha dát. É Antákiahay shahr at ke awali randá morid, "Masihi" gwashtag butant.

²⁷ Hamá róchán, lahtén nabi cha Urshalimá Antákiahá átk. ²⁸ Cha áyán yakkéá, ke námi Ágábus at, cha Hodáay Ruhay elhámá pád átk, péshgói kort o gwashti: "Rumay sarjamén molká[‡] mazanén dhokkálé kapit." É dhokkál, Kaysar Klawdiusay bádsháhiay dawr o bárigá but. ²⁹ Gorhá moridán shawr kort harkas wati was o twáná, pa Yahudiahay nendóké báwarmandén brátáni komaká, chizzé ráh bedant. ³⁰ Áyán hamé dhawlá kort o é théki, Bárnábá o Sháulá pa kelisáay kamáshán rasént.

12

Petrosay ázáti

¹ Hamé róchán, bádsháh Hirudisá pa kelisáay ázár rasénagá, lahtén mardomay gerag o band kanag bongéj kort. ² Áiá Yuhannáay brát Ákub gept o zahmkósh kort. ³ Wahdé disti ke Yahudi cha é kára wassh ant, gorhá Petrosi ham dazgir kort. É kár, Béhomirén Nánay Aiday róchán but. ⁴ Dazgir kanagá rand, áiá Petros jél kort. Chár chár sepáhigay chár thóli, bárig bárigá áiy sará páspáni kanagá at. Hirudisay delá at ke Sargwazay Aidá rand, áiá kawmay démá kárit o pésha kant.* ⁵ Petros angat jélé bandig at o kelisá gón bázén delsetki pa áiá Hodáay bárgáhá dwá kanagá at.

⁶ Cha á róchá ke Hirudisá Petros hakdiwáná baragi o mayárig kanagi at yak shapé pésar, á gón do zamzilá bastagat o do sepáhigay nyámá waptagat. Jélay darwázagay dapá ham negahpánén sepáhig óshátatagant. ⁷ Yak anágat cha Hodáwandy némagá préshtagé átk o á kóthi rozhnág but. Préshtagé Petrosay kash o pahnát dast jat, cha wábá ágáh kort o gwashti: "Hayyá, pád á." Zamzil cha Petrosay dastán botk o kaptant. ⁸ Préshtagé gwasht: "Lánká band o swásán pádá kan." Áiá anchosh kort. Préshtagé padá gwasht: "Wati kabáhá gwará kan o mani randá bay." ⁹ Petrosá préshtagay rand gept o dhanná dar átk, bale sari per nabut ke pa rásti anchosh bayagá ent, hayáli kort balkén shobéné. ¹⁰ Á doén cha awali o domi negahpániá gwastant o hamá mazanén áseni darwázagay dapá rasetant ke shahray némagá at. Darwázag watsará

[‡] 11:28 11:28 Asligén Yunáni nebeshtánka gwasht: "sajjahén jahán".

* 12:4 12:4 Béhomirén nánay aid o Sargwazay aid nazzik ant. Béhomirén nánay aid, Sargwazay aidá rand hapt róchay tahá geraga bit.

pach but o á dhanná dar átkant. Cha yak damkéa o rand, préshtagá á yalah dát. ¹¹ Wahdé Petrosá hósh kort, gwashti: “Nun man pa dela zánán ke Hodáwandá wati préshtag ráh dátag o maná cha Hirudisay dastá o cha hamá bad o baláhán rakkéntag ke Yahudi áyáni wadárig o rahchár atant.”

¹² Cha é sarpadiá rand, Petros Maryamay lógá shot. Maryam hamá Yuhannáay máat at ke Markásay námá ham zánaga bit. Ódá bázén mardomé pa dwá kanagá mocch at. ¹³ Petrosá lógay darwázag thokket, Ródá námén móledé pa darwázagay pach kanagá dar átk. ¹⁴ Áiá Petrosay tawár pajjáh áwort o cha galá, bé darwázagay pach kanagá, tacháná lógá per tarret o háli dátant: “Petros dhanná óshtátá.” ¹⁵ Áyán gón Ródáyá gwasht: “Taw ganók butagay.” Bale á wati gappay sará óshtátátag o gwashagá at ke “á pa del Petros ent.” Gorphá áyán gwasht: “Zalur áiy préshtag ent.”† ¹⁶ Petros darwázagá thokkagá at. Áyán darwázag pach kort o gón Petrosay gendagá, hayrán o habakkah mantant. ¹⁷ Petrosá gón dastay eshárahá bétawár kortant o hál dátant ke Hodáwandá á, cha jéla chón azát kortag. Gón áyán gwashti: “Ákub o é dega brátán cha é hálá sahig bekanét.” Randá cha ódá dar átk o dega jághéá shot.

¹⁸ Sabáhay sará, sepáhigáni nyámá shór o walwalahé mán kapt ke “báren, Petrosá ché but?” ¹⁹ Hirudisá shóház kanáent, bale wahdé Petros dastá nakapt, cha sepáhigán jost o pors kanagá rand, áyáni koshagay hokmi dát. Gorphá Hirudisá Yahudiáh yalah dát o Kaysariahá shot o hamódá mant.

Hirudisay mark

²⁰ Hirudis gón Sur o Saydunay mardomán zahr o nárazá at, bale óday lahtén kamáshá pa áiyay diwánjáhay rawagá ejázat lóthet. Bádsháhay, Blástus námén dast o dapi hezmatkáresh gón wat hamshawr kort o cha Hirudisá sohl o saláh kanagay mennatwár butant. Chiá ke áyáni sardhagáray ward o warák, cha Hirudis bádsháhay molkay némagá átk. ²¹ Gorphá pa áyáni gend o nendá yak róché gishshénag but. Á róchá, Hirudis gón sháhi póshákán, bádsháhi tahtay sará nesht o mardománi demá tráni kort. ²² Wahdé áiy habar halás butant, mardomán kukkár kanáná gwasht: “É ensáni tawaré naent, Hodái tawaré.” ²³ Hamá

damáná, Hodáwanday préshtagéá á jat, chiá ke áiá Hodá satá nakortagat. Jesmi kerm gept o mort.

Pulosay awali mestági sapar

Bárnábá o Shául

²⁴ Hodáay habar o kolaw róch pa róch gésh bayán o demá rawán at. ²⁵ Wahdé Bárnábá o Sháulá gón komak o thékiáni rasénagá wati kár sarjam kort, cha Urshalimay saporá per tarret o átkant o Yuhannáesh ke Markás ham gwashaga but, gón wat áwort.

13

Bárnábá o Sháulay kásedi

¹ Antákiahay kelisáyá, lahtén nabi o ostád hastat: Bárnábá, Shamun ke “Syáhal” ham gwashaga but, Lukius ke Keriniay báhendahé at, Manáhin ke hákem Hirudisay darbárá, áiyay kasániay sangat at o Shául. ² Wahdé róchag atant o Hodáwandá saná o satá kanagá atant, Pákén Ruhá gón áyán gwasht: “Bárnábá o Sháulá pa mani hamá káráni sarjam kanagá gechén bekanét ke man pa áyán gishshéntagant.” ³ Cha róchag o dwáyá rand, á doénesh dast baddhá jat o ráh dátant.

Bárnábá o Shául dém pa Kebresá

⁴ É dábá, Bárnábá o Shául ke cha Pákén Ruhay némagá ráh dayag butagatant, dém pa Selukiáyá jahlád butant. Cha ódá bójigá* nesht o Kebresá shotant. ⁵ Wahdé Sálámisay shahrá rasetant, Yahudiáni kanisahánHodáay habaresh jár jat. Yuhannáesh† pa komaká hamráh at. ⁶ Áyán sajjahén jazirahá tarr o tába kort tánke Pápúsá rasetant. Ódá, yak drógén Yahudi paygambar o jádugaré distesh ke námi Báryashu at. ⁷ Áiá, watá gón wáli Sergius Pulosá hamgranch kortagat. Wáli, zántkárén mardé at. Áiá, pa Hodáay Habaray eshkonagá, Bárnábá o Shául lóthetant. ⁸ Bale á jádugar, ke Yunáni zobáná áiyay nám “Elimás” ent, Bárnábá o Sháulay demá óshtát o johdi kort ke wáli, Issá Masihay sará báwar makant. ⁹ Sháulá ke Pulos ham gwashaga bit, cha Pákén Ruhá sarréché, Elimásay némagá chamm sakk dátant o gwashti: ¹⁰ “Oo Shaytánay chokk! Taw ke cha makr o mandrá‡ sarréché ay o har rástiyay dozhmen ay, taw hechbar Hodáwanday rástén ráhay chapp o chóth kanagay kára yalaha nakanay? ¹¹ Bechár, annun

† 12:15 12:15 Bázén Yahudiáni báwar esh at ke har mardoméá préshtagé ham hast. * 13:4 13:4 Bójig, bezán lánch, yakdár, kashti. † 13:5 13:5 Bezán hamá Yuhanná ke Markás ham zánaga bit. ‡ 13:10 13:10 Mandr, bezán repk, sázesh, pachali. § 13:11 13:11 Asligén Yunáni nebeshtánka gwasht: “Hodáwanday dast”.

Hodáwand[§] tará gipt, kóra bay o tán wahdéá, róchay rozhnáá dista nakanay.” Hamá damáná, áiy chammán moj o tahárókiá mán shánt. Dazmósh kanán shóházá lagget ke kasé áiy dastá begipt o ráhá sój bedant. ¹² Wahdé wáliá é dist, cha Hodáwanday tálimay zórakiá hayrán mant o báwarmand but.

Pulos Yahudiáni kanisahá trána kant

¹³ Randá, Pulos o áiy hamkár, cha Pápusay shahrá bójigá swár but o Pampilihay damagá, Pergahay shahrá átkant. Cha ódá Yuhannáya á yalah dátant o Urshalimá per tarret. ¹⁴ Bale Bárnábá o Pulos, cha Pergahay shahrá démá rawán, Pisidiahay damagá, Antákiahay shahrá sar butant. Shabbatay róchá, Yahudiáni kanisahá shotant. ¹⁵ Tawrát o Nabiáni Ketábáni wánagá rand, kanisahay masterán gón áyán gwasht: “Oo brátán! Agan pa mardománi delbaddhiá gón shomá kolawé hast, darshán bekanét.” ¹⁶ Pulos pád átk, óshtát o gón dastay eshárahá gwashti: “Oo Esráilián o darkawmén Hodátorsán! Mani habarán delgósh kanét. ¹⁷ É kawmay Hodá, Esráilay Hodáyá may pet o pirok gechéen kort o Mesrá jahnenndiay wahd o zamánagá sarperáz kortant o gón wati zórakiá cha Mesrá dar áyagay rahshóni dátant. ¹⁸ Chel sáláy kesásá mán barr o gyábáná, áyáni kár o kerdi saggetant.*

¹⁹ Áiá Kanhánay molká hapt kawm prósh dát o áyáni sardhagár wati kawmay mirás o melkat kort. ²⁰ É sajjahén sargwast, kesás chársad o panjásh sálá butant. Cha áiá rand, tán Samuul nabiy zamánagá, Hodáyá pa áyán kázia dásht.

²¹ “Padá áyán bádsháhé lóthet, gorhá Hodáyá cha Benyáminay kabilahá, Kisay chokk Shául, tán chel sálá áyáni bádsháh kort. ²² Randá Hodáyá á, cha bádsháhiay tahtá ér gétk o Dáud áyáni bádsháh kort. Hodáyá pa áiá gwáhi dát ke ‘mani del cha Yassiy chokk Dáudá rázig ent o á mani har wáhagá sarjama kant.’ ²³ Cha hamá Dáuday nasl o padréchá, pa Esráilay kawmá wati kawl dátagén rakkénók, bezán Issái ráh dát. ²⁴ Cha Issáay áyagá pésar, pákshódókén Yahyáay sarjamén Esráilay kawmay démá jár jat ke á cha wati gonánán pashómán bebant o pákshódi bekanant. ²⁵ Wahdé Yahyáay hezmatkáriay wahd halás bayagi at, áiá jost kort: ‘Shomay hayálá man kay án? Man, á naán ke shomá hayála kanét. Á cha man o randa kayt o man áiy kawshbandáni bójagay láhek ham naán.’

²⁶ “Oo brátán, oo Ebráhémay nasl o padréch o darkawmén Hodátorsán! É rakkénagay kolaw o paygám, pa máshomá rawán dayag butag. ²⁷ Urshalimay mardom o áyáni hákemán, Issá pajjásh nayáwort, bale gón áiy mayárig kanagá, áyán nabíáni hamá habar purah o sarjam kortant ke har Shabbatay róchá wánaga bant. ²⁸ Harchont áyán pa Issáay koshagá hech sawab o dalilé nadist, bale cha Pilátusá lóthetesh ke áiá bekóshárenit. ²⁹ Áiy bárawá harché nebisag butagat, áyán sarjam kortant o cha salibay dárá ér gétk o kabresh kort. ³⁰ Bale Hodáyá cha mordagán zendag kort o ³¹ hamá mardom ke cha Jalilá áiy hamráhiá Urshalimá átkagatant, tán bázén róchéá áesh dist. Nun á, kawmay démá pa Issáyá gwáhia dayant. ³² Annun má pa shomá hamé mestágá dayagá én, á kawl ke Hodáyá gón may pet o pirokán kortagat, ³³ gón Issáay zendag kanagá, pa má ke áyáni chokk o óbádag én, sarjam o purahi kort, anchosh ke Zaburay domi bahrá nebisag butag:

‘Taw mani Bacch ay,

maróchi man tará pédá kortag.’[†]

³⁴ “Hodáyá gón é habarán ham kawl dátag ke Issáyá cha mordagán zendaga kant o jóni hechbara napussit:

‘Hamá pák o deljamén kawl o wádaháni barkatá shomará bakshán ke gón Dáudá labzon kortagat.’[‡]

³⁵ Paméshká, dega jágahé ham átkag: ‘Taw wati hamá Pákéná sarhag o pussagá naylay.’ ³⁶ Wahdé Dáudá wati wahd o bárigá, Hodáyá wáhag sarjam kortant, mort o wati pet o pirokáni dhawlá kabr but o áiy jón ham pusset. ³⁷ Bale á kas ke Hodáyá cha mordagán zendag kort, áiy jón napusset.

³⁸ “Oo brátán! Bezánét, cha Issáay némagá gonáháni pahelliay jár pa shomá janaga bit. ³⁹ Mussáay Sharyatá shomará cha gonánán rakként nakort. Bale nun harkas ke Issá Masihay sará báwara kant áiy sajjahén gonáh pahell kanaga bant. ⁴⁰ Hozzhár bét, chosh mabit ke nabíáni habar shomay sará sarjam bebant:

⁴¹ *‘Oo malándh o maskará kanókán!*

Bechárét, hayrán o habakkah bebét,

chiá ke man shomay dawr o bárigá anchéen káré kanagá án ke toré shomará begwashant ham, shomá hechbar báwara nakanét.’[§]

⁴² Wahdé Pulos o Bárnábá cha kanisahá dar áyag o rawagá atant, mardomán cha áyán lóthet ke démi Shabbatay

* **13:18** 13:18 Lahtén daznebeshtá átkag: “áyáni chárégi kort”. [†] **13:33** 13:33 Zabur 2:7. [‡] **13:34** 13:34 Eshayá Nabiy Ketáb 55:3. [§] **13:41** 13:41 Habakuk Nabiy Ketáb 1:5.

róchá padá hamé sarháláni sará géshter habar bekanant. ⁴³ Mocchiay pád áyagá rand, bázén Yahudi o darkawmén Yahudi butagén Hodátorsén mardom, Pulos o Bárnábáay hamráh butant. Pulos o Bárnábáyá á delbaddhi dát o gwashtant ke Hodáay mehr o rahmatáni sáhegá bemánant.

⁴⁴ É dega Shabbatá, kamm o gésht shahray sajjahén mardom pa Hodáwanday habar o kolaway gósh dáragá mocch butant. ⁴⁵ Wahdé Yahudián mardománi bázén mocchi dist, cha kast o konnatá zahr geptant, Pulosesh béezat kort o áiy habaráni démá óshtátant. ⁴⁶ Á wahdá, Pulos o Bárnábáyá gón deléri áyáni passawá gwasht: "Mará cha sajjahénán pésar, Hodáay habar gón shomá gwashtagí at, bale shomá Hodáay habará namannét o watá abadmánén zenday láheka nazánét, nun má darkawmáni gwará rawén. ⁴⁷ Hodáwandá mará hamé hokm dátag ke:

'Man tará darkawmáni nur o rozhn kortag, ke taw rakkénag o nejátá, tán donyáy goddhi marz o simsarán berasénay.' ^{*}

⁴⁸ Wahdé darkawmán é habar eshкотant, báz gal o shádán butant o Hodáwanday habarash sharap dátant o haminchok mardomá imán áwort ke Hodáyá pa namiránén zendá gechéen kortagat. ⁴⁹ É dhawlá, Hodáwanday habar á sajjahén damagá sheng o tálán but.

⁵⁰ Bale Yahudián, sharapdár o Hodátorsén janén o shahray námdárén mardén, Pulos o Bárnábáay ázár dayag o badwáhiá shóréntant o áesh cha á damagá dar kanáéntant. ⁵¹ Pulos o Bárnábáyá wati pádáni danz hamódá chandhetant o Ekoniahay shahrá shotant. ⁵² Morid gal o shádán, cha Pákén Ruhá sarréech atant.

14

Pulos o Bárnábá Ekoniahá rasant

¹ Pulos o Bárnábá wati hél o ádatay padá, Ekoniahay shahrá ham Yahudiáni kanisahá shotant. Ódá áyán anchén dábéá habar kort ke bázén Yahudi o Yunáni báwarmand butant. ² Bale hamá Yahudi ke báwar kanagá tayár naant, á dega darkawmén mardomesh shóréntant, áyáni pegresh Pulos o Bárnábáay helápá tarréent o zahrreéch kortant. ³ Pulos o Bárnábáyá tán bázén wahdé hamódá dásht o pa natorsi Hodáwanday bárawá

sháhediesha dát. Hodáwandá á, pa mójezah o ajabbatén nesháni pésh dáragá wák o twána dátant o é dhawlá paddaria kort ke áiy mehr o rahmatay kolaw o paygám rást ent. ⁴ Shahray mardománi nyamá jérhah o nátepákiá sar kasshet. Bahré Yahudiáni némagá but o á dega bahr gón Issáay kásedán hamráh but. ⁵ Yahudi o darkawm hór butant o gón wati hákemáni hamráhiá, kásedáni ázár dayag o sengsár kanagay shawresh kort. ⁶ Kásed sahig butant o cha ódá jest o Likáuniahay damagay shahr, Lestrah o Derbeh o é dega kerr o gwaráni halk o hankénán shotant. ⁷ Hamódá Issáay wasshén mestágesh tálán kort.

Pulos o Bárnábá Lestrahá rawant

⁸ Lestrahá, yak mardé hastat ke pédáeshi langé at o hechbar gámi jat nakortagat. ⁹ Á Pulosay habarán eshkonagá at, Pulosá tachkátachk áiy némagá cháret o zánti ke áiá pa drahbakshíá imán o báwar hast. ¹⁰ Gorhá Pulosá pa borztawári gwasht: "Pád á, wati pádáni sará bósht." Á mard jáh serret o rawagá lagget. ¹¹ Wahdé mardomán Pulosay é kár dist, Likáuniahay gálwára gwashtesh: "É hodá ant ke bani ádamay shekl o dróshomá pa má ér átkagant." ¹² Áyán, Bárnábá "Zeus" námént o Pulos "Hermes",^{*} chiá ke masterén habar kanók Pulos at. ¹³ Zeusay parasteshgáh shahray dhanná at. Parasteshgáhay masterá, pa Pulos o Bárnábáyá káigar[†] gók o poll o shósheng shahray darwázagá áwortant. Parasteshgáhay master o mardománi romb hamé shawrá atant ke pa áyán korbánig bekanant.

¹⁴ Wahdé kásed, bezán Pulos o Bárnábá cha áyáni é wáhagá sahig butant, wati pocch o póshákán derrán o cháak dayáná, gón kukkáré mardománi mocchiay nyamá átkant. ¹⁵ Gwashtesh: "Oo mardomán! Shomá ché kanagá ét? Má shomay dhawlén bani ádam én o bass. Átkagén shomará é mestágá bedayén ke é haráb o náhudagén káran yalah bekanét o barhakk o namiránén Hodáay keshká begerét. Áiá ásmán, zemin, daryá o harché ke áyáni tahá hastent, addh kortagant. ¹⁶ Pésarigén zamánagá, Hodáyá sajjahén kawm mókal dátagant ke wati ráhá wat gechéen bekanant. ¹⁷ Angat ham áiá watá cha gwáhi dayagá dur nadáshtag. Pa wati mehryar darshán kanagá, cha ásmáná hawra gwárenit o porbarén kesharán pa mósoma ródénit,

^{*} 13:47 13:47 Eshayá Nabiy Ketáb 49:6.

^{*} 14:12 14:12 Yunániáni báwar at ke Zeus o Hermes do hodá ant, Zeus masterén hodá o Hermes hodáyáni tarjomán o sohongó ent. [†] 14:13 14:13 Káigar, bezán mazanén narén gók.

shomará pa alkápi ward o waráka dant o shomay delán cha wasshián sarrécha kant.”¹⁸ Gón é habarán, kásedán pa hillaté mardom cha hayrát o korbánig kanagá dáshtant.

¹⁹ Bale lahtén róchá o rand, bázén Yahudi cha Antákiah o Ekoniahá átk o shahray mardomesh wati némagá tarréntant. Pulosesh sengsár kort o gón é haylál ke mortag, kasshán kanán cha shahrá dhann dawr dát,²⁰ bale wahdé morid Pulosay chapp o chágérdá átk o mocch butant, á pád átk o shahrá per tarret. Domi róchá, Bárnábáay hamráhiá, Derbehay shahrá shot.

Pulos o Bárnábá Antákiahá pera tar-rant

²¹ Mán Derbehay shahrá ham, Issáay wasshén mestágesh tálán kort o bázén mardomé moridesh kort. Padá Lestrah, Ekoniah o Antákiahá per tarretant.²² Moridesh sar o sój kort o delbaddhi dátant ke wati báwará mohr bedárant. Gwashtesh: “Má, gón bázén sakkí o sóriáni saggagá Hodáay bádsháhiá shota kanén.”²³ Áyán pa har kelisáya kamásh gechén kort o gón róchag o dwáyá, á kamáshesh hamá Hodáwanday báhóth kortant, ke áiy sará báwaresh kortagat.²⁴ Cha Pisidiahay damagá gwazán but o Pampiliahá átkant.²⁵ Padá Pergahá, Hodáay mestágesh rasént o dém pa Attáliahay shahrá[†] jahldá butant.

²⁶ Cha Attáliahá, bójiǵá swár but o Antákiahá per tarretant. Cha hamódá pa hamá kár o mohimmá[§] Hodáay mehr o rahmatáni sepordah kanag butagatant, ke nun áyán sarjam kortagat.²⁷ Wahdé Pulos o Bárnábá Antákiahá rasetant, áyán kelisáay mardom mocch o yakjáh kortant. Har káré ke Hodáyá cha áyáni dastá kanáéntagat, gón áyán gwashtesh o hálesh dát ke Hodáyá pa darkawmán ham imán o báwarmandiay darwázag pach kortag.²⁸ Pulos o Bárnábá tán dérá gón Antákiahay moridán mantant.

15

Urshalimay diwán

¹ Cha Yahudiahá lahtén mardom Antákiahá átk o brátesh tálím dátant o gwashtesh: “Tán wahdé shomá Mussáay Sharyatay randgiriá sonnat o borrok makanét, rakketa nakanét.”² Pulos o Bárnábáyá, é sarhálay sará gón áyán dapják kort o sakk nátepak butant. Gorhá shawresh kort ke Pulos o Bárnábá gón

dega lahténá, Urshalimá berawant o gón kásed o kamáshán é jérhahay bárawá habar bekanant.³ Kelisáya áyáni ráh dayagay chen o lánch kort o áyán cha Pinikiah o Sámerahay ráhá gwazán, har jáh é wasshén hál dát ke bázén darkawmán ham che paymá Hodáay ráh zortag. Cha é hálay eshkonagá, sajjahén brát báz wassh o shádán butant.

⁴ Wahdé Urshalimá átk o rasetant, kelisá o kásed o kamáshán wasshátk kortant. Har káré ke Hodáyá cha áyáni dastá kanáéntagat, hálesh dátant,⁵ bale lahtén báwarmand ke péshá Parisiáni rombá butagatant, pád átkant o gwashtesh: “Hamá sajjahén darkawm ke imánesh áwortag, báyad sonnat o borrok kanag bebant o hokm dayag bebit ke Mussáay Sharyatay randgiriá bekanant.”⁶ Gorhá kásed o kamáshán pa é habaray gishshénagá diwán kort.⁷ Bázén habar o hálá rand, Petros pád átk o gón áyán gwashti: “Oo brátán! Shomá sharra zánét ke báz wahdá pésar, Hodáyá cha shomay nyámá maná gechén kort ke darkawm cha mani zobána Issáay wasshén mestágá beshkonant o báwar bekanant.⁸ Hamá Hodá ke harkasay delay hálá zánt, darkawmi ham Pákén Ruh bakshet o pa wat zortant, anchosh ke Pákén Ruhi mará bakshetagat.⁹ Hodáyá mayg o áyáni nyámá hech park o péré naesh, wahdé á báwarmand butant, Hodáyá áyáni del ham pák o palǵár kort.¹⁰ Nun shomá chiá moridáni gardená gránén jogé* bandét o Hodáyá chakkásét? É bárá, na má zorta kanén o na may pirénán zort kortag.¹¹ Enna! Mará báwar ent, anchosh ke má gón Hodáwandén Issáay mehr o rahmatay tohpahá rakkén, hamé dhawlá á ham rakkant.”¹² Petrosay habaráni eshkonagá rand, sarjamén mocchi bétawár but o Bárnábá o Pulosay gapp o tránesh gósh dáshtant, ke Hodáyá cha áyáni dastá, darkawmáni nyámá chónén mójezah o ajekkái pésh dáshtag.

¹³ Wahdé áyán wati gapp o trán halás kort, Ákubá darráént: “Oo brátán! Mani habarán delgósh kanét.¹⁴ Shamun Petrosá gwasht ke Hodáyá che paymá awali bará darkawmáni némagá pa mehr hayál gwar kort ke cha áyán ham pa wati námá kawmé gechén bekant.¹⁵ É gón nabíáni habarán yakk o hamdap ent, anchosh ke nebisag butag:

¹⁶⁻¹⁷ ‘Á Hodáwand ke é sajjahén kárán yakjáh sarjama kant chosha gwashti: “Cha eshiá rand, man padá káyán

‡ 14:25 14:25 Attáliah, bezán annugén Antáliah. § 14:26 14:26 Mohimm, bezán háсэн káré. * 15:10 15:10 Bechár: Mattá 11:29. † 15:16-17 15:16-17 Dáuday kaptagént tambu, bezán Hodáay bakshetagént bádsháhi.

o Dáuday kaptagén tambuá'nók o mekka kanán.

Man áiy wayránén jáhán padá jórhenán o rásta kanán, tánke á dega kawm dém pa Hodáwandá byáyant, bezán á sajjahén darkawm ke mani nám áyáni delá neshtag."

¹⁸ *É habar cha dérigén zamánagán zánag butag.'*[‡]

¹⁹ "Paméshká mani hayálá, má á darkawmáni ráhá janjál addh makanén ke Hodáay ráhesh zortag, ²⁰ pa áyán benebisén: cha hamá korbánigán ke gón botáni námay geragá nápák butagant, cha zená o bénagíá, cha mordárén dalwatáni gósh tá, anchosh ham cha hónay waragá pahréz bekanét. ²¹ Chiá ke cha kwahnén zamánagán, har shahrá Mussáay Shary-atay jár perrénókén mardom butagant ke har Shabbatay róchá mardomesh kanisaháni tahá wánéntagant."

Pa darkawmén báwarmandán, Urshal-ima kelisáay kágad

²² Gorhá gón sarjamén kelisáyá horigá, kásed o kamáshán shawr kort ke cha wati nyámá lahtén mardom gechén bekanant o Pulos o Bárnábáay hamráhiá Antákiahá rawán bedayant. Áyán cha wati némagá Yahudá ke Barsábá gwashag butagat o Silás, gechén kortant ke brátáni nyámá, é doén sarókén mardom atant. ²³ Áyáni dastá kágadé dátesh ke é dhawlá at:

"Má, kásed o kelisáay kamáshén mardom o shomay brát, shomará, bezán Antákiah, Suriah o Kilikiahay darkawménbáwarmandén brátán drud o drahbáta[§] dayén. ²⁴ Má eshкотag ke bé may parmáná cha may nyámá lahtén báwarmand hamángor átkag o gón wati habarán shomará delparkah* o paréshánesh kortag. ²⁵ Paméshká má pa hamdeli shawr kort ke cha watá lahtén mardom gechén bekanén o gón wati dóstén Pulos o Bárnábáay hamráhiá, pa shomá ráh bedayén, ²⁶ hamá doén brátáni hamráhiá ke pa may Hodáwandén Issá Masihay námá wati sáhay nadr kanagá chakk o pad nabutagant. ²⁷ May é doén kásed Yahudá o Silás, hamá habarán ke má pa shomá nebeshtagant, sarzobáni ham gwashant. ²⁸ Pákén Ruh o má, hamé sharter zántag ke lahtén bonyádi gappán o abéd, gránén béré shomay kópagán maladdhén. ²⁹ Shomá cha botáni námá korbánig kortagén gósh tá,

cha hónay waragá, cha mordárén dalwatáni gósh tá o cha zená o bénagíá pahréz bekanét. Cha é kárán watá dur dárag, pa shomá báz sharr ent. Wassh o salámat bátét."

³⁰ Randá, é gechén kortagén brát Antákiahá dém dayag butant. Ódá shot o kelisáay sajjahén mardomesh yakjáh kortant o kágadesh pa áyán rasént. ³¹ Áyán é kágad wánt o cha eshiay deljami o delbaddhi dayókéen kolawá báz wassh butant. ³² Yahudá o Silás ke wat ham nabi atant, óday brátesh gón bázén habarán delbaddhi dát o áyáni báwaresh mohrter kort. ³³ Chizé wahdá ódá mantant o randá, brátán á pa wasshi o salámati roksat kortant o cha hamódá ke dém dayag butagatant, hamá jáhá per tarretant. ³⁴ † ³⁵ Pulos o Bárnábá, Antákiahá mahtal butant o gón dega bázén mardomán hór but o Hodáwanday habaresh tálim dayán o sheng kanána kort.

Pulosay domi mestági sapar

Pulos o Bárnábáay jérhah

³⁶ Lahtén róchá o rand, Pulosá gón Bárnábáyá gwasht: "Sajjahén hamá shahrán ke má Hodáwanday habar raséntag, byá padá hamódá berawén o brátán bechárén ke báren á chón ant." ³⁷ Bárnábáay wáhag at, Yuhannáyá ke Markás ham gwashag butagat, hamráh bekant, ³⁸ bale Pulos áiy hamráh kanagá razá naat chiá ke áiy, Pampiliahay damagá á yalah dátatagant o é káray tahá áyáni hamráh nabutagat. ³⁹ É dhawlá, Pulos o Bárnábá watmánwatá tepák nabut, nathahetant o cha yakdomiá jetá butant. Bárnábá, Markásay hamráhiá, bójiagéá swár but o Kebresá shot. ⁴⁰ Bale Pulosá, Silás gechén kort o brátán á, Hodáwanday mehr o rahmatáni báhóth kortant. Nun Pulos sar gept. ⁴¹ Kelisáyán mohr o zórmant kanán, cha Suriah o Kilikiahay damagán tarr o táb kanáná shot.

16

Timutáusay hamráhi

¹ Padá Pulos, Derbeh o Lestrahay shahrán átk o raset. Lestrahá, Timutáus námén moridé hastat ke áiy mát báwarmandén Yahudi o pet Yunánié at. ² Lestrah o Ekoniahay brátáni nyámá Timutáus báz néknámén mardé at. ³ Pulosay wáhag at ke Timutáusá wati sát o saporá hamráh bekant, paméshká cha rawagá pésar, pa Yahudiáni hátera sonnatí kanáént, chiá ke á hand o

‡ 15:18 15:18 Ámus Nabíay Ketáb 9:11-12. § 15:23 15:23 Drud o drahbát, salám o alayk. * 15:24 15:24 Delparkah, bezán paréshán, deltrakk. † 15:34 15:34 Bázén daznebeshtá band 34 átkag ke gwashit: "Bale Silásá shawr kort hamódá bemánit" néstent.

damagáni sajjahén mardomán zántagat ke Timutáusay pet Yunánié. ⁴ Shahr pa shahr tarrán butant o cha Urshali-maykásed o kamásháni gishshéntagén ráh o rahbandán,* brátesh pa mannagá sahig o sarpada kortant. ⁵ É dhawlá, kelisáyáni báwarmand róch pa róch géshtera butant o báwaresh ham mohrtera but.

Pulosay elhám

⁶ Pulos o áiyay hamráh cha Prijiah o Galátiahay damagán gwastant, chiá ke Pákén Ruhá á, Ásiáyay damagá Hodáay habaray rasénag o sheng kanagá makan kortant. ⁷ Wahdé Misiahay simsarán rasetant, Bitiniahay némagá rawagay johdesh kort bale Issáay Ruhá pa óday rawagá naeshtant. ⁸ Gorhá cha Misiahá gwazán but o Truásay bandená átkant. ⁹ Hamódá shapá Pulosá yak Makduni mardé pa shobén dist ke óshtátagat o mennat kanán at ke “daryáyá begwázén, Makduniahá† byá o mára komak kan.” ¹⁰ Cha é shobéná rand, má‡ pa Makduniahay rasagá eshtáp kort, chiá ke cha é shobéná deljam butén, Hodáay razá hamesh ent ke má berawén o wasshén mestágá óday mardománi nyámá sheng o tálán bekanén.

Lidiahay báwarmandi

¹¹ Má cha Truásá bójigá swár but o dém pa Sámutrákiay jazirahá shotén. Domi róchá cha ódá Nyápuulisay bandená átk o rasetén. ¹² Cha ódá Pilipiá shotén, ke Makduniahay á bahray§ mazanén shahré o Rumiáni menendjáh ent o tán chizzé róchá hamódá mahtal butén. ¹³ Shabbatay róchá, cha shahray darwázagá dar kapt o kawray lambá shotén. May hayál at balkén ódá Yahudiáni zegr o dwáay jágahé bebit. Hamódá neshtén o gón lahtén janéná ke pa zegr o dwáyá átkagatant, habará goláesh butén. ¹⁴ Janénáni nyámá, Lidiah námén Hodátorsén* janéné ham gón at ke Tyátirahay shahray mardomé at o jamurangén† gránkimmatén god bahá kanóké at. Á Pulosay habarán gósh dáragá at ke Hodáwandá áiyay delay chamh pach kortant o áiyá Pulosay habar mannetant. ¹⁵ Lidiahá gón wati lógay sajjahén mardomán pákshódi kort. Pákshódiá rand, áiyá dazbandi kort o gwasht: “Agan shomá maná Hodáwandén Issáay hakkén mannógeré zánét, gorhá byáét mani

lógá bedárét.” Lidiahá gón wati bázén gwashagá mára mannént.

Pulos o Silás bandijáhá

¹⁶ Yak róché má zegr o dwáay jágahá rawagá atén, móledá distén. Móledá jenné per at ke cha áiyay zóra gaybguia kort o cha eshiá pa wati hodábondán bázén zarr o mália katthet. ¹⁷ Á, Pulos o may randá átk o pa kukkár gwashagá at ke “é mardom, borzén arshay Hodáay hezmatkár ant o shomará rakkénagay yak ráhé sója dayant.” ¹⁸ Áiyá tán báz róchá anchosh gwashán kort. Godhsará, Pulos delrésh o bézár but, chakki tarrént o gón jenná gwashti: “Man tará pa Issá Masihay námá hokma dayán ke cha eshiá dar kap.” Hamá damáná jenn cha áiyá dar átk. ¹⁹ Wahdé móleday hodábondán dist ke áiyáni nap o katthay omét halás but, gorhá áyán Pulos o Silás gept, kasshán kort o bázará, shahray masteráni Kerrá bortant. ²⁰ Káziani démá pesh kortant o gwashtesh: “É mardom Yahudi ant o may shahrá jérhah o pléndhi kanagá ant. ²¹ Má Rumi én o é mára anchén dód o rabédag tálim dayagá ant ke áiyáni mannag o kár bandag pa má rawá naent.” ²² É dega mardom ham gón but o Pulos o Silásay démá óshtátant. Shahray masterán parmán dátant ke Pulos o Silásay pochhán bekasshant o áyán latth bejanant. ²³ Cha bázén latth o kotthá rand, bandijáhá bort o bandesh kortant. Bandijáhay negahpánesh parmán dát ke áiyáni negahpániá sharr delgósh bekant. ²⁴ Hamé hokmay sará, bandijáhay negahpániá bandijáhay tók tóki kóthiá bortant o áiyáni pád konthband kortant.

²⁵ Shapnéhá, Pulos o Silás jélay tahá dwá kanán, Hodáyá satá kanagá atant. É dega bandig gósh dáragá atant. ²⁶ Anágat, mazanén zeminchandhé but ke bandijáhay bonred,‡ sorag o jombagá lagget. Hamá damáná, sajjahén darwázag pach butant o jéliáni zamzil botkant. ²⁷ Jélay negahpán, cha wábá pach larzet o ágáh but, disti ke bandijáhay sajjahén darwázag pach ant, gománi kort ke kaydi tatkg o shotagant. Nun pa watkoshiá zahmi kasshet. ²⁸ Bale Pulosá tawár kort o gwasht: “Watá táwan maday, má sajjahén wati jágahá én.” ²⁹ Jélay negahpániá cherágé lóthet o tachána bandijáhay tóká shot o gón drahgá Pulos

* **16:4** 16:4 Bechár: Kásedáni Kár 15: 20, 29. † **16:9** 16:9 Á zamánagay Makduniahá, maróchigén Yunánay shomáli bahr ham gón at. ‡ **16:10** 16:10 Cha ed o rand, é Ketábay nebisók, bezán Luká, wat jáhé jáhé gón ent. § **16:12** 16:12 Á zamánagá, Makduniahay chár bahr butagant. * **16:14** 16:14 Hodátorsay maná esh ent ke Lidiah darkawmén báwarmandé at. † **16:14** 16:14 Jamu, rangé ke Pársiá banafsh o Orduá banafshi gwashanti. Jamu gránkimmatén rangé at. ‡ **16:26** 16:26 Bonred, bezán lóg yá diwáleyay awali o johlterén red.

o Silásay pádán kapt. ³⁰ Á cha jéla dar kortant o gwashiti: “Oo wájahán! Man pa wati rakkagá ché bekanán?” ³¹ Áyán passaw dát: “Hodáwandén Issáay sará imán byár gorhá taw o tai lógay sajjahén mardoma rakkét.” ³² Áyán Hodáwandén Issáay wasshén kolaw pa áia o áiy lógay sajjahén mardomán rasént. ³³ Shapay wahdá, Pulos o Silási gón wat bortant o áyáni thappi shoshtant. Á o áiy lógay mardomán hamá damáná pákshódi kort. ³⁴ Randá áia wati lógá bort o warag dátant, áiy jend o áiy lógay sajjahén mardom, cha áiy Hodábawariá gal o shádán butant.

³⁵ Domi róchá, kázián wati kárdár jélay negahpánay gwará ráh dátant ke “é mardomán yalah beday.” ³⁶ Jélay negahpáná Pulos hál dát o gwashit: “Maná cha káziáni némagá parmán rasetag ke shomará yalah bedayán. Paméshká shomá pa wasshi o salámati berawét.” ³⁷ Pulosá passaw dát: “Má Rumi báshendah[§] én, bale é shahray masterán, mára bé hokmay borragá shahray mardománi démá janééntag o jél kortag. Nun, á chérokái mára cha jéla kasshaga lóthant. Chosha nabit, báyad ent páde wat hamedá byáyant o mára dar bekanant.” ³⁸ Kárdarán, é passaw pa kázián rasént. Wahdé sahig butant ke á doén Rumi báshendah ant, torsetesh. ³⁹ Nun wat áyáni kerrá átkant o cha áyán pahelliesh lóthet o mennatwár butant ke cha é shahrá berawant. ⁴⁰ Cha bandijáhá dar áyagá rand, Pulos o Silás Lidiahay lógá shotant o gón báwarmandán* gend o nendesh kort, delbaddhiesh dátant ke wati imánay sará mohr o káhem bóshtant o padá cha Pilipiay shahrá dar kapt o shotant.

17

Tesálunikiay shóresh

¹ Pulos o Silás, cha Ampipulis o Apuluniahay shahrán gwastant o Tesálunikiá átkant, Yahudián ódá kanisahé hastat. ² Pulos wati hél o ádatay sará kanisahá shot o tán say Shabbatay róchá cha Pákén Ketábán gón áyán gapp o tráni kort. ³ Áia gón bázén bayán o mohrén dalilán paddar kort ke Masih báyad ent sakkí o sóri besaggit, bemerit o padá cha mordagán jáh bejant. Gwashagá at: “É Issá ke áiy báravá man shomará sahig kanagá án, é hamá Masih ent.” ⁴ Cha Yahudián lahtén, anchosh ham cha

á Hodátorsén Yunánián o dega mazanén rombé cha námdarén janénán, é habar pa del mannetant o Pulos o Silásay hamráh butant. ⁵ Bale Yahudián gón Pulos o Silásá hasadd kort. Cha bázará lahtén lát o lóparén mardom mocch kort, rombé jórhént o shahray tahá shóreshesh kort. Áyán, Pulos o Silasay shóház o mardománi mocchiay démá áragá, Yásunay lógay sará orosh bort. ⁶ Bale wahdé nadistan-tesh, Yásun o dega lahtén báwarmandén brátesh gept o gerrán kanán shahray masteráni jergahá pésh kortant. Á pa kukkár gwashagá atant: “É mardomán, donyá pa sar zortag o nun edá átkagant. ⁷ Yásuná ham wati lógá bortagant. Rumay Kaysaray náparmániá kanant o gwashant dega bádsháhé hast ke námi Issá ent.” ⁸ Cha é habaráni eshkonagá, mardom o shahray masterán torset o deltaparkah butant. ⁹ Cha Yásun o áiy hamráhán mánzamániesh* gept o yalahesh dátant.

Pulos o Silás, Biriayahay shahrá

¹⁰ Anchosh ke shap but, brátán Pulos o Silás Biriayahay shahrá ráh dátant. Óday rasagá, Yahudiáni kanisahá shotant. ¹¹ É shahray Yahudi cha Tesálunikiay shahray Yahudián wáhagdárter† atant. Áyán, pa hobb o hodók Hodáay habar mannet o har róch Pákén Ketábeshá wántant o patth o pólesha kort tán bezánant bárén Pulosay habar rást ant yá na? ¹² Cha áyán bázénéá báwar kort o dega bázén námdarén Yunáni mardén o janéné ham báwarmand but. ¹³ Wahdé Tesálunikiay Yahudi sahig butant ke Pulos Biriayahay shahrá Hodáay habará sheng o tálán kanagá ent, hamódá shotant, mardomesh shórént o shahrá áshópesh pád kort. ¹⁴ Gorhá, brátán eshtápi Pulos tayábá bort o rasént, bale Silás o Timutásusá Biriáhá dásht. ¹⁵ Pulosay hamráhén roksat kanók, gón áia tán Átenay shahrá átkant. Cha Pulosá é parmánesh gept ke Silás o Timutásus wata zutt áiy kerrá berasénant, nun per tarretant.

Pulos, Átenay shahrá

¹⁶ Wahdé Pulos, Átenay shahrá pa Silás o Timutásusay áyagá wadárig o rahchár at, áia dist ke shahr cha botán porr ent. Báz gamig o delranj but. ¹⁷ Paméshká kanisahá shot o gón Yahudi o darkawmén Hodátorsén mardomán gend o nendia kort. Bázaráy chárrahay sará ham gón rahgwazén mardomán har róch gapp o

§ 16:37 16:37 Báshendah, bezán shahrwand. Rumay chérdastén kawmáni báz kammén mardom Rumi báshendah atant. * 16:40 16:40 Asligén Yunáni nebeshtánka gwashit: “gón brátán”. * 17:9 17:9 Mánzamáni, bezán zamánat. † 17:11 17:11 Wáhagdár, bezán lóthók, delmánag, hodónák.

tránia kort. ¹⁸ Ódá, lahtén Epikuri o Estuiki[‡] pilsup gón áia dapa kapt. Cha áyán, lahténá gwasht: “É puttár ché gwashagá ent?” Dega lahténá gwasht: “Gwashaygá, bégánagén hodáyáni járá perrénagá ent.” Áyán, paméshká é habar kort ke Pulos, Issá o mordagáni jáh janagay wasshén mestágá tálán kanagá at. ¹⁹ Áyán Pulos, “Ariupágusá”[§] hort o gwashtesh: “Buta kant má bezánén é nókén tálim ke taw dayay, chi ent? ²⁰ Tai habar may góshán ajab ant o má esháni mánáyá zánaga lóthén.” ²¹ Átenay molki o darmolki sajjahén mardomán, abéd cha é kára dega káré néstat ke benendant o nókén hál o jáwaráni bárawá gapp o trán bekanant o beshkonant.

²² Nun Pulos, Ariupágusay diwánjáhá óshtát o tráni kort: “Oo Átenay jahmenendán! Man gendagá án ke shomá báz dindóstén mardom ét. ²³ Wahdé shahray sayl o sawádá dar kaptán, bázén bot o korbánjáhon distant, áyáni tahá yak anchén korbánjáhé ham diston ke ódá nebeshtagat: ‘Pa hamá Hodáyá ke zánag nabutag.’ Hamá Hodá ke shomá áia angata nazánét bale áia parastesha kanét, man hamá Hodáay bárawá gón shomá trána kanán. ²⁴ Á Hodá hamá ent ke é donyá o eshiay tahay sajjahén chizzá addh kortagant. Á wat, zemín o ásmánay Hodáwand ent, paméshká áia mardománi dastay jórh kortagén parasteshgáhn jágaha nabit. ²⁵ Á pa Ensánay hech chizzá wázmant naent o hechkas pa áia hezmaté korta nakant, chiá ke á wat harkasá zend o sáha bakshit o ensánay é dega lóth o garazán ham sarjama kant. ²⁶ Áia donyáay sajjahén mardom cha yakkéá pedá kortag o sajjahén kawm o kothom donyáay chárén kondhán tálán kortagant. Áyáni dawr o bárig o hand o jágaháni marz o simsari ham, pésará gisshéntagant, ²⁷ tán mardom Hodáyá shóház bekanant o balkén áia dar begéjant, bale rásti esh ent ke á cha má hechkasá dur naent. ²⁸ ‘Chiá ke may zend, jonzag* o harkat o hasti cha hamáia ent.’ Anchosh ke cha shomay jenday sháerán lahténá gwashtag: ‘Má ham áiy poshtpad én.’ ²⁹ Agan má Hodáay poshtpad én, gorhá nabáyad ent má Hodáyá gón sohr, nograh o sengá addh kortagén botán hamdarwar bekanén ke mardomán gón wati hayál o honará jórhéntagant. ³⁰ Hodá,

cha ensánay pésarigén zamánagáni é názántiá sar gwastag, bale nun á har jágah harkasá parmán dayagá ent ke pashómán bebét. ³¹ Chiá ke áia yak róché gisshéntag ke á róchá donyáay sajjahén mardománi kortagén kárán gón ensáp dádrasi† o dáwaria kant o pa é maksadá yakké gechéni kortag. Hodáyá á paméshká cha mordagán zendag kort ke pa harkasá é habaray rásti pakká bebit.”

³² Wahdé áyán Pulosay é habar eshkont ke Hodá mordagán padá zendaga kant, lahténá áiy sará malandh o maskará kort, bale dega lahténá gwasht: “É bárawá dega baré márá géshter sarpad kan.” ³³ Gorhá Pulos, cha diwáná dar átk. ³⁴ Lahtén mardomá áiy habar mannet o Issáay sará báwarmand but. Cha báwar kanókán yakké, Ariupágusay diwánay báské at ke áiy nám Diunisius at o yak janéné ke námi Dámáris at o gón áyán dega lahtén ham gón at.

18

Pulos, Korentay shahrá

¹ Randá, Pulos cha Átenay shahrá dar átk o Korentay shahrá shot. ² Ódá gón Akwilá námén yak Yahudiéá dochár kapt* ke Pontusay damagá pedá butagat o gón wati janén Priskiláyá cha Itáliáyá molká Korentay shahrá nóki átkagat. Chiá ke Rumay Kaysar Klawdiúsá parmán dátagat ke sajjahén Yahudi cha Rumay shahrá dar bekapant. Pulos áyáni lógá shot. ³ Akwilá o Priskilá ham Pulosay dhawlá gedándóch atant. Paméshká Pulos hamáyáni kerrá mant o gón áyán hamkár but. ⁴ Har Shabbatay róchá, Pulosá kanisahá gón Yahudi o Yunánián gapp o trána kort o áyáni báwarmand kanagay johdá at.

⁵ Wahdé Silás o Timutáus cha Makeduniáhá átk o gón Pulosá hór butant, á Hodáay habaráni sheng o tálán kanagá dazgath o goláesh at. Áia pa Yahudián paddara kort o gwasht: “Issá hamá Masih ent.” ⁶ Wahdé Yahudián Pulosay habar namannent o áesh bad o rad gwasht, Pulosá wati gwaray kabáh dar kort o á shahray danz áyáni démá chandhetant o gwashti: “Man wati kár kortag. Nun shomay hón shomay wati gardená ent o man bémayár án. Cha ed o rand, Hodáay habará darkawmáni nyámá sheng o tálána kanán.” ⁷ Gorhá, cha áyáni kanisahá dar átk o Titius Yustus námén Hodátorsén mardéay lógá shot.

[‡] **17:18** 17:18 Epikuriáni é báwar at ke donyáay maksad shádkámi o washtámi ent o Estuiki bezán Rawákiáni ráh, cha donyáay har paymén washtámiá pahréz kanag at. [§] **17:19** 17:19 “Ariupágus” shahray mazanén sarókáni diwánjáth at. * **17:28** 17:28 Jonzag, bezán sahdáráni sor o por o harkat ent. † **17:31** 17:31 Dádrasi, bezán hakkén paysalah, hamá shawr ke cha dádgáhána kayt, dáwari. * **18:2** 18:2 Dochár kapag, bezán dhikk warag, yakdegará gendag.

Áiay lóg, kanisahay kashá at. ⁸ Kanisahay masteray nám, Krispus at. Áiá gón wati lógay sajjahén mardomán, Hodáwandén Issáay sará báwar kort. Korentay shahray dega bázén mardom ham gón Pulosay habaráni eshkonagá, báwarmand butant o pákshódiesh kort.

⁹ Yak shapé, Hodáwandén Issá, Pulosay shobéná átk o gwashti: “Mators, mani mestágá sheng o tálán kanán kan. Bétawár mabay. ¹⁰ Hechkas tará dasta najant o táwán dáta nakant chiá ke man tai posht o panáh án. É shahrá mani báwarmand báz ant.” ¹¹ Gorhá, tán yak sál o shash máhá hamódá dáshti o mardomi Hodáay habar sója dátant.

Pulos, Galliuy hakdiwáná

¹² Á wahdá ke Galliu Akáyahay† damagay wáli at, Yahudi mocch butant o Pulosay sará orosh o hamlahesh bort, gept o hakdiwánay démá pëshesh kort. ¹³ Gwashtesh: “É mard, cha Mussáay Sharyatay ráhá dhann, mardomán Hodáay parastesh kanagá hojja kant.” ¹⁴ Wahdé Pulosá habar kanagi at, Galliuy dém gón Yahudián kort o gwashti: “Oo Yahudián! Agan é mardá mayaré yá mazanén radén káré bekortén, man shomay habar gósh dáshtagat. ¹⁵ Bale shomay jérhah, labz o nám o shomay Yahudi Sharyatay bárawá ent, paméshká shomá bezánét o shomay kár. Man é káráni tahá pád mána nakanán.” ¹⁶ Áiá mardom cha hakdiwáná dhanná dar kortant. ¹⁷ Gorhá, áyan kanisahay nókén master Sustines gept o hakdiwánay démá lath o koth kort. Bale Galliuyá eshiay sará hech delgósh nadát.

Pulos, Antákiahá pera tarrit

¹⁸ Pulosá Korentay shahrá angat bázén róché gwázént o randá bráti roksat kortant, bójigá nesht o Suriahá ráhi but. Priskilá o Akwilá áiay hamráh atant. Cha Kenkriahay bandená bójigay swár bayagá pésar, áiá wati mud chet o gwandh kortant, chiá á kawl ke áiá pa Hodáay námá kortagat, nun wahdí gwastagat. ¹⁹ Wahdé Epesosay bandená rasetant, Pulosá wati hamráh Priskilá o Akwilá yalah dátant o wat kanisahá shot o gón Yahudián gapp o tráni kort. ²⁰ Áyan dazbandi kort géshterén wahdé bejallit, bale Pulosá namannet. ²¹ Cha áyan roksati gept o gwashti: “Agan Hodáay razá bebit, dega baré shomay kerrá káyán.” Gorhá bójigéá nesht o cha Epesosá dar átk. ²² Mán

Kaysariahá ér átk o Urshalimá shot o cha óday kelisáay gend o nendá rand, padá Antákiahá shot.

Pulosay saymi mestági sapar

Apulos

²³ Pulos Antákiahá kammé wahdá mah-tal but o padá cha ódá dar átk o Galátiah o Prijiáhá tarr o táb kanán, gón moridán gend o nendia kort o áyáni setk o báwari mohr o rédag kanána kort. ²⁴ Hamá wahdá Apulos námén yak Yahudié Epesosay shahrá átk ke Eskandariahá pédá butagat, wánendah o habarzánté at o Pákén Ketábán sharr balad at. ²⁵ Áiá Hodáwanday ráhay bárawá tálim geptagat o mardomán gón hobb o hodónáki, § sharriay sará Issáay bárawá habar kanag o tálim dayagá at, bale áiay zánt, Yahyáay pákshódiay bárawá at o bass. ²⁶ Áiá pa deléri kanisahá wati habaráni darshán bongéj kort. Wahdé Priskilá o Akwiláyá áiay habar eshкотant, wati lógá bortesh o Hodáay ráhesh sharriay sará sój dát. ²⁷ Apulosá ke Akáyahay rawagay shawr kort, gorhá Epesosay shahray brátán delbaddhi dát o pa óday moridánesh nebesht ke áiá pa delgarmi wasshátk bekanant. Wahdé Apulos ódá raset, óday hamá mardomi báz komak kortant ke cha Hodáay rahmat o barkatá imánesh áwortagat, ²⁸ chiá ke áiá sajjahénáni démá gón Yahudián gapp o trána kort o áyáni báwari* gón mohrén dalilána próshnt. É dhawlá, cha Pákén Ketábáni nebeshtánkán pëshia dásht ke Issá, hamá Masih ent.

19

Pulos, Epesosay shahrá

¹ Hamá zamánagá ke Apulos Korentá at, Pulos ham cha molkay nyámi hand o damagán gwazán, Epesosay shahrá átk o raset. Ódá lahtén moridi dist. ² Cha áyan josti gept: “Wahdé shomá Issá Masihay sará báwar kort, Pákén Ruh shomará raset?” Passawesh dát: “Na, má é ham naeshkotag ke Pákén Ruh hastent.” ³ Gwashti: “Gorhá shomá chónén pákshódié kortag?” Passaw dátesh: “Yahyáay pákshódi.” ⁴ Gwashti: “Yahyáay pákshódi, gonáháni pashómániay pákshódi at. Yahyáyá wat gón mardomán gwashtagat: ‘Hamá kasé ke cha man o randa kayt, bezán Issá, shomá hamáiay sará báwar kanét.’” ⁵ Cha é habaray eshkonagá rand, áyan

† **18:12** 18:12 Akáyá, annugén Yunánay jonubi bahrá ent. Á wahdá Rumay damagé at o bonjáhi Korent at. ‡ **18:18** 18:18 Kawl esh at ke tán wahdéá Pulos wati sajjahén wahdá pa Hodáyá nadra kant, saray mudána nachent o sharáb ham nawárt. Nun é wahd gwastagat. § **18:25** 18:25 Hodónák, bezán wáhangdár, lóthók, delmánag. * **18:28** 18:28 Áyáni hamá pésarigén Yahudi báwar ke namannit Issá, Masih ent.

Hodáwandén Issáay námá pákshódi kort. ⁶ Pulosá wati dast áyáni baddhá jat o Pákén Ruh áyáni delá potert, nun á nókén zobánán habar kanagá laggetant o paygambariesha kort. ⁷ Á, kesás dwázdah mardom atant.

⁸ Pulos tán say máhá kanisahá shot o átk o bé tors o bimmá Hodáay bádsháhiay bárawá gón mohrén dalilán habar o tráni kort. ⁹ Bale cha áyán lahtén sarkash o yági but o áiy habaresh nazort o mardománi démá “É Ráhesh” bad o rada gwasht. Paméshká Pulosá watá cha áyán yak Kerrá dásh. Moridi zor-tant o har róch mán Tiránus námén mardéay tálará* gapp o trána at. ¹⁰ Tán do sálá hamé kári kort o é dhawlá pa Ásiáay damagay sajjahén mardomán, Yahudi o Yunánián ham, Hodáwanday habar rasénag but. ¹¹ Hodáyá cha Pulosay dastá ajabén mójézh péscha dásh. ¹² Har dazmál o godé ke áii belaggetén o pa nádráhánesh per bemoshén, á wassh o dráha butant o jennán, ganók yalaha kortant.

¹³ Yahudi sáheráni yak thóliéá shahr pa shahr tarr o garda kort. Pa chakkásá, jenniáni sará Hodáwandén Issáay námesha gept o gwashtesh: “Man shomará hamá Issáay námá hokma dayán, ke Pulos áiy bárawá gwájáragá† ent.” ¹⁴ Yahudiáni yak mazanén dini péshwáé ke námi Es-kiwá at, áiy hapt bachakán é kára kort. ¹⁵ Palitén ruhá á passaw dátant o gwashti: “Issáy mana zánán, Pulosá ham pajjáha kárán, bale shomá kay ét?” ¹⁶ Hamé mardá ke jenn per at, koppí kort o áyáni chakká kapt. Sarzór but o á jándará o thappi, cha á lógá tatkant. ¹⁷ Cha é hálay eshkonagá, Epesosay shahray sajjahén mardomán, Yahudi o Yunáni doénán, báz torset o Hodáwandén Issáay námesh satá o saná kort. ¹⁸ Bázéné ke báwarmand but, mardománi démá wati pésarigén sellén káresh mannetant. ¹⁹ Lahténá ke pésará jádugari kortagat, wati jádugari ketáb o daptar áwort o mardománi démá sótkant. Wahdé sótkagén ketábáni kim-matay hesábesh kasshet, zánag but ke panjáh hazár derhamay‡ ketáb butagatant. ²⁰ É dhawlá, Hodáwanday habar gón géshterén zór o wáké sheng o tálána but.

Epesosay shahray shóresh

²¹ Cha é káráni sarjamiá rand, Pulosá wati delá shawr kort Makduniah o

Akáyahay damagán gwazán, Urshalimá berawt. Gwashti: “Cha óday rawagá rand, maná allam, Rumay shahr ham gendagi ent.” ²² Áii cha wati komakkárán do mardom, Timutáus o Erastus Makduniahá rawán kortant o wat kammé wahd géshter Ásiáay damagá mahtal but. ²³ Hamá wahdá Epesosay shahrá “É Ráhay” bárawá mazanén shóreshé chest but. ²⁴ Shóresh é dhawlá but ke Epesosay shahrá Dimitrius námén zargaré hastat ke áii Ártemisay§ zyaratjáhay nograhén dóttoka jórhént o bahá kort. Cha é kára, shahray hon-armandán bázén zarr o málé katthet. ²⁵ Áii, shahray sajjahén honarmand o é péshahay mardom lóthet o mocch kortant. Gón áyán gwashti: “Oo wájahán! Anchosh ke shomá zánét, é kár may hastómandiay sarchammag* ent. ²⁶ Bale shomá wat eshкотag o distag, é mardá, Pulosá, na tahná Epesosay, kamm o gésch sajjahén Ásiáay damagay bázén mardomé gomráh kortag o gwashtit ke may dastáni addh kortagén Hodá, pa hech dába Hodá naant. ²⁷ Nun tors tahná é naent ke pa mardomán may kár kamsharapa bit, tors esh ent ke may mazanén Hodá Ártemisay zyaratjáhay mazani gára bit o á, ke Ásiáay damag o sajjahén donyá áii parastesha kant, wati shán o shawkatá báhénit.”†

²⁸ Wahdé mocchiay mardomán é habar eshкотant, sakk zahr geptant o pa kukkár gwashtesh: “Epesosay hodá, Ártemis mazan ent.” ²⁹ É paymá sajjahén shahrá shóresh chest but. Mardománi mocchi, kukkár kanán shahray maydánjáhá‡ shot. Áyán Pulosay do hamráh ke áyáni nám Gáyus o Aristarkás at o Makduniahay mardom atant, gept, kasshakán kort o gón wat bortant. ³⁰ Pulosá mocchiay tahá rawag lóthet bale áiy shágerdán naesht. ³¹ Tantaná Ásiáay damagay lahtén masterá ham, ke Pulosay dóst atant, pa áii kolaw ráh dát o dazbandi kort ke shahray maydánjáhá marawt. ³² Ódá báz shór o árhahór at, harkasá yak chizzé gwasht. Bázénéá é habar ham nazánt ke á chia edá átkag o mocch butagant. ³³ Yahudián, Eskandar námén mardé démá kort o cha mocchiá harkasá áiára hokmé dát. Dasti shahár dát ke chopp o bétawár bebant, tán mardománi démá gón wati habarán Yahudiáni démpániá bekant. ³⁴ Bale wahdé mocchiay mar-

* **19:9** 19:9 Tálár; bezán pa gapp o trán o gwashtánká mazanén diwánjáhé. † **19:13** 19:13 Gwájárag, bezán tablig kanag. ‡ **19:19** 19:19 Yak derham kamm o gésch yak róchay mozz at. § **19:24** 19:24 Ártemis cha Yunániáni bánokén hodáyán yakké at. Yunániáni botén hodá, janén ham butagant o mardén ham. * **19:25** 19:25 Hastómandiay sarchammag, bezán sarwatmandiay bonyád. † **19:27** 19:27 Báhénag, bezán gár dayag, cha dast dayag. ‡ **19:29** 19:29 Asligén Yunáni nebeshtánka gwashtit: “tyáter”, bezán tamásháy jágh.

domán zánt ke á Yahudié, gorrhá padá hamgotth o hamtaráw butant o tán kesás do sáhatá ják o kukkáresh kort o gwashtesh: “Epesosay hodá, Ártemis mazan ent.”

³⁵ Gorrhá, shahray monshiá mocchi áram kort o gwashti: “Oo Epesosay mardomán! Sajjahén donyáay mardoma zánant ke Epesosay shahr, mazanén hodá Ártemisay zyaratjáhay negahpán ent, ke áiy naksh cha ásmáná ér átkag. ³⁶ Nun ke harkas é habará mannit,[§] shomá áram bebét o pa eshtápi hech kéré makanét. ³⁷ É doén mardom ke shomá geptag o edá áwortagant, eshán na cha zyaratjáhá chizzé poletag o na may bánokén hodáesh bésharap kortag. ³⁸ Agan Dimitrius o áiy honarmandán gón kaséá jérhahé hast, hakdiwánay darwázag pach ent o wáli ham har wahdá hastent, berawant o wati jérhahá pésh bekanant. ³⁹ Agan dega habaré hast, báyard áiy shahray sarkári diwáná byárant tánke gísshénag bebit. ⁴⁰ Cha maróchigén sargwastá, tors esh ent may sará shóreshgariay bohtámá* bejanant. Agan chosh bebit, mára pa maróchigén shóreshá hech passawé nést.” ⁴¹ Áiy é habar kortant o mocchií prósh.

20

Pulos, dém pa Makdunia o Yunána

¹ Epesosay shahray shóreshay halásiá rand, Pulosá á shahray morid lóthet o delbaddhi dátant, gorrhá cha áyán roksati gept o dém pa Makduniahá ráh kapt. ² Cha á hand o damagán ke gwast, gón wati habarán, báwarmandi bázén delbaddhié dátant. Randá átk o Yunána raset. ³ Ódá tán say máhá mahtal but. Gón bójjigé Suriahay rawagá pésar, Yahudián pa áiy pandalé sázet, paméshká cha Makduniahay ráhá per tarragay shawri kort. ⁴ Áiy hamráh esh atant: Pirrusay chokk Supáterus ke Biriayah mardomé at, Aristarkás o Sekundus ke Tesáulunikiay mardom atant, Gáyus ke Derbehay mardomé at, Timutáus, Tikikus o Trupimus ke Ásiáay damagay mardom atant. ⁵ Á cha má pésh kaptant o Truásay shahrá shotant. Hamódá pa may áyagá rahchár butant. ⁶ Béhomirén nánay aidá rand, má cha Pilipiay shahrá bójjigé swár butén o panch róchá rand, Truásá áyáni kerrá átkén o tán hapt róchá hamódá dáshtén.

Warnáé zendaga bit

§ 19:36 19:36 Asligén Yunáni nebeshtánka gwasht: “Nun ke hechkas é habaray namannók naent...”. * 19:40 19:40 Bohtám, bezán malámat, tohmat. * 20:7 20:7 Bezán Yakshambehá. † 20:11 20:11 Gwarbám, bezán rótheck, róchay dar áyagay wahd. ‡ 20:16 20:16 Rón o móshay aid.

⁷ Haptagay awali róchá,* pa nánay chondh chondh kanagá hórigá neshtagatén o Pulosá gón báwarmandán trán kort. Domi sabáhá á rawagi at, paméshká tán shapnémá habari kort. ⁸ Hamá borzádi báná ke neshtagatén, bázén cheragé rók at. ⁹ Pulosay habaráni wahdá, Yutukus námén warnáé darigay dapá neshtagat. Wábénag but, kóchandhagá lagget o wáb kapt. Cha lógay saymi tabaká jahlád kapt o mort. Mardomán áiy jón chest kort. ¹⁰ Pulos ér átk, áiy némagá jahl but, goláeshi kort o gwashti: “Matorsét, sáhi mán ent.” ¹¹ Gorrhá borzód shot, náni chondh chondh kort o wárt, randá gón áyán wati gapp o tráni tán gwarbámá† démá bort o padá cha ódá dar kapt o shot. ¹² Á warnáesh, zendag o dráh áiy lógá bort o áyán mazanén tasallá o delbaddhié raset.

Dém pa Militusay bandená

¹³ Má bójjigá swár butén o cha Pulosá pésar, Ásusay shahrá shotén ke cha ódá áiy gón wat bezurén. Pulosay wáhag esh at ke Truásá beger tán Ásusá hoshkiá sapar bekant. ¹⁴ Wahdé Ásusay shahrá gón áiy dochár kaptén, gorrhá bójjigá swáren kort o Mitiliniay shahrá átkén. ¹⁵ Cha ódá domi róchá Kiusay jazirahay démá átk o rasetén. Saymi róchá, Sámusay banden o cháromi róchá Militusay shahrá átkén. ¹⁶ Pulosay shawr at, Epesosay shahrá hecch maóshitt, tánke Ásiáay damagá báz mahtal mabit. Áiy eshtáp at ke agan buta kant Pentikástay Aiday‡ róchá Urshalimá bebit.

Gón Epesosay kamáshán Pulosay trán

¹⁷ Pulosá cha Militusay shahrá, pa Epesosay kelisáay kamáshán kolaw ráh dát o á wati kerrá lóthetant. ¹⁸ Kamásh ke átkant, gón áyán gwashti: “Shomá wata zánét cha hamá awali róchá ke man Ásiáay damagá pád ér kortag, che paymá wati zend gón shomá gwázéntag. ¹⁹ Man ars réchán o pa békebri o darbéshi Hodáwanday hezmatkári kortag o Yahudiáni pandaláni sawabá bázén sakkí o sóri saggetag. ²⁰ Wata zánét, shomay nap o suttá harché ke mani dastá bayagi butag man kortag o Hodáay kolaw pa shomá, mocchiáni tahá o lóg pa lóg áwortag o sar kortag. ²¹ Man Yahudi o Yunáni, doén pant o sój dátagant ke cha wati radén kárán pashómán bebant, Hodáay ráhá begerant o may Hodáwandén Issáay sará báwar bekanant. ²² Annun gón

Pákén Ruhay rahshóniá Urshalimá rawán. Nazánán ódá gón man ché bayagi ent. ²³ Bale eshiá zánán ke Pákén Ruh maná har shahrá péshgói kanag o gwáhi dayagá ent, kayd o band o sakki o sóri mani wadár o entezárá ant. ²⁴ Maná pa wati sáh o zendá parwáh nést, mani yakkén wáhag esh ent ke wati dawr o bárigá pa sar berasénán o Hodáwandén Issáay dátágén kárá sarjam bekanán, bezán Hodáay mehr o rahmataymestágá berasénán.

²⁵ “Nuna zánán, man ke Hodáay bádsháhiay wasshén mestág pa shomá áwortag o raséntag, cha shomá hechkas padá maná nagendit. ²⁶ Paméshká maróchi shomárá pa rásti o deljamia gwashán ke shomay hechkasay hón mani gardená naent. ²⁷ Chiá ke man pa shomá Hodáay sajjahén wáhagáni rasénagá hechbar chakk o pad nabutagán. ²⁸ Shomá wati jend o wati ramagay sajjahén báwarmandáni hayáldáriá bekanét ke Pákén Ruhá shomárá áyáni negahpán kortag. Hodáay kelisáay shopánki o negahpániá bekanét, hamá kelisá ke Hodáwandén Issáay gón wati hóná pa bahá geptag. ²⁹ Mana zánán cha mani rawagá rand, derrókéén gork shomay nyámá káyant o ramagay sará rahma nakanant. ³⁰ Tantaná shomay wati nyámá ham anchén mardom páda káyant ke rástén habarán prosht o prósha kanant tánke moridán wati némagá bekasshant. ³¹ Paméshká hozzhár bét o yát bekanét ke tán say sálá, man shap o róch pa shomá grétag o shomárá dháh^S dátág.

³² “Nun shomárá Hodá o áiyay pormehr o rahmatén habaráni sepordaha kanán ke á habar shomárá mohr dáshta kanant tán hór gón sajjahén Hodáay palgártágénán mirás bebarét. ³³ Maná cha kaséá hech chizzéay tamah o lálech nabutag, na sohr o tangaway, na nograh o zarray o na god o póshákay. ³⁴ Shomá wata zánét ke man gón wati é dastán kár kortag, watig o wati hamkáráni zalurat o garaz wat sarjam kortagant. ³⁵ Man shomárá darwar o nemunah pésh kortag ke shomá ham mani dhawlá wati dastán kár bebandét o kár bekanét o wár o bazzagán komak bedayét. Shomá cha Hodáwandén Issáay é habarán bétránag mabét o mashamóshét ke áiyá gwasht: ‘Cha zuragá, dayag bahtáwarter ent.’” ³⁶ Cha é habaráni halásiá rand, Pulos kóndhán kapt o gón sajjahénán hór dwái kort. ³⁷ Sajjahénán Pulos goláésh kort, chokket o báz grétesh. ³⁸ Á géshter pa eshiá gamig atant ke Pulosá gwashtagat:

“Shomá padá maná nagendét.” Gorrhá tán bójigá raséntesh.

21

Dém pa Urshalimá

¹ Wahdé má cha áyán jetá butén, bójigá swár but o tachkátachk dém pa Kásay jazirahá átkén. Domi róchá Rudesay jazirahá rasetén o cha ódá Pátáraay shahrá shotén. ² Ódá mára yak bójigé dast kapt ke Pinikiahá rawagi at. Má hamé bójigá swár but o ráh geptén. ³ Wahdé bójig daryáyá rawán at, cha durá Kebresay jazirah, chappén pahnátá gendag but, cha ódá gwazán, Suriahá, Suray bandená raset o cha bójigá ér kaptén, chiá ke ódá bójigá bár ér géjagi at. ⁴ Má óday morid shóház kortant o tán hapt róchá áyáni Kerrá jalletén. Áyán, cha Pákén Ruhay némagá gón Pulosá gwasht ke Urshalimá marawt. ⁵ Bale wahdé ódá may jallagay róch halás butant, má padá wati sapor bendát kort. Sajjahén báwarmand gón wati jan o chokkán may hamráhiá cha shahrá dhann, tayábdapá átkant. Ódá má sajjahén kóndhán kaptén o dwáén kort. ⁶ Cha yak domiá roksat bayagá rand, má bójigá swár butén o á wati lógán per tarretant.

⁷ Cha Suray bandená sapor kanán Potulemaisay shahrá átk o cha bójigá ér kaptén. Ódá ham má gón báwarmandán* gendok kort o yak róché áyáni gwará dáshtén. ⁸ É dega róchá cha ódá dar átk o Kaysariahay shahrá rasetén. Ódá má mestág dayóken Piliposay lógá dásht ke cha hamá hapténán† yakké at. ⁹ Áiyá chár neshtágén janéchokk hastat ke paygambariay sawgátesh cha Hodáay némagá rasetagat. ¹⁰ Á lahtén róchá ke má ódá atén, Ágábuz námén nabié cha Yahudiahá átkagat. ¹¹ May gendoká átk, Pulosay lánkbandi zort, wati dast o pádi bastant o gwashti: “Pákén Ruha gwasht: ‘Urshalimay Yahudi é lánkbanday hodábondá gerant o hamé paymá ke man watá bastag, hamé paymá áiyay dast o pádána bandant o darkawmáni dastá dayant.’” ¹² Áiyay habaráni eshkonagá rand, má o á shahray mardomán gón Pulosá dazbandi o mennatgiriya kort ke Urshalimá marawt. ¹³ Bale Pulosá gwasht: “Chiá shomá gréwét o mani delá próshét? Man band bayagá bell, Urshalimá, pa Hodáwandén Issáay námaygi wati zenday nadr kanagá ham tayár án.” ¹⁴ Wahdé má Pulos mannént nakort, gorrhá

§ 20:31 20:31 Dháh, bezán hoshdár, wárning. * 21:7 Asligén Yunáni nebeshtánka gwasht: “gón brátán”.

† 21:8 21:8 Bezán cha haptén géchén kortágén hezmatkárán, bechár Kásedáni Kár 6:5.

gwashtén: “Harché ke Hodáwanday razá ent, hamá dhawlá bebit” o bétawár butén.

¹⁵ Cha á róchá n o rand, má wati ord o bonag bast o dém pa Urshalimá sar geptén. ¹⁶ Cha Kaysariahay shahrá lahtén morid may hamráh but, áyan mára pa dárag o mehmán bayagá Manásun námén báwarmandéay lógá bort. Á cha Issáay awali mannógerán at o béhá Kebresié at.

Pulos, Urshalimay shahrá

¹⁷ Wahdé Urshalimá raseten, brátán mára gón wáhagé wasshátk kort. ¹⁸ Domi róchá, Pulosay hamráhiá Issáay brát Ákubay gend o nendá shotén. Kelisáay sajjahén kamásh hamódá atant. ¹⁹ Tayárjórihá rand, Pulosá pa sarjamiá gwasht ke Hodáyá cha áiy hezmatán pa darkawmán ché kortag. ²⁰ Wahdé áyan é hál eshкотant, Hodáyá shogresh gept. Nun gón Pulosá gwashtesh: “Oo brát! Taw sahig ay ke hazarán Yahudi Issáay sará báwarmand butag o sajjahén Mussáay Sharyatay sará pa del o setk páband ant. ²¹ Bale lahténá tai bárawá gón áyan gwashtag ke taw sajjahén á Yahudi ke darkawmáni nyámá neshtagant sója dayay ke Mussáay Sharyatá yalah bedayant o wati chokkán sonnat makanéant o may é dega dód o rabédagáni sará kár makanant. ²² Nun shawr chi ent? Má ché bekanén? Allamá cha tai eday áyagá sahiga bant. ²³ Paméshká anchosh ke má gwashén, hamá dhawlá bekan. May Kerrá chár mardom hast ke áyan gón Hodáyá kawlé kortag. ²⁴ Taw hamáyáni hamráhiá beraw o gón áyani pák o palgáriay rasmán hór bebay. Áyani korbánigay dalwatáni kimmatá ham taw porr kan, tánke á wati sarán besáyant. É dhawlá harkasa zánt ke tai bárawá áyani eshкотagé n habar dróg butagant o taw wati zendá Sharyatay sará gwázénagá ay. ²⁵ Bale má hamá darkawmén báwarmandáni sará nebeshtag ke may hokm áyani bárawá chi ent. Cha botáni námá korbánig kortagén gósh tá, cha hónay waragá, cha mordáren dalwatáni gósh tá o cha zená o benangiá pahrez bekanant.” ²⁶ Pulosá á cháren mardom zortant o é dega róchá gón áyan horigá, pák o palgáriay rasmi sarjam kort. Padá mazanén parasteshgá há shot tán palgáriay rócháni sarjam bayagay járá bejant, ke hamá róchá cha áyan har yakkéay korbánig ham hayrát kanaga bit.

Pulosay dazgir kanag

²⁷ Áyani palgáriay haptén róch sarjam bayagi atant ke Ásiáay damagay lahtén Yahudiá Pulos mazanén parasteshgá há dist. Mardomesh shóréntant, Pulosesh gept o ²⁸ kukkáresh kort: “Oo Esráilián!

Byáét mára komak bekanét. É mard, Pulos hamá ent ke har jágah gón harkasá, may kawm o Mussáay Sharyat o Hodáay é Pákén Lógay helápá tálima dant. Annun ham darkawmén Yunáni mardomi mazanén parasteshgá há áwortag o Hodáay Pákén Lógi palit kortag.” ²⁹ Áyan é habar paméshká kort ke pésará Pulosesh gón Trupimusá, ke Epesosay shahray nendóké at, Urshalimay bázará distagat. Gománesh kortagat ke Pulosá, Trupimus mazanén parasteshgá há áwortag. ³⁰ Sajjahén shahrá shóreshé chest but, sajjahén mardom cha har némagá tachána átk o mocch butant. Pulosesh gept o cha mazanén parasteshgá há dhanná dar kort o hamá damána parasteshgá hay darwázagesh band kortant. ³¹ Pulosesh koshagi kortagat ke Rumi lashkaray masterá hál raset sajjahén Urshalimá shóreshé kaptag. ³² Áiá hamá damána watá, sepáhig o apsaráni hamráhiá pa mardomán raseten. Wahdé mardomán lashkaray master o sepáhig distant, Pulosay latth o kotthesh bass kort. ³³ Lashkaray master Pulosay Kerrá átk, dazgiri kort o parmáni dát gón do zamzilá bebandanti. Cha mardomán josti gept ke “é kay ent o mayári chi ent?” ³⁴ Mardom báz kukkár kanagá atant, harkasá áiy bárawá chizzé gwasht, paméshká lashkaray master cha rástén jáwará sarpad nabut o hokmi kort ke Pulosá kalátá bebarant. ³⁵ Wahdé Pulos kalátay padánkán raset, cha mahlukay zahr o hezhmá sepáhig áiy baddh kanagá náchár butant, ³⁶ chiá ke mahluk áiy randá kukkár kanán, gwashán at: “Eshíá bekosh.”

³⁷ Hamá wahdá ke sepáhig Pulosá kalátá baragá atant, áiá gón Rumi lashkaray masterá gwasht: “Maná mókala dayay gón taw habaré bekanán?” Lashkaray masterá jost kort: “Záná, taw Yunáni zobána balad ay? ³⁸ Acha, taw hamá Mesri naay ke nóki shóreshi kortagat o chár hazár yágién mardomi gón wat gyábána bortagat.” ³⁹ Pulosá darráent: “Enna, man Yahudié án o Kilikiahay damagay námién shahr Tarsusay mardomé án. Maná bell ke gón é mardománi mocchiá kammé habar bekanán.” ⁴⁰ Lashkaray masterá mannet, Pulos átk o kalátay padánkáni sará ósh tá o gón dastay sorénagá mardomi bétawár kortant. Wahdé mardom bé trekk o tawár butant, gorhá Pulosá gón áyan Ebráni zobána habar kort o gwashti:

1 “Oo pet o brátán! Maná é hakká bedayét ke shomay demá wati démpáni* bekanán.”² Wahdé mardomán dist ke á Ebráni zobáná gón áyán habar kanagá ent, géshter bétawár butant. Áiá gwasht: ³ “Man Yahudié án o mani pédáeshay jágh, Kilikiahay damagá, Tarsusay shahr ent, bale mani rost o rodóm hamedá Urshalimá butag. Gámáliál mani ostád butag o may pet o pirokáni sarjamén Sharyat† man cha hamáíá dar bortag. Pa Hodá o áiy razáyá báz wáhagdár o hodónák butagán, anchosh ke maróchi shomá hodónák ét. ⁴ Man ‘É Ráhay’ mannóger ázar dátag o koshagi ham kortagant, mardén wa mardén ant, janén ham geptag o bandi kanáentagant. ⁵ Masterén dini péshwá o sajjahén kamásháni diwán mani bárawá gwáhi dáta kant. Áyán pa Dameshkay Yahudi brátán maná kágad dátagat tán ódá berawán, óday báwarmandán begerán o pa sezá dayagá Urshalimá byárán.

⁶ “Ráhá, wahdé Dameshkay shahray nazziká rasetagátán, némróchay wahdá anágat cha ásmáná mani chapp o chágerdá trondén rozhné drapshet. ⁷ Zeminá kaptán o tawaré eshkoton ke maná gwashti: ‘Shául, Oo Shául! Taw chiá maná ázára dayay?’ ⁸ Man jost kort: ‘Oo wájah! Taw kay ay?’ Passawi dát: ‘Man Issá Náseri án, hamá ke taw áiá ázára dayay.’ ⁹ Mani hamráhán rozhn dist, bale hamá ke gón man habar kanagá at, áiy tawáresh naeshkot. ¹⁰ Joston kort: ‘Oo Hodáwand! Man ché bekanán?’ Hodáwandá maná passaw dát: ‘Pád á, Dameshkay shahrá beraw, hamá sajjahén kár ke tará kanagí ant, ódá tará gwashaga bant.’ ¹¹ Hamráhán maná dastá gept o Dameshkay shahrá bort, chiá ke cha hamá trondén rozhnay gendagá mani chammáni rozhnái shotagat.

¹² “Ódá Hannániá námén yak mardé at ke Hodádóst o Sharyatay páband at o sajjahén jahmenendén Yahudiáni nyámá washnámén mardé at. ¹³ Mani kerrá átk o óshtát o gwashti: ‘Oo mani brát Shául! Tai chammáni rozhnái per betarrát o maym bekanátay.’ Hamá damáná mani chamm padá rozhná butant o man á dist. ¹⁴ Gorná Hannániáyá gón man gwasht: ‘May pet o pirokáni Hodáyá tará gechéen kortag tán áiy razáyá bezánay, áiy “Pák o Nékená”‡ begenday o áiy tawárá cha áiy jenday dapá beshkonay. ¹⁵ Báyard ent pa sajjahénán wati eshkotagén o distagénáni gwáhiá bedayay. ¹⁶ Nun chiá mahtal ay?

Pád á, Issáay námá beger, pákshódi bekan ke cha wati gonáh o mayarán pák o palgár bebay.’

¹⁷ “Randá wahdé Urshalimá átkán, yak róché pa dwáya mazanén parasteshgáhá shotán, dwáay wahdá maná shobén o elháme raset. ¹⁸ Issá Masihon dist ke maná gwashti: ‘Zutt kan. Cha Urshalimá dar kap, chiá ke eday mardom mani bárawá tai gwáhiá namannant.’ ¹⁹ Man gwasht: ‘Oo Hodáwand! Á wa zánant ke man har jágh, kanisahán shotagán o tai báwarmand jatag o jél kanáentagant. ²⁰ É habará ham zánant ke wahdé tai shahid Estipánay hón réchag but, man hamódá óshtátagátán o pa áiy koshagá rázig atán o áiy hónigáni god o poccháni negahpán atán.’ ²¹ Padá Hodáwandén Issáyá maná gwasht: ‘Beraw, chiá ke man tará durén hand o damagán darkawmáni kerrá ráha dayán.’”

Cha Pulosá jost o pors

²² Mardom tán haminchoká Pulosay habarán gósh dárágá atant, bale é habari ke kort nun kukkár kort o gwashtes: “É mard koshag o gár kanag bebit ke zenda nakarzit.” ²³ Áyán kukkár kort, wati gwaray kabáh o jámagesh kasshetant o hákshániesh kort. ²⁴ Rumi lashkaray masterá parmán dát ke Pulosá kalátá bebarant o shallák bejanant tán zánag bebit mardom chiá áiy sará kukkár kanagá ant. ²⁵ Wahdé Pulosesh pa shallák janagá bast, áiá hamódá cha óshtátagén aparará jost kort: “Man Rumi báshendahé án. Kánuná, é rawá ent ke shomá bé hokmay borragá Rumi báshendahé shallák bejanét?” ²⁶ Wahdé aparará é habar eshkot, lashkaray masteray kerrá átk o gwashti: “Oo wájah! Taw ché kanagá ay? É mard Rumi báshendahé.” ²⁷ Lashkaray master, Pulosay kerrá shot o josti kort: “Begwash, pa rásti taw Rumi báshendahé ay?” Pulosá passaw dát: “Haw, man Rumi báshendahé án.” ²⁸ Masterá gwasht: “Man pa Rumi báshendah bayagá bázén zarré dátag.” Pulosá darráent: “Man cha pédáeshá Rumi báshendahé án.” ²⁹ Á sepáhig ke cha Pulosá jost o pors kanagá atant, hamá damáná cha áiá poshtá kenzetant. Wahdé lashkaray master sarpad but ke Pulos Rumi báshendahé o áiá band kanáentag, wat ham torseti. ³⁰ Lótheti sharr bezánt Yahudi Pulosay sará chónén bohtámé janant, paméshká domi róchá Pulosi cha bandijáhá dar kort o parmáni dát Yahudiáni mazanén dini péshwá o sarókáni diwánay sajjahén básk diwáná

* 22:1 22:1 Démpáni, bezán wati rakkénagay johd, Arabi o Pársiá “defá”. † 22:3 22:3 Bezán hamá Mussáay Sharyat. ‡ 22:14 22:14 Bezán Issá Masihá.

benendant. Gorhá Pulosi áwort o áyáni demá pësh kort.

23

Pulos Yahudi sarókáni diwánay demá

¹ Pulosá sarókáni diwáná nendóken báskáni némagá tachkátachk cháret o gwasht: "Oo brátán! Man tán maróchigén róchá wati zend gón pák o palgárén jabin* o wejdáné pa Hodáay rázayá gwázéntag."

² É habará o rand, masterén dini pëshwá Hannániáyá Pulosay pahnátá óshátátagén mardom parmán dátant ke áiy dapá shahmát bejanant. ³ Gorhá Pulosá gwasht: "Hodá tará jant, oo espéti per moshtagén diwál!† Taw Sharyatay rahbandáni randgiriá mani mayár o bémayáriay gishshénagá edá ay, bale é káray badalá gón mani shahmát janáénagá Sharyatay rahbandán próshagá ay." ⁴ Pulosay kashá óshátátagén mardomán gón áiy gwasht: "Tará lajja‡ nakant Hodáay náméntagén dini pëshwáyá béezzata kanay?" ⁵ Pulosá passaw dát o gwasht: "Oo brátán! Man nazántag ke é, Hodáay náméntagén masterén dini pëshwá ent. Chiá ke nebeshtah ent 'wati kawmay pëshwáyán bad o rad magwashét.'"§

⁶ Pulos sahig at ke sarókáni diwánay lahtén básk, Saduki o lahtén Parisi ant, paméshká áiy pa borztawári darráént: "Oo brátán! Man Parisié án o mani pet o pirok ham Parisi butagant, maróchi é hakdiwánay demá paméshká ósharétag butagán ke mani báwar o omét ent ke Hodá mordagán padá zendaga kant."

⁷ Anchosh ke áiy é habar kort, sarókáni diwánay Parisi o Saduki báskáni nyámá jérhahé pád átk o diwán do bahr but. ⁸ Sadukiáni báwar esh ent ke mordag padá zendaga nabant o na préshtag hast o na ruh, bale Parisi é sajjahénána mannant. ⁹ Báz ják o jik but o Parisiáni Sharyatay lahtén zánógerá pa namannag gwasht: "Má pa é mardá hech mayaré nagendén, balkén yak ruh yá préshtagéá gón eshiá habar kortag." ¹⁰ Wahdé áyáni nyámá arh o janjál géshter but, lashkaray masterá torset, chó mabit Pulosá bejanant o chondh chondh bekanant, paméshká sepáhigi parmán dátant ke jahlád be-rawant, Pulosá cha áyáni nyámá pa zór dar bekanant o kalátá bebarant.

¹¹ Hamá shapá Hodáawandén Issá Pulosay demá átk o óshátá. Gwashti: "Oo Pulos! Delá mazan kan, anchosh ke taw Urshalimay shahrá pa mani mestágá sháhedi dátag, hamé dhawlá Rumay shahrá ham tará sháhedi dayagi ent."

Pulosay kósharétagay sázesh o pandal

¹² Domi sabáhá, lahtén Yahudiá pandalé jórhént o watmánwatá sawgendesh wárt ke tán Pulosá makoshant, na ápa warant o na warag. ¹³ Pléndh o petnah sáchókén mardom cha chelá géshter atant. ¹⁴ Mazanén dini pëshwá o kawmay kamásháni Kerrá shotant o gwashtesh: "Má pa del sawgend wártag ke tán Pulosá makoshén heccha nawarén. ¹⁵ Paméshká shomá gón sarókáni diwáná horigá, lashkaray masterá begwashét ke á Pulosá shomay Kerrá byárit. Gón lashkaray masterá shomay nimmón é bebit ke shomá Pulosay bárawá géshter zánag o jost o pors kanaga lóthét. Má tayár én, rasagá pésar, ráhá áiy koshén."

¹⁶ Bale Pulosay gohárázátke ke cha é pandalá sahig but, kalátá shot o Pulosi sahig kort. ¹⁷ Pulosá yak Rumi pawji apsaré lóthet o gwashti: "É warnáyá wati masteray Kerrá bar ke eshiá chizzé gwashagi ent." ¹⁸ Áiy warná wati masteray Kerrá bort o gwashti: "Maná kaydién Pulosá lóthettag o gwashtag ke é warnáyá tai Kerrá byáran, chiá ke eshiá gón taw chizzé gwashagi ent." ¹⁹ Lashkaray masterá warnáay dast gept o yak Kerré bort o jost kort: "Tará gón man chónén habaré hast?" ²⁰ Áiy gwasht: "Lahtén Yahudiá shawr kortag ke tará begwashant bándá Pulosá diwánay demá pësh bekanay, pa é shawrá áyáni nimmón esh ent ke á Pulosay bárawá géshter jost o pors kanaga lóthant, ²¹ Bale taw áyáni é habaray managá tayár mabay, chiá ke cha áyán chel mardomá gesh, ráhá Pulosay sará orosh kanag o áiy koshagá tayár ent. Áyán sawgend wártag ke tán Pulosá makoshant, na ápa warant o na warag. Á tayár neshtagant o wadárig ant ke taw áyáni wáhagá bemannay." ²² Lashkaray masterá warná roksat kort o gwasht: "Hechkas sahig mabit ke taw maná é hál dátag."

Pulos, dém pa Kaysariahá

²³ Gorhá lashkaray masterá do apsar lóthet o gwashtant: "Dosad payádagén sepáhig, haptád aspawár o dosad naysahbandén sepáhig tayár bekanét ke enshapi,

* 23:1 23:1 Jabin, bezán waju, darun, zamir, wejdán. † 23:3 23:3 "Espéti per moshtagén diwál" hamá mardománi bárawá gwashag butag ke záherá sharr ant bale áyáni del o darun syáh ent. ‡ 23:4 23:4 Lajj, bezán sharm, hajálat. § 23:5 23:5 Dargwaz 2:28. * 23:23 23:23 Asligén Yunáni nebeshtánka gwasht: "shapay saymi sáhat".

sáhat nohá* Kaysariahá berawant, ²⁴ pa swáriá, Pulosá asp ham bedayét tán áia pa wasshi o salámati, wáli Piliksay kerrá berasénant.” ²⁵ Lashkaray masterá, Rumi wáliay námá yak kágadé ham é dhawlá nebesht:

²⁶ “Cha Klawdius Lisiásay némagá pa sharapdárén wáli Piliksay námá:

Drud o drabhát!

²⁷ É mard, Yahudián geptagat o áia koshagi atant. Bale wahdé man sahig bután ke á Rumi báhendahé, gorhá gón sepáhigán shotán o man cha áyáni dastá rakként. ²⁸ Man lóthet bezánán ke é marday sará chónén bohtámé janant, paméshká áyáni sarókáni diwánay demá pesh kort. ²⁹ Sahig bután ke áia wati Sharyatay jérhaháni sará mayárig kanagá ant o áia hech choshén karé nakortag ke kayd o band, yá markay sezawár bebit. ³⁰ Wahdé maná hál raset ke pa áiy koshagá pandalé sázag butag, hamá damáná tai gwará ráhon dát. Man, hamá mardom ke áiy sará bohtáma janant, parmán dátagant ke gón áia wati arhá tai demá pesh bekanant.”

³¹ Gorhá sepáhigán, parmánay sará, hamá shapá Pulos cha Urshalimá zort o Antipátrisay shahrá† rasént. ³² Domi róchá, aspswáren sepáhigesh Pulosay hamráhiá rawán dátant o wat kalátá per tarretant. ³³ Kaysariahay rasagá, áyán kágad á damagay wáli Piliksá dát o Pulosesh áiy demá pesh kort. ³⁴ Kágaday wánagá rand, wáliá cha Pulosá jost kort: “Taw kojám damagay mardomé ay?” Passawi dát: “Man Kilikiahay damagay mardomé án.” ³⁵ Gorhá gón Pulosá gwashti: “Wahdé tai sará bohtám janókén mardoma káyant, man taig o áyáni habarán wat gósha dárán.” Gorhá áia sepáhig hokm kortant ke Pulosá hamá kalátá bebarant ke Hirudis bádsháhá bastag o hamódá áiy negahpániá bekanant.

24

Piliksay demá Pulosay pesh kanag

¹ Panch róchá rand, Yahudiáni masterén dini peshwá Hannániá gón kawmay lahtén kamásh o Tertulos námén wakiléá Kaysariahá shot, tán Pulosay sará wati bastagén bohtámá wáliay demá pesh bekanant. ² Wahdé Pulos árag but, Tertulosá wáliay demá Pulosay sará bohtám é dhawlá pesh kort: “Marháhdárén* wáli Piliks! Shomá é sardhagará émenén dawr o bárigé áwortag o cha wati durchári

o kárzántiá, pa eday mardomán gehbudi kár kanáéntag. ³ Paméshká má rah jáh o har kojá tai báz mennatwár én. ⁴ Man geshén habar kanag o tará del-syáh kanaga nalóthán, bale pa kasteri gón taw dazbandia kanán ke may yak o do habará gósh dár o mará wati mennatwár bekan. ⁵ Gapp esh ent ke é mard, Pulos, mazanén pléndh o petnahsázé o sarjamén donyáay Yahudiána shórenit. Náseri námén yak naráhén thóliéay saróké. ⁶ Cha eshán o abéd, mazanén parasteshgáhay béhormati kanagay chen o lánchi ham kortagat ke má gept. ⁷ Lótheten áia wati Sharyatay sará mayárig bekanén, bale lashkaray master Lisiásá, pa zór cha may dastá pach gept o bort. Paméshká má, áiy beddh o bohtám janók, tai kerrá ráh dayag butagén.† ⁸ Nun taw wat áia jost o pors bekan, hamá beddh o bohtám ke má áiy sará jatagant, áyáni rástiá sahig bebay.” ⁹ Yahudi ham gón áia hamtawár butant o gwashtesh: “Harché ke Tertulosá gwashtag, hamé paymá ent.”

Pulos wati démpániá kant

¹⁰ Nun wáli Piliksá Pulosay némagá eshárah kort ke á wati habarán bekan. Pulosá gwasht: “Mana zánán báz sál ent ke taw may Yahudi kawmay dádrasiá kanagá ay, paméshká pa deljami wati bémayáriay paddar kanagá gón taw habara kanán. ¹¹ Agan taw jost bekanay gorhá zánay ke dwázdah róchá geshter nagwastag ke man pa parastesh kanagá Urshalimá shotagán. ¹² Mazanén parasteshgáhá, maná hechkasá gón yakkéá pa jérhah o dajjáka nadistag, shahr o kanisahán ham mardom nashóréntagant. ¹³ É beddh o bohtámán ke annun mani sará janant, tai demá áyáni rástiá paddar korta nakanant. ¹⁴ Bale tai demá é habará mannán ke ‘É Ráhay’ randgir o mannók án ke mardom áia naráhén dini thólié gwashtant. Wati pet o pirokáni Hodáyá parastesha kanán o harché ke Tawrát o Nabiáni Ketábán nebeshtah ent, man áyáni báwarmand án. ¹⁵ Man ham, hamáyáni dhawlá, cha Hodáyá ométwár án o deljam án ke sajjahén mordag, nékén o badén, padá zendaga bant. ¹⁶ Paméshká, modám johda kanán ke gón Hodá o sajjahén mardomán mani jabin o wejdan pák o palgár bebit.

¹⁷ “Nun lahtén sálán o rand, per tarret o Urshalimá átkán, tán hamá hayrátán ke maná pa komak kanagá gón atant wati kawmá berasénán o korbánig ham bekanán. ¹⁸ Watá pák o palgár kortagat ke áyán maná mazanén parasteshgáhá dist,

† **23:31** 23:31 Antipátris, Kaysariahay nazziká at. * **24:2** 24:2 Marháhdár; bezán sharapdár, ezzatmand. † **24:7** 24:7 Band hapt bázén daznebeshtá nést.

na mardománi mocchi o mérhié hastat o na ham áshóp o balwáé. ¹⁹ Bale Ásíáay damagay lahtén Yahudi hamódá at, agan áyán gón man jérhahé hastat, á tai Kerrá byátkénant o maná mayárigesh bekortén. ²⁰ Cha é mardomán jost kan, wahdé man Yahudiáni sarókáni diwánay demá pesh kanag bután, áyán pa man che mayaré rást o paddar kort, ²¹ abéd cha é yakkén habará ke man ódá jár jat o gwasht: ‘Man paméshká é hakdiwánay demá ósttárenag butagán ke gwashtagaton: “Hodá mordagán padá zendaga kant.”’

²² É habaráni eshkonagá rand, Piliksá, ke “É Ráhay” bárawá zántkár at, hakdiwánay dádrasi demá nabort o gwashti: “Wahdé lashkaray master Lisiása kayt, hamá wahdá é arh gishshénaga bit.” ²³ Gorhá, yak pawji apsaré parmáni kort Pulosá angat bedárant, bale áia géshter ásudagi bedayant o áiaý dóst o sangatán ham cha áiaý gendok o hezmatkáriá makan makanant.

Pulos, Piliksáy demá

²⁴ Lahtén róchá rand, Piliks wati Yahudién zál Drusiláay hamráhiá átk o Pulosi ham lóthet o áwort. Gón Pulosá gwashti: “Issá Masihay saray báwarmandiay bárawá cha taw géshter eshkonaga lóthán.” ²⁵ Bale wahdé Pulosá hakk o ensáp, pahrézkári o jost o porsay áyókén róchay bárawá habar kort, gorhá Piliksá torset o gwashti: “Annun taw beraw, wahdé dazgath nabután, tará padá lóthán.” ²⁶ Á ométwár at balkén Pulos áia chizzoké zarr lálecha dant, paméshká báz randá lóthet o áworti o gón áia gapp o tránia kort.

²⁷ Do sál hamé dábá gwast o Piliksáy jágahá, Purkius Pestus wáli but. Piliksá pa Yahudiáni razá kanagá, Pulos bandijáhá dásht.

25

Pulos, Pestusáy demá

¹ Wáli Pestus, é damagay rasagá say róchá rand, cha Kaysariahá dém pa Urshalimá shot. ² Ódá, mazanén dini peshwá o Yahudiáni sarókán áiy demá Pulosay sará bohtám jat o ³ dazbandiesh kort ke áyán wati mennatwár bekant o Pulosá Urshalimá ráh bedant. Shawresh kortagat ke Pulosay áyagay wahdá, ráhá áiy sará orosh bekanant o bekoshanti. ⁴ Pestusá passaw dát: “Pulos Kaysariahá bandig ent, maná wat pa hamé zuttán hamódá rawagi ent. ⁵ Cha shomá lahtén master o kamásh mani hamráhiá hamódá byayt, agan áiaý

mayár o gonáhé kortag gorhá hamódá áiy sará bohtám bejanét.”

⁶ Hasht tán dah róchá gón áyán nendagá rand, Pestus Kaysariahá per tarret. Domi róchá áia hakdiwán kort o hokmi dát ke Pulosá byárant. ⁷ Wahdé Pulosesh áwort, cha Urshalimá átkagén Yahudi áiy chapp o chágérdá mocch butant o áiy sará bázén bohtámesh jat, bale áyán cha á bohtámán yakké ham, rást paddar kort nakort. ⁸ Pulosá pa wati bémayáriay paddar kanagá darráent: “Man pa Yahudi Sharyat o mazanén parasteshgáh o pa Rumay Kaysará, hech dhawlé rad o nárahbandén káre nakortag.” ⁹ Bale Pestusá lóthet Yahudián wati mennatwár bekant, paméshká cha Pulosá josti kort: “Taw Urshalimay rawagá razá ay, ke man hamódá hakdiwán bekanán o é arhá begishshénán?” ¹⁰ Pulosá gwasht: “Man Rumay Kaysaray hakdiwánay demá ósttátagán. Mani dádrasi báyad hamedá bebit. Anchosh ke taw wat sharra zánay man pa Yahudián hech mayár o gonáhé nakortag. ¹¹ Agan man anchén mayaré bekortén ke markay sezáyá haktár buténán, gorhá markay sezáyá saggagá ham tayár butagatán, bale agan mani sará Yahudiáni é bohtám rást naant, hechkas maná pa koshagá áyáni dastá dáta nakant. Maná Kaysaray hakdiwáná bebarét.” ¹² Pestusá gón wati saláhkárán shawr kort o randá gwashti: “Taw Kaysaray hakdiwáná peshi lóthet, hamódá pesh kanaga bay.”

Pulos, bádsháh Agripásay demá

¹³ Kammé róchán o rand, bádsháh Agripas wati gohá Bernikiay hamráhiá, pa Pestusay mobárakiá Kaysariahá átk o ¹⁴ tán bázén róchéá hamódá mant. Pestusá bádsháhay demá Pulosay bárawá trán kort o gwasht: “Mani Kerrá bandigé hastent ke wáli Piliksá eshtag. ¹⁵ Wahdé Urshalimá shotagatán, Yahudiáni mazanén dini peshwá o kamáshán áiy sará bohtám jat o maná gwashtesh ke mayárigi bekanán. ¹⁶ Man gwashtant: ‘Rumiáni rahband esh ent, tán wahdé kaséá bohtám janókáni demá wati démpániay móh dayag mabit, á sezá dayaga nabit.’ ¹⁷ Wahdé áiy bohtám janók edá átkant, man áyáni é arhay gishshénagá dér nakort, domi róchá hakdiwáná neshtán o parmán dát ke Pulos pesh kanag bebit. ¹⁸ Wahdé bohtám janók pa habar kanagá pád átkant, áyáni bohtám chosh naatant ke man gomán kortagat. ¹⁹ É marday sará áyáni bohtám wati jenday dini habar o Issá námén mortagén mardéay bárawá atant ke Pulosá gwashtit á zendag ent. ²⁰ Man sarbatag o hayrán atán ke é arhá che paymá begishshénán? Paméshká cha

Pulosá joston kort ke 'Urshalimay rawagá razá ay, tánke é arh hamóday hakdiwáná gishshénag bebit?' ²¹ Bale Pulosá lóthet hamedá bemánit o Kaysar wat áiy arhá begishshénit. Paméshká man parmán dát, tán wahdé áiy Kaysaray darbára ráh madayán, hamedá dárág bebit." ²² Agripásá gwasht: "Man wat é marday habarán gósh dárága lóthán." Pestusá gwasht: "Bándá taw áiy habarána eshkonay."

²³ Domi róchá, Agripás o áiy gohár Berniki, gón mazanén shán o sharapéá, shahray pawji mansabdár o lahtén námádrén sarókáni hamráhiá, wáliay diwánjáhá átkant. Pestusá, Pulosay pésh kanagay parmán dát o Pulos diwánay demá árag but. ²⁴ Pestusá gwasht: "Oo bádsháh Agripás o diwánay nendóken mardomán! É mardá ke shomá gendagá ét, Urshalim o Kaysariahay shahráni sajjahén Yahudián eshiay sará bázén bohtámé jatag o gón man kukkár kanán dazbandiesh kortag ke eshiá bekóshárenán. ²⁵ Mani zánagá, eshiá choshén mazanén mayár o gonáhé nokortag ke koshag bebit, bale wahdé eshiá lóthet ke Kaysaray hakdiwáná pésh kanag bebit, gorhá man shawr kort Rumay shahrá ráhi bedayán. ²⁶ Nun mani dastá eshiay bárawá pakkáén chizzé nést ke pa Kaysará benebisán. Paméshká, man Pulos pa shomá sajjahénán o géshter pa taw, oo bádsháh Agripás, pésh kortag tán jost o porsá rand, chizzé pa nebisagá dar begéján. ²⁷ Chiá ke é bé sar o bonén karé, man yak bandigéá dém bedayán bale á bohtámán ke áiy sará janag butagant, manebisán."

26

Pulos watá bémayára kant

¹ Bádsháh Agripásá gón Pulosá gwasht: "Tará wati démpániay móh o mókal ent." Pulosá dast borz kort o pa wati bémayáriay paddar kanagá habará lagget o gwashti: ² "Oo sharapdárén bádsháh Agripás! Man bahtáwaré án ke maróchi tai demá pésh kanag butagán tán cha Yahudiáni sajjahén bohtámán wati démpániá bekanán. ³ Mana zánán ke taw Yahudiáni sajjahén dód o rabédag o áyani jerhahán sharra zánay. Paméshká gón taw peryát o dazbandia kanán, mani habaráni sará gón sharrén sabr o ópáre delgósh gwar bekanay.

⁴ "Sajjahén Yahudi sharra zánant ke mani zend che paymá butag o mani kasáni o warnái wati mardománi gwará o randá Urshalimá chón gwashtag. ⁵ Báz wahd

ent ke maná zánant o agan belóthant, é gwáhiá dáta kanant ke man Parisié butag o áyani pábandterén dini rombá gón butagán. ⁶ Nun, paméshká hakdiwáná árag butagán ke Hodáay hamá labz o kawlay sarjam bayagá deljam o saddak án ke áiy gón may pet o pirokán kortag. ⁷ Pa hamé labz o kawlay sarjam bayagay ométá, may Yahudiáni dwázdahén kabilah shap o róch pa delsetki Hodáya parastesha kanant. Oo marháhdáren bádsháh! Yahudi paméshká mani sará bohtám janagá ant ke man pa hamé kawlay sarjam bayagá saddak án. ⁸ Oo gósh dárókán! Chiá é habará manneta nakanét ke Hodá mordagán padá zendaga kant?

⁹ "Yak wahdé man ham báwar kortagat ke Issá Masihay* námay namanag o áiy morid o mannógeráni ázár dayag, sharrén karé. ¹⁰ Urshalimá, hamé kára kanagá atán. Gón mazanén dini péshwáyáni ehtiára, cha Hodáay palgártagénán bázéné, bandi kortag o modám áyani kóshárenagá hamshawr butagán. ¹¹ Báz randá sajjahén kanisaháni tahá, man á pa kopr kanagá hojj kortagant. Maná badwáhi o kénagá anchosh ganók kortagat ke pa áyani ázár rasénagá, dhanni shahrán ham shotagátán.

¹² "Yak baré gón mazanén dini péshwáyáni sarjamén wák o ehtiára, Dameshká ráhi atán. ¹³ Oo sharapdárén bádsháh! Némróchá hamé ráhá, anágat ásmáná cha róchá rozhnáterén shahmé diston. Hamá rozhn manig o mani hamráhání cháren némagán drapshet. ¹⁴ Má sajjahén zeminá kaptén, tawaré eshkoton ke Ebráni zobáná maná gwashagá at: 'Shául, oo Shául! Taw chiá maná ázára dayay? Taw hamá kaigarén gókey paymá ay ke shatay tusk o tézén sojjá† lagata jant o watá táwana dant.' ¹⁵ Man jost kort: 'Oo wájah! Taw kay ay?' Hodáwandá passaw dát: 'Man Issá án, hamá ke taw áiy ázára dayay. ¹⁶ Nun pád á, wati pádáni sará bósh, man paméshká pa taw paddar butagán ke tará wati sháhed o hezmatkár gechén bekanán, tán harché ke cha man distaget o démterá genday, pa áyan gwáhi bedayay. ¹⁷ Tará cha tai jenday kawmá o cha darkawmán, ke áyani Kerrá tará rawána dayán, rakkénán. ¹⁸ Tará paméshká áyani Kerrá ráha dayán, tán chammánesh pach bekanay. Á cha taháriá rozhnáiy némagá byáyant o cha Shaytánay porzórén dastá dém pa Hodáay ráhá betarrant, tán gonáhesh pahell kanag bebant o gón hamá mardomán sharikdár bebant ke cha

* 26:9 26:9 Asligén Yunáni nebeshtánka gwasht: "Issá Náseriay". † 26:14 26:14 Shatt dáré o sojj dáray tuskén sarok ent. Nangár kanagay wahdá, é dárá pa gókáni hay kanagá kára bandant.

mani saray báwarmandiá pák o palgár butagant.’

¹⁹ “Oo bádsháh Agripás! Man cha á ásmáni shobénay managá sar táb nadát. ²⁰ Péसारá Dameshkay shahray mardománi nyámá, randá Urshalim o Yahudiahay sajjahén hand o damagáni mardománi Kerrá o goddhá darkawmáni gwará ham shotán o é kolaw rasént ke cha wati gonáhán pashómán bebant o Hodáay ráhá per be-tarrant o cha wati kárán paddar bekanant ke Hodáay ráhesh geptag. ²¹ Paméshká Yahudián maná mazanén parasteshghá gept o koshagay johdesh kort. ²² Bale Hodáyá maná tán maróchigá komak kortag o nun edá óshtátágán o mazan o kasán, sajjahénáni demá gwáhia dayán. É habarán ke man kanagá án, cha Mussá o é dega nabíáni péshgóián dhann naant, ²³ ke Masih báyard ent sakki o sóri besag-git, bemerit o cha sajjahénán péसार, cha mordagán zendag bebit, jáh bejant o pa wati kawm o darkawmán nur o rozhnay mestágay járá bejant.”

Pa Agripásay báwarmand bayagá, Pulosay wáhag

²⁴ Hamedá, Pestusá pa borztawári Pulosay habaray tahá dawr kort o gwashti: “Oo Pulos! Taw bésár ay, tai geshén zánt o zánagá tará ganók kortag.” ²⁵ Pulosá darráént: “Sharapdárén wáli Pestus! Man bésár naán, é chizz ke mana gwashán rást o hóshmandén[‡] habar ant. ²⁶ Bádsháh Agripás wat é chizzáni bárawá sharra zánt o man pa deléri é habarán kanagá án, chiá ke deljam án, á cha é sargwastán sahig ent, é sajjahén yak gwandhén kallag o kerreá wa nabutagant. ²⁷ Marháhdárén bádsháh Agripás! Tará nabíáni sará báwar ent? Haw! Mana zánán ke tará báwar ent.” ²⁸ Gorhá Agripásá gón Pulosá gwasht: “Tai hayálá, maná gón wati habarán chosh zutt Masihíáni ráhá áworta kanay?” ²⁹ Pulosá passaw dát: “Zutt yá dér, bale man cha Hodáyá hameshiá lóthán ke éwák taw na, harkas ke maróchi mani habarán gósh dárágá ent, mani dhawlá báwarmand bebit, bale pádi zamzilán mabant.”

³⁰ Randá bádsháh o gón áia wáli, Berniki o neshtagén mardom pád átkant. ³¹ Wahdé dar áyagá atant, watmánwat gwashagá atant ke “é mardá choshén mazanén mayaré nakortag ke jél kanag yá koshag bebit.” ³² Bádsháh Agripásá gón Pestusá gwasht: “Agan é mardá Kaysaray hakdiwaná péshi malóthetén, annun ázát kanag butagat.”

27

Pulos o Rumay sapar

¹ Wahdé karár but má gón bójigá Itáliáyá berawén, gorhá Pulosesh gón dega lahtén bandigá, Julyus námén apsaréay dastá dát, ke cha Kaysaray lashkará at. ² Má bójigéá swár but o ráh kaptén ke á cha Adrámitinay bandená átkagat o Ásiáay damagay é dega bandenán rawagi at. Tesálunikiay shahray Aristarkás námén Makdunié ham, é bójigá gón at. ³ Domi róchá, may bójigá Saydunay bandená nangar dawr dát. Apsar Julyus gón Pulosá mehrabán at o eshti ke Pulos berawt gón wati dóstán gendok bekant o áiy zaluratán purah bekanant. ⁴ Cha ódá padá ráh geptén bale gwát may demá at, paméshká má Kebresay jazirahay kash gept o érgwátá* demá rawán butén. ⁵ Cha Kilikiah o Pampiliahay zerkerrán gwazán, Likiahay damagá, Mirahay shahrá átkén. ⁶ Ódá may pawji apsará dega bójigé dar gétk ke cha Mesray shahr Eskandariahá átkagat o Itáliáyá rawagá at. Áia mára hamé bójigá swár kort. ⁷ Má tán bázén róchán madán madán† demá shotén o pa hillaté Knidusay bandenay nazziká átk o rasetén. Nun gwát may demá at, paméshká cha Kritay érgwátén pahnátá Salmunahay Kerrá gwazán, demá shotén o ⁸ pa sakki o sórié “Zéba” námén bandená sar butén ke Lásiahay shahray nazziká ent.

⁹ Bázén wahdé zawál butagat, tantaná Róchagay Aid[‡] ham gwastagat o daryáay sapar báz torsnák butagat, paméshká Pulosá á dháh dát o hozzhár kortant, ¹⁰ gwashti: “Oo wájahán! Man an-chosha gendán ke sakkén binnák o táwánbáren saporé may demá ent, na tahná pa bójig o bójigay bár o bonagá, pa may zendá ham.” ¹¹ Bale pawji apsará Pulosay habaráni sará delgósh dayagay badalá, bójigay hodábond o náhodáay habar zortant. ¹² Zemestáná á banden pa dárágá sharr naat, paméshká géshterénáni shawr hamesh at ke bójig cha ódá dar bekapit o agan buta kant, á Piniksay bandená watá berasénant o zemestáná ódá begwázénant. Piniksay banden, Kritay yak bandené ke démi cha shomál o jonubá magrebay némagá ent.

Mazanén tuppán

¹³ Wahdé sobakkén zerbári gwát wassh wasshá kasshagá lagget, gománesh kort ke nun áyáni delay morád puraha bit. Gorhá

‡ 26:25 26:25 Hóshmand, bezán agli. * 27:4 27:4 “Érgwátay” máná esh ent ke yak diwálé, kóhé yá dega chizzé gwátay demá dárit. † 27:7 27:7 Madán madán, bezán ástah ástah, lahm lahmá, wassh wasshá. ‡ 27:9 27:9 Róchagay aid, bezán Yahudiáni “Yawm Kipur” námén aidé ke érahtay wahdá ent.

bójigay nangaresh chest kort o Kritay jazirahay pahnátá gerán, tayábay nazziká rawán butant. ¹⁴ Bale dér nagwast ke tuppánén gwátéa cha Kritá sar kort, ke áia góricháni ródarátkey^S gwáta gwashant. ¹⁵ Bójig gón tuppáná dochár kapt o gwátay démi dásht nakort, paméshká má watá gwátay sepordah kort o chawl o mawján márá demá bort. ¹⁶ Má gwandhén Kawdá námén jazirahéay érgwátá, pa sakki bójigay kathi* dastá áwort. ¹⁷ Kathiay sar géjagá rand, gón tayl o sádán bójigesh chapp o chágerdá mohrband kort ke maproshít. Torsetesh chosh mabit ke bójig, Sirtisay bazén rékání tahá mén berawt, paméshká bójigay ácháresh[†] ér gétk o bótk, nun gwát bójigá demá baragá at. ¹⁸ Bójig cha gwátay trondi o daryáay chawl o mawjáni mastiá chest o ér bayagá at, paméshká domi róchá, bójigay bár o bonagáni chagal dayagá laggetant. ¹⁹ Saymi róchá, bójigay bázén kárgéj o sámánesh ham daste wat daryáay dawr dátant. ²⁰ Wahdé tán bázén róchán na róch gendaga but o na estár o tuppánén gwát ham kasshagá at, gorhá má pa watí zenday rakkagá hech omét nakasshet.

²¹ Tán báz róchá waragesh ham nawártagat. Gorhá, Pulos áyáni demá óstát o gwashti: “Oo mardán! Agan shomá mani habar bezortén o cha Kritá dar mayátkénét, may sará inchok sakki o sóri nakaptagat o inchok táwán ham narasetagat. ²² Bale nun gón shomá dazbandia kanán wati delá dhaddh kanét, bójiga boddhit bale shomay jendá heccha nabit. ²³ É habará, man paméshká zánán ke dóshi cha hamá Hodáay némagá ke man áiyag án o áiyag hezmatkár án, préshtagé átk, mani kashá óstát o ²⁴ gwashti: ‘Oo Pulos! Maters, taw báyard Kaysaray darbára pésh kanag bebay, man bójigá tai hamráh ham Hodáay rakkéntagant.’ ²⁵ Oo brátán! Delá dhaddh kanét chiá ke maná Hodáay sará setk ent o deljam án, préshtagá harché maná gwashtag, allamá hamá dhawlá bit. ²⁶ Bale may bójig yak jazirahéa ména rawt.”

Bójigay proshag

²⁷ Chárdahomi shapá, may bójig angat Ádriátikay Zerá[‡] jombán o chest o ér bayán at. Shapnémá, jánshóán gomán kort ke tayábgwar nazzik ent. ²⁸ Gorhá ápay johliesh sódet o kesás kort ke bist

gwáz^S at, wahdé bójig kammé démterá shot padá ápesh sódet o zántesh ke zeray johli pánzdah gwáz* ent. ²⁹ Torsetesh, chosh mabit ke bójig ápa gón kóhéa dhikk bwárt. Paméshká bójigay poshti némagá chár nangaresh daryáay dawr dát o dwaesh kort ke zutter róch bebit. ³⁰ Jáns hó cha bójigá ér kapag o jehagá delmánag atant, paméshká áyan kathiay sád pach kortant o daryáay ér gétk. Áyáni nimmón esh at ke cha démi némagá ham nangar ápa ér begéjant. ³¹ Pulosá gón pawji apsar o sepáhigán gwasht: “Agan jánshóán bójig yalah dát o jestant, gorhá shomá rakketa nakanét.” ³² Paméshká sepáhigán sád borretant o kathi daryáay yalah dát.

³³ Wahdé gwarbám nazzik but, Pulosá sajjahén delbaddhi dát o gwashtant: “Shomá tán chárdah róchá wadár kortag ke báren ché bit o ward o warákó dast ham najatag. ³⁴ Paméshká man gón shomá dazbandia kanán chizzé bwarét tán zendag bemánét, cha shomá hechkasay saray mudáni thálé ham zýana nabit.” ³⁵ Pulosá nán zortant, sajjahénáni demá Hodáay shogr gépt o padá nán tronset o warag bongéj kort. ³⁶ Cha eshiá sajjahénáni del dhaddh but o á ham waragá laggetant. ³⁷ Bójigay tahá má dosad o haptád o shash mardom atén. ³⁸ Wahdé waragesh wárt o sér kort, gallahén dánesh daryáay dawr dátant tán bójig sobakter bebit.

³⁹ Róch ke dar átk, tayábesh dist bale nazántesh kojám sardhagará ant. Talagén hóré[†] distesh ke tayábi rék at, shawresh kort, agan bebit bójigá hamé hórá sara géjant. ⁴⁰ Nangaresh bótk o daryáay yalah kortant. Bójigay sokkánesh ke gón sádán bastagat pach kort o bójigay démi némagay áchár borz kort, tánke tayábá sar bebant, ⁴¹ bale áp é jágahá talag at, paméshká bójigay démi némag rékání tompéa mén shot o poshti némag cha mastén chawláni zóra proshagá lagget. ⁴² Sepáhigán kaydiáni koshagay shawr kort tán chó mabit ke cha áyan kasé ózhnág[‡] bekant o betachit, ⁴³ bale pawji apsará pa Pulosay zenday rakkénagá sepáhig cha é kára makan kortant o parmán dát ke agan kasé ózhnág korta kant, daryáay kopp bekant o tayábá berawt, ⁴⁴ é dega mardom, lahtén tahtagén dáráni komaká o lahtén bójigay é dega

^S 27:14 27:14 Ródarátk, bezán hamá némag ke róch dara kayt, mashrek. * 27:16 27:16 Kathi (yá sudommi) kasánén bójigé ke har mazanén bójigá hast. † 27:17 27:17 Áchá, bezán bádpán. ‡ 27:27 27:27 Pulosay zamánagá, Ádriátikay Zer cha maróchigén Ádriátikay Zerá master butag o á wahdá Máltháay nazzikén zer ke maróchi “Yónyan Zer” gwashaga bit, ham Ádriátikay Zerá hawár butag. § 27:28 27:28 Bezán chel mitar. Har doén dastáni drájiá, ke do mitara bit, gwáza gwashant. * 27:28 27:28 Bezán si mitar. † 27:39 27:39 Hór, Arabi o Pársiá “khalij”. ‡ 27:42 27:42 Ózhnág, bezán shená.

thokkoráni sará watá hoshkiá berasénant. É dhawlá sajjahén mardom pa wasshi o salámati tayábá ér kaptant.

28

Máltháay jazirahá, Pulosay mójezah

¹ Wahdé má sajjahén pa wasshi o salámati hoshkiá ér kaptén gorhá zántén ke á jazirahay nám Málthá ent. ² Óday mardomán gón má bedarwarén mehrabánia kort, hawr gwáragá at o sakk sárt at, áyán mazanén ásé rók kort o mára wasshát kkanáná gwasht: "Watá betápét o garm bekanét." ³ Pulosá lahtén lansh o dár chet o mocch kort o anchosh ke ásay tahá dawr dayagá at, cha ásay garmia yak garmaré dar átk o áiy dastá mangal but. ⁴ Mardomán wahdé Pulosay dastá patátágén már dist, watmánwatá gwashtesh: "Allamá é mard hónigé ke cha daryáyá raketag bale nun ensápáy hodá* áiy zendagá naylit." ⁵ Bale Pulosá wati dast chandhet, már ásá kapt o Pulosá hecch nabut. ⁶ Mardom cháragá atant ke allamá áiy jesm o ján gwáta gipt yá kapit o merit. Tán dérá wadárezh kort bale wahdé distesh áiy choshén hech chizzé nabut, gorhá áyani hayál badal but o gwashtesh: "É cha hodáyan yakké."

⁷ Jazirahay sardár Publiusay melkat o jáydád nazzik atant, sardár may kerrá átk o mára wati lógá borti o tán say róchá mehmáni kort. ⁸ Hamá róchán sardáray pet tapig at o láprechéá geptagat. Pulos áiy kerrá shot, dasti baddhá jat o gón wati dwáyá dráhi kort. ⁹ Randá á jazirahay é dega nájórhén mardom Pulosay kerrá átkant o dráh butant. ¹⁰ Áyan har paymá mára báz sharap dát o randá, rawagay wahdá pa sát o saporá harché tóshag ke mára pakár at dátesh.

Pulos, dém pa Rumá

¹¹ Máltháay jazirahá say máhá jallagá rand, cha Eskandariahay shahrá átkagén bójigéá swár butén. Bójigay démi némagá daryáyá járhén botáni† neshán per at. ¹² Wahdé bójig Sirákusay bandená raset, gorhá tán say róchá hamódá mahtal butén. ¹³ Má cha ódá ráh gept o Régiumay bandená átk o rasetén. Domi róchá zerbári gwátéá sar kort, saymi róchá Putiuliyay bandená rasetén. ¹⁴ Ódá má wati lahtén báwarmandén brát dist o áyan lóthet tán haptagéá áyani kerrá bedáren. Cha ódá Rumay shahrá rasetén. ¹⁵ Wahdé óday báwarmandén brátán eshкотagat ke

má pédák én, gorhá tán "Ápiusay Bázará" o "Say Mosáperjáh" námén métagéá may péshwázia átkant. Pulosá ke distant, áiy delbaddhié raset o Hodáay shogri gept. ¹⁶ Rumay shahray rasagá, Pulosá é mókal dayag but ke jetéén lógéay tahá, tahná gón yak negahpánén sepáhigéá benendit.

Pulos, Rumay shahrá

¹⁷ Say róchá rand, Pulosá Rumay shahray Yahudiáni kamásh wati kerrá lóthetant. Wahdé átk o yakjáh butant, gón áyan gwashti: "Oo mani brátán! Harchont man pa wati kawm o pet o piroki dód o rabédagán hech dhawlén radén karé nakortag, bale angat lahtén mardomá maná Urshalimá geráentag o Rumiáni dastá dátag. ¹⁸ Rumián bázén patth o póla rand, pa man hech choshén mayaré nadist ke koshag bebán, paméshká lóthetesh maná yalah bedayant. ¹⁹ Bale Yahudián áyani é shawr namannet, nun man náchár bután ke cha Kaysará pa wat ensáp belóthán, angat ham wati kawmay zangá najanán o maná cha áyan gelagé nést. ²⁰ Paméshká shomará wati kerrá lóthetag tán shomará begendán o gapp o trán bekanén. Man pa 'Esráilay armáná‡ gón é zamzil o sánkalan bandig án." ²¹ Gwashtesh: "Tai bárawá cha Yahudiahá pa má hech kolaw o kágadé nayátkag o cha may brátán ke edá átkagant, na kaséa tai bárawá gón má hál o hawál kortag, na kaséa bad o radén habaré gwashtag." ²² Bale má tai pegr o hayálán cha tai jenday dapá gósh dáraga lóthén. Parchá ke má zánén shomay Issái thóliay bárawá har jágah mardom bad gwashagá ant.

²³ Áyan gón Pulosá pa gend o nendá yak róché gishhént o á róchá, cha pésará géshter mardom Pulosay lógá átk o mocch but. Gorhá Pulosá sabáhá beger tán bégáhá gón áyan Hodáay bádsháhiay bárawá trán kort o gwáhi dát. Áiy cha Mussáay Sharyat o gwastagén Nabiáni Ketábáni gwáhi o dalilán é johd kort ke Issáay mannógeriá áyani delán benádénit. ²⁴ Áiy habaráni gósh dáraga rand lahtén báwarmand but bale dega lahténá báwar nakort. ²⁵ Á watmánwat nátepák but o cha ódá shotant, bale áyani rawagá pésar, Pulosá wati goddhi habar kort: "Pákén Ruhá cha Eshayá nabiay zobána gón shomay pet o pirénán chón wassh o rást gwashtag:

²⁶ *É kawmay gwará beraw o begwash: "gón góshána eshkonét, bale sarkecha nawarét,*

* 28:4 28:4 Máltháay mardom botparast butagant. Áyani ensápáy bánokén hodáay nám "Diki" at. † 28:11 28:11 É doén botáni nám Kástor o Puluks atant ke Jawzá ham zánaga bant. ‡ 28:20 28:20 "Esráilay armán", bezán Masihay áyag.

gón chammána chárét, bale nagendét,”

²⁷ *chiá ke é kawm sengdel butag,*

góshesh grán ant,

áyán wati chamm bastagant

chó mabit áyáni chamm begen-

dant,

áyáni gósh beshkonant,

áyáni del bezánant o sarpad bebant o

mani némagá per betarrant

ke man áyán dráh bekanán. †

²⁸ Paméshká man shomará sahiq o sarpada kanán ke cha Hodáay némagá rakkénagay é jár darkawmáni kerrá baraga bit, á gósha dárant.” ²⁹ Wahdé Pulosá é habar gwasht, Yahudi pád átk o shotant o watmánwatá pa trondi dapjákesht kort.*

³⁰ Pulos tán do sálá wati jenday keréh kortagén lógéá jahmenend but o harkas pa gendoká byátkén áiá wasshátka kort.

³¹ Pa natorsi Hodáay bádsháhiay jária jat o Hodáwandén Issá Masihay bárawá mardomi tálima dátant o hechkaséá á, makana nakort.

† 28:27 28:27 Eshayá Nabiyi Ketáb 6:9-10.

* 28:29 28:29 Lahtén daznebeshtá band 29 nést.

Pulosay kágad pa Rumián

Drud

¹ Cha Issá Masihay hezmatkár,* Pulosay némagá ke pa kásediá gwánk janag butag o zendi pa Hodáay wasshén mestágá wapk† ent, ² hamá wasshén mestág ke Hodáyá pésará wati nabiáni wasilahá, Pákén Ketábáni tahá wádah dátatag. ³⁻⁴ É mestág áiy Chokk bezán may Hodáawand Issá Masihay bárawá ent ke jesmi hesábá, Dáuday poshtpad o óbádag ent. Wahdé cha mordagáni nyámá jáhi jat, Pákén Ruhay wák o kodratay sawabá Hodáay zórmandén Chokk zánag o jár janag but. ⁵ Márá cha áiy némagá é rahmat o kásediay kár rasetag ke pa hamáiy námaygi, sajjahén darkawmáni nyámá anchén parmánbardárié byáren ke cha imáná kayt. ⁶ Gón áyán shomá ham hór ét, shomá ke gwánk janag butagét ke Issá Masihay bebét.

⁷ Pa Rumay hamá sajjahén mardomán ke Hodáyá dóst ant o gwánk janag butagant ke pák o palgár bebant.

Cha may Hodáén Pet o Hodáawandén Issá Masihá pa shomá rahmat o émeni sar bát.

Pa Rumay saporá Pulosay lóth o wáhag

⁸ Har chizzá pésar, cha Issá Masihay ráhá pa shomá sajjahénán wati Hodáay shográ gerán, chiá ke shomay imánay tawár sajjahén donyáyá sheng butag. ⁹ Hamá Hodá ke man pa ján o del, gón áiy Chokkay wasshén mestágay sar kanagá áiy hezmatá kanán, wat sháhed ent ke wati dwáyáni tahá modám shomárá yata kanán. ¹⁰ Mani dazbandi cha Hodáyá esh ent ke godhsará, gón hamáiy razáyá shomay Kerrá rasagá kámyáb bebán, ¹¹ chiá ke shomárá gendaga lóthán, tán pa shomá ruhánién thékié berasénán ke shomárá mohr o mohkam bekant, ¹² bezán ke márá cha yakdomiay báwar o imáná delbaddhi berasit, cha manig o shomay imáná.

¹³ Oo brátán!‡ Lóthán shomá bezánét báz randá wati delá shawron kortag shomay Kerrá byáyán bale har randá yak na yak moshkeléá maná dáshtag. Mani wáhag at shomay nyámá bar o samaré bekatthán, hamá paymá ke cha á dega darkawmán katthetag. ¹⁴ Man,

* **1:1** 1:1 Asligén Yunáni nebeshtánka gwashit: “golám”.
1:13 “Brátay” maná har báwarmand ent, mardén o janén.

† **1:17** 1:17 Yá: “Pák o pahrézkár imánay sará zenda gwázénit.” Habakuk Nabiay Ketáb 2:4. † **1:20** 1:20 Saresht, bezán báten, fetrat, jawhar.

watá Yunáni o Barbar,§ dáná o nádánáni zemmahwára zánán. ¹⁵ Paméshká, mani del báza lóthit shomárá ham ke Rumá nendók ét, mestág o bashárat bedayán. ¹⁶ Parchá ke cha Issáay wasshén mestágá pashal o sharmendag naán, é pa har hamá kasay rakkénagá Hodáay zór o twán ent ke báwara kant, awalá pa Yahudián o randá pa darkawmán. ¹⁷ Chiá ke Issáay wasshén mestágay tahá hamá páki o palgári pad-dara bit ke cha Hodáay némagá ent, hamá páki o palgári ke cha azal tán abad imánay sará óshátatag, anchosh ke nebisag butag: “Hamá ke cha imánay ráhá pák o palgár ent, zendaga manít”.*

Pa gonahkárán Hodáay kahr

¹⁸ Hodáay kahr o gazab cha ásmáná záhera bit o mardománi sajjahén béhodái o badkáriáni sará kapit, ke gón wati radkárián, rástiy ráhá lagatmála kanant. ¹⁹ Parchá ke á chizz ke Hodáay bárawá zánaga bit, pa áyán záher ent. Hodáyá á chizz pa áyán tachk o záher kortag. ²⁰ Cha donyáay jórhénagá beger tán annun Hodáay chér o andémén jawhar, bezán áiy abadmánén zór o Hodái saresh† cha áiy jórhéntagén chizzán gendag o zánaga bit, nun mardomán námah o nimmóné nést. ²¹ Harchont ke Hodáesha zánt, bale Hodái ezzatesha nadát o shogresha nagept. Eshiyá badalá, wati náhudagén pegr o hayáláni tahá gomráh butant o áyáni násarpadén del taháriá póshet. ²² Harchont ke watá dáná gwashtesh bale hódh o ahmak butant. ²³ Namiránén Hodáay shán o shawkatesh gón hamá botán sawdá kort ke hákién ensán, báli morg, chárpadén haywán o már o gójáni rang o dróshomá‡ atant. ²⁴ Paméshká Hodáyá á, áyáni deláy sell o badén wáhagáni tahá yalah kortant tán gón nápákiá wati jesmán watmánwatá sobakk o béarzesh bekanant. ²⁵ Áyán Hodáay hakk o rásti gón drógá sawdá kort o addh kanókné Hodáay badalá, addh kortagénáni parastesh o hezmatesha kort, hamá addh kanók ke tán abad satá o saná karzit. Anchosh ent, Ámin.

²⁶ Paméshká Hodáyá ham á, áyáni sharmnákén hawá o hawasáni tahá yalah kortant. Áyáni janénán wati wapt o wábay aslén ráh yalah dát o naráhén keshká shotant. ²⁷ Hamé paymá, mardénán gón wati janénán ráh o rahbandén nazz-íki yalah dát o watmánwatá hawá o hawasáni ásá kaptant, mardénán gón

† **1:1** 1:1 Wapk, bezán chizzé ke nadra bit. ‡ **1:13**

§ **1:14** 1:14 Barbar pa á kawmán ke Yunáni zobán

‡ **1:23** 1:23 Dróshom, bezán shekl.

mardénán sharmnákén kára kort o é badráhiáni allamén sezáesh jendá raset. ²⁸ Áyán Hodápajjárí porarzesh o allamén káré nazánt o Hodáyá ham á, bénangén pegr o hayáláni tahá yalah kortant tán náráhen káráni tahá bekapant. ²⁹ Á cha har paymén badkári, gandahi, tamah o badén hayálán porr o sarréech butagant, cha hasadd o konnat, hón o kósh, jang o jadál, mandr o préb o badwáhiá porr, mardománi báposhtá habar kanók, ³⁰ bohtám janók, hodábézár, béadab, gorunák, bathák janók, badkerdiay jorhénók, pet o máyat náparmán, ³¹ ahmak, béwapá, béehsás o bérahm ant. ³² Harchont á cha Hodáay hokmá sahig ant ke choshén káráni kanók markay láhek ant, bale angat na tahná wat á kárána kanant, degaráni ham choshén káráni poshta bant.

2

Hodáay ádelén dádrasi

¹ Paméshká taw, harkas ke bebay, wahdé degarán mayáriga kanay, tará ham ozré nést. Chiá ke gón degaréay mayárig kanagá, watá mayáriga kanay. Parchá ke taw wat hamá kárána kanay. ² Má zánén Hodáay dádrasi* áyáni sará barhakk ent ke é paymén kára kanant. ³ Taw, harkas bebay, wahdé degarán éra janay bale wat hamá kárána kanay, tai hayálá cha Hodáay dádrasiá rakkay? ⁴ Yá ke áiy mehrabáni o sabr o tahambolay ganjá béarzeshá zánay o é chizzá sarpada nabay ke Hodáay mehrabániay maksad hamesh ent ke tará dém pa pashómániá bebárt? ⁵ Bale taw gón wati nápushómán o sengén delá, pa kahr o gazabay róchá pa wat kahr o gazab ambára kanay, hamá róchá ke Hodáay ádelén dádrasi záhera bit.

⁶ Hodá harkasay mozzá áiy kortagén káráni hesábá dant. ⁷ Hamá ke gón sabr o ópár, nékén káráni sará mohr óshtatagant o shawkat, ezzat o namirániay randá ant, áyán namiránén zenda bakshít. ⁸ Bale pa watwáh o hamá mardomán wati kahr o gazabá gwárenit ke hakk o rástiy badalá badkáriay randgir ant. ⁹ Harkas ke badén kára kant, ranj o azábáni tahá kapit, pésará Yahudi o randá Yunáni.† ¹⁰ Bale harkas ke nékia kant, shawkat, ezzat o émeniy wáhonda bit, pésará Yahudi o randá Yunáni. ¹¹ Chiá ke Hodá ru o ryá‡ nakant.

¹² Á ke Sharyatá nazánant o cha Sharyatá dhann gonáhesh kortag, cha Sharyatá

dhann tabáh o bérána bant o á ke Sharyatá zánant o Sharyatay chérá gonáhesh kortag, áyáni dádrasi Sharyatay hesábá bit. ¹³ Chiá ke tahná cha Sharyatay rahbandáni eshkonagá, kas Hodáay chammá pák o palgára nabit. Hamá kas pák o palgár zánaga bit ke Sharyatay rahbandáni sará kára kant. ¹⁴ Wahdé darkawm ke Sharyat pa áyán narasetag bale cha wati sareshá anchén kára kanant ke Sharyatay rahbandá ant, á wati sará wat Sharyat ant, bell ke Sharyatesh nést. ¹⁵ Gón wati é kárán pésha dárant ke Sharyatay rahband áyáni delá nakant. Áyáni del o jabin pa eshiá gwáhia dant o pegr o hayálesh baré áyán mayárig o baré bémayára kanant. ¹⁶ É hamá róchá paddara bit ke Hodá cha Issá Masihay ráhá, mardománi chér o andémén pegráni dádrasiá kant, hamá dhawlá ke mani wasshén mestága gwashít.

Yahudi o Hodáay Sharyat

¹⁷ Bale agan taw watá Yahudié zánay o Sharyatay sará tawkala kanay, agan gón Hodáyá wati nazziykiay sará pahra banday, ¹⁸ agan cha Sharyatá tálím geragay sawabá Hodáay wáhagá zánay o gehterená pajjáha káray, ¹⁹ agan deljam ay ke kóráni rahshón ay o pa áyán nuré ay ke tahárókiá ant, ²⁰ agan hamá Sharyatay sawabá ke zánt o rástiy jawhar ent jáheláni tálím dayók o kóðakáni ostád ay, ²¹ agan taw degarán tálíma dayay, gorhá chiá wati jendá tálíma nadayay? Taw ke dozziay helápá jára janay, bárén wat dozzia nakanay? ²² Taw ke zenáyá makan o manaha kanay, bárén wat zená nakanay? Tará ke cha botán naprat ent, bárén wat botáni parasteshgáhána napolay? ²³ Taw ke Sharyatay sará pahra banday, bárén gón Sharyatay próshagá Hodáay béezatiá nakanay? ²⁴ Hamá paymá ke nebeshtah ent: “*Shomay sawabá darkawm Hodáay námá béezzata kanant.*”§

²⁵ Borrok o sonnatá hamá wahdá arzesh hast ke Sharyatá barjáh bedáray bale agan Sharyatá bepróshay gorhá bezán sonnat kanag nabutagay. ²⁶ Agan á ke sonnat kanag nabutag bale Sharyatay rahbandán purah bekant, sonnat butagén hesába nabit? ²⁷ Á ke jesmi sonnat kanag nabutag bale Sharyatay sará kára kant tará mayáriga kant. Bell ke tará nebeshtagén Sharyat o sonnat kanagay rasm hast, bale taw angat Sharyatá próshay. ²⁸ Chiá ke Yahudi á naent ke sarzáherá Yahudi ent o anchosh ham rástén sonnat bayag,

* 2:2 2:2 Dádrasi, bezán hakkén paysalah, hamá shawr ke cha dádgáhána kayt, dáwari. † 2:9 2:9 Yunáni edá pa sajjáhén darkawmán mesalé. ‡ 2:11 2:11 Ru o ryá, bezán park o dark, tarafdári, Arabi o Pársiá “tab’iz”. § 2:24 2:24 Eshayá Nabiy Ketáb 52:5 o Hezekiál Nabiy Ketáb 36:22.

sarzáheri chizzé naent. ²⁹ Yahudi hamá ent ke pa del Yahudi bebit o rástén sonnat delay tahá bit, cha Hodáay Ruhá bit, cha nebeshtagén labzá nabit. Choshén mardomá cha ensáná satá narasit, cha Hodáyá rasit.

3

Hodáay wapádári

¹ Gorhá Yahudi bayagay páedag chi ent o sonnatay arzesh ché buta kant? ² Har paymá ke bechárén, esháni páedag báz ent. Awali gapp esh ent ke Hodáyá wati habar Yahudiáni sepordah kortag. ³ Bale agan cha áyán lahtén wapádár nabut, gorhá ché bit? Áyáni béwapái Hodáay wapádáriá halás o náákara kant? ⁴ Hechbar! Bell ke sajjahén mardom drógband bebant, Hodá rástgó ent! Hamá paymá ke nebisag butag:

“Paméshká, taw ke habara kanay barhakk ay o

*dádrasiay wahdá kámyáb.”**

⁵ Bale agan may badkári Hodáay páki o palgáriá paddara kant, gorhá ché begwashén? Hodá náensáp ent ke áiy kahr o gazab may sará kapit? (Nun man ensáni habar kanagá án.) ⁶ Hechbar chosh naent. Agan chosh butén gorhá Hodáyá che paymá donyáay dádrasi korta kort? ⁷ Balkén kasé begwashit: “Agan gón mani drógá Hodáay rásti géshter záher o paddara bit o áiy shán o shawkat master, gorhá chiá man angat pa gonahkáriá mayárig kanaga bán?” ⁸ Chiá magwashén: “Byáét badi kanén tán bar o samari néki bebit?” Hamá paymá ke lahtén mardom mára bohtáma jant o gwashit ke má chosh gwashagá én. Áyáni hakk ent ke mayárig kanag bebant.

Kass pahrézkár naent

⁹ Gorhá ché begwashén? May, Yahudiáni hál cha á degarán gehter ent? Na, hech paymá gehter naent! Chiá ke má é habar paddar o pakká kortag ke sajjahén mardom, Yahudi o Yunáni, gonáhay bandig ant. ¹⁰ Anchosh ke nebeshtah ent:

“Kass pahrézkár naent, hechkas.

¹¹ *Kass sarpada nabit, hechkas Hodáay shóházá naent.*

¹² *Sajjahénán wati dém tarréntag o hóriá náhudag butagant,*

kass nékén kár kanagá naent, hechkas.†

¹³ *Goth o galush práhén kabré, zobáná pa makr o prébá kára bandant,‡*

garmáray zahresh lontháni chérá ent o§

¹⁴ *dapesh cha baddwái o jawr o kocchalá porr ant,**

¹⁵ *pa hónay réchagá eshtápa kanant,*

¹⁶ *har jáh ke rawant, béráni o bazzagia kárant,*

¹⁷ *sohl o émeniy ráhesh nazántag o†*

¹⁸ *áyáni chammán Hodátorsi nést.”*

¹⁹ Nuna zánén, Sharyat har ché ke gwashit pa hamá mardomán ent ke Sharyatay sáhegá ant, tán sajjahén dap band bebant o sarjamén donyá Hodáay bérgháh mayárig bebit. ²⁰ Parchá ke hechkas cha Sharyatay kár bandagá Hodáay démá pahrézkár zánaga nabit, chiá ke Sharyat mardomá sarpada kant ke gonáh chié.

Cha báwarmandiay ráhá, páki o palgári

²¹ Bale nun cha Sharyatá dhann, Hodáay bakshetagént páki o palgári záher butag ke Sharyat o nabíán pa áiy gwáhi dátag. ²² Issá Masihay sará báwarmandi, é pákiay bakshesh o thékiá pa sajjahén báwarmandána rasénit o pa kassá hech park o pére ellaga nabit. ²³ Parchá ke sajjahénán gonáh kortag o cha Hodáay shán o shawkatá dur ant, ²⁴ bale gón Hodáay rahmatay thékiá o hamá rakkénagá ke cha Issá Masihay némagá ent, pák o palgár zánaga bant. ²⁵ Hodáyá á pesh kort tán cha báwaray ráhá gón wati hóna hamá korbánig bebit ke gonáhána bakshit. É kári pa wati adlay pesh dáragá kort, parchá ke gón wati Hodái ópárá‡ cha pésarigén gonáhán sar gwastagat. ²⁶ Hodáyá paméshká chosh kort tán maróchigén wahdá pesh bedárit ke á, ádel ent o hamá kasá pák o palgára kant ke Issáay sará báwarmanda bit.

²⁷ Gorhá che chizzay sará pahr bebantén? Pa pahr jágahé nést. Kojám ráh o rahbanday sará eshiá zánén? Nékén kár o kerday rahbanday sará? Na, báwar o imánay rahbanday sará. ²⁸ Chiá ke may báwar esh ent ke ensán cha báwarmandiá pák o palgár zánaga bit, cha Sharyatay káráni kanagá na. ²⁹ Hodá éwaká Yahudiáni Hodá ent? Darkawmáni Hodá naent? Albat, á darkawmáni ham Hodá ent, ³⁰ parchá ke Hodá wa yakké o sonnat kortagén o sonnat nakortagénán, cha yakkén imán o báwaray ráhá pák o palgára kant. ³¹ Gorhá cha báwaray ráhá má Sharyatá próshén o harába kanén? Hechbar! Má Sharyatá mohrtera kanén.

* 3:4 3:4 Zibur 51:4. † 3:12 3:12 Zibur 14:1-3; 53:1-3. ‡ 3:13 3:13 Zibur 5:9. § 3:13 3:13 Zibur 140:3.

* 3:14 3:14 Zibur 10:7. † 3:17 3:17 Eshayá Nabiay Ketáb 59:7-8. ‡ 3:25 3:25 Ópará, bezán sabr, tahambol, bardásht.

4

Ebráhémay mesál

¹ Gorhá ché begwashén, Ebráhém ke jesmi hesábá may bonpirok ent, áiá ché katthet? ² Agan Ebráhém cha wati kár o kerdá pák o palgár zánag butén, áiá chizzé hastat ke áiy sará pahr bekant, bale Hodáay chammá chosh naent. ³ Pákén Ketáb ché gwashit? *Ebráhémá Hodáay sará báwar kort o hamé báwar pa áiá, páki o palgárié hesáb but.* ⁴ Nun kasé ke kára kant, áiy mozz, tohpah o thékié hesába nabit, áiy hakk ent. ⁵ Bale á ke nekén káráni sará tawkala nakant, hamá Hodáay sará tawkala kant ke radkár o béhodáyán pák o palgára kant, áiy báwar pa áiá páki o palgárié hesába bit. ⁶ Hamé paymá Dáud ham hamá mardomay bahtáwariay habará kant ke Hodá cha áiy kár o kerdá dhann áiá pák o palgár hesába kant o gwashit:

⁷ *“Bahtáwar ant hamá ke Hodá cha áyáni násharián sar gwastag o gonáhesh bakshag butagant.*

⁸ *Bahtáwar ent hamá ke Hodáwand áiy gonáhá hechbar hesábá mayárit.”[†]*

⁹ É bahtáwari tahná pa hamáyán ent ke sonnat kanag butagant? Yá pa áyán ent ham ke sonnat kanag nabutagant? Má gwashén ke Ebráhémay báwar, pa áiá páki o palgárié hesáb but. ¹⁰ Chónén hál o jáwaréá chosh but? Sonnat bayagá pésar yá sonnat bayagá rand? Pakká ent ke sonnat bayagá pésar pák o palgár hesáb árag but, randá na. ¹¹ Bale sonnat bayagay nesháni áiá raset tán pa áiy páki o palgáriá mohr o nakshé bebit ke sonnat bayagá pésar, cha báwaray ráhá hastati. Maksad esh at ke Ebráhém hamá sajjahén mardománi pet zánag bebit ke bé sonnat bayagá imána kárant o é dhawlá á ham pák o palgár hesába bant. ¹² Hamé paymá, Ebráhém áyáni ham pet ent ke na tahná sonnat kanag butagant, imánay ráhá gám ham janagá ant, hamá ráhá ke may pet Ebráhémá cha sonnat bayagá pésar gáma jat.

Ebráhém o wádah

¹³ Ebráhém o áiy nasl o padréchá é wádah ke jahánay mirás baróka bant cha Sharyatay ráhá naraset, cha páki o palgáriay ráhá raset ke cha imáná kayt. ¹⁴ Parchá ke agan Sharyatay randgir o mannók mirás barók buténant, báwar béarzech o wádah bémáná at, ¹⁵ chiá ke Sharyat kahr o gazaba kárit. Bale ódá

ke Sharyat néstent, Sharyat próshag ham nabit.

¹⁶ Paméshká, wádah báwaray sará óstátat, tán wádahay bonred rahmat bebit o áiy sarjam bayag pa Ebráhémay sajjahén nasl o padréchá zamánat kanag bebit. É wádah tahná pa Sharyatay randgir o mannókán mabit, pa áyán ham bebit ke gón Ebráhémay imáná sharikdár ant, parchá ke Ebráhém may sajjahénáni pet ent. ¹⁷ Anchosh ke nebisag butag: *“Man tará bázén kawmáni pet kortag.”[‡]* Gorhá, Hodáay chammá á may pet ent, hamá Hodá ke Ebráhémá áiy sará báwar kort, á ke mordagán zendaga kant o néstíá gwánka jant o hasta kant.

¹⁸ Wahdé hech omété néstat, Ebráhémá gón ométwári báwar kort ke bázén kawméay peta bit. Anchosh ke Hodáyá gón Ebráhémá gwashtagat: *“Tai poshtpad o óbádag estáráni kesásá báza bant.”[§]*

¹⁹ Wahdé wati bésáhén jesm o jáni cháret, parchá ke Ebráhémá kamm o gesh sad sál at, yá hamá wahdá ke Sárahay santhi o béchokkii dist, á wati báwaray sará sost nabut. ²⁰ Hodáay wádahay sará, Ebráhém bébáwar nabut o shakki nakort, á wati báwaray sará mohr óstát o Hodái shán o shawkat dát. ²¹ Saddak at ke Hodáyá é wák hast ke wati wádahá purah bekant. ²² Paméshká cha Hodáay némagá *“pák o palgár hesáb árag but”*. ²³ Pákén Ketábay é labz ke *“hesáb árag but”* tahná pa Ebráhémá nebisag nabutag, ²⁴ pa má ham nebisag butag. Má ham cha Hodáay némagá pák o palgár hesáb áragá bèn, má ke Hodáay sará báwara kanén ke áiá may Hodáwand Issá cha mordagán jáh janáent. ²⁵ Issá pa may gonáhán, markay dastá dayag but o pa may pák o palgár kanagá, cha mordagán jáh janáenag but.

5

Hodá o ensánay nyámá wassháni

¹ Nun ke báwarmandiay sawabá pák o palgár zánag butagén, cha may Hodáwand Issá Masihay ráhá mayg o Hodáay nyámá sohl o wassháni* barjáh dárag butag. ² Cha Issá Masihay ráhá, é rahmatay darwázag ham pa má pach kanag butag o annun rahmatáni sáhegá óstátagén, wati é ométay sará gal o shádehi ham kanén ke Hodáay shán o shawkatá sharikdára bèn. ³ Tahná eshiay sará na, wati sakkíáni sará ham gal o shádehia kanén, chiá ke zánén sakkíay bar o samar sabr o ópár ent. ⁴ Ópár, shaksiat[†]

* 4:3 4:3 Pédáesh 15:6. † 4:8 4:8 Zabur 32:1-2. ‡ 4:17 4:17 Pédáesh 17:5. § 4:18 4:18 Pédáesh 15:5. * 5:1 5:1 Wassháni, bezán sohl, áshiti. † 5:4 5:4 Shaksiat, bezán kerdár, Arabi o Pársiá “shakhsiat”.

addha kant o shaksiat ométa kárit. ⁵ Omét márâ delprósh bayagá naylit, chiá ke Hodáay mehr may delá ér réchag butag, cha hamá Pákén Ruhay ráhá ke márâ bakshag butag. ⁶ Gisshéntagén wahdá, Masihá wati sáh pa radkár o béhodáyán dát, á wahdá ke má angat nezór o béwas atén. ⁷ Sakk kammok chosha bit ke kasé pa nek o pákén mardoméa cha wati sáh sar begwazit, chónáhá buta kant kaséá é tahm o joriat bebit ke wati sáh pa nékén mardoméa bedant. ⁸ Bale Hodá may sará wati mehrá chosh paddara kant: hamá wahdá Masih pa maygi mort ke má angat gonahkár atén.

⁹ Paméshká, nun ke má cha áiy hónay ráhá pák o palgár zánag butagén, angat deljamter én ke áiy sawabá cha Hodáay kahr o gazabá rakkénaga bén. ¹⁰ Agan á wahdá ke angat Hodáay dozhmen atén, cha áiy Chokkay markay ráhá gón áia pa sohl o wasshánía rasénag butén, gorhá nun ke pa sohl o wasshánía rasetagén, sakk deljamter én ke áiy zenday sawabá rakkénaga bén. ¹¹ Bale na tahná pa haminchoká, má cha wati Hodáwand Issá Masihay ráhá Hodáay sará pahra bandén, hamá Issá ke áiy sawabá annun márâ sohl o wasshání rasetag.

Ádam o Masih

¹² Gorhá hamá paymá ke gonáh yak kaséay sawabá jaháná átk o mark cha gonáhá, hamé dhawlá mark ham sajjahén mardománi nyámá sheng o tálán but, chiá ke sajjahénán gonáh kort. ¹³ Cha Sharyatá pésar, gonáh jaháná hastat, bale agan Sharyaté mabit, gonáh ham hesába nabit. ¹⁴ Bale angat, cha Ádamá beger tán Mussáyá, marká hákemi kort, tantaná[‡] hamáyáni sará ham ke sarkeshiesh Ádamay dhawlá naat. Ádam hamá kasay mesál at ke áyagi at.

¹⁵ Bale bakshesh o théki, náparmániay paymá naent. Agan yak kaséay náparmániay sawabá bázéné mort, bale Hodáay rahmat o théki chinchok géshter, bázén mardoméa sar but, é théki ke cha hamá yakkén ensánay rahmatá raset, bezán cha Issá Masihaygá. ¹⁶ É théki, á yakkén ensánay gonáhay ásaray paymá naent, chiá ke dádrasi cha yak náparmániéa átk o ásar o ákebati mayárbári at, bale bakshesh o théki bázén náparmánián o randa kayt o páki o palgária kárit. ¹⁷ Agan yakkéay náparmániay sawabá, cha hamá yakkénay ráhá marká bádsháhi kort, gorhá á mardom ke sarréchen rahmat o palgáriay thékiay wáhonda bant, cha é

yakkéná, bezán cha Issá Masihay némagá, wati zendá báz géshter bádsháhia kanant.

¹⁸ Gorhá hamá paymá ke cha yak ensánéay gonáhá sajjahén mardom mayárig kanag butant, cha yak ensánéay nékén kára sajjahén mardom pák o palgár o zenday wáhonda bant. ¹⁹ Hamá paymá ke cha yakkéay náparmániá bázén mardomé gonahkár kanag but, cha yakkéay parmánbardáriá bázéné pák o palgár ham kanaga bit. ²⁰ Nun, Sharyat átk ke náparmáni géshter bebit, bale jáhé ke gonáh gésht but, rahmat ham sarréchter but, ²¹ tánke, hamá paymá ke gonáhá cha markay ráhá bádsháhi kort, rahmat ham cha páki o palgáriá bádsháhi bekant o cha may Hodáwand Issá Masihay ráhá márâ dém pa namiránén zendá bebárt.

6

Cha gonáhá mark o gón Hodáyá zend

¹ Gorhá ché begwashén? Gón gonáhá démá berawén tán rahmat géshter bebit? ² Hechbar! Má ke cha gonáhá sestag o mortagén, chón buta kant ke angat gonáháni tahá zend begwázénén? ³ Shomá nazánét, wahdé má sajjahén Issá Masihay námá pákshódi dayag butén, gón áiy marká may pákshódi but?

⁴ Paméshká, má cha pákshódiay ráhá mortag o gón áia kabr kanag butagén, tán hamá paymá ke Masih cha Petay shán o shawkatá cha mordagán zendag kanag but, hamé dhawlá má ham nókén zenday tahá gám bejanén. ⁵ Agan má áiy paymén markéa gón áia hór butagén, gorhá allam áiy paymén jáh janagéa ham gón áia hóra bén. ⁶ Má zánén ke may kwahnén hasti o zend, gón áia salibay sará dran jag but tánke hamá jesm o ján bérán bebit ke gonáhay golám ent o má cha ed o rand gonáhay golámiá makanén. ⁷ Parchá ke á kas ke mortag cha gonáhá chotthetag. ⁸ Bale agan gón Masihá mortagén, márâ báwar ent ke gón áia zend ham gwázénén. ⁹ Má zánén, Masih ke cha mordagán jáh janáénag butag, nun hechbara namerit o mark cha ed o rand áiy sará sarzóra nabit. ¹⁰ Á, gón wati marká, yakkén randá pa modámi, pa gonáhá mort o wati annugén zendá, pa Hodáyá zendag ent. ¹¹ Hamé dhawlá, shomá ham watá pa gonáhá mordag bezánét o cha Issá Masihay ráhá watá pa Hodáyá zendag bezánét.

¹² Paméshká maylét gonáh shomay zawál bayóken jesm o jáná hákemi bekant ke áiy sellén wáhagán purah bekanét. ¹³ Wati jesm o jánay band o bógán gonáhay dastá madayét ke selliy sámán bebant. Shomá cha marká dém pa zendá

[‡] 5:14 5:14 Tantaná, bezán hattá, tán é haddá ke.

árag butagét, nun watá Hodáay sepor-dah bekanét o wati jesm o jánay band o bógán ham Hodáay dastá bedayét ke páki o palgáriay sámán bebant. ¹⁴ Báyard ent gonáh shomay sará hákemi makant, parchá ke shomá Sharyatay sáhegá naét, rahmatay sáhegá ét.

Páki o palgáriay golámi

¹⁵ Gorhá ché? Paméshká ke Shary-atay sáhegá naén o rahmatay sáhegá én, gorhá gonáh bekanét? Hechbar! ¹⁶ Wahdé watá parmánbardárén golámáni paymá yakkéay dastá dayét, áiy goláma bét, parchá ke cha hamáii parmána zurét. É habará nazánét? Yá gonáhay goláma bét ke dém pa marká bárt yá parmánbardáriay golám, dém pa páki o palgáriá. ¹⁷ Bale Hodáay shogr ent, harchont pésará gonáhay golám atét, nun shomá pa setke del hamá tálimay parmánbardári kortag ke áiy sepor-dah butagét. ¹⁸ Shomá cha gonáhá ázát kanag o nun páki o palgáriay golám butagét. ¹⁹ Wati sareshhá nezór ét, paméshká man é habarán gón ensáni mesáléa kanán. Hamá paymá ke shomá pésará wati jesm o jánay band o bóg pa ná páki o gésh o géshter bayókén radkáriáni golámiá péscha kort, nun áyán pa pákiay golámiá pesh bekanét ke ásar o ákehati palgári ent.

²⁰ Á wahdá ke shomá gonáhay golám atét cha páki o palgáriay némagá ázát atét. ²¹ Gorhá shomá cha á chizzán chónén samaré bort ke nun cha áyán sharmendag ét, á chizzáni ásar mark ent. ²² Bale nun ke cha gonáhay némagá ázát butagét o Hodáay golám ét, samaré ke kathét palgári ent o áiy ásar namiránén zend. ²³ Parchá ke gonáhay mozz mark ent bale Hodáay bakshesh namiránén zend ent ke cha may Hodáwand Issá Masihay ráhá rasit.

7

Cha sur o sángá mesále

¹ Oo brátán! Nazánét ke Sharyat tán hamá wahdá ensánay sará hokma kant ke ensán zendag ent? Man gón hamáyán habar kanagá án ke Sharyatá zánant. ² Pa mesál, Sharyatay rahbandá, yak jané tán hamá wahdá wati marday páband ent ke mardi zendag ent. Bale agan mardi mort, gorhá á cha sur o sángay rahbandán ázát ent. ³ Tán wahdé áiy mard zendag ent, agan á dega mardé begipt, zenahkár zánaga bit. Bale agan áiy mard bemerit, cha Sharyatay é rahbandá ázát ent o agan dega mardé begipt zenahkár zánaga nabit.

⁴ Oo mani brátán! Hamé paymá cha Masihay jesm o jánay ráhá* shomá cha Sharyatá ázát butag o mortagét tán dega kaséay bebét, hamáiy bebét ke cha mordagán jáh janáénag but, tán pa Hodáyá bar o samar byáren. ⁵ Wahdé may mahár gonahkárén sareshhá dastá at, may band o bógáni tahá hamá por-gonáhén hawá o hawásán kára kort ke cha Sharyatay zánagá chest butagatant tánke pa marká bar o samar byáren. ⁶ Bale nun má cha Sharyatá ázát butagén, cha hamá chizzá mortagén ke pésará mará pábandi kortagat, tánke cha Ruhay nókén ráhá Hodáay hezmatá bekanén, cha Sharyatay nebeshtaháni kwahnén ráhá na.

Gón gonáhá ger o chill

⁷ Gorhá ché begwashén? Sharyat gonáh ent? Hechbar! Bale agan Sharyat mabutén, mana nazánt gonáh chié. Agan Sharyatá magwashtén "tamah makan",[†] mana nazánt tamah o lálech chié. ⁸ Bale gonáhá cha hamá hokmá sudd o páedag zort o mani delá har paymén tamahi pédá kort. Chiá ke cha Sharyatá dhann, gonáh mortag. ⁹ Yak wahdé man cha Sharyatá dhann zenda gwázént, bale anchosh ke Sharyatay hokm átk, gonáh zendag but o man mortán. ¹⁰ Man dist hamá hokmá ke báyard ent zend byáwortén, pa man marki áwort. ¹¹ Gonáhá cha é hokmá sudd o páedag zort, maná radi dát o cha hamé hokmá koshti. ¹² Gorhá, Sharyat pák ent, hokmi ham pák o nék o ádel ent. ¹³ Gorhá á chizz ke nék ent, mani markay sawab but? Hechbar! Cha á Sharyatá ke wat nék ent, gonáhá maná dém pa marká bort tán gonáh, gonáh zánag o pajárag bebit o cha Sharyatay hokmá áiy sherri o gandagi béhesáb bebit.

¹⁴ Má zánén ke Sharyat ruhi chizzé, bale man napsáni mardomé án ke goláméay paymá gonáhay kerrá bahá butagán. ¹⁵ Man wati jenday kár o kerdán sarpada nabán. Á kárán ke kanaga lóthán nakanánesh, bale hamá kárána kanán ke cha áyán naprata kanán. ¹⁶ Agan hamá kárána kanán ke kanagesha nalóthán, gorhá mannán ke Sharyat sharr ent. ¹⁷ Nun, cha ed o rand, é man naán ke á kára kant, é hamá gonáh ent ke mani delá neshtag. ¹⁸ Mana zánán ke maná, bezán mani gonahkárén sareshhá hech nékié mán nést. Maná nékén kár kanagay wárag hast, bale korta nakanán. ¹⁹ Á nékén kárán ke kanaga lóthán nakanánesh, bale hamá badén kárána kanán ke kanagesha nalóthán. ²⁰ Agan

* 7:4 7:4 Cha Masihay jesm o jánay ráhá, bezán cha Masihay markay ráhá. † 7:7 7:7 Dargwaz 20:17; Sharyatay Domi Rahband 5:21.

man hamá kárána kanán ke nalóthán bekanáesh, gorhá á káráni kanók man naán, kanók hamá gonáh ent ke mani delá neshtag.

²¹ Paméshká é kánuná gendán ke wahdé néki kanaga lóthán, badi gón man gón ent. ²² Wati del o daruná, cha Hodáay Sharyatá shádán án, ²³ bale dega kánuné wati band o bógáni tahá gendán ke gón mani delay kánuná jangá ent. É maná gonáhay kánunay bandiga kant ke mani band o bógáni tahá kár kanagá ent. ²⁴ Oh ke man chónén syahróchén mardomé án. Kay maná cha é markígén jesmá rakkénit? ²⁵ Hodáay shográ gerán ke cha may Hodáwand Issá Masihay ráhá rakkán. Haw, wati pegr o hayálá Hodáay Sharyatay golámiá kanán, bale wati sareshatá gonáhay kánunay golám án.

8

Cha Pákén Ruhá zendagi

¹ Nun pa hamá mardomán hech mayárbárié nést ke Issá Masihay ant. ² Chiá ke cha Issá Masihay ráhá, zenday Ruhay kánuná maná cha gonáh o markay kánuná ázát kortag. ³ Hamá kár ke Sharyatá kort nakortagat, parchá ke gonahkárén sareshtay sawabá nezór butagat, á kár Hodáyá wat kort. É kári chosh kort ke wati jenday Chokki gonahkárén ensánéay dróshomá rawán dát tán pa may gonáhán korbánig bebit. É paymá cha yak jesm o jánéay ráhá* gonáhi mayárbár kort, ⁴ tánke Sharyatay lóth may jesm o jáná sarjamiá purah bebit, má ke gonahkárén sareshtay ráhá nazurén, Ruhay ráhá zurén. ⁵ Á ke gonahkárén sareshtay ráhá zurant, áyáni pegr o hayál gón hamá chizzán ent ke áyáni sareshatá lóthit, bale á ke Ruhay ráhá zurant, hamá chizzáni hayálá ant ke Ruhesha lóthit. ⁶ Gonahkárén ensánay pegr o hayáláay ásar mark ent. Bale á pegr o hayál ke mahári Ruhay dastá ent áiy ásar, zendmán o ásudagi ent. ⁷ Hamá pegr o hayál Hodáay dozhmen ent ke mahári gonahkárén sareshtay dastá ent. Á watá Hodáay Sharyatay dastá nadant, é kárá kort ham nakant. ⁸ Á ke gonahkárén sareshtay dastá ant, Hodáyá washnód korta nakanant.

⁹ Bale shomá gonahkárén sareshtay dastá naét, Ruhay dastá ét, parchá ke Hodáay Ruh shomay delá neshtag. Agan kaséá Masihay Ruh gón mabit, á Masihay naent, ¹⁰ bale agan Masih shomay delá ent, gorhá shomay jesm o ján gonáhay sawabá

mortag o shomay ruh páki o palgáriay sawabá zendag ent. ¹¹ Agan hamáiy Ruh shomay delá ent ke Issá Masihi cha marká rand jáh janáént, gorhá á ke Masihi cha mordagán jáh janáént, shomay zawál bayókén jesm o jáná ham cha wati hamá Ruhá zenda bakshit ke shomay delá neshtag.

¹² Oo brátán! Gorhá má wámdár én, bale gonahkárén sareshtay wámdár naén ke áiy hesábá zend begwázénén. ¹³ Chiá ke agan shomá gonahkárén sareshtay ráhá begerét, merét. Bale agan cha Ruhay ráhá wati sareshtay gonáh o badkárián bekoshét, zendaga mánét. ¹⁴ Á sajjahén mardom Hodáay chokk ant ke Hodáay Ruh áyáni rahshón ent. ¹⁵ Shomará golámi ruhé narasetag ke padá betorsét, shomá pa chokki zurag butagét o Hodái Ruh shomará rasetag. Cha hamé Ruhá kukkára kanén “Abbá, oo Pet!” ¹⁶ Ruhay jend gón may arwáhá gwáhia dant ke má Hodáay chokk én. ¹⁷ Nun agan má Hodáay chokk én, gorhá mirás ham barén, cha Hodáyá mirása barén o gón Masihá hammirás én. Chiá ke agan má pa rásti áiy sakkí o sórián hamráh bebén, gorhá áiy shán o shawkatá ham sharikdára bén.

Hodáay mehr o may áyókén shán o shawkat

¹⁸ Mani hesábá, é zamánagay sakkí o sóri, á shán o shawkatay déma hecch naant ke pa má paddar bayagi ent. ¹⁹ Chiá ke sajjahén hastí, pa bésabri hamé wadará ent ke Hodáay chokk kadén záher kanaga bant. ²⁰ SaJJahén hasti náhudagiay dastá dayag but. É cha hastiay jenday wáhag o razáyá nabut, cha hamáiy wáhag o razáyá but ke hastii náhudagiay chérá chér tarrént, bale gón é ométá ²¹ ke hastiay jend cha zawáliay golámiá ázát o Hodáay chokkáni ázátiay shán o shawkatá sharikdára bit. ²² Má zánén ke sajjahén hasti angat cha zank o záyagay dardán nálagá ent. ²³ Tahná hasti nálagá naent, má wat ham ke cha Ruhay awali bar o samará sharikdár butagén, wati daruná nálagá én, hamé wahdá ke pa bésabri wadará én ke mará pa chokki bezurit, tánke may jesm o ján ázát kanag bebit. ²⁴ Má gón hamé ométá rakkénag butagén, bale omété ke sarjam butag, nun omét gwashaga nabit. Chón buta kant mardom hamá chizzay ométá bebit ke has-tenti? ²⁵ Agan hamá chizzay ométwár bebén ke angat mará nést, gorhá pa sabr áiy wadará bén. ²⁶ Hamé paymá Ruh may nezóriáni tahá mará komaka kant, chiá ke má nazánén chón o pa kojám

* 8:3 8:3 Bezán cha Issá Masihay jesm o jánay ráhá. † 8:26 8:26 Nyámjigeri, bezán sohl o saláhkári.

chizzán dwá bekanén, bale Ruhay jend gón anchen nálagán pa má nyámjigeria[†] kant ke labzesh bayán korta nakant. ²⁷ Á ke may delána patthit Pákén Ruhay pegr o hayálána zánt, chiá ke Ruh gón Hodáay wáhag o razáyá pa palgártagenán nyámjigeria kant.

²⁸ Má zánén, Hodá sajjahén chizzán pa wati dóst dárókáni sharri o émeníá kára bandit,[‡] pa hamáyán ke Hodáay maksadá gwánk janag butagant. ²⁹ Hodáyá á cha peshá zántant o cha pésará anchoshi gishéntant ke áiy Chokkay dáb o dróshomá bebant, tán á Chokk bázén brátáni awali bebit. ³⁰ Á ke Hodáyá cha pésará gishéntant, gwánki ham jatant, á ke Hodáyá gwánk jatant, pák o palgári kortant o á ke pák o palgári kortant, shán o shawkti ham dátant.

³¹ É chizzáni bárawá ché begwashén? Agan Hodá gón má gón ent, kay may dozhmen buta kant? ³² Á ke wati Chokkay parwáhi nakort o pa maygi cha áíá sar gwast, gón áíá hawár, á dega sajjahén chizzán ham márá nadant? ³³ Hodáay gechen kortagenán kay bohtám jata kant? É Hodá ent ke pák o palgára kant. ³⁴ Kay mayárbáriay hokmá borreta kant? Issá Masih, hamá ent ke mort o, haw, cha mordagán jáh janáénag but, hamá ke Hodáay rástén kashá ent o áiy dargáhá pa má nyámjigeria kant. ³⁵ Kay márá cha Issá Masihay mehrá jetá korta kant? Sakkí o sóri yá parésháni, azár yá dhokkál[§], jándari, hatar yá zahmay zráb? ³⁶ Anchosh ke nebisag butag:

*Tai sawabá sajjahén róchá gón marká dém pa dém én o korbánigén pasáni paymá hesáb áraga bén.**

³⁷ Enna, márá é sajjahén chizzáni tahá cha hamáiy ráhá mazanén kámyábié rasit ke gón má mehri kortag. ³⁸ Man deljam o saddak án ke na mark, na zendagi, na préshtag, na hokmrán, na annugén o na áyókén chizz, na wák o zór, ³⁹ na borzi, na jahli o na sajjahén hastiy dega chizzé márá cha Hodáay hamá mehrá jetá korta kant ke cha may Hodáawand Issá Masihá márá rasit.

9

Hodái gechen

¹ Man cha Masihay arwáh o jabiná rásta gwashán o dróga nabandán, mani del o darun cha Pákén Ruhá é habaray

sháhediá dant ke ² maná sóznákén andóh o modámén dardé delá ent. ³ Drécha wati hamrag o hamzátén brátáni háterá, man nálat kanag buténán o cha Masihá besesténán. ⁴ Á, Esráili ant ke pa chokki zurag butagant. Shán o shawkat, ahd o paymán, Sharyatay rasag, parasteshay ráh o rahband o Hodáay labz o karár hamáyánig ant. ⁵ Bonpirok hamáyánig ant o Masih ham ke sajjahénáni Hodá ent, jesmi hesábá cha hamáyáni nasl o padréchá ent. Áíá modám satá o saná bát. Anchosh bát. Ámin.

⁶ Chosh naent ke Hodáay habará prósh wártag. Chiá ke har Bani Esráilié, Esráili naent. ⁷ Ebráhémay har chokk o nomásagé áiy rástén óbádag naent. Bale *“tai nasl o padréch cha Esháká hesáb áraga bit.”** ⁸ É chizz péscha dárit ke Hodáay chokk á naent ke jesmi chokk ant. Wádah dátagen chokk Ebráhémay nasl o padréch hesáb áraga bant. ⁹ Parchá ke wádah o karár chosh at: *“Gishéntagen wahdá pera tarrán o Sárhá mardénchokké bit.”†* ¹⁰ Tahná esh naat, gón Rebekáyá ham hamé paymén chizzé but, wahdé á pa wati járhén chokkán lápporr but. Áyáni pet ham hamá yakkén at, bezán may bonpirok Eshák. ¹¹⁻¹² Bale cha eshiá pésar ke chokk pédá bebant o néki yá badi bekanant, Rebekáyá gwashag but ke *“masterén kasterénay hezmatá kant.”‡* É dhawlá but tán Hodáay eradah cha gechenkáriá barjáh dárag bebit, bale cha kár o kerday ráhá na, cha hamáiy ráhá ke ensáná gwánka jant. ¹³ Anchosh ke nebisag butag: *“Ákub maná dóst at o cha Issuá napraton kort.”§*

¹⁴ Gorhá ché begwashén? Hodá náensáp ent? Hechbar! ¹⁵ Chiá ke gón Mussáyá gwashit: *“Agan belóthán gón yakkéá mehrabán bebán, gón áíá mehrabána bán o agan belóthán kaséay sará rahm bekanán, áiy sará rahma kanán.”** ¹⁶ Bezán, é ensánay wáhag o was kanagay sará nabit, rahm kanag Hodáay dastá ent. ¹⁷ Parchá ke Pákén Ketáb gón Perawná gwashit: *“Man tará pa é maksadá mazani dátag ke cha taw wati zór o wáká pesh bedarán tánke mani nám sajjahén zeminá jár janag bebit.”†* ¹⁸ Gorhá bezán, Hodá harkasay sará ke belóthit rahma kant o harkasay delá ke belóthit senga kant.

Hodáay kahr o rahmat

‡ **8:28** 8:28 Yá: “Má zánén, sajjahén chizz pa Hodádóstáni sharri o émeníá gón yakdomíá kára ant, ...”. **§ 8:35** 8:35 Dhokkál, bezán kaht, hoshksáli. * **8:36** 8:36 Zabur 44:22. * **9:7** 9:7 Pédáesh 21:12. † **9:9** 9:9 Pédáesh 18:10. ‡ **9:11-12** 9:11-12 Pédáesh 25:23. **§ 9:13** 9:13 Maláki Nabiy Ketáb 1:2-3. * **9:15** 9:15 Dargwaz 33:19. † **9:17** 9:17 Dargwaz 9:16.

¹⁹ Cha man josta kanay: “Gorhá Hodá chiá angat márá éra jant? Áiay erádahay demá kay óshatáta kant?” ²⁰ Bale, oo ensán! Pa rásti taw kay ay ke gón Hodáyá yak o do bekanay? É sharrén habaré ke addh kortagéné wati addh kanóká begwashit: “Chiá maná é paymá addhet kortag?” ²¹ Kuzahgará é hakk nést ke cha gelay yakkén chanká darpé pa alkápén o darpé pa ancháén káráé addh bekant?

²² Gorhá ché? Harchont Hodáyá wati kahr o gazab pésh dárag o wati wák o kodrat paddar kanag lóthet, bale angat áiay ehtiárá at, gón mazanén ópáré á mardomán besaggit ke kahr o gazabay chérá atant o gár o gomsár bayagay láhek. ²³ Gorhá ché? Balkén áiá chosh kortag tán wati shán o shawkatá hamá mardomán pésh bedárit ke áiay rahmatay chérá ant, hamá mardom ke Hodáyá pésará pa shán o shawkatá tayár kortagant. ²⁴ Má ham ke Hodáay gwánk jatagén én é rahmatay chérá én, tahná cha Yahudiáni nyámá gwánk jang nabutagén, cha darkawmáni nyámá ham gwánk jang butagén. ²⁵ Anchosh ke Hushah nabíay ketába gwashit:

*“Hamá ke mani kawm naat, man áiá wati kawma gwashán,
hamá ke mani dordánag naat man áiá wati dordánaga gwashán.”*[‡]

²⁶ Anchosh ham:

*“Hamá jágahá ke gón áyán gwashag but: ‘Shomá mani kawm naét,’
ódá á, zendagén Hodáay chokk gwashaga bant.”*[§]

²⁷ Esráilay bárawá Eshayá nabi jára jant o gwashit:

*“Bell ke Bani Esráilay chokk, daryáay rékání kesásá báz bebant,
bale cha áyán tahná yak kasánén pasht kaptagén bahré rakkít.*

²⁸ Chiá ke Hodáwand zemínay sará wati shawr o hokmá pa tézi o mohkami barjáha kant.”^{*}

²⁹ Hamá paymá ke Eshayá nabíay péshgóyi kortag:

*“Agan lashkaráni Hodáwandá pa má nasl o padréch maeshén,
gorhá má ham Sodumay mardománi paymá butagatén o may ásar ham Gomurahay mardománi ásar at.”[†]*

Esráilay nábawari

³⁰ Nun ché begwashén? Hamá darkawm ke pa páki o palgáriá johdesh nakort, páki o palgáriesh raset, hamá páki o palgári ke cha báwará kayt. ³¹ Bale Esráilián ke cha Sharyatay ráhá pa páki o palgáriá johd kort, cha Sharyatay ráhá pa páki o palgáriá narasetant. ³² Parchá chosh but? Paméshká ke áyáni johd, báwaray sará naat, kár o kerday sará at. Áyán mán gishshénóken sengay sará thagal wárt. ³³ Anchosh ke nebeshtah ent:

*“Man Sahyuná sengé:éra kanán ke mardomána thagalénit,
taláre ke áyán dawra dant,
harkas ke áyay sará báwar bekant pashal o sharmendaga nabit.”*[§]

10

Cha Hodáay némagá páki

¹ Oo brátán! Mani delay armán o dwá gón Hodáyá pa Esráilián hamesh ent ke á berakkant. ² Man pa áyán gwáhi dáta kanán ke á pa Hodáyá hodónák* o porjósh ant, bale áyáni é hodónáki cha sharrén zánt o zánagéa naent. ³ Cha á páki o palgáriá násahig o násarpad atant ke cha Hodáay némagá ent o wati jenday páki o palgáriay jórhenagay johdá atant, paméshká watá á páki o palgáriay dastá nadátagesh ke cha Hodáay némagá ent. ⁴ Masih, Sharyatay sarjami o halási ent. Ásar esh ent, harkas ke báwara kant, pák o palgár zánaga bit.

Rakkagay ráh

⁵ Hamá páki o palgári ke cha Sharyatá kayt, áiay bárawá Mussá chosha nebisit: *“Harkas ke é hokmáni sará kára kant gón eshání dáragá zendaga mánit.”*[†] ⁶ Bale á páki o palgári ke cha báwará kayt é dhawlá gwashit: *“Wati delá magwashét ‘kay ásmáná rawt?’ ”*[‡] bezán ke Masihá jahlád byárit, ⁷ “yá ‘kay johlén kabrá éra kapit?’ ”[§] bezán ke Masihá cha mordagán borzád byárit. ⁸ Gorhá ché gwashit? *“Labz tai nazziká ent, tai lontháni sará o tai delay tahá ent”*,^{*} bezán báwaray hamá Labz ke má áiá jára janén. ⁹ Agan gón dapá bemanay ke Issá Hodáwand ent o pa del báwar bekanay ke Hodáyá á cha mordagán jáh janáéntag, rakkénaga bay. ¹⁰ Chiá ke ensán pa del báwara kant o pák o palgár zánaga bit, gón zobáná ham mannit o é paymá rakkít. ¹¹ Chiá ke Pákén Ketába

[‡] **9:25** 9:25 Hushah Nabíay Ketáb 2:23. **§** **9:26** 9:26 Hushah Nabíay Ketáb 1:10. ***** **9:28** 9:28 Eshayá Nabíay Ketáb 10:22-23. **†** **9:29** 9:29 Eshayá Nabíay Ketáb 1:9. **‡** **9:33** 9:33 Edá seng pa Issá Masihá esháraté. **§** **9:33** 9:33 Eshayá Nabíay Ketáb 8:14; 28:16. ***** **10:2** 10:2 Hodónák, bezán wáhadgar, armáni, lóthók, delmánag. **†** **10:5** 10:5 Láwián 18:5. **‡** **10:6** 10:6 Sharyatay Domi Rahband 30:12. **§** **10:7** 10:7 Sharyatay Domi Rahband 30:13.

***** **10:8** 10:8 Sharyatay Domi Rahband 30:14. **†** **10:11** 10:11 Eshayá Nabíay Ketáb 28:16.

gwashit: *“Harkas áiy sará báwar bekant hechbar sharmendaga nabit.”*[†] ¹² É bárawá Yahudi o Yunániay nyámá park o pére nést. Chiá ke hamé yakkén Hodáwand, sajjahénáni Hodáwand ent o pa hamá drostigén mardomán békesás saki[‡] o bakshók ent ke áia tawára kanant. ¹³ Chiá ke *“harkas Hodáwanday námá tawár bekant, rakkít.”*[§]

¹⁴ Nun chón yakkéá tawár bekanant ke áiy sará báwaresh nakortag? O chón yakkéay sará báwar bekanant wahdé áiy bárawá chizzé naeshkotagesh? O chón beshkonant agan kasé áyani kerrá é járá majant? ¹⁵ O chón jár bejanant agan rawán dayag nabutagant? Anchosh ke nebeshtah ent: *“Washkadam ant á mardom ke wasshén mestága kárant.”*^{*}

¹⁶ Bale bázénéá é wasshén mestág nannettag, chiá ke Eshayá nabia gwashit: *“Oo Hodáwand! May paygámay sará kayá báwar kort?”*[†] ¹⁷ Gorhá bezán ke báwar, cha paygámay gósh dáragá kayt o paygámay gósh dárag, cha Masihay mestágay jár janagá.

¹⁸ Bale nun josta kanán: *“Áyan naeshkotag?”* Allam eshкотagesh, parchá ke: *“Áyani tawár sajjahén donyáya shotag o áyani habar jahánay goddhi marz o simsarán sar butagant.”*[‡]

¹⁹ Padá josta kanán: *“Esráil sarpad nabutag?”* Awalá, Mussá cha Hodáay kawlá gwashit: *“Man shomará hamá mardománi hasadiga kanán ke kawmé naant; shomará gón násarpadén kawmé hezhmnáka kanán.”*[§]

²⁰ Gorhá, Eshayá nabi pa deléri o tamaridi cha Hodáay kawlá gwashit: *“Maná hamáyán dar gétk ke mani shóházá naatant, man watá pa hamáyán paddar kort ke mani jost o porsá naatant.”*^{*}

²¹ Bale Esráilay bárawá gwashit: *“Sajjahén róchá man wati dast, dém pa náparmán o barhelápén kawméá dráj kortag.”*[†]

11

Hodáya wati kawm yalah nakortag

¹ Nun josta kanán, Hodáya wati kawm dawr dátag o yalah kortag? Hechbar! Chiá ke man wat ham Esráilié

án, cha Ebráhémay nasl o padréchá án o Benyáminay kabilahá. ² Hodáya wati kawm ke cha pésará zántag, dawr nadátag. Nazánét Pákén Ketáb Elyás nabiyá bárawá ché gwashit? Á, che paymá Esráilay helapá Hodáay kerrá dazbandia kant? ³ Gwashit: *“Oo Hodáwand! Eshán tai nabi koshtagant o tai korbánjáh wayrán kortagant. Pasht kaptagén tahná man án o nun mani koshagay randá ant.”*^{*}

⁴ Bale Hodáay passaw pa áia ché at? *“Man pa wat hapt hazár mardom gishéntag ke Baalaydémá kóndhán nakaptagant.”*[‡] ⁵ Hamé paymá, maróchi ham lahtén choshén pasht kaptag ke cha rahmatay ráhá gechén kanag butagant. ⁶ Agan gechén cha rahmatay ráhá ent, gorhá cha ed o rand cha kár o kerdá naent, agan cha kár o kerdá butén, gorhá cha ed o rand rahmat, rahmat nabutagant.

⁷ Gorhá ché? Á chizz ke Esráil áiy shóházá at naraseti, gechén kortagénán raset bale á degaráni del seng but. ⁸ Anchosh ke nebeshtah ent:

“Hodáya á káhel o sostén ruhé dátant, chammi dátant ke magendant o góshi dátant ke maeshkonant, tán maróchigén róchá.” §

⁹ Dáudá ham gwashtag:

“Áyani parzónag pa áyan dám o talké bát, thagal dayóknén seng o sezá o azábé bát,*

¹⁰ *chammesh tahár bátant tán magendant o srénesh tán abad komp o chóth bát.”*[†]

¹¹ Gorhá josta kanán, áyan anchosh thagal wártag ke bekapant o padá pád átk makanant? Hechbar! Áyani thagal waragay sawabá rakkag pa darkawmán átkag tán Esráiliáni hasadd pád byayt. ¹² Agan áyani thagal warag pa donyáyá barkat but o áyani prósh o táwan pa darkawmán ganjé, gorhá áyani sarjamén hór bayag chónén mazanén barkaté kárit.

¹³ Oo darkawmán! Annun gón shomá habara kanán. Nun ke mani kásedi gón darkawmán ent, wati hezmatá porarzesha zánán, ¹⁴ pa é ométá ke wati jenday mardomán hasaddig bekanán o é paymá cha áyan lahténá berakkénán. ¹⁵ Chiá ke, agan áyani dawr dayag jahánay sohl o wassháni ent, gorhá áyani zurag cha mordagán zendag bayagá abéd, ché buta

‡ **10:12** 10:12 Sakí, bezán bakshendah, Ordu o Pársiá “sakhi”. § **10:13** 10:13 Yuil Nabiyay Ketáb 2:32. * **10:15**

10:15 Eshayá Nabiyay Ketáb 52:7. † **10:16** 10:16 Eshayá Nabiyay Ketáb 53:1. ‡ **10:18** 10:18 Zabur 19:4. § **10:19**

10:19 Sharyatay Domi Rahband 32:21. * **10:20** 10:20 Eshayá Nabiyay Ketáb 65:1. † **10:21** 10:21 Eshayá Nabiyay

Ketáb 65:2. * **11:3** 11:3 Bádsháháni Awali Ketáb 19:10, 14. † **11:4** 11:4 Baal, bezán darkawmání yak boté.

‡ **11:4** 11:4 Bádsháháni Awali Ketáb 19:18. § **11:8** 11:8 Sharyatay Domi Rahband 29:4; Eshayá Nabiyay Ketáb

29:10. * **11:9** 11:9 Parzónag, bezán soprah. † **11:10** 11:10 Zabur 69:22-23.

kant? ¹⁶ Agan homiray hamá chánag pák bebit ke awali bar o samar ent, gorhá bezán tarunay sajjahén nagan ham pák ant, agan rissahg pák bebit thál ham pák ant.

¹⁷ Agan drachkay lahtén thál próshag o sendag butag o taw ke jangali zaytunay thálé ay, á dega tháláni nyámá gón drachká paywand janag butagay o nun zaytunay rissahgay porzórén shiragá sharikdár ay, ¹⁸ á tháláni poshtá pahr maband. Agan chosha kanay, mashamósh ke taw rissahg nadáshtag, é rissahg ent ke tará dáshtagi. ¹⁹ Nun balkén begwashay: “Á thál próshag o sendag butant tán man paywand janag bebán.” ²⁰ Rást ent. Á thál sendag butant ke nábáwar atant, bale taw cha báwará óshátatag o mohr ay. Gorunák mabay o pa tors zend begwázén. ²¹ Chiá ke agan Hodáyá drachkay asligén tháláni ópár nakort, tai ópára ham nakant. ²² Nun Hodáyá mehrabáni o trondiá bechár, trondi pa hamáyán ent ke kaptagant o mehrabáni pa taw ent, agan áiy mehrabániáni sáhegá bemánay. Agan na, taw ham goddhaga bay. ²³ Á ham, agan wati bebáwariay sará mamánant, paywand janaga bant, chiá ke Hodáyá áyáni padá paywand janagay wák o twán hast. ²⁴ Taw cha hamá zaytunay drachká goddhag butagay ke wati zátá jangali ent o wati zátay helápá gón keshtagén zaytuná paywand janag butagay. Gorhá hamá ke é zaytunay asligén thál ant, che paymá pa arzáni gón wati jenday drachká padá paywand janag buta nakanant?

Esráilay rakkénag

²⁵ Oo brátán! Chó mabit watá cha wati kadd o kesásá master bezánét. Paméshká nalóthán cha é rázá násarpad bebét ke Esráilay yak bahréay sará sakdeli tán hamá wahdá átkag ke darkawm sarjamiá byáyant gón. ²⁶ É paymá, nun sajjahén Esráila rakkít, hamá dhawlá ke nebeshtah ent:

“Rakkénók cha Sahyuná kayt o

gomráhiá cha Ákubay padréchá dura kant.”

²⁷ *“Gón áyán mani ahd o paymán hamesha bit,*

wahdé áyáni gonáhán dura kanán.”‡

²⁸ Bani Esráili wasshén mestágay hesábá, pa shomaygi Hodáyay dozhmen ant bale gechénkáriay hesábá, á pa wati bonpirokáni háteraí Hodáyay dóst ant. ²⁹ Chiá ke Hodá wati thékiá pacha nagipt o wati gwánká pera natarrénit. ³⁰ Hamá paymá ke yak wahdé shomá

Hodáyay náparmán atét bale cha Esráiliáni náparmániá, Hodáyay mehr o rahmat shomará raset, ³¹ nun á náparmán butagant tánke cha hamá rahmatá ke shomará rasetag, áyán ham rahmat berasalit. ³² Chiá ke Hodáyay sajjahén mardom náparmániay bandig kortagant tánke sajjahénáni sará rahm bekant.

Hodáyay hekmat

³³ Pokkó, Hodáyay ganj o hekmat o zántay johlánki chinchok báz ent!

Áiy shawr o saláh cha zánag o dar géjagá dur ant o ráhi cha shóházá dhann!

³⁴ *“Kayá Hodáwanday pegr zántag o kay áiy sar o sój dayók butag?”*§

³⁵ *“Kayá áiará chizzé dátag*

ke badalá chizzé begipt?” *

³⁶ Chiá ke har chizz cha hamáiy némagá ent o cha áiy sawabá o pa hamáia ent. Tán abad shán o shawkat hamáia sar bát. Anchosh bát. Ámin.

12

Zendagén korbániq

¹ Oo brátán! Mani dazbandi gón shomá esh ent ke gón Hodáyay rahmatáni chárágá, wati jesm o jáná chó zendagén korbániqéá pésh bekanét ke pák o palgár ent o Hodáyá pasonda bit. É shomay ruhánién parastesh ent. ² Gón é donyáya hamrang o hamdróshom mabét, cha wati pegr o pahmay nók kanagay ráhá badal bebét, tán shomá bezánét o gisshént bekanét ke Hodáyay wáhag chi ent, kojám chizz sharr, kámel o Hodáyay pasond ent.

³ Gón hamá rahmatá ke maná bakshag butag shomá sajjahénána gwashán, haminchok ke hastét wati borzter mazánét. Wati bárawá pa sharri o rásti shawr beborrét o watá barábar gón haminchok báwará kesás bekanét ke Hodáyay pa shomá gisshéntag. ⁴ Hamá dába ke may yakkén jáná, bázén band o bóg hast o sajjahén band o bógáni kár yakké naent, ⁵ má ke báz én, Masihay arwá o jabiná yakkén jesm o ján én o cha má har yakké, yakdomiay band o bóg ent. ⁶ Barábar gón é mehr o rahmatá ke mará dayag butag, tahr tahrén Hodái dádáni wáhond én. Agan kaséa paygambariay théki rasetag, áia barábar gón wati báwará kár bebandit, ⁷ agan hezmat kanag ent hezmat bekant, agan tálim dayag ent tálim bedant, ⁸ agan delbaddhi dayag ent delbaddhi bedant, agan degaráni zaluratáni purah kanag ent gón daspachi komak bekant, agan péshwái o saróki ent gón sharrén delgóshdári o

‡ 11:27 11:27 Eshayá Nabiay Ketáb 59:20-21; 27:9; Eremiá Nabiay Ketáb 31:33-34.

§ 11:34 11:34 Eshayá Nabiay

Ketáb 40:13. * 11:35 11:35 Ayyubay Ketáb 41:11.

johdéa saróki bekant, agan mehr o rahm ent gón wasshén delé mehr o rahm bekant.

Mehr

⁹ Shomay mehr báyard ent zagr* o pa del bebit, cha badiá naprat bekanét o gón sharri o nékiá belacché. ¹⁰ Gón bráti mehré, yakdegará dóst bedárét, pa sharap o ezzat kanagá cha yakdomiá démáter bebét. ¹¹ Hech káray tahá sosti makanét, wati ruhá porjósh bebét, Hodáwandy hezmatá bekanét. ¹² Pa ométwári gal o shádehi bekanét, sakkiáni tahá sabr o ópár pésh bedárét o wati dwáyán mohr bóshét. ¹³ Hodáay palgártagén mardománi hájatán purah kanagá sharikdár bebét o wati lógay darwázagá pa darámadáni mehmándáriá pach bekanét.

¹⁴ Agan kasé shomará ázar berasénit pa áia barkat belóthét, barkat belóthét o nálat makanét. ¹⁵ Agan kasé shádehia kant gón áia shádehi bekanét o agan kasé grét gón áia begrewét. ¹⁶ Gón yakdomiá pa hamdeli o hamsetki zend begwázénét. Pahr o shán makanét, gón kamterénán hamráh bebét o watá báz aglmand mazánét. ¹⁷ Gón kassá badiay badalá badi makanét. Gón hamá kárán delgósh bebét ke harkasay chammán sharr ant. ¹⁸ Tán hamá haddá ke shomay dastá bit, gón harkasá pa sohl o árámí zend begwázénét. ¹⁹ Oo dordánagan! Hechbar bérgiri makanét, kahrá pa Hodáyá bellét. Chiá ke nebeshtah ent: "*Hodáwanda gwashit: 'Béray gerag mani kár ent, sezá dayók man án.'*" † ²⁰ Eshiy badalá: "*Agan tai dozhmen shodíg ent, waráki beday,*

*agan tonnig ent, ápi beday,
ke gón wati é kára, áiy sará rókén jal
o eshkar moccha kanay.*" ‡ §

²¹ Mayl badi tai sará sardast bebit, gón nékiá badiay sará sardast bebay.

13

Hokumatay parmánbardári

¹ Harkas watá hokumatay chérdast bemannit, parchá ke cha Hodáay nádéntagéná abéd, hech wák o ehtiáre nést o har wák o kodraté ke hast, Hodáyá nádéntag. ² Paméshká, harkas ke cha hokumatá sarkashia kant, Hodáay nádéntagénay helápá pád átkag o harkas ke sarkashi bekant, wati sará mayárbária kárit. ³ Á ke sharrén kára kanant, áyan

cha hokumatá torsé nést, bale selkár cha áia torsant. Agan lóthay cha hokumatay torsá ázát bebay, gorhá sharrén kár bekan o á tará mannit o satá kant. ⁴ Pa tai sharriá, hokumat Hodáay hezmatkár ent, bale agan badkária kanay, cha áia betors chiá ke zahm mopt o bé sawab áiy dastá naent. Á Hodáay hezmatkár ent, sezá dayóké ke pa badkárán kahrá kárit. ⁵ Gorhá, báyard ent hokumatay chérdast bebay, tahná cha kahray torsá na, cha wati jabin o wejdná ham. ⁶ Pa hamé sawabá song o máliát ham dayét, parchá ke hákem Hodáay hezmatkár ant o wati wadhá pa hamé kára dayant. ⁷ Harkasay hakká báyard ent bedayét. Agan song o máliátó per ent, báyard ent bedayét, agan rasad* per ent, gorhá rasadá bedayét. Agan ezzat ent, ezzat bekanét o agan sharap ent, sharap.

Pa yakdomiá mehr

⁸ Hechkasay dayn shomará per mabit. Shomay daynkári tahná gón yakdegará mehr kanag ent; chiá ke harkas gón domigá mehra kant, áia Sharyat barjáh dáshtag. ⁹ Parchá ke "zená makan", "hón makan", "dozzi makan", "tamah makan" † o á dega hokm gón hamé habará gwandh geraga bant: "Gón wati hamsáhegá wati jenday paymá mehr bekan." ‡ ¹⁰ Mehr gón hamsáhegá badiá nakant. Paméshká mehr kanag, Sharyatay sarjami ent.

¹¹ Anchosh ham, shomá annugén wahdá zánét ke nun á sáhat átkag ke cha wábá pád byáét o hozhár bebét. Chiá ke nun may rakkag cha á wahday hesábá nazzikter ent ke má awalá báwarmand butagatén. ¹² Shap, dém pa halásiá ent o róch nazzik. Nun byáét tahárókiay kár o kerdán yalah kanén o rozhnáiy zerahá§ bepóshén. ¹³ Byáét sharapdárén zendé begwázénén, hamá zend ke róchay rozhnáia gwázénaga bit, choshén zendé magwázénén ke pa ayyáshi, hanósh o malár, waylánki, landhari, pasát o hasadd bebit. ¹⁴ Esháni badalá, Hodáwandy Issá Masihá wati póshák bekanét o wati gonahkárén sareshatay wáhagáni sarjam kanagay pad o randá mabét.

14

Nezórén báwarmand

¹ Nezórén báwarmandá wasshát kanét o bezurét o nagishshetagé habaráni sará gón áia jérhah makanét. ² Yakkéay báwar áia har chizzay waragá kellit, bale domi ke

* **12:9** 12:9 Zagr, bezán háles. † **12:19** 12:19 Sharyatay Domi Rahband 32:35. ‡ **12:20** 12:20 Áiy sará rókén jal o eshkar moccha kanay, bezán áia pashal o sharmendaga kanay. § **12:20** 12:20 Solaymánay Bataláni Ketáb 25:21-22. * **13:7** 13:7 Rasad, bezán cha dhagaráni bar o samarán yak bahré. † **13:9** 13:9 Dargwaz 20:13-15, 17; Sharyatay Domi Rahband 5:17-19, 21. ‡ **13:9** 13:9 Sharyatay Domi Rahband 19:18. § **13:12** 13:12 Zerah, bezán zahmjanáni ásenén póshák.

báwari nezor ent tahná sabzia wárt. ³ Á ke har chizza wárt, domiá pa áiy pahréz kanagá kamarzesh mazánt o á ke pahréza kant, á degaray sará ke har waráka wárt hokm maborrit, chiá ke Hodáyá, á wasshátk kortag o zortag. ⁴ Taw kay ay ke degaréay hezmatkáray sará hokm beborray? Á wati jenday hodábanday péshgáhá óshtit yá kapit. Bale bezán ke óshtit, chiá ke Hodáwandá é wák hast ke áia bedárit.

⁵ Kasé yak róchéa cha dega róchéa shartera zánt o degaréay delá sajjahén róch yakk ant. Harkas wati delay hayálani sará saddak bebit. ⁶ Á kas ke yak róchéa háсэн róché zánt, pa Hodáwandaygi chosha kant. Á kas ke wárt ham pa Hodáwandaygia wárt, parchá ke Hodáay shográ gipt o á kas ke cha waragá pahréza kant, pa Hodáwandaygi chosha kant o Hodáay shográ gipt. ⁷ Cha má hechkas pa watiigi zendag naent o kass pa watigia namerit. ⁸ Agan zendag én pa Hodáwandá zendag én o agan bemerén pa Hodáwandá merén. Gorhá zendag bebén yá bemerén, Hodáwandayg én. ⁹ Masih paméshká mort o padá zendag but ke mordagáni ham Hodáwand bebit o zendagenáni ham.

¹⁰ Nun taw chiá wati brátá éra janay? Pa ché áia kamarzeshá zánay? Chiá ke hesábay róchá má sajjahén Hodáay bárgáhá óshtén. ¹¹ Parchá ke nebisag butag:

*“Hodáwanda gwashit: ‘Anchosh ke man zendag án,
é habar ham rást ent,
hamok mardom mani démá kóndhána kapit o
har zobán Hodáyá satá kant o sárháit’.”**

¹² Gorhá cha má har yakkéa Hodáay démá wati hesáb dayagi ent.

¹³ Byáét cha ed o rand yakdomiay hokmá maborrén. Eshiy badalá, wati delá shawr bekanét ke á dega brátáni pádráhá lakoshánkén dhók ér makanét o band mabandét. ¹⁴ Man, cha Hodáwandén Issáy némagá saddak án ke hech waráké watáwat palit naent, bale agan kasé chiz-zéa pa wat palit bezánt pa áia palit ent. ¹⁵ Agan gón tai warákéay waragá tai brát delranja bit, gorhá cha ed o rand mehray tahá gám najanagá ay. Pa wati waráká áia tabáh makan ke Masih pa hamáia mort. ¹⁶ Maylét mardom á chizzáni bárawá badén habar bekanant ke shomá áyan néka zánét. ¹⁷ Chiá ke Hodáay bádsháhi pa warag o nóshag naent, áiy bádsháhi,

palgári o sohl o shádehi ent ke cha Pákén Ruhá rasit. ¹⁸ Harkas hamé paymá Masih hay hezmatá bekant, Hodáyá washnóda kant o mardom ham áia mannant.

¹⁹ Gorhá byáét modám hamá káráni pad o randá bebén ke dém pa sohl o árami o yakdomiay rost o rodómá barant. ²⁰ Hodáay kára pa waráká zawál makan. Pa rásti sajjahén warák pák ant, bale tai har hamá waráké pa taw bad ent ke degaréay thagal waragay sawabsáza bit. ²¹ Sharter ent ke cha gósh, sharáb yá dega har chizzá pahréz bekanay ke tai brátay thagal waragay sawabsáza bit. ²² É chizzáni sará wati mohrén báwará watig o Hodáay nyámá bedár, taw bezánay o Hodá. Gal pa hamáia ke wati man-netagén chizzáni sará watá mayáriga nakant. ²³ Bale á ke warákéay sará shakk ent, agan áia bwárt mayárig ent, chiá ke gón báwar o imáná nawártagi. Harché ke cha báwar o imáná mabit, gonáh ent.

15

Degaráni hayálá bebén

¹ Má ke zórmánd én, báyard ent nezórén báwarmandáni kamzórián wati baddhá bezurén o bass wati jenday wasshiáni randá mabén. ² Cha má har yakké wati hamsáhegá pa áiy rost o rodómay sharrén maksadá washnód bekant. ³ Chiá ke Masih ham wati washnódiay padá naat, anchosh ke nebeshtah ent: *“Tai rad o bad kanókáni rad o bad, mani sará kap-tagant.”** ⁴ Har chizé ke pésará nebisag butag, pa may tálimá butag, tán gón Pákén Ketábay bakshetagéen sabr o delbaddhiá mára omét berasit. ⁵ Nun sabr o delbaddhiay Hodá shomará anchén zendé bebakshát ke Issá Masihay paymá gón yakdomiá hamdel o hamsetk bebét, ⁶ tán shomá pa hamdeli o hamtawári Hodá, bezán may Hodáwandén Issá Masihay Petá, satá o saná bekanét. ⁷ Nun pa Hodáay shán o shawkatá, shomá yakdomiá hamá paymá wasshátk bekanét o bezurét ke Masihá shomará zortag.

Yahudi o darkawmáni omét

⁸ Shomará gwashán ke pa Hodáay rástiy pajjáragá, Masih Yahudiáni[†] hezmatkaré butag tánke hamá kawl o wádashán pakká bekant ke bonpirokán dayag butagatant o ⁹ tánke darkawm, Hodáyá pa áiy rahmatán satá o saná bekanant. Anchosh ke nebisag butag:

“Paméshká tará kawmáni nyámá satá kanán o

* 14:11 14:11 Eshayá Nabiy Ketáb 45:23.

* 15:3 15:3 Zabur 69:9.

† 15:8 15:8 Asligén Yunáni nebeshtánka

gwashit: “sonnat kortagénáni”. † 15:9 15:9 Samuil Dágaray Domi Ketáb 22:50; Zabur 18:49.

tai námá názénán."‡

¹⁰ Padá gwashag butag:

"Oo darkawmán! Gón áiy kawmá shádehi kanét." §

¹¹ Démterá:

"Oo sajjahén kawmán! Hodáwanda benázénét.

Jahánay sajjahén ráj áiy satá o saná bekanant." *

¹² Eshayá nabi ham gwashit:

"Yassiy rishhaga rodít,

hamá ke páda kayt tán darkawmáni sará bádsháhi bekant,

áiy sará darkawm ométa bandant." †

¹³ Ométay Hodá ke shomá áiy sará báwar kortag, shomay delá cha shádehi o sohl o árámia porr kanát, tán gón Pákén Ruhay wák o zórá cha ométá sarréch bebét.

Pulos, pa darkawmán kásedé

¹⁴ Oo brátán! Man deljam án ke shomá wat cha sharri o nékia porr ét, har paymén zántá tamán ét o pa yakdomiay pant o tálimá twáná ét.

¹⁵ Bale man shomay sará lahtén chizzáni bárawá pa deléri nebeshtag tán padá á

chizzán shomay yátá byarán. É cha hamá rahmatá ent ke Hodáyá maná bakshetag, ¹⁶ ke man pa darkawmán

Issá Masihay hezmatkár bebán o pa Hodáay wasshén mestágay rasénagá hezmat o péshwái bekanán, tánke darkawm Hodáay dargáhá zortagén hayráté bebant ke cha Pákén Ruhá palgárag butag. ¹⁷ Gorrhá, pa Issá Masihaygi, pa Hodáyá wati kortagén hezmatáni sará pahra kanán. ¹⁸ Maná bass hamá káráni

bárawá habar kanagay tahm o joriat hastent ke Masihá cha mani dastá, bezán cha mani habar o kárán, kortagant tán darkawm parmánbardár bebant. ¹⁹ Áiy é kár, cha nesháni o mójzeháni wák o kodratá, gón Hodáay Ruhay zórá kortagant. Gorrhá cha Urshalimá beger tán

Ilirikumay damagá,‡ man sajjahén ráhá tarr o gard kortag o Masihay wasshén mestág pa sarjami jár jatag. ²⁰ Mani armán hamé butag ke mestágá á jágahán jár bejanán ke Masih ódá pajjárág nabutag o degaráni ér kortagén bonheshtáni sará chizzé addh makanán. ²¹ Bale hamá dábá ke nebeshtag ent:

"Hamá ke áiy bárawá hechbar hál dayag nabutagant, gendant o

hamá ke hechbar áiy bárawá naeshkotagesh, sarpada bant." §

²² Paméshká báz randá mani dém dárag butag ke shomay Kerrá átk makanán.

Pulos dém pa Rumá

²³ Bale nun pa man, é hand o damagán kár kanagá jáhé pasht nakaptag o bázén sáléá mani armán ham butag ke shomay Kerrá byáyán. ²⁴ Paméshká mani delá ent ke dém pa Espániáyá wati sát o saparay ráhá, gón shomá gend o nend bekanán tán shomay gendokay wasshián o rand, shomá maná pa óday separá madat bekanét.

²⁵ Bale nun Urshalimá, palgártagénáni hezmat kanagá rawagá án. ²⁶ Chiá ke Makduniah o Akáyahay kelisáyán shawr kort ke pa Urshalimay nézgarén palgártagénán máli komaké ráh bedayant. ²⁷ É áyani wati jenday shawr at. Á pa rásti Yahudiáni wámdár ant, chiá ke wahdé darkawm gón Yahudiáni ruhi barkatán sharikkár butagant, á ham wámdár ant ke gón wati máli hastiá, Yahudiáni hezmatá bekanant. ²⁸ Wahdé é káron sarjam kort o deljam bután ke é théki pa áyan sar butag, dém pa Espániáyá sara gerán o hamé saparay ráhá shomará gendán. ²⁹ Mana zánán ke wahdé shomay Kerrá byáyán, gón Masihay sarjamén barkatána káyán.

³⁰ Oo brátán! Pa may Hodáwánd Issá Masihá o pa Pákén Ruhay mehrá cha shomá dazbandia kanán ke Hodáay dargáhá pa man dwá bekanét o gón wati dwáyán mani johdán hamráh bebét. ³¹ Dwá kanét ke cha Yahudiahay nábawaráni dastá berakkán o Urshalimay shahrá, palgártagén mardom mani hezmatá bemannant, ³² tán gón Hodáay wáhag o razáyá pa shádehi shomay Kerrá byáyán o gón shomay gend o nendá nókén wák o twáné begerán. ³³ Sohl o émeniy Hodá shomá sajjahénáni hamráh bát. Anchosh bát. Ámin.

16

Pulosay drud o drahbát

¹ Shomay Kerrá mayshomay gohár Pibiay sepáreshá kanán, ke Kenkriahay shahray kelisáay hezmatkáré, ² tánke pa Hodáwándaygi, hamá paymá ke palgártagénáni arzesh ent, áiy gón wat bezurét o wasshátk bekanét o har komaké ke cha shomá lóthit, bekanét, chiá ke á, bázén mardoméay madatkár butag o mani jenday ham.

³ Mani salámán pa hamkárén Priskilá* o Akwiláyá sar kanét, ke mani hamráhiá Issá Masihay hezmatesh kortag. ⁴ Á pa

§ 15:10 15:10 Sharyatay Domi Rahband 32:43. * 15:11 15:11 Zabur 117:1. † 15:12 15:12 Eshayá Nabiy Ketáb 11:1. ‡ 15:19 15:19 Ilirikum maróchigén rónendi Bálkánay damagé butag. § 15:21 15:21 Eshayá Nabiy Ketáb 52:15. * 16:3 16:3 Asligén Yunáni nebeshtánká "Priská" átkag, ke Priskiláay gwandh geptagén nám ent.

manigi, cha wati zendá sar gwastagant. Tahná man na, darkawmáni sajjahén kelisá ham áyáni shográ gerant. ⁵ Anchosh ham hamá kelisáyá mani salámán berasénét ke áyáni lógá barjáh dáraga bit. Mani dordánagén dóst Epaynéтусá ke pa Masihá Ásiáay† damagay awali bar o samar at, drud sar kanét. ⁶ Maryamá ke pa shomaygi bázén zahmaté kasshetagi salám sar kanét. ⁷ Mani syád‡ Andrunikás o Yuniásá ke mani hamráhiá bandig atant drud sar kanét. Kásedáni nyámá á, arzeshmand o námdárén chehrag ant o cha man o pésar, Masihay báwarmand butagant. ⁸ Ampliátusá drud sar kanét. Á, pa Hodáwandaygi maná báz dóst ent. ⁹ Masihay hezmatá may hamkár Urbánus o mani dóstén sangat Estákisá drud sar kanét. ¹⁰ Apelisá ke Issá Masihay kár o hezmatá páydár ent o anchosh ham Aristubulosay lógay mardomán salám sar kanét. ¹¹ Mani syád§ Hirudiuná drud sar kanét, Nárkisusay lógay hamá mardomán ke Hodáwanday sará báwarmand ant salám berasénét. ¹² Bánokén Tripiná o Tripusáyá ke pa Hodáwandá bázén káré kortagesh o anchosh dordánagén Persisá ke Hodáwanday ráhá mazanén hezmati kortag drud sar kanét. ¹³ Pa Ruposá ke cha Hodáwanday némagá gechén kanag butag o áiy mátá ke pa man ham mátay paymá ent drud sar kanét. ¹⁴ Asinkritus, Pligun, Hermes, Pátrubás, Hermás o á dega brátán ke gón áyán ant salám berasénét. ¹⁵ Anchosh Pilulugos, Yuliá, Nirias o áiy gohár Ulimpás o sajjahén palgártagénán ke gón áyán ant drud sar kanét. ¹⁶ Gón pákén chokkagán, yakdomiá drud o drahbát begwashét. Masihay sajjahén kelisá pa shomá salám déma dayant. ¹⁷ Oo brátán! Cha shomá dazbandia kanán, á mardomán sharr bechárét o watá cha áyán dur bedárét ke mardománi nyámá pléndhia kanant o shomay gep-tagén tálimáni helápá gonáhay sawabsáza bant. ¹⁸ Chiá ke choshén mardom may Hodáwand Masihay hezmatá nakanant, á wati lápay golám ant o gón wati narm o charpén zobáná sádahén mardomán rada dayant. ¹⁹ Shomay parmánbardáriay tawár o áwáz sajjahénáni nyámá proshtag o man cha shomá shádmán án, bale cha shomá lóthán ke pa nékén kárán dáná o hóshmand bebét o cha sellén kárán pák o sáp bemánét. ²⁰ Sohl o émeniy Hodá, hamé zuttán Shaytáná shomay pádáni chérá hurta kant. May Hodáwand Issá Masihay rahmat shomay hamráh bát.

²¹ Mani hamkár Timutáwus shomará drud o drahbáta gwashit, anchosh mani syád* Lukius, Yásun o Susipáterus pa shomá salám déma dayant.

²² Man Tertius, é kágaday washnebis,† cha Hodáwanday némagá shomará druda gwashán.

²³ Gáyus ke maná o kelisáy sajjahén mardomi wati mehmándáriay sáhégá dáshtagant shomará druda gwashit. É shahray hazánagay kelitdár Erástus o may brát Kwártus shomará druda gwashant. ²⁴ May Hodáwandén Issá Masihay rahmat shomá sajjahénáni hamráh bát. Anchosh bát. Ámin.‡

Satá o saná

²⁵ Nun Hodáyá satá o saná bát, ke cha mani é wasshén mestág o Issá Masihay kol-away jár janagay barkatá, shomará barjáh dáshta kant. É mestágay ráz, karnáni karn chér o bétawár at, ²⁶ bale nun páshk o paddar butag o gón abadmánén Hodáay hokm o parmáná cha nabiáni nebeshtánkán darkawmáni nyámá pajjárnag butag, tán sajjahén kawm báwar bekanant o bemannant. ²⁷ Cha Issá Mashiay ráhá yakkén dánáén Hodáyá tán abad shán o shawkat berasát. Anchosh bát. Ámin.

† 16:5 16:5 Á wahdá, Ásiáay máná annugén Torkiahay rónendi némag at. ‡ 16:7 16:7 Yá: hammolki. § 16:11 16:11 Yá: hammolki. * 16:21 16:21 Yá: hammolki. † 16:22 16:22 Washnebis, bezán káteb. ‡ 16:24 16:24 Lahtén kwahnén syáhagá, band 24 nést.

Ákubay kágad

Drud

¹ Cha Hodá o Hodáwandén Issá Masihay hezmatkár,* Ákubay némagá pa dwázdahén kabilahán ke donyáyá sheng o sháng ant.

Shomará drud sar bát.

Báwar o hekmat

² Oo brátán!† Wahdé warh warhén chakkás o ázmáeshána kapét, é chizzá sarréchéh shádehié bezánét. ³ Chiá ke zánét shomay imánay chakkás sabr o ópára kárit, ⁴ bale bellét ke é sabr o ópár sarjam bebit tán shomá rost o rodóm bekanét o tamán o kámel bebét o shomará hech kammíé mabit.

⁵ Agan cha shomá yakkéay zánt o hekmat kamm bebit, cha Hodáyá belóthit o Hodá, ke cha wati bakshendagiá harkasá bé mennat o shegána dant, áia zánt o hekmata bakshit. ⁶ Bale gón báwarmandiá belóthit o hech shakké delá mayárit, chiá ke dodelén mardom zeray cawl o mawjáni dhawlá ent ke gón gwátá har némagá létha wárt. ⁷ É warhén mardomé, chosh hayál makant ke áia cha Hodáwandá chizzé rasit. ⁸ Parchá ke á dodel ent o wati hech kár o hech kerdáray sará mohr naóshtátáq.

Hastómand o nézgár

⁹ Nézgárén brát, wati marháh o ezzatmandiay sará pahr bekant o ¹⁰ hastómand, wati darbéshi o nézgáriay sará, chiá ke hastómand dashtay golyay paymá hoshka tarrít o zawála bit. ¹¹ Róch gón wati sóchókén bránzá sara kasshit o káhán hoshka kant, áyáni polla rechant o zébáiesh gára bit. Hastómand hamé paymá ent, wati kasb o káráni chen o lánchá gimmorit o bégwáha bit.

Chakkásay samar

¹² Bahtáwar hamá ent ke wati ázmáesh o chakkásán mohra óshtit. Parchá ke wahdé á cha chakkásán sarbolanda bit, zendmánay hamá táj áia rasit ke Hodáyá pa wati dóst dárókán wádah kortag. ¹³ Á ke chakkásá kapit, magwashit: “É Hodá ent ke maná ázmáesha kant.” Chiá ke Hodá gón hech badié chakkásaga nabit o hechkasá chakkás o waswasahá dawra nadant. ¹⁴ Harkas ke waswasaha bit, é áiyay jenday sellén wáhag ant ke galáénant

* **1:1** 1:1 Asligén Yunáni nebeshtánka gwashit: “golám”. † **1:2** 1:2 “Brátán” máná har báwarmand ent, mardén o janén. ‡ **1:16** 1:16 Asligén Yunáni nebeshtánka gwashit: “Oo mani dordánagén brátán!” § **1:25** 1:25 Ázátaiy Sharyat, bezán hamá “Sharyat” ke mará cha gonáhán ázáta kant.

o dámá dawria dayant. ¹⁵ Sellén wáhag ke lápporra bant, gorhá gonáh pédá bit, gonáh ke rodit o mazana bit, marka kárit. ¹⁶ Oo mani dordánagán!‡ Rad mawarét.

¹⁷ Har nékén dád o har tamánén tohpa o théki cha borzáda kayt, cha nur o rozhnay Petay némagá ke hechbar badala nabit o hech tahári o sáhegéá áiyay arwáh o jabiná ráh nést. ¹⁸ Áiyay wáhag hamé butag ke mará cha rástaiy habaray wasilahá pédá bekant, tánke áiyay jórh kortagénáni awali bar o samar bebén.

Eshkonag o kanag

¹⁹ Oo mani dordánagán! Sharr delgósh bekanét. Harkas báyard ent eshkonagá tayár bebit, bale habará eshtáp makant o zutt zahr magipt. ²⁰ Chiá ke ensánay zahr o hezhm, á pahrézkáriá pa bar o samara naylit ke Hodá lóthit. ²¹ Paméshká har warhén paliti o sajjahén badián cha watá dur kanét o pa békebri o nar-mdeli, hamá gál o habarán delá bedarét ke shomay del o jáná nádéngay butag o shomay rakkénagay wák o twáni hast.

²² Hodáay habará, anchosh sahl o hoshká gósh madarét o watá rad madayét, áiyay sará kár bekanét. ²³ Chiá ke harkas é habará eshkont o áiyay sará kára nakant, hamá mardomay dhawlá ent ke wati chehragá ádenká chárit, ²⁴ watá gendit, bale anchosh ke cha ádenkay déma dura bit, hamá damáná wati rang o dróshomá shamóshit. ²⁵ Bale á ke wati chammán dém pa tamán o kámelén Sharyat, bezán “ázátaiy Sharyat”§ tarrénit o áiyay sará mohra óshtit, shamóshkárén eshkonóké naent, mannókéh kár kanóké. Á wati kár o kerdá bahtáwara bit.

²⁶ Á kas ke watá Hodádóste zánt bale wati zobánay mahárá dáshta nakant, watá rada dant o galáénit o áiyay “Hodádóstiá” páedagé nést. ²⁷ Hamá Hodádósti ke may Hodáén Pet, pák o béaybia zánt: “Sakkiáni wahdá janózám o chórawáni dastá gerag” o “Watá cha é donyáay gandagián pák dárag” ent.

2

Cha park o pérá pahréz

¹ Oo mani brátán! Shomá ke may mazanshánén Hodáwand Issá Masihay báwarmand ét, mardománi nyámá park o pér korta nakanét. ² Pa mesále, agan yakké gón teláhén challah o mondrik o wasshén póshákán shomay diwáná byayt o dega dertagpocchéh bazzagé ham bepoterit o ³ shomá atlaspóshá gón sharrén

chammé bechárét o begwashét: “Byá, byá borzá benend”, bale gón á bazzagá begwashét: “Ódá bósht”, yá: “Mani pádáni démá benend”,⁴ gorhá shomá wati nyámá park o pére naesht o gón wati sellén hayálán ér janagi káré nakort?⁵ Oo dordánaagán! Gósh dárét. Hodáyá é donyáay nézgarén mardom gechén nakortagant ke báwará hastómand bebant o hamá bádsháhiá mirás bebarant ke Hodáyá pa wati dóst dárókán labz o kawl kortag?⁶ Bale shomá nézgaráni béezzati kortag. É hastómand naant ke shomay sará setama kanant o shomará gerrénant o hakdiwánána barant?⁷ Hamé naant ke hamá sharapdárén námáy* sará kopr kanant ke Hodáyá shomará bakshetag?

⁸ Agan sháhánagén Sharyatá, hamá dába barjáh bedárét ke Pákén Ketáb hokma kant: “Gón wati hamsáhegá wati jenday dhawlá mehr bekan” gorhá shomá sharr kortag.⁹ Bale agan park o pére bellét, gonáha kanét o Sharyat ham shomará hamá dhawlá mayáriga kant ke gonahkárána kant.¹⁰ Parchá ke agan kasé Sharyatay sajjahén rahbandáni sará kár becant bale yak rahbandé ham bepróshit, bezán sajjahén Sharyati próshtag.¹¹ Áiá ke gwashtag: “Zená makan,” anchosh ham gwashtagi: “Hón makan.” Nun agan zená makanay bale hón bekanay, taw Sharyat próshtag.¹² Gorhá hamáyáni dába kár o habar bekanét ke ázátiay Sharyatay sará dádrasi† kanaga bant.¹³ Chiá ke á mardom ke mehr o rahma nakanant, áyáni dádrasi pa bérahmia bit. Bale mehr o rahm, dádrasiay sará báládest o sóbena‡ bit.

Báwarmandi o kár o kerd

¹⁴ Oo brátán! Bé kár o kerdá, tahná gón báwarmandiay gapp o habará, kaséá ché sutt o páedagé rasit? É paymén báwarmandi chón áiá rakkénta kant?¹⁵ Agan brát yá goháre rózig o pósháká mohtáj bebit o¹⁶ cha shomá yakké gón áiá begwashit: “Pa salámati beraw, sharrén póshák bepósh o lápay sérá bwar,” bale pa áiyi jesmi zaluratáni purah kanagá hech makant, áiyi káré sharra bit?¹⁷ Acha, bé kár o kerdá, báwarmandi mortag.

¹⁸ Nun buta kant kasé begwashit: “Tai Kerrá báwar hast o mani Kerrá kár o kerd. Taw wati báwará bé kár o kerdá maná pésh bedár o man cha wati kár o kerdá, tará wati báwará pésha dárán.”¹⁹ Tará báwar ent ke Hodá yakké. Sharr ent. Déh

o jennáni báwar ham hamesh ent o cha torsá larzant.

²⁰ Oo nádán! Pa békerdén báwarmandiay bébar o bésamariá dalil o neshánia lóthay?²¹ May bonpirok Ebráhém, cha wati kár o kerdá pák o pahrézkár hesáb árag nabut hamá wahdá ke wati chokk, Esháki korbánjáhá bort?²² Genday ke áiyi báwarmandi o kárkerd, hórigá démá shotant o báwarmandi gón kárkerdá sarjam but.²³ É dhawlá, hamá nebeshtah pa sar raset o sarjam but ke gwashit: *Ebráhémá Hodáyá sará báwar kort o hamé báwar, pa áiá páki o pahrézkári hesáb árag but* o á Hodáyá dóst zánag but.²⁴ Gorhá gendét ke harkas cha wati kárkerdá pák o pahrézkár zánaga bit, tahná cha báwar o imáná na.

²⁵ Anchosh ham, bannámén janén Raháb cha wati kár o kerdá pák o pahrézkár hesáb árag nabut, hamá wahdá ke chárigi§ jáh o panáh dátant o cha dega ráhéá táchéntant?²⁶ Haw! Bezán, hamá dába ke bé ruhá, jesm o ján mortag, bé kár o kerdá báwar ham mortag.

3

Zobánay gandagi

¹ Oo mani brátán! Chosh mabit, cha shomá bázén ostád bebit. Chiá ke zánét, má ostádáni sará gránterén dádrasia kapit o² má sajjahén báz rada janén o thagala warén. Agan kasé cha wati habarán thagal mawárt, tamán o kámelén ensáné o wati sarjamén jesm o jánay mahará dáshta kant.³ Agan má aspáni dapá lagám bekanén tán áyan wati parmáná byárén, gorhá áyáni sajjahén jesm o jáná har némagé ke belóthén táb dáta kanén.

⁴ Thuhén bójigán* bechárét. Harchont ke báz mazan ant o pa áyáni démá baragá trondén gwát pakár ent, bale náhodá bójigá gón hordén sokkáné har jáh ke belóthit bárt.⁵ Hamé dhawlá, zobán o lellek ham ensánay jesmay yak hordokén bahré bale mazanén gorraya jant. Anchosh ke ásay hordokén trishkoké, mazanén jangalé sóchit,⁶ zobán ham yak anchén ásé ke may jesm o jánay rag o bandáni tahá selliáni donyáé. Mardomá pahk sell o áلودaga kant o áiyi drostigén zendá ása jant. Zobán wat ásé ke cha tahtarunay† ásá rók butag.

⁷ Har dhawlén jánwar, báli morg, már o gój o daryái sahdár rámag kanaga bant o ensáná é kár kortag,⁸ bale hechkas

* 2:7 2:7 Hamá sharapdárén nám, bezán Issá Masihay nám. † 2:12 2:12 Dádrasi, bezán hakkén paysalah, hamá shawr ke cha dádgáhána kayt, dáwari. ‡ 2:13 2:13 Sóbén, bezán péróz, kámyáb. § 2:25 2:25 Chárig, bezán jásus, mokhber. * 3:4 3:4 Bójig, bezán lánch, yakdár, kashiti. † 3:6 3:6 Tahtarun, bezán jahannam, dózah.

zobán o lleleká lagám korta nakant. Zobán sarkasshén sherré ke cha koshókén zahrá porr ent. ⁹ Gón hamé zobáná wati Hodáwandén Petá satá kanén o gón hamé zobáná hamá mardomán nálata kanén ke Hodáyá wati shekl o dróshomá adhd kortagant. ¹⁰ Cha yakkén dapá satá o saná ham dara kayt o baddwái o nálát ham. Oo brátán! Nabáyad ent chosh bebit. ¹¹ Buta kant cha yakkén chammagá sórén o wasshén áp berombit? ¹² Oo mani brátán! Enjiray drachké zaytunay bar dáta kant? Yá ke anguray drachké enjira dant? Hamé dhawlá, sórén chammagé wasshén áp rombénta nakant.

Do paymén hekmat

¹³ Shomay nyámá dáná o aglmand kay ent? Bellét eshiá cha wati sharkerdiá pésh bedárit, gón hamá békebri o mehrabániá ke cha hekmatá kayt. ¹⁴ Bale agan shomay delá tahlén hasadd o watgarazi[‡] mán ent, gorhá pahr makanét, dróg mabandét o é rástíá bemannét. ¹⁵ É dhawlén “hekmat” cha borzád éra nayayt, zemini, napsáni o shaytáni ent. ¹⁶ Chiá ke har jáh hasadd o watgarazi bebit, ódá petnah o áshóp o dega har dhawlén gandagia bit. ¹⁷ Bale á hekmat ke cha borzáda kayt, awalá ke pák o palgár ent, randá sohl árók o narm, mannók o cha néki o rahmatay bar o samará porr ent, cha park o pér o dorui o dopóstiá ham dur ent. ¹⁸ Á ke sohl o saláhay tohmá keshant, pahrézkária ronant.

4

Watá Hodáay dastá bedayét

¹ Shomay nyámá, jang o dapják, cha kojá wadia bant? Cha shomay jenday hamá tamah o wáhagán naant ke shomay rag o bandáni tahá jangá ant? ² Chizzé lóthét o shomará narasit. Cha hamáiy tamahá, hón o kóshá kapét, bale angat shomará narasit. Nun jang o jadála jórhénét, padá ham shomará narasit chiá ke cha Hodáyá nalóthetagó. ³ Wahdé lóthét o narasit, pa é sawabá ent ke shomá gón badén morád o wáhagé lóthetag tán á chizzán pa wati aysh o nóshán kár bebandét. ⁴ Oo zenahkárán! Nazánét ke donyáay dósti, Hodáay dozhmeni ent? Harkas ke donyáay dóstiyá randá ent, watá Hodáay dozhmena jórhénit. ⁵ Hayála kanét ke Pákén Ketábá mopt o náhudag gwash-tag: “Ruhé ke Hodáyá mayshomay jesm o jáná dametag, tán hasadday kesásá pa má

hodónák* ent?” ⁶ Bale rahmaté ke á mára bakshit, bé hesáb géshter ent. Paméshká Pákén ketába gwashit:

Hodá porkebr o gorunákén[†] mardománi démá mohra óshtit, bale békebr o darbéshén mardománi sará wati rahmatána gwárenit.

⁷ Gorhá, watá Hodáay dastá bedayét. Shaytánay démá mohr bóshtét o á cha shomay démá tachit. ⁸ Gón Hodáyá nazzik bebét, Hodá ham gón shomá nazzika bit. Oo gonahkárán! Wati dastán pák kanét. Oo dodelán! Wati delá sáp kanét, ⁹ zári bekanét, mótk byarét o begrewét. Wati kandagán mótkay tahá badal kanét o shádehián andóhání tahá. ¹⁰ Hodáwanday bárgáhá, békebr o darbésh bebét o Hodáwand shomará borz o sarperáza kant.

Ér majanét

¹¹ Oo brátán! Yakdomiá ér majanét o badgói makanét. Harkas ke wati brátá bad begwashit o áia mayárbár bekant, rást esh ent ke áia Sharyat bad gwashtag o mayárig kortag. Agan taw Sharyatay dadrasíá kanay, gorhá Sharyatay sará kár kanagá naay, Sharyatay helápá shawr borragá ay. ¹² Bale dádras o Sharyatay jórhénók yakké. Á hamá ent ke rakkénag o tabáh kanagay wák o twáni hast. Gorhá taw kay ay ke wati hamsáhegay dádrasiá kanay?

Pa bándatá náhudagén pahr

¹³ Bale shomá ke gwashét: “Maróchi o bándá é shahr o á shahrá rawén o sálé hamángora gwázénén, sawdágeria kanén o mazanén sutta katthén,” sharr gósh dárét. ¹⁴ Shomá haminchok ham nazánét ke bándá ché bit. Shomay zend chié? Shomá báp o hormay[‡] paymá ét ke damánokéá gendaga bit o padá gára bit. ¹⁵ Gorhá chosh begwashét: “Agan Hodáwand belóthit, zendaga mánén o é paym o á paymá kanén.” ¹⁶ Bale nun chosh ent ke pa kebré pahra kanét. Har é warhén pahré sell ent. ¹⁷ Gorhá, agan kasé bezánt kojám kár sharr ent o á kára makant, gonahkára bit.

5

Bazhn o opsóz pa hastómandán

¹ Nun shomá, oo zarr o málay wájahán, begrewét o zári kanét, chiá ke taháren róch dém pa shomá pédák ant. ² Shomay mál o hasti zawál butag o sarhetag o jámag o póshák ham warók o ramézá*

[‡] **3:14** 3:14 Watgarazi, bezán har chizzá pa wat lóthag, har kára pa wati jenday nap o suttá kanag. * **4:5** 4:5 Hodónák, bezán wáhagádár, armáni, lóthók, delmánag. † **4:6** 4:6 Gorunák, bezán magrur. ‡ **4:14** 4:14 Báp o horm hamá dutt ent ke sardiáni mósomá cha dhagará dara kayt o gára bit. Ordu o Pársiá “bokhár”. * **5:2** 5:2 Warók o raméz, bezán gwandhén kerm o lulok ke dár o poccha wárt.

wártagant. ³ Shomay zarr o simm zang geptagant o zangesh shomay helápá gwáhia dayant o ásay dhawlá shomay jesm o jánay gósh tá warant, parchá ke é goddhi róchán, zarr o málo ambár kortag. ⁴ Bechárét, annun hamá kárendah o dehkánáni mozz shomay helápá kukkára kant, ke áyán shomay dhagáráni keshár rón o mósh kortagant o shomá gón mandr o repk áyáni mozz nadátag. Á ronókáni é peryát, zórakén Hodáwanday góshá rasetag. ⁵ Shomá zeminay sará pa aysh o nósh o hawá o hawass zend gwázéntag. Watá pa koshagay róchá sharr sáthetag o pazzóro kortag. ⁶ Shomá tachk o pahrézkarén mardom mayárig kortag o koshtagant. Á shomay helápá naósh tátagant.

Sakkiáni wahdá sabr o ópár

⁷ Oo brátán! Tán Hodáwanday áyagá, sabr o ópár kanét. Bechárét ke dehkán che paymá wadára kant tán zemin wati porarzechén bará beródenit, á pa érahti† o bahári hawrán chón wadárig ent. ⁸ Shomá ham sabr kanét o delá dhaddh kanét parchá ke Hodáwanday áyag nazzik ent. ⁹ Oo brátán! Yakdomiay zangá majanét tánke dádrasiá mayárig kanag mabét. Chiá ke dádras, darwázagay dapá óshtátag. ¹⁰ Brátán! Sakkiáni wahdá, sabr o ópára cha hamá nabián sabak begerét ke Hodáwanday námá habaresh kortag. ¹¹ Má hamáyán bahtáwara zánén ke wati zendesh pa sabr o ópár gwázéntag, shomá Ayyubay sabr o tahambolay bárawá eshкотag o zánét ke Hodáwandá áyag ásar o ákebat ché kort. Chiá ke Hodáwand wat gamwár o mehrabán ent. ¹² Bale, oo mani brátán! Sawgend mawarét, na ásmánay, na zeminay o na dega chizzéay. Bellét ke shomay “haw”, haw bebit o “na”, na bebit, tán chosh mabit ke mayárig kanag bebét.

Báwarmandi dwá

¹³ Agan cha shomá kasé sakki o sórián kaptag, dwá bekant o agan yakké gal o shádán ent, saná o satá bekant. ¹⁴ Agan cha shomá kasé nádráh ent, kelisáay kamáshán tawár bekant tán pa áiá dwá bekanant o Hodáwanday námá rógeni per bemoshant. ¹⁵ Báwarmandi dwá nádráhá dráha kant o Hodáwand áiá páda kant o agan gonáhi kortag, gonáhi bakshaga bant. ¹⁶ Paméshká, wati gonáhán, yakdomiay démá bemannét o pa yakdomiá dwá belóthét tán dráh kanag bebét. Pahrézkarén mardoméay dwáyá zór mán o barjáha bit.

¹⁷ Elyás may paymén mardomé at, bale pa delsetki dwái kort ke hawr mabit. Gorhá tán say o ném sálá zeminá hawr naretk. ¹⁸ Padá ke dwái kort cha ásmáná hawrán gwart o zeminá bar o samar dát.

¹⁹ Oo mani brátán! Agan cha shomá kasé cha rástia thagal bwárt o degaré áiá per betarrénit, ²⁰ bezánét ke harkas yak gonahkáréa cha gomráhia betarrénit, gonahkára cha marká rakkénit o bázén gonáhéay bakshagay sawabsáza bit.

† 5:7 5:7 Érahti, bezán páizi.

Petrosay Awali Kágad

Drud

¹⁻² Cha Issá Masihay kásed Petrosay némagá,

pa hamá sajjahén darándhéhén mardomán ke Pontus, Galátiah, Kápádukiah, Ásiá* o Bitiniahay damagán sheng o sháng ant. Hodáyá cha wati péshzánti o gón wati palgár kanókén Pákén Ruhá, shomará gechén kortag tán Issá Masihay parmánbardáriá bekanét o hamáiy hón shomay sará páshag o dranzag bebít.

Hodáay rahmat o sohl o ásudagi shomay sará gés h o géshter bát.

Zendagén omét

³ May Hodáwándén Issá Masihay Hodáén Petá satá o saná bát. Cha wati sarrchéhén rahmatá o gón Issá Masihay cha mordagán zendag bayagá, Hodáyá márá nóksará pédá kort tán márá zendagén omété berasit. ⁴ Áiá pa shomá ásmáná mirásé ambár kortag ke é mirás hechbara napussit, gára nabit o abadmán ent. ⁵ Shomá Hodáay sará báwar kortag o Hodá ham gón wati zór o wáká pa hamá nejátá shomay negahpániá kant ke cha annuná tayár ent o áheri zamánagá paddara bit. ⁶ É shomay shádmáni ent, toré shomá nun pa damánokéá gránén wahd o chakkásán bekapét. ⁷ É chakkás paméshká káyant ke shomay mohr o mohkamén báwar Issá Masihay záher bayagay wahdá satá kanag o sárháyag o ezzat dayag bebít. Shomay báwar cha zawál bayókén sohr o teláhá báz géshtera karzit, bell toré sohr cha ása gwastag. ⁸ Shomá Masih hechbar nadistag, angat áiá dósta dárét. Annun ham shomái nagendét, bale áiy sará báwaró hast o hech labzé shomay porshawkatén wasshiá darshán korta nakant, ⁹ chiá ke wati báwar o imánay morádá gendagá ét, bezán shomay jánay rakkag.

¹⁰ Paygambarán hamé rakkagay bárawá bázén johlánkén patth o pól kortag. Á paygambarán hamé rahmatay bárawá péshgói kortag ke shomará rasagi at. ¹¹ Masihay Ruh cha áyáni zobáná habar kanán o gwashán butag ke Masihá chónén sakkí saggagi ent o randá áiá chónén mazanén shán o shawkaté rásit. Gorchá, á modám hamé johdá butagant ke bezánant Pákén Ruh kai bárawá habará ent o é

kár kadéna bit. ¹² Pa áyán paddar butag ke wahdé habará atant wati hezmatá nakanagá atant, shomay hezmatá kanagá atant. Nun gón Pákén Ruhay zórá dega mardomán é wasshén mestág pa shomá raséntag, hamá Pákén Ruh ke cha ásmáná dém dayag butag. Pa é wasshén mestágay zánagá préshtag ham delmánag ant.

Pák bebét

¹³ Wati lánká bebandét o hozzhár bebét. Zendá pa shehm o rahdári† begwázénét. Wati ométá pa Hodáay hamá rahmatán bebandét ke Issá Masih wati záher bayagay wahdá pa shomá rasénitesh. ¹⁴ Habarzurén chokkáni paymá bebét. Maylét ke shomay zend hamá dhawlá sellén wáhagáni dastá bebít ke shomay názántiay wahdá butag. ¹⁵ Hamá dhawlá ke shomay gwánk janók pák ent, har káray tahá shomá ham pák bebét. ¹⁶ Chiá ke nebisag butag: “*Man pák án o shomá ham báiyad ent pák bebét.*” ‡ ¹⁷ Agan shomá Hodáyá wati Peta gwashét, ke á harkasay dadrasíá bé ru o ryá, § áiy káráni hesábá kant, gorhá wati darándhéiyay wahd o pásán pa sharap o ezzat gón Hodátorsi begwázénét. ¹⁸ Shomá zánét ke cha hamá náhudagén zendá ke cha shomay pet o pirénán shomará rasetagat, bahá zurag o mókag* butagét, bale gón nograh o sohrá na, ke abadmán naant, ¹⁹ gón hamá béayb o békeccchahén Gwarándh, bezán Masihay bebáháén hóná bahá zurag butagét. ²⁰ Masih cha donyáay jór h bayagá pésar gechén kanag butag, bale é goddhi róchán pa shomaygi átk o paddar but. ²¹ Cha áiy wasilahá, shomára Hodáay sará báwar hast, hamá Hodáay sará ke Masihi cha mordagán zendag kort o shán o shawkati dát. Paméshká, shomá Hodáay sará báwara kanét o cha hamáiy ométwár ét.

²² Nun ke shomá gón rástiy randgiriá watá pák o palgár kortag o gón yakdegará padelén mehray wáhond butagét, gorhá pa del o setk gón yakdomiá mehr bekanét. ²³ Chiá ke shomará nókén zend cha zawál bayókén tohmá narasetag, cha zawál nabayókén tohmá rasetag, bezán cha Hodáay zendag o abadmánén gál o habará. ²⁴ Parchá ke:

“*Ensán chó káh o sabzagá ent o shán o shawkati chó káhay pollá.*

Káh o sabzaga merant o poll ham kapant.

* **1:1-2** 1:1-2 Á wahdá, Ásiáay máná annugén Torkiahay rónendi némag at. † **1:13** 1:13 Shehm o rahdári, bezán Ordu o Pársiá “nazm o tartib”, Engrézi “discipline”. ‡ **1:16** 1:16 Láwíán 11:44-45, 19:2, 20:7. § **1:17** 1:17 Ru o ryá, bezán park o dark, Arabi o Pársiá “tab’iz”. * **1:18** 1:18 Mókaq, bezán pa kaséay jánay rakkénagá gránén kimmaté dayag, Pársiá “bázhkarid”. † **1:25** 1:25 Eshayá Nabiyá Ketáb 40:6-8.

²⁵ *Bale Hodáwandyag gál o habar tán abada mánit.* †

É gál o habar hamesh ent ke shomará mestág dayag butag.

2

Zendagén seng o dar chetagéen kawm

¹ Paméshká, har paymén badi, makr o préb, dotal o dopósti, hasadd o kénaqan cha watá dur kanét o hechkaséay poshtá bad o radén habar makanét. ²⁻³ Nun ke shomá Hodáwandyag néki o mehrabániay tám chashetag, nók pédá butagéen non-nokáni paymá pa pák o ruhánién shirá shodig bebét tánke cha hameshiá dém pa wati rakkagá rodán bebét.

⁴ Issá Masihay némagá byáét, hamá zendagén seng ke mardomán pasond nakort o nazort bale Hodáya géchen kort o áiy chammá Issá bématth o porarzesh at. ⁵ Nun shomá zendagén sengáni paymá pa ruhánién lógeay bandagá kár bandag bebét, pák o palgártagéen ruhánién péshwá ham bebét o anchén ruhánién korbánig bedayét ke cha Issá Masihay wasilahá Hodáya washnóda kanant. ⁶ É hamá habar ent ke Hodáya Pákén ketábá átkag:

“Bechárét, man Sahyuná sengé éra kanán.

É seng bebáhá o géchénién bonheshté.

*Á kas ke eshiay sará báwar bekant,
hechbar pashal o sharmendaga nabit.”*

*

⁷ É seng pa shomá ke imánó áwortag porarzesh ent, bale pa áyan ke imánesh nayáwortag:

“Á seng ke bánbandén ostáyán † pasond nakort o nazort

hamá seng, bonhesht but.” ‡

⁸ o

“sengé ke mardomána thagalénit o

kóhé ke áyan dawra dant.” §

Áyáni thagal waragay sawab esh at ke Hodáya habaresh nazort. Áyáni ásar o ákebat hamesh at. ⁹ Bale shomá Hodáya géchen kortagéen bádsháhén ruhánién péshwá o pákén kawm ét, Hodáya jenday kawm ét o áiy shomará cha taháriá dém pa wati porshawkatén rozhnáiy gwánk jatag tán áiy mazanén kárán jár bejanét. ¹⁰ Pésará shomá kawmé naatét bale annun Hodáya kawm ét. Pésará shomará Hodáya rahmat narasetagat bale annun áiy rahmat shomará gón ent.

* **2:6** 2:6 Eshayá Nabiay Ketáb 28:16. † **2:7** 2:7 Bánbandén ostá hamá ent ke lógay bandagá zántkár ent. ‡ **2:7** 2:7 Zabur 118:22. § **2:8** 2:8 Eshayá Nabiay Ketáb 8:14. * **2:22** 2:22 Eshayá Nabiay Ketáb 53:9. † **2:23** 2:23 Tantaná, bezán hattá, tán é haddá ke. ‡ **2:23** 2:23 Pátráp, bezán tahdid, damki. § **2:23** 2:23 Dádrasi, bezán hakkén paysalah, hamá shawr ke cha dádgáhána kayt, dáwari.

¹¹ Oo dordánagán! Shomá é donyáya bigánag o darámad ét. Mani dazbandi hamesh ent ke watá cha á jesmáni lóth o wáhagán pahréz bekanét ke shomay ruhay helápá janga kanant. ¹² Nábáwaráni nyamá pák o palgáren zend begwázénét. Bell toré á, shomará bohtáma janant o gwashant ke shomá radén kár kanagá ét, bale gón shomay nékén káráni gendagá, Hodáya áyagay róchá Hodáya sharap o ezzat bedayant.

Ehtiárdaráni parmánbardáriá bekanét

¹³ Shomá pa Hodáwandyagi, sajjahén ehtiárdáren mardománi parmánbardáriá bekanét, bádsháhay ham ke cha sajjahénán master ent o ¹⁴ hákemáni ham ke cha bádsháhay némagá pa radkáráni sezá dayag o sharkerdén mardománi sharap dayagá dém dayag butagant. ¹⁵ Hodá lóthit shomá gón wati sharrén kerd o kárán ahmakén mardománi násarpadén habaráni démá bedárét. ¹⁶ Shomá ázát ét, paméshká ázátén mardománi dhawlá zend begwázénét bale wati ázátiá hehbar pa radén kárán nimmón makanét, wati ázátiá pa Hodáya hezmatá kár bebandét. ¹⁷ Harkasá ezzat bedayét o pa báwarmandán háсэн mehré delá bedárét, wati zendá pa Hodátorsi begwázénét o bádsháhá sharap bedayét.

Masihay sakki saggagay mesál

¹⁸ Oo golámán! Wati wájaháni parmánbardáriá bekanét o áyan báz ezzat bedayét. Tahná narm o mehrabánén wájaháni parmánbardáriá makanét, trond o zórakén wájaháni parmánbardáriá ham bekanét. ¹⁹ Wahdé shomá gón Hodáya wapádár ét o náhakkén sezáyana saggét, shomay hamé sabr o ópár wat pa shomá sharapé bit. ²⁰ Agan shomá pa radén káréa sezá dayag bebét, gorhá chón á sezáy saggag shomará sharapdára kant? Bale agan sharrén kár o kerdéay sawabá sakki besaggét, Hodá shomará satá kant. ²¹ Shomá pa hamé sakkiáni saggagá géchen kanag butagét, parchá ke Masihá ham pa shomaygi sakki saggét o nemunah o mesalé but ke shomá áiy rangiriá bekanét.

²² *“Áiyá hech gonáh nakort o*

*kassará prébi nadát.” **

²³ Bell toré béeezzat kanag but, bale angat ham hechkasi béeezzat nakort. Tantaná† wahdé sakki saggagá at, kassará pátrápi‡ nadát. Áiyá Hodáya sará tawkal kort ke

tachkén ensáp o dádrasia[§] kant. ²⁴ Áiá wat may gonáháni bár salibay sará wati bad-dhá laddhet, tánke gonáh cha may delá be-merit o pa néki o páki zend begwázénén, ke shomá cha hamáiy thapp o thórán dráh butagét. ²⁵ Mésháni paymá gár o sar-gardán atét, bale nun hamáiy kerrá per tarretagét ke shomay arwáháni shopánk o sambálók ent.

3

Jan o mard

¹ Oo janénán! Hamé paymá, shomá wati mardáni parmánbardáriá bekanét, tán agan cha áyán yakké Hodáay habará mamannit, gorrhá á gón habará na, gón wati janay kár o kerday gendagá Hodáay sará báwar bekané, ² hamá wahdá ke shomay Hodátorsí o pákdámoníá gendit. ³ Shomay singár o palgár zaheri mabit ke “sará chón begwapén, chónén saht o zéwar per bekanén o chónén god bepóshén.” ⁴ Eshiy badalá, wati del o jabiná gón narm o áramén ruhéay páydáren zébáiá besingárét, ke pa Hodáyá é chizz báz porazsh ent. ⁵ Kwahnén wahd o zamánagá anchosh butag o pák o nékén janén ke ométesh pa Hodá butag, watá gón wati mardáni parmánbardáriá singáretagesh, ⁶ anchosh ke Sárará Ebráhémay parmánbardári kort o wájah o masteri gwasht. Agan shomay kár nék o sharr bebant o maylét ke chizzé shomará betorsénit, shomá ham hamáiy chokka bét.

⁷ Oo mardán! Shomá ham gón wati janán porméhr bebét ke cha shomá názorkter ant. Janén gón shomá zendmáney porbarkatén thékiá sharikdár ant. Áyán ezzat bedayét, tán chosh mabit ke shomay dwá eshkonag mabant.

Rástiy ráhá sakkíay saggag

⁸ Néth,* shomá sajjahén yakdel o ham-dard bebét, gón yakkdomíá mehr bekanét, narmdel o békebr bebét. ⁹ Gón hechkasá badiay badalá badi makanét. Agan kaséá shomará zá o zakat kort, áiá zá o zakat makanét, eshiy badalá pa áiá nékén dwá belóthét ke pa hamé kára gwánk janag butagét o cha hameshiá shomará barkata rasit. ¹⁰ Paméshká:

“Á kas ke zendmáney wáhadgár ent o wasshén róch gendaga lóthit, áiy zobán cha badiá dur bebít o lonth cha makr o prébá;

¹¹ *cha badiá per betarrít o néki bekané; sohl o émeni belóthit o hameshiay shóhazá bebít.*

¹² *Chíá ke Hodáwanday chamm, nék o pahrézkárén mardomán sakk ent o góshi gón hamáyáni dwáyá.*

Bale Hodáwand wati demá cha badkerdén mardomána tarrenít.”†

¹³ Nun ke shomá pa nékén káráni kanagá wáhadgár ét, kay shomará táwán dáta kant? ¹⁴ Agan pa shomay nékén kárán shomará ázár berasit, angat ham shomá bahtáwar ét. Cha áyáni patrápán matorsét o paréshán mabét. ¹⁵ Bass, wati delá Masihá Hodáwand bemannét o hamáiyá sharap bedayét. Agan kasé shomay ométay sawabay jostá bekané, modám pa passaw dayagá tayár bebét. ¹⁶ Bale é kára gón narmi o pa sangini bekanét. Wati jabin o wejdáná pák o sáp bedaré, tánke shomará bad o rad gwashagay wahdá, á mardom gón shomay nékén Masihi kerdáray gendagá cha wati zá o zakatán pashal o sharmendag bebant. ¹⁷ Paméshká, agan Hodáay razá bebít ke sakkí besaggét, gorrhá badén káráni sakkíay saggagay badalá, nékén káráni sakkíá besaggét. ¹⁸ Masihá ham yak baré pa may gonáhán sakkí sagget, bezán á “Nék o Páká” pa gonahkárán wati ján nadr kort tán márá‡ pa Hodáyá sar bekané. Masih jesmi koshtag but bale Ruhá zendag kort.

¹⁹ É, hamáiy Ruh at ke bandigén arwáháni nyámá shot o pa áyán járé jati, ²⁰ hamá arwáh ke gwastagén zamánagá náparmániesh kortagat, bezán Nuhay zamánagá ke bójjig[§] adhd bayagá at o Hodá gón sabr o opár wadáríg at, bale kammén mardomé, bezán tahná hasht mardom cha ápáy ráhá rakket. ²¹ Hamé áp shomay pákshódiay mesál o nemunah ent ke annun shomará rakkénit. Pákshódi jesm o jánay zaheri chellán páka nakant, é pa pákén wejdán o jabiná gón Hodáyá shomay dazbandi ent ke cha Issá Masi-hay jáh janagay wasilahá shomará rasit, ²² hamá Masih ke ásmáná shotag o nun Hodáay rástén némagá neshtag o préshtag o zór o wák, hamáiy dastay chérá ant.

4

Gón Hodáyá wapádári

¹ Nun hamá dhawlá ke Masihá wati jesm o jáná sakkí sagget, shomá ham pa anchén káréa tayár bebét, parchá ke har wahdá kaséa mán jesmá sakkí saggetag, cha gonáhá rakketag. ² É paymá, nun á wati mantagén jesmi zendá ensáni lóth o wáhadgáni sará nagwázénit, Hodáay

* 3:8 3:8 Néth, bezán godhsará, áherá. † 3:12 3:12 Zabur 34:12–16. ‡ 3:18 3:18 Lahtén syáhagay tahá átkag:

shomará. § 3:20 3:20 Bójjig, bezán lánch, yakdár, kashti.

wáhagáni sará gwázénit. ³ Shomá bázén wahdé hamá káráni sará gwázéntag ke Hodánábáwarén* mardomán dósta bant, chó ke badkári, hawá o hawas, hanósh o hésári, sharábwáriay mahpel, aysh o nósh o é gandahén botparasti. ⁴ Nun wahdé á gendant ke shomá é radén káráni hár o hirrópá áyáni hamráha nabét, hayrána bant o shomará bad o rada gwashant. ⁵ Bale é mardomán hamáiay démá jwáb dayagi ent ke pa sajjahén zendagén o mortagénáni dadrasiá tayár ent. ⁶ É dhawlá, Hodáay wasshén mestág pa mordagán ham rasénag but, ke sajjahénáni dhawlá áyáni jesmi dádrasi butagat, tánke arwáhesh Hodáay paymá zendag bemánant.

⁷ Donyá zutt halás bayagi ent, paméshká gón shehm o rahdáriá watá grán o sangin bedaréét tán dwá bekanét. ⁸ Cha sajjahénán masterén gapp esh ent ke yakdomiá pa del o setk dóst bedaréét ke mehr, bázén gonáhéay bakshagay sawabsáza bit. ⁹ Bé norondhagá wati lógay dápa pa yakdomiá pach bekanét. ¹⁰ Shomá har yakkéá cha Hodáyá hásén twané rasetag. Amánatdáráni paymá, Hodáay tahr tahrén naymatán pa yakdomiay hezmata kár bebandét. ¹¹ Kasé ke habara kant, Hodáay jenday habarán bekant o kasé ke hezmata kant gón Hodáay dátagén zór o wáká hezmata bekant, tánke cha Issá Masihay wasilahá Hodáyá satá o saná berasit. Sajjahén shán o shawkat o zór o wák abad tán abad hamáiay bátant. Anchosh bát. Ámin.

Pa Issáayi sakkíani saggag

¹² Oo dordánagán! Cha hamá ásen chakkás o ázmáeshán hayrat makanét ke shomay chakká kápan o wati delá magwashét ke “é ajabén karé gón má bayagá ent.” ¹³ Tán ódá ke gón Masihay sakkíani saggagá sharikdár ét gal o shádán bebét, tánke hamá sáhatá ke áiy shán o shawkat paddara bit, shomá ham wassh bebét o békesás shádmáni kort bekanét. ¹⁴ Agan Masihay námay sawabá shomará zá o zakata kanant, shomá bahtáwar ét, parchá ke Hodáay porshawkatén Ruhá shomay delá jágah kortag. ¹⁵ Watá pahrézét ke cha shomá kasé hóni, dozz, radkár o pléndh bayagay sawabá sakkí o sóriáni tahá makapit. ¹⁶ Bale agan kasé Masíhi bayagay sawabá sakkí o sóriáni tahá bekapit, cha eshiá pashal o sharmendag mabit o pa wati Masíhi bayagá Hodáyá satá o saná bekant. ¹⁷ Nun dádrasiay wahd átkag o é dádrasi

cha Hodáay hándán o kahólá[†] bendáta bit. Agan dádrasi cha Hodáay hándáná bendáta bit ke má én, gorhá á mardománi ásar o ákebat ché bit ke Hodáay wasshén mestágay namannók ant?!

¹⁸ “Agan pahrézkárén mardoméay rakkag chó grán ent, gorhá nábáwar o gonahkáráni hál ché bit?”

¹⁹ Paméshká, á ke gón Hodáay razáyá sakkí o sóriáni tahá kaptagant, watá may jórh kanókey sepordah bekanant ke wapadár ent o nékén kár kanán bebant.

5

Hodáay ramag

¹ Man wat ke cha kelisáay kamáshán yakké án o Masihay sakkí o sóriáni sháhedé án o áiy paddar bayagién shán o shawkatá sharikdár án, shomay nyamá harché kamásh hast, cha áyán mani dazbandi esh ent ke: ² Hodáay ramagay shopánki o chárágá bekanét ke shomay sepordah kanag butag. É kára pa nádelkasshi makanét, pa del o setk bekanéti hamá dhawlá ke Hodá lóthit. Gón hobb o hodónáki bekanéti, pa wati jenday nap o suttá makanéti. ³ É ramagay sará wájahi makanét ke shomay dastá dayag butag, pa eshiá sharrén mesalé bebét. ⁴ Padá wahdé masterén shopánka kayt o paddara bit, shomá shán o shawkatay hamá tájá katthét ke hechbar gár o zawála nabit.

⁵ Oo warnáyán! Anchosh shomá ham wati masterénáni parmánbardáriá bekanét o gón yakdomiá békebr o darbésh bebét, chiá ke:

“Hodá porkebr o gorunákén* mardománi helápá mohra óshtit, bale békebr o darbéshén mardománi sará wati rahmatána gwárenit.”

⁶ Paméshká, Hodáay porwákén dastay chérá watá békebr o darbésh bekanét tánke á, wati gishshéntagén wahdá shomará borz o sarperáz bekant. ⁷ Wati sajjahén gam o paréshánián hamáiay sará yalah kanét, parchá ke áiy shomay hayál gwar ent. ⁸ Grán o sangin o hozzhár bebét, chiá ke shomay dozhtmen, Shaytán, chó shérá gorrán ent o shóházá ent ke kojá shekáré berasiti tán bederrit o éri bebárt. ⁹ Shaytánay démá bóshtét o wati báwará mohr o mohkam bedaréét. Bezánét ke hamé paymén sakkí o sóri jahánay é dega jágahán ham shomay brátáni[†] sará bayagá ent. ¹⁰ Nun Hodá, ke sajjahén rahmatáni málek ent o shomará cha

* **4:3** 4:3 Asligén Yunáni nebeshtánka gwashit: “darkawmén”. † **4:17** 4:17 Kahól, bezán hánwár, hánwádah (yak lógeay nánwár). * **5:5** 5:5 Gorunák, bezán magrur. † **5:9** 5:9 “Brátay” máná har báwarmand ent, mardén o janén.

Masihay ráhá dém pa hamá abadmánén shawkatá gwánki jatag, shomay kammén sakki o sóriay saggagá rand, shomará nóksará twána dant, mohr o mohkama kant o páydári o zóra bakshit. ¹¹ Wák o kodrat abad tán abad hamáiyag ent. Anchosh bát. Ámin.

Goddhi habar

¹² É gwandhén kágadon gón Silwánusay[‡] komaká nebeshtag, ke áia wapádárén braté zánán, tánke shomará delbaddhi bedayán o gwáhi bedayán ke Hodáay rahmatáni hakkén ráh hamesh ent. Hamé ráhá mohr bóshtét. ¹³ Cha hamá bánokén goháray némagá shomá sajjahénán drud o drahbát sar bát ke Bábelay shahrá ent[§] o gón shomá hór gechén kanag butag. Cha mani chokk, Markásay némagá ham shomará drud o drahbát berasát.

¹⁴ Gón pormehrén chokkagán yakdegará drahbát begwashét.

Shomá sajjahénán sohl o émeni sar bát ke Masihay arwáh o jabiná ét.

[‡] 5:12 5:12 Silwánus hamá Silás ent ke Kásedáni Káray ketábá ham áiy nám geraga bit. shahray bánokén gohár, Bábelay shahray kelisá yá Rumay shahray kelisá buta kant.

§ 5:13 5:13 Bábelay

Petrosay Domi Kágad

Drud

¹ Cha Issá Masihay hezmatkár o kásed, Shamun Petrosay némagá, pa hamáyán ke cha may Hodá o rakkénók Issá Masihay páki o nékiá, hamá paymén bébahéen báwaré rasetagesh ke márá rasetag.

² Shomá ke Hodá o may Hodáwand Issáyá pajjáha kárét, cha áiy zánagá shomay sará rahmat o sohl o ásudagi gész o géshter bát.

Báwarmandi zend

³ Áiá gón wati Hodái wák o kodratá, márá har zalurién chizz pa anchén zendéa dátag ke Hodáyá pasond ent. É chizz márá cha hamáiy pajjáha áragá rasetag ke gón wati néki o shán o shawkatá márá gwánki jatag. ⁴ Hamé paymá, máshomará cha é chizzán wati bébahá o sakkén mazanén kawl o wádahi dátag tán gón Hodái zátá sharikdár bebét o cha hamá tabáhiá berakkét ke donyáyá hastent o sellén wáhagáni bar o samar ent.

⁵ Paméshká wati wasá johd bekanét ke gón sharkerdí wati báwará mohr o mohkam bekanét o hamé paymá: gón zántá wati sharkerdí, ⁶ gón shehm o rahdáriá wati zántá, gón sabr o ópárá wati shehm o rahdáriá, gón Hodádóstiá wati sabr o ópárá, ⁷ gón á dega báwarmandáni dóst dárágá wati Hodádóstiá mohr bekanét o gón sajjahén mardománi dóst dárágá pa báwarmandán wati mehrá mohkam bekanét. ⁸ Parchá ke agan shomay nyámá hamé chizz bebant o berodant, gorhá cha may Hodáwand Issá Masihay zánag o pajjáha áragá béasar o bésamara nabét. ⁹ Bale agan kaséa é sharri mabant, allamá kamdid o kóré o shamoshtagi ke cha wati pésarigén gonáhán pák butag.

¹⁰ Oo mani brátán!* Paméshká wati sajjahén johdá bekanét ke é gwánk janag o gechén bayagay tahá mohr bóshtét, chiá ke agan chosh bekanét, hechbar thagala nawarét. ¹¹ Gorhá pa shamá may Hodáwand o rakkénókén Issá Masihay abadmánén bádsháhiay darwázag, pa delpachén washátkié pacha bit.

¹² Paméshká man harwahd shomará é habaráni tahtál o hayálá perrénán, bell toré shomá é habarán wata zánét o é rástiy sará mohr óshtátagét ke shomará

rasetag. ¹³ Tánke man wati jesm o jánay é tambuá† án, mani hayálá sharter hamesh ent ke é chizzán shomay yátá byárán o tahtál bedayán, ¹⁴ chiá ke zánán kammén wahdéa rand é tambuá roksata kanán. Hodáwandén Issá Masihá maná cha é habará sahig kortag. ¹⁵ Wati wasá johda kanán ke mani marká rand ham, har wahdá é chizzáni hayálá bekapét.

Chamdístén sháhedi

¹⁶ Wahdé má Hodáwandén Issá Masihay zór o kodrat o áiy per tarragay bárawá habar kort, pa cháláki jórth kortagén kessaháni randgiriá naatén, má gón wati jenday chammán áiy shán o shawkat distagat, ¹⁷ á wahdá ke Hodáén Petá Issá shán o sharap dát. Porshawkatén tawaré pa Issáyá átk o gwashti: “É mani dóstén bacch ent, man cha eshiá báz wassh o razá án.” ¹⁸ É tawár ke cha ásmáná átk, má hamá wahdá wat eshкот ke gón áiá pákén kóhay sará atén.

¹⁹ Anchosh márá nabíáni pakkáén habar ham hastant, sakk sharr ent ke esháni némagá delgósh bekanét, cheragéay paymá ant ke taháriá drapshít, tán hamá wahdá ke róch bebít o bámay estár shomay deláni tahá sar bekasshit. ²⁰ Masterén habar esh ent ke bezánét Pákén Ketábay hech péshgói, nabíáni jenday máná kortagén naent ²¹ chiá ke péshgói cha Ensánay érاده o wáhagá dhann ent, Pákén Ruh mardománi delá neshtag tán cha Hodáay némagá habar bekanant.

2

Drógén nabi o áyáni sezá

¹ Bale mardománi nyámá drógén nabi ham hastat, hamá dába ke shomay nyámá drógén ostád wadia bant ke cherándari bérán kanókén báwarán rawája dayant, tantaná wati Hodáwandá ham namanant ke ái gón wati hóná bahá zortant. Á gón tézén gár o bégwáhiéa dochára kapant. ² Bázéné esháni badkáriáni randgiriá kant o rástiy ráh, é ostádáni sawabá kalág gerag o béhormat kanaga bit. ³ É ostád, wati tamah o jópaháni háterá gón habaráni chál o prébá shomára polant. Bázén wahdé bit ke áyáni sará mayárbáriay shawr borrag butag. É shawr purah kanaga bit o áyáni tabáhi wábé naent.

⁴ Hodá tantaná cha hamá préshtagán sar nagwast ke gonáhesh kort. Tahtarunay* tahárterén tahárokiá band

* **1:10** 1:10 “Brátán” maná har báwarmand ent, mardén o janén. † **1:13** 1:13 Tambu, bezán haymah. * **2:4** 2:4 Tahtarun, bezán jahannam, dózah. † **2:4** 2:4 Dádrasi, bezán hakkén paysalah, hamá shawr ke cha dádgáhána kayt, dáwari.

o zamzili kortant tán dádrasiay[†] róch berasit. ⁵ Cha kwahnén jaháná ham sar nagwast o Hodánábáwaráni donyáay sará tuppáni áwort o tahná Nuh ke rásti o pahrézkáriay jár janók at, gón hapt kasá rakkénti. ⁶ Hodáay, Sodom o Gomurahay shahr ham sótk o por kort o cha zeminay sará gár kortant, tán pa Hodánábáwarán dars o ebraté bebant o ⁷ pahrézkárén Lut ke cha násharén mardománi selli o badkárián sakk delranj at, rakkénti ⁸ (parchá ke á nek o pahrézkárén mardá hamáyáni nyámá zenda gwázént o Lutay pahrézkárén ruh, har róch cha á násharén kárán sakk padarda but ke Lut gendag o eshkonagá atesh). ⁹ Gorrhá hamé paymá Hodáwanda zánt ke wati pahrézkárén mardomán chón cha chakkásán berakkénit o badkárán sezá bedant tán hamá wahdá ke dádrasiay róch berasit. ¹⁰ Hodáay kahr o sezá hás hamá mardománi sará kapit ke wati jesmay maháresh sell o nápákén wáhagáni tahá yalah kortag o hech wák o kodratá namannant o mána nayárant. Haminchok tamard o porkebr ant ke cha ásmáni zórmandáni sobakk kanagá torsesh nést. ¹¹ Bale préshtag ke cha é zórmandán zórakter ant, angat Hodáwanday bárgáhá eshán sobakk o béezzata nakanant.

¹² É mardom násarpad o bézobánén jánwaráni paymá ant. Hamá kárána kanant ke áyáni saresha[‡] gwashit o tahná pa gerag o koshagá pédá butagant. Hamá káráni sará maskará o rishkanda kanant ke sarpadesha nabant o jánwaráni paymá gár o bégwáha bant. ¹³ Wati gandahén káráni sezá o padmozzesha rasit. Áyáni shádehi hamesh ent ke róchay rozhnáíá mast o hanósh bebant. Gón shomá hór warák waragay wahdá, á wati aysh o nósháni tahá gark ant o é pa shomá bannámi o pólongé bit. ¹⁴ Gón nápák o zenahkárén chammán, hechbar cha gonáhá séra nabant o sost o nezórén mardomán pa mandr o repk wati dámá perrénant. É mardom tamah o lálechá balad o zántkár ant, nálat butagén ant. ¹⁵ Cha rástén ráhá dar shotag o cha Bahuray chokk Balyámay ráhay randgiriá gomráh butagant ke wati sellén káray mozzi dóst at. ¹⁶ Bale Balyám wati gonáhay sará sarzanesh kanag but. Áiy bézobánén har, ensáméay paymá habará lagget o á nabii cha ganókiá dásht.

¹⁷ É paymén mardom hoshetagén cham-mag o anchén báp o horm ant ke tuppán áyán har némagá bárt. Tahárterén

tahároki áyáni ásar o ákebat ent. ¹⁸ É, batháka janant o habaresh puch o hálig ant. Hamá mardomán gón jesmi badén wáhagán préba dayant o wati dámá perrénant ke nóki cha radkáráni dastá rakketagant. ¹⁹ Áyán ázátiay kawl o wádaha dayant bale wat selkáriay golám o bandig ant. Chiá ke harkas chizzéá wati wájah o mastera kant, wat áiy golám o bandiga bit. ²⁰ Hamá mardom ke gón may Hodáwand o rakkénók Issá Masihay zánag o pajjárágá cha é donyáay selkáriána rakkant, agan padá hamá selkáriáni tóka bekapant, randi hálesh cha pésarigéná ham gantera bit. ²¹ É mardomán, agan cha páki o pahrézkáriay ráhá hech mazántén, pa áyán gehter at cha eshiá ke zánagá o rand, cha é pákén hokmá bebajjant ke áyáni sepordah kanag butag. ²² É batal áyáni bárawá chón wassha gwashit ke:

“Kochek pa wati shántagénán pera tar-rit.” §

o

“Shoshtagén hukk padá pujgeláni tahá létha wárt.”*

3

Hodáwanday róch

¹ Oo dordánagán! É nun domi kágad ent ke pa shomá nebisagá áni. Har doén kágadon pa é sawabá nebeshtant tán shomay delá sharrén pegr o hayáláni hobb o wáhagá pédá bekanán o shomará tahtál bedayán ² hamá habarán wati yátá byárét ke gwastagén zamánagán péshigén pák o palgártagén nabíán gwashtagant, anchosh ham may Hodáwand o rakkénókay hokmá shomay hayalá byáran ke áiy kásedán shomará dátag.

³ Cha har chizzá pésar bezánét ke áheri zamánagán, maskará o rishkand kanóké mardom jáha janant ke wati sell o badén wáhagáni randgir ant. ⁴ Gwashant: *“Gorrhá áiy áyagay wádah chón but? Cha hamá wahdá ke may pet o pirén mortagant, har chizz hamá paymá ent ke cha jáhánay jórh bayagay wahdá butag.”*

⁵ É paymá pa zánt, wati chammán cha é rástiá banda kanant ke ásmán, Hodáay hokmay sará cha dérigén wahdán hastat o é zemin, cha ápá o ápay ráhá jórh butag o ⁶ cha hamé ápá á zamánagay donyá boddhet o gár o bégwáh but. ⁷ Cha hamá hokm o habará ham sajjahén ásmán o é zemin, pa ásá gechén kanag butag o tán dádrasiay róch o nábáwarén mardománi tabáhi o zawál bayagá dárag butagant.

‡ 2:12 2:12 Saresht, bezán báten, fetrat, jawhar.

§ 2:22 2:22 Solaymánay Bataláni Ketáb 26:11.

* 2:22 2:22

Pujgel, bezán puglich, pussetagén gel.

⁸ Bale, oo dordánagán! Cha é habará béhayál mabét ke pa Hodáwandá yak róché, hazár sálay paymá ent o hazár sál, yak róchéay paymá. ⁹ Lahtén mardom gomána kant o gwashit ke Hodáwandá wati per tarrag o áyagay kawl o wádah mahtal dáshtag, bale chosh naent. Rástén habar esh ent ke Hodáwand gón shomá sabr o ópára kant, wahd o móha dant tán gonahkár pashómán bebant, chiá ke nalóthit kassé gár o bégwáh bebit. ¹⁰ Bale Hodáwanday róch allamá kayt. Chosh ke dozzé anágata kayt o sajjahénán jáha serrénit. Á róchá ásmán gón torsnákén tawár o bustagé gár o bégwáha bit, estár o máh o róch o harché ke ásmáná hast, ásá kapit o ápa bit o zemin o harché ke zeminá hast sochit o pora bit.

¹¹ Nun ke zánét harché may chágerdá hast gár o zawál bayagi ent, gorhá báyard ent shomay zend pák o palgár bebit o pa Hodádósti begwazit. ¹² Hodáay róchay entezár o wadará ham bebét o johd bekanét ke á róch zutter berasit, hamá róch ke ásmána sochit o ápa bit o estár o máh o róch o harché ke ásmáná hast ásá kapant o ápa bant. ¹³ Bale má nókén ásmán o zeminay entezár o wadará én ke áyáni tahá adl o rásti hákema bit. Chiá ke é Hodáay labz o wádah ent.

Goddhi habar

¹⁴ Oo dordánagán! Nun ke é chizzáni wadará ét, johd kanét á shomará pák o béayb o gón wat pa sohl o árámia wadi bekant o begendit. ¹⁵ É habará ham mashamóshét ke may Hodáwanday sabr o ópáray maksad rakkénag ent, anchosh ke may dordánagén brát Pulosá gón Hodábakshetagen hekmaté pa shomá nebeshtag. ¹⁶ Wati sajjahén kágadáni tahá hamé bárawá nebisit. Á kágadáni lahtén habaráni zánag o dar barag grán ent o násarpad o nezóren mardom á nebeshtahán wati tabá chahra dayant o pa radi máná kanant, bale é mardom wat zawála bant. Gón Pákén Ketábay á dega nebeshtahán ham hamé kára kanant.

¹⁷ Paméshká, oo dordánagán! Nun ke shomá é sajjahén chizzán cha pésará zánét, pahréz kanét tán radkár o násharén mardom shomará wati gomráhiay némagá mabarant o shomá wati mohr o mohkamén zendá mabáhénét. ¹⁸ Gón may Hodáwand o rakkénók Issá Masihay rahmat o zántá, rost o rodóm gerán bebét. Shán o shawkat annun tán abad, hamáiyag ent. Anchosh bát. Ámin.

Yuhannáay Awali Kágad

Zendmánay gál

¹ Hamá ke cha azal hastat, hamá ke má eshкотag, gón wati chammán distag, hamá ke má cháretag o dast per kortag, á zendmánay gál ent. ² Zend záher o paddar but, má distag o pa áia gwáhia dayén. Má pa shomá hamá namiránén zenday járá janén ke gón Petá at o pa má paddar but. ³ Á chizz ke má distag o eshкотag shomára gwashén tánke gón má hamdel o hamsetk bebét. May hamdeli o hamsetki, gón Pet o áiy Chokk, Issá Masihá ent. ⁴ Má eshiá pa shomá nebisén tánke mayshomay shádmáni purah o sarjam bebit.

Rozhnáia gám janag

⁵ Á kolaw o paygám ke má cha áia eshкотag o pa shomá jára janén, esh ent: Hodá nur o rozhn ent o áiy arwáh o jabiná hech tahári nést. ⁶ Agan begwashén gón áia hamdel o hamráh én o padá ham taháriá gám janagá én, gorhá dróga bandén o rástiy sará kár nakanagá én. ⁷ Bale agan rozhnáia rawagá én, hamá paymá ke á rozhnáia ent, gorhá watmánwatá hamdel o hamsetk én o áiy Chokk, Issáay hón mára cha sajjahén gonáh o mayarán pák o palgára kant. ⁸ Agan begwashén bégonáh o bémayár én, watá rada dayén o rástia may delá jágh nést. ⁹ Bale agan wati gonáhán bemannén, á ke wapádár o ádel ent may gonáhána bakshit o may sajjahén nápahréziána shódit. ¹⁰ Agan begwashén gonáhen nakortag, áia drógbanda kanén o áiy habarán may delá jágh nést.

2

Issá may démpán ent

¹ Oo mani dordánagén chokkán! É chizzán pa shomá nebisán tán gonáh makanét, bale agan kaséá gonáhé kort, démpané* hast ke Petay kerrá pa may rakkénagá habara kant, hamá pák o ádelén Issá Masih. ² Á may gonáháni shódókén korbánig ent, tahná may na, sajjahén jahánay gonáháni korbánig ent.

Parmánbardáriay arzesh

³ Agan má áiy hokm o parmánáni sará kár bekanén, gorhá sarpada bén ke má áia zánén. ⁴ Kasé ke gwashit: “Man áia zánán” bale áiy hokmáni sará kára nakant, drógbandé o áiy delá rásti nést. ⁵ Bale kasé ke áiy habaráni sará kára kant, pa rásti, Hodáay mehr áiy delá

kámel o sarréch butag. Cha hamé chizzá zánén ke má Issá Masihay arwáh o jabiná én. ⁶ Kasé ke gwashit: “Man áiy arwáh o jabiná án,” báyard ent hamáiy ráhá berawt.

⁷ Oo dordánagán! É nókén hokmé naent ke pa shomá nebisagá án, hamá kwahnén hokm ent ke cha bendátá shomará gón at. É kwahnén hokm hamá gál o habar ent ke shomá eshкотag. ⁸ Bale padá ham pa shomá nókén hokmé nebisagá án ke eshiay rásti, cha shomá o áia paddara bit. Chiá ke tahároki gára bit o rástén rozhn hamé annun ham drapshagá ent. ⁹ Kasé ke gwashit: “Rozhnáiy tóká án,” bale cha brátá[†] naprata kant, angat tahárokiá ent. ¹⁰ Kasé ke gón wati brátá mehra kant, rozhnáia ent o rozhnáiy tahá hech choshén chizzé nést ke áiy rad kapag o thagal waragay sawabsáz bebit. ¹¹ Bale á kas ke cha brátá naprata kant, taháriá ent o mán tahárokiá gáma jant. Á nazánt kojá rawagá ent chiá ke taháriá kór kortag.

¹² Oo dordánagén chokkán! Pa shomá nebisagá án chiá ke hamáiy námay sará shomay gonáh bakshag butagant.

¹³ Oo wájahén petán! Pa shomá nebisagá án chiá ke shomá áia zánét, hamá ke cha azalá ent.

Oo warnáyán! Pa shomá nebisagá án, chiá ke shomá Shaytánay sará báládest butagét.

¹⁴ Oo chokkán! Pa shomá nebisagá án, chiá ke shomá Petá zánét.

Oo wájahén petán! Pa shomá nebisagá án, chiá ke shomá hamáia zánét ke cha azalá ent.

Oo warnáyán! Pa shomá nebisagá án, chiá ke twáná o tamard ét o Hodáay habar shomay delá ent o shomá Shaytán prósh dátag.

Donyáya dóst madárét

¹⁵ Donyá o har chizzé ke áiy tahá hast, dóstesh madárét. Agan kasé donyáya dóst bedárit, Petay mehr áiy delá nést. ¹⁶ Chiá ke donyáay sajjahén chizz, bezán jesmay lóth o wáhag, chammay lóth o wáhag o málay kebr o gorur, cha Petá nayátkagant, cha donyáya átkagant. ¹⁷ Donyá o donyái wáhag, gár o zawála bant, bale kasé ke Hodáay wáhagáni sará kára kant, abadmán ent.

Masihay dozhmen

¹⁸ Oo chokkán! Nun goddhi damán o sáhat ent. Hamá dábá ke shomá eshкотag, “Masihay dozhmen” pédák ent, hamé annun ham Masihay bázén dozhmené átkag

* 2:1 2:1 Démpán, bezán kasé ke pa taw habara kant. Arabi o Pársia “modáfe”. † 2:9 2:9 “Brátay” máná har báwarmand ent, mardén o janén.

o cha hameshiá zánén ke sáhat, goddhi sáhat ent. ¹⁹ Á cha má dar átkant, bale chónáhá cha má naatant, agan cha má buténant, gón má mantant. Bale áyáni rawagá sharr pésh dásht cha áyán yakké ham cha má naat.

²⁰ Bale “á Pákéná” shomará “rógen per moshtag”[‡] o shomá sajjahén chizzána zánét. ²¹ Man pa shomá nebisagá án, pa é sawabá na ke rástíá nazánét, rástíá zánét o sarkecha warét ke cha rástíá hech drógé wadia nabit. ²² Drógband kay ent? Hamá ent ke namannit Issá, Masih ent. Hamá kas ke Pet o Chokká namannit, Masihay dozhen ent. ²³ Harkas ke Chokká namannit, Pet ham áiyaga nabit. Harkas ke Chokká mannit, Pet ham áiyaga bit. ²⁴ Bellét harché ke shomá cha bendatá eshкотag shomay delá bemánit. Agan é habar ke shomá cha bendatá eshкотag shomay delá bemánit, gorhá Pet o Chokkay arwáh o jabiná mánét. ²⁵ É hamá chizz ent ke hamáia mára labz o wádah dáttag, bezán namiránén zend.

Shomá Hodáay dar chetagen ét

²⁶ Man pa shomá é chizz hamáyáni bárawá nebeshtagant ke shomará gomráh kanaga lóthant. ²⁷ Bale shomá cha áiy némagá “rógen per moshag” butagét o é “per moshag” shomay delá mánit. Shomará zalurat nést kasé shomará dars o sabak bedant, chiá ke cha Hodáay némagá, “rógen per moshag” wat shomará sajjahén chizzán sabaka dant. É “rógen per moshag” rást ent o drógéné naent. Hamá paymá Hodáay arwáh o jabiná bemánét ke shomará tálimi dáttag.

²⁸ Nun, oo mani dordánagen chokkán! Áiy arwáh o jabiná bemánét tánke áiy záher bayagay wahdá, may del dhaddh bebit o áiy demá sharmendag mabén. ²⁹ Agan zánét ke á rást o pák ent, gorhá zánét harkas ke rástíay ráhá rawt cha hamáia pédá butag.

3

Hodáay chokk

¹ Bechárét ke Petá chónén mehré mára bakshetag ke Hodáay chokk zánag bebén o bésakk má Hodáay chokk én. Donyá mára nazánt o pajjáha nayárit chiá ke donyáyá á ham pajjáha nayáwort. ² Oo dordánagan! Annun má Hodáay chokk én, bale angat zánag nabutag ke má ché jórh bayagi én, haminchoka zánén, wahdé á záhera bit má ham hamáiy dhawlá bén, parchá ke á wahdi má áia hamá

paymá gendén ke á hast. ³ Harkasá cha áia choshén omété hast watá páka kant, anchosh ke á wat pák ent. ⁴ Harkas ke gonáha kant, Sharyatay helápá kára kant, chiá ke gonáh, náshari* ent. ⁵ Shomá zánét, á paddar but tán gonánah gár o bégwáh bekané, áia hech gonáh nést. ⁶ Á kas ke áiy arwáh o jabiná mánit, gonáha nakant. Harkas ke gonáha kant Issái nadistag o nazántagi.

⁷ Oo chokkán! Bechárét kasé shomará gomráh makant. Harkas rástíay ráhá rawt, rástén mardomé, anchosh ke á, pák o rást ent. ⁸ Á ke gonáha kant Shaytánay chokk ent parchá ke Shaytán cha bongejá gonáh kanán ent. Hodáay Chokk paméshká paddar but ke Shaytánay káran bepróshit o zawál bekané. ⁹ Á ke cha Hodáyá pédá butag gonáha nakant, parchá ke Hodáay zát áia mán ent. Gorhá á gonáh korta nakant, chiá ke cha Hodáyá pédá butag. ¹⁰ Hodáay chokk o Shaytánay chokk, hamé paymá zánag o pajjáh áraga bant, á kas ke rástíay ráhá narawt, Hodáay chokk naent o anchosh á kas ham ke gón wati brátá mehra nakant.

Gón yakdomiá mehr

¹¹ Á kolaw o paygám ke shomá cha bongejá eshкот, hamesh ent ke báyd ent yakdomiá dóst bedárén. ¹² Káenay† dhawlá mabén ke Shaytánay chokk at o wati bráti kosht. Nun chiá á koshti? Pa é sawabá ke áiy jenday kár o kerd sell o shaytáni atant o brátay kár nék o Hodái atant.

¹³ Oo brátán! Cha é habará hayrat makanét ke donyá gón shomá naprata kant. ¹⁴ Má zánén ke cha marká gwastag o pa zendmáná rasetagen, chiá ke gón wati brátán mehra kanén. Harkas ke mehra nakant, markay sáhegá mánit. ¹⁵ Kasé ke cha brátá bézara bit o naprata kant hónigé. Shomá zánét, hónigén mardomé hechbar namiránén zenday wáhonda nabit. ¹⁶ Má mehr é paymá pajjáh áwort ke Masihá wati ján pa maygi nadr kort, tánke má ham wati jáná pa brátán nadr bekanén. ¹⁷ Agan kaséá donyái mál o melkaté bebit o bratéá mohtáj begendit bale pa áia bazzagi mabit, gorhá Hodáay mehr che paymá choshén mardoméay delá jágaha kant?

¹⁸ Oo dordánagen chokkán! Byáét mehr kanén, bale na pa dap o habar, pa del o setk o gón kár o kerd. ¹⁹⁻²⁰ Cha hamé kára zánén ke má, gón hakk o rástíá hamband o paywast én o agan may del mára mayárbár ham bekané, angat

‡ 2:20 2:20 Rógen per moshag, bezán pa káréa gechén kanag o wák o twán dayag.

*

3:4 3:4 Náshari, bezán Sharyatay kánun o rahbandáni próshag.

† 3:12 3:12 Káen hamá Kábil ent ke wati bráti kosht.

Hodáay déma mohr o deljama bén, chiá ke Hodá cha may del o hayálán master ent o har chizzá zánt.

²¹ Oo dordánagán! Agan may del o jabin mára mayárbár makant, gorhá Hodáay gwará ásudag o deldhaddh én. ²² Á wahdi harché cha áia belóthén mára rasit, chiá ke áia hokm o parmánána zurén o pa hamáia washnódiá kára kanén. ²³ Áia hokm hamesh ent ke áia Chokk Issá Masihay námay sará báwarmand bebén o watmánwatá mehr bekanén, hamá paymá ke mára hokmi kortag. ²⁴ Harkas ke Hodáay hokmáni sará kára kant, áia arwáh o jabiná mánit o Hodá ham á mardomay delá jágaha kant. Wati Ruhi mára bakshetag o é paymá zánén ke á may delá mánit.

4

Ruhán bechakkásét

¹ Oo dordánagán! Har ruhéay sará báwar makanét, ruhán ázmáesh kanét o bechakkásét ke baren cha Hodáay némagá ant yá na? Chiá ke bázén drógén nabí donyáay chárén kondhán potertag. ² Hodáay Ruhá é dhawlá zánét: har hamá Ruh cha Hodáay némagá ent ke báwara kant o mannit ke Issá Masih, ensáni rang o dróshomá ér átkag. ³ Bale har ruhé ke Issáy namannit, á cha Hodáay némagá naent o Masihay hamá dozhmenay ruh ent. Shomá eshkotag ke á ruha kayt o hamé annun ham donyáyá ent.

⁴ Oo dordánagén chokkán! Shomá cha Hodáyá ét o áyáni sará báládest butagét, chiá ke á ke shomay delá ent cha áia master ent ke donyáyá ent. ⁵ Á donyáayg ant, paméshká harché ke gwashant ham donyái ent o donyáay gósh áyáni némagá ent. ⁶ Má cha Hodáyá én o kasé ke Hodáyá zánt, áia delgósh may némagá ent, bale á ke cha Hodáyá naent, áia delgósh may némagá naent. Rástiay Ruh o gomráhiay ruhá hamé dhawlá zánén o pajjáha káren.

Hodái mehr

⁷ Oo dordánagán! Gón yakdomiá mehr bekanén, chiá ke mehr cha Hodáyá ent o harkas ke mehra kant, cha Hodáyá pédá butag o Hodáyá zánt. ⁸ Á ke mehra nakant Hodái nazántag, chiá ke Hodá mehr ent. ⁹ Hodáay mehr é dhawlá may nyámá paddar but ke wati yakk o yakdánagén chokki é jaháná rawán dát tánke cha áia némagá zendmánay wáhond bebén. ¹⁰ Má gón Hodáyá mehr nakortag, mehr hamesh ent ke áia kortag o wati Chokki dém dátag tán pa may gonáháni shodagá korbánig kanag bebit. ¹¹ Oo dordánagán! Agan

Hodáyá é dhawlá gón má mehr kortag, má ham báyard ent yakdomiá dóst bedárén. ¹² Kassá hechbar Hodá nadistag, bale agan yakdegará mehr bekanén, Hodá may delá mánit o áia mehr may delá kámel o sarréch butag.

¹³ Áia mára cha wati Ruhá bahré dátag. Cha hamedá zánén ke má áia arwáh o jabiná mánén o á may delá. ¹⁴ Má distag o gwáhia dayén ke Petá wati chokk rawán dátag tán jahánay rakkénók bebit. ¹⁵ Á ke mannit Issá Hodáay chokk ent, Hodá áia delá jágaha kant o á Hodáay arwáh o jabiná. ¹⁶ Má hamá mehr zántag o áia sará báwar kortag ke Hodáyá mára dátag. Hodá mehr ent o harkas ke wati zendá pa mehr begwázénit, Hodáay arwáh o jabiná mánit o Hodá áia delá. ¹⁷ Mehr may nyámá hamé dhawlá kámel o sarréch butag ke jost o porsay róchá deldhaddh bebén. Chiá ke má é donyáyá hamáiaay* dhawlá én. ¹⁸ Mehray tahá tors nést. Sarréchéen mehr, torsá gára dant. Chiá ke tors cha sezáay hayála kayt o kasé ke torsit cha mehrá sarréch nabutag. ¹⁹ Má mehra kanén chiá ke pésará áia gón má mehr kortag. ²⁰ Kasé ke gwashit: “Maná Hodá dóst ent” o cha wati brátá naprata kant, drógbandé, parchá ke wati brátá gendit o dóstia nadárit, gorhá Hodáyá ke nagendit che paymá dósti dáshta kant? ²¹ Má é hokm cha hamáia gteptag ke gwashit: “Harkas ke gón Hodáyá mehra kant, báyard ent gón wati brátá ham mehr bekant.”

5

Hodáay Chokkay sará báwar

¹ Harkasá é báwarmandi bebit ke Issá hamá Masih ent, á cha Hodáyá pédá butag. Harkasá ke Pet dóst ent, Chokká ham dósta dárit. ² Wahdé gón Hodáyá mehra kanén o áia hokmán kára bandén, zánén ke Hodáay chokkán mehra kanén. ³ Hodádósti hamesh ent ke Hodáay hokmán kár bebandén o áia hokm gránén béré ham naent. ⁴ Chiá ke harché cha Hodáyá pédá butag, donyáay sará báládest o sóbena* bit o may báwar o imán hamé báládesti ent ke donyáyá érdasta kant. ⁵ Abéd cha á kasá ke báwara kant Issá Hodáay Chokk ent, dega kay donyáyá érdast korta kant?

⁶ É hamá ent ke cha áp o hóná átkag, bezán Issá Masih, tahná cha ápá na, cha áp o hóná. É Ruh ent ke gwáhia dant, chiá ke Ruh rásti ent. ⁷ Parchá ke say gwáh o sháhed hast: ⁸ Ruh, áp o hón. É har sayén hamshawr ant. ⁹ Agan má ensánay gwáhia

* 4:17 4:17 Hamáiaay, bezán Issá Masihay.

* 5:4 5:4 Sóbén, bezán péróz, kámyáb.

mannén, gorhá Hodáay gwáhi báz master ent, chiá ke Hodáay gwáhi hamá ent ke wati Chokkay bárawá dátagi. ¹⁰ Harkas ke Hodáay Chokkay sará báwara kant, áia é gwáhi wat gón ent, bale á ke Hodáay sará báwara nakant, Hodái drógband kortag, chiá ke Hodáay gwáhi dayagi pa Chokká báwar nakortag. ¹¹ Á gwáhi esh ent ke Hodáyá mára namiránén zend bakshetag o é zend cha Hodáay Chokkay némagá ent. ¹² Hamá kas zenday wáhond ent ke gón Hodáay Chokká gón ent o á ke gón Chokká gón naent, zenday wáhond naent.

Goddhi habar

¹³ É chizzon pa shomá nebeshtant ke shomará Hodáay Chokkay námay sará báwar ent, tán bezánét ke namiránén zenday wáhond ét. ¹⁴ Cha áia mára é deldhaddhi rasetag, harché ke áiy lóth o wáhayay sará belóthén, á eshkont. ¹⁵ Nun agan zánén harché cha áia belóthén mára eshkont, gorhá deljam én ke may lóth o wáhay sarjam butagant.

¹⁶ Agan kasé bráté begendit anchén gonáhé kanagá ent ke markay sawaba nabit, dwá bekant o Hodá áia zenda bakshit. Eshía hamá kasay bárawá gwashán ke gonáhi markay sawaba nabit. Gonáhé hastent ke markay sawaba bit, mana nagwashán ke kasé pa choshén gonáhéay bakshagá dwá bekant. ¹⁷ Har badén karé gonáh ent, bale anchén gonáhé ham hast ke markay sawaba nabit.

¹⁸ Má zánén harkas ke cha Hodáyá pédá butag, gonáha nakant, hamá ke cha Hodáyá pédá butag† Hodá wat áiy negahpánia kant o Shaytánay dast pa áia narasit. ¹⁹ Má zánén ke Hodáay chokk én o sajjahén donyá‡ Shaytánay zór o wákay chérá ent. ²⁰ É chizzá ham zánén ke Hodáay Chokk átkag o mára é póh o zánti dátag ke á “Rásténá” bezánén. Má hamá “Rásténay” arwáh o jabiná én, áiy Chokk Issá Masihay arwáh o jabiná. Rástén Hodá o namiránén zend, hamá ent.

²¹ Oo dordánagén chokkán! Watá cha botán§ dur bedárét o bepahrézét.

† 5:18 5:18 Bezán Issá Masih. ‡ 5:19 5:19 Donyáay máná edá hamá mardom ant ke Issá Masihay sará báwarmand naant. § 5:21 5:21 Bot tahná botén hodá naant, bot har chizz buta kant ke ensán Hodáay badalá áia parastesha kant.

Yuhannáay Domi Kágad

Drud

¹ Cha kelisáay kamáshay némagá,
pa gechén kortagén bánok o áiy
chokkán* ke pa del maná sakk dóst ant.
Tahná maná na, hamá sajjahénán ham
dóst ant ke rástíá zánant. ² Paméshká
mára dóst ant ke may delá rástíá jágah
kortag o tán abad gón má hamráh ent.
³ Hodái mehr o rahmat o sohl o ásudagi,
cha Petén Hodá o áiy Chokk Issá Masihay
némagá, pa rásti o mehr gón má góna bit.

Rásti o mehr

⁴ Gal o shádán bután wahdé zánton tai
lahtén chokk rástíay sará zenda gwázénit,
hamá dhawlá ke Petá márá hokm kortag.
⁵ Nun, oo bánok! Man nókén hokmé nebis-
agá naán, é hamá hokm ent ke cha bongéjá
mára gón butag, bale cha taw dazban-
dia kanán, máshomá gón yakdomiá mehr
bekanén. ⁶ Mehr hamesh ent ke áiy hokm
o parmánáni sará zend begwázénén. Áiy
hokm hamesh ent ke shomá cha bongéjá
eshkotag. Hamé mehray hokmay sará
zend begwázénét.

⁷ Chiá ke bázén rad dayóké donyáyá
potertag o tálán ent o é habará namannant
ke Issá Masih ensáni jesm o jánéá ér
átkag. É paymén mardom rad dayók o
Masihay dozhmen ant. ⁸ Hósh o sár bét
ke may† káray bar o samará barbád o
zawál makanét, sarréchéen mozzé pa wat
bekatthét. ⁹ Harkas ke Masihay tálimay
sará mohr maóshittit o watsará démáter
berawt, Hodá áiyag naent, bale harkas ke
Masihay tálimay sará mohr bóshttit, ham
Pet áiyag ent, ham Chokk. ¹⁰ Agan kasé
shomay gwará byayt o é tálimá mayárit,
áiá wati lógá maylét o wasshátki mag-
washét. ¹¹ Parchá ke é dhawlén mar-
doméay wasshátki kanag, gón áiy radén
karán sharikdár bayag ent.

Godhi habar

¹² Bázén chizzé hast ke pa taw
benebisán, bale nalóthán gón kalam o
kágadá bebant. Ométwár án ke shomay
kerrá byáyán o dém pa dém gapp o
trán bekanén tán mayshomay shádmáni
sarréchéen bebit. ¹³ Tai gechénién goháray
chokk‡ tará baddhé drud o drahbáta
gwashant.

* **1:1** 1:1 Bázén zántkáréay báwar esh ent ke “bánok” dega kelisáay gwashag butag o “bánokay chokk”, á kelisáay báwarmand ant. † **1:8** 1:8 Lahtén kwahnén syáhaga gwashit: “wati”. ‡ **1:13** 1:13 “Tai gechénién goháray chokk”, bezán Yuhannáay kelisáay báwarmand.

Yuhannáay Saymi Kágad

Drud

¹ Cha kelisáay kamáshay némagá pa dordánagén Gáyusá ke pa del maná sakk dóst ent.

² Oo dordánag! Dwá kanán ke tai sajjahén kár pa sharri démá berawant o tai jesm o ján ham, tai ruhay paymá dráh o salámat bebit. ³ Báz gal o shádán bután ke lahtén sangat átk o gwáhiesh dát ke taw rástiy wapádár ay, bezán wati zendá rástiy sará gwázenagá ay. ⁴ Hech chizz maná cha eshiá géshter shádána nakant ke beshkonán mani chokk rástiy sará zenda gwázénant.

Brátáni madat kanag

⁵ Oo dordánag! Taw brátáni* sajjahén kárán gón wapádáriá kanay, toré á bégánag bebant. ⁶ Áyán, báwarmandáni démá pa tai mehrá gwáhi dátag. É sakkén sharrén káré bit ke taw áyán hamá paymá sát o saparán rawán bekanay ke Hodáay razá ent. ⁷ Chiá ke á pa hamá námaygi† sar geptagant o cha nábáwarán‡ komaké nageptagesh. ⁸ Gorhá má báyad ent choshén mardomán madat bekanén, tán má pa rástiy démá baragá hamkár bebén.

⁹ Chizzé pa kelisáyá nebeshtagon, bale Diutripis ke masteriy lóthók ent, may ehtiárá namannit. ¹⁰ Wahdé wat byáyán, áiy káráni hesáb o ketábá kanán, chiá ke may helápá drógén bohtám sheng o tálán kanagá ent. Pa inchoká ham bassa nakant, brátán wasshátka nakant o á degarán ham ke brátán wasshátka kanaga lóthant pa é kára naylit o áyán cha kelisáyá dara kant o gallénit.

¹¹ Oo dordánag! Badiay randgiriá makan, nékiay randgiriá bekan. Harkas ke nékia kant cha Hodáay némagá ent, bale á ke badia kant Hodái nadis-tag. ¹² Sajjahénán, Dimitriusay bárawá sharrén gwáhi dátag, tantaná rástiy jendá ham. Má ham hamé dhawlá gwáhia dayén o wata zánay ke may gwáhi rást o barhakk ent.

Goddhi habar

¹³ Bázén chizzé hastat ke pa taw benebeshténán, bale nalóthán gón kalam o kágadá bebant. ¹⁴ Ométwár án ke pa hamé zuttán tará begendán o dém pa dém gapp o trán bekanén.

* 1:5 1:5 “Brátay” máná har báwarmand ent, mardén o janén. † 1:7 1:7 Bezán Issá Masihay nám. ‡ 1:7 1:7 Asligén Yunáni nebeshtánka gwashit: “cha darkawmán”.

¹⁵ Tará sohl o ásudagi sar bát! Dóst tará drud o drahbáta gwashant. Taw ham dóstán yak yakká pa nám, drud o drahbát sar kan.

Yahudáay Kágad

¹ Cha Ákubay brát, Issáay hezmatkár,* Yahudáay némagá,

pa hamá gwánk jatagénán ke Hodáén Petá dóst ant o pa Issá Masihaygi gón sharrén pahrézé dárag butagant. ² Shomay sará rahmat, sohl o ásudagi o mehr gésh o géshter bát.

Drógén ostádáni ásar o ákebat

³ Oo dordánagán! Wáhagdar atán pa shomá hamá rakkaay bárawá benebisán ke má sajjahén áiy sharikdár én. Bale man zalurat dist ke gón é chizzáni nebisagá, shomay delá shawk pédá bekanán tán pa hamá báwará johd bekanét ke yak randé palgártagénán† dayag butag o tán abad gón máshomá góna bit. ⁴ Chiá ke lahtén anchén mardom chérokái shomay nyamá potertag ke wati béhodáiy sawabá cha pésará mayárig kanag butagant. Á Hodáay rahmatán tába dayant o pa wati bénangén kár o wáhagán káresha bándant o may yak o yakdánagéen Wájah o Hodáwand, Issá Masihá namannant.

⁵ Shomá é sajjahén chizzán sarpad butagét o zánét, bale lóthán shomará tahtál perrénán ke Hodáwandá yak baré wati kawm cha Mesrá rakként, bale á ke bebáwar atant randterá gár o bégwáhi kortant. ⁶ Áiá hamá préshtag ham tán dádrasiay‡ mazanén róchá tahárokíá gón abadmánén zamzilán bastagant ke wati ehtiáray borz o bolandén kadresh nazánt o wati jágahesh yalah dát. ⁷ Hamé paymá, Sodum o Gomurah o kerr o gwaray shahráni mardom, ke hamáyáni dhawlá bénangiesh kort o nárahbandén wáhagáni randá kaptant, abadi ása dawr dayag butant tán pa degarán dars o ebrat bebant.

⁸ Anchosh, gón é sajjahén sargwastáni zánagá, hamá mardom ke wati wábáni tahá zendag ant, wati jesm o jáná palit o gandaha kanant, ehtiárá namannant o ásmáni zórmándán sobakk o béezzata kanant. ⁹ Tantaná mazanén préshtag Mikáilá, á wahdá ke Mussáay jónay bárawá gón Shaytáná yak o doi kort, é tahn o joryat néstat ke Shaytáná sobakk o mayárig bekant. Tahná gwashti: “Hodáwand tará sezá bedayát.” ¹⁰ Bale

é, hamá chizzáni sobakki o béhormatiá kanant ke áyáni bárawá heccha nazánant. É mardom násarpad o bézobánén jánwaráni paymá, wati sareshtay§ randá kaptant o é paymá gár o bégwáha bant.

¹¹ Bazhn o apsoz pa áyán! Chiá ke Káenay* ráhá rawant o wati suttáni padá Balyámay gomráhiá kaptant o Kórahay† sarkashiá bérana bant. ¹² É mardom, shomay pormehréen báwarmandi diwánán, wahdé pa béparwáhi gón shomá horigá waráka warant pa shomá bannámi o pólongé bant. É hamá shopánk ant ke tahná wati jenday pazzór kanagay randá ant. Hamá béhawréen jambar ant ke gwátesha bárt. Hamá dhokkáli‡ drachk ant ke bébar o bérisshag ant o do bar mortagant. ¹³ É zeray hamá mastén chawl o mawj ant ke wati sharmnákén káráni kap o gájján dara réchant. Hamá gesar o sargardánén estár ant ke tahárterén tahárokí áyáni abadi ásar o ákebat ent.

¹⁴ Hannuh ke Ádamay haptomi nasl o padréch at, esháni bárawá chosh péshgóia kant o gwashti: “Hodáwand gón wati lakkáni lakkén palgártagénána kayt, ¹⁵ tán sajjahénáni dadrasiá bekant o é béhodáén nábwáwan pa áyáni sajjahén gandahkarián o pa hamá sajjahén sellén habarán ke é bebáwarén gonahkárán áiy helápá gwashtagant, mayárig bekant.” ¹⁶ É mardom, gellahgozár, irázger o wati badkári o sellén wáhagáni boddhetagén ant, pa wat pahra bándant o pa wati nap o suttán gón cháplusi o charpzobáni mardomán satá kanant.

Báwaray sará mohr óshtag

¹⁷ Ji, oo dordánagán! Shomá may Hodáwand Issá Masihay kásedáni péshgóian wati yátá bedaré† ¹⁸ ke shomará gwashtesh: “Goddhi zamánagá, anchén rishkand kanók wadia bant o káyant ke wati béhodái o sell o badén wáhagáni randgir ant.” ¹⁹ É, donyái mardom ant, cha Hodáay Ruhá zebahr§ ant o jetái dawra dayant.

²⁰ Bale oo dordánagán! Shomá watá cha pák o béaybén imáná mohr o mohkam bekanét o gón Pákén Ruhay madatá dwá belóthét. ²¹ Watá Hodáay mehráni sáhegá bedaré† o may Hodáwandén Issá Masihay rahmatay entezár o wadará bebét ke shomará pa namiránén zendá sara kant.

* **1:1** 1:1 Asligén Yunáni nebeshtánka gwashti: “golám”. † **1:3** 1:3 “Palgártagén” hamá mardom ant ke gón Issá Masihay hóná cha wati gonáhán shódag o pák kanag butag o é dhawlá pa Hodáyá dar chenag butagant. ‡ **1:6** 1:6 Dádrasi, bezán hakkén paysalah, hamá shawr ke cha dádgáhána kayt, dáwari. § **1:10** 1:10 Saresht, bezán báten, fetrat, jawhar. * **1:11** 1:11 Káen hamá Kábil ent ke wati bráti kosht. † **1:11** 1:11 Kórah Mussáay zamánagay mardomé at. ‡ **1:12** 1:12 Asligén Yunáni nebeshtánka gwashti: “érahti”. § **1:19** 1:19 Zebahr, bezán bébahr.

²² Gón á lahténá ke dodel ant mehrabán bebét, ²³ lahténá cha ásá bekašshét o berakkénét o dega lahténá rahmat pésh bedárét bale gón tors o larz o cha áyáni jámagán ham naprat bekanét ke áyáni jesmá palit kortagant.

Satá o saná

²⁴ Hamáá, ke shomará cha thagal warag o kapagá mohr dáshta kant o béayb o gón mazanén shádmánié shomará wati porshawkatén dargáhá bort o sar korta kant, ²⁵ may yakk o yakdánagén Hodá o rakkénóká, cha may Hodáwand Issá Masihay wasilahá, cha azal, annun o tán abad shán o shawkat o wák o kodrat berasát! Anchosh bát. Ámin.

Yuhannáay elhámay ketáb

Péshlabz

¹ Issá Masihay hamá elhám ke Hodáay áiará dát tán wati hezmatkárán hamá chizzán pésh bedárit ke allam zutt bayagi atant. Áiá wati préshtagé pa wati hezmatkár Yuhannáyá rawán dát tán é elhám áshkár bebit. ² Yuhannáyá hamá chizzáni gwáhi dát ke distagatanti, bezán Hodáay habar o Issá Masihay sháhedi. ³ Bahtáwar hamá ent ke é péshgóiy labzán pa borztawária wánit o bahtáwar hamá ant ke é péshgóiy labzán gósha dárant o harché ke nebisag butag, wati delá dárantesh, chiá ke wahd nazzik ent.

Drahbát

⁴⁻⁶ Cha Yuhannáay némagá, pa Ásiáay* damagay haptén kelisáyán:

Cha hamáiy jenday némagá ke hastent, hast butag o áyagi ent, cha hamá haptén ruháni némagá ke áiy bádsháhi tahtay demá ant o cha wapádárén sháhéd Issá Masihay némagá shomárah rahmat o émeni sar bát. Issá Masih hamá awali ent ke cha mordagán zendag butag o donyáay bádsháháni hákem ent. Shán o shawkat o zór, abad tán abad hamáia sar bát ke mára dósta dárit o gón wati hóná mára cha gonáhán ázáti kortag o dini péshwá o bádsháhié jórhi kortag ke áiy Hodáén Petay hezmatá bekanén. Anchosh bát. Ámin.

⁷ Bechár, á gón jambarán pédák ent o hamok chamm áia gendít, hamá ham ke áiy jánesh thong thong kortag o zeminay sajjahén kawm hamáiy sawabá porsiga bant. Haw, anchosh bát. Ámin.

⁸ Hodáwandén Hodá gwashit: “Bendát man án o halási man án,† hamá ke hastent, hast butag o áyagi ent, porwák, á man án.”

Yuhannáay elhámay bendát

⁹ Man, Yuhanná, shomay brát án o hamá ázár, bádsháhi o sabr o ópára shomay hamráh án ke mára Issáay námay sawabá rasant. Man Hodáay habar o Issáay sháhediay sawabá Patmusay jazirahá atán. ¹⁰ Hodáwanday róchá‡ Hodáay Ruh mani delá potert o man eshкот ke poshtá

borzén tawaré but, gwashaygá karnáay§ tawaré at. ¹¹ Gwashti: “É chizzán ke taw genday, ketábéay tahá nebeshtahesh kan o pa haptén kelisáyán demesh day, pa Epesos, Samurná, Pergámum, Tyátirah, Sárdis, Piládelpiá o Lawdikiáay kelisáyán.” ¹² Man hamá tawaray némagá chakk jat ke gón man habará at. Man ke chakk tarrént, hapt teláhén cherágdánon dist o ¹³ cherágdánáni nyámá ensánay chokkéay dhawlén diston, drájén pashké gwará ati ke tán pádán at o sénagá teláhén patthié bastagati. ¹⁴ Sar o mudi chó pazhmá espét atant, chó barpá espét, o chammí chó ásay bránzá. ¹⁵ Pádi purah táptagén brenj atant ke ásay kurahéá* rók atant o tawári chó bázén ápáni tawará at. ¹⁶ Hapt estári rástén dastá at o cha áiy dapá dodapén tézén zahmé dar áyagá at. Démi gón wati sarjamén rozhná chó róchá drapshagá at. ¹⁷ Man ke dist, purah mordagé bután o áiy pádáni demá kaptán. Wati rástén dastí mani sará ér kort o gwashti: “Mators, man awali o áheri án. ¹⁸ Man zendagén án. Man mortagatán o bechár, nun zendag án, abad tán abad. Mark o mordagáni jahánay kelit maná gón ant. ¹⁹ Paméshká harché ke taw dist, harché ke annun bayagá ent o harché ke demterá bit, nebeshtahesh kan. ²⁰ Haptén estár ke taw mani rástén dastá distant, áyáni o haptén teláhén cherágdánáni ráz esh ent: haptén estár haptén kelisáyáni préshtag ant o haptén cherágdán haptén kelisá ant.”

2

Pa Epesosay kelisáyá

¹ Pa Epesosay kelisáaypréshtagá nebeshtah kan:

É habar hamáiyg ant ke haptén estári rástén dastá ant o haptén teláhén cherágdánáni nyámá gám janagá ent. Á chosha gwashit:

² Man tai kárána zánán, tai zahmatkasshi o sabr o ópára. Mana zánán ke taw badén mardomán saggeta nakanay, hamáyán ke watá kásed gwash-tag bale nabutagant, taw á mardom chakkásetagant o distag ke drógband ant. ³ Mohr óshátagay o gón sabr o óparé har chizzet pa mani námá saggetag o damet nabortag.

⁴ Bale maná gón taw yak gelagé hastent. Nun taw á paymá mehr kanagá naay ke bendátá kanagá atay. ⁵ Paméshká yát

* **1:4-6** 1:4-6 Á wahdá, Ásiáay máná annugén Torkiahay rónendi némag at. † **1:8** 1:8 Asligén nebeshtánká pa bendát o halásiá Yunáni zobánay awali o áheri ábáni nám gerag butag. ‡ **1:10** 1:10 Bezán Yakshambehay róchá.

§ **1:10** 1:10 Karná, bezán sornáay dhawlén sázé. * **1:15** 1:15 Kurah, bezán jágahé ke ásay tahá kunzag, mathh

o dega chizza pachant. * **2:5** 2:5 Pashómán bayag, bezán tawbah kanag.

kan ke cha kojá kaptagay. Pashómán* bay o hamá kárán bekan ke taw bendátá kortagant. Agan wati pashómániet záher nakort, man pa taw pédák án o tai cherágdáná cha áiy jágahá dura kanán. ⁶ Bale tará é sharri hastent ke taw ham cha Nikuláitáni kárán naprata kanay o man ham naprata kanán.

⁷ Harkasá ke gósh per, gósh bedárit ke Pákén Ruh gón kelisáyán ché gwashit. Hamá ke sóbena† bit, man áia cha zenday hamá drachká waragay hakká dayán ke Hodáay beheshtá ent.

Pa Samurnáay kelisáyá

⁸ Pa Samurnáay kelisáaypréshtagá nebeshtah kan:

É hamá awali o áheriay habar ant ke mortagat o padá zendag but. Á chosha gwashit:

⁹ Man tai ázár o nézgáriá sarpad án bale taw hastómand ay. Á koprána zánán ke hamá mardomán kortagant ke watá Yahudia gwashant bale Yahudi naant. Á Shaytánay kanisahé‡ ant. ¹⁰ Cha áyókén ázárán mators. Bechár, Shaytán cha shomá lahténá pa shomay chakkásagá zendáná kant o taw tán dah róchá ázár dayaga bay. Tán markay sáhatá wapádár bay o man tará zenday tájá dayán.

¹¹ Harkasá ke gósh per, gósh bedárit ke Pákén Ruh gón kelisáyán ché gwashit. Harkas ke sóbena bit, cha domi marká hech táwané nagendit.

Pa Pergámumay kelisáyá

¹² Pa Pergámumay kelisáaypréshtagá nebeshtah kan:

É hamáiy habar ant ke dodapén tézén zahmi gón ent. Á chosha gwashit:

¹³ Mana zánán taw kojá jahnenend ay, hamódá ke Shaytánay taht ent, bale taw mani nám mohr dáshtag. Taw mani wapádáren sháhed, Antipásay wahdá ham mani sará báwar kanagá enkár nakort, hamá Antipás ke shomay nyámá koshag but, hamódá ke Shaytán jahmenend ent.

¹⁴ Bale maná gón taw lahtén gelag hast. Tai Kerrá lahtén mardom hast ke Balyámay tálimay mannók ant. Balyámá Bálák sój dát ke pa Esráilay chokkán dámé chér begéjit ke Esráilay chokk, pa botán kortágén korbánigán bwarant o béráh o rahbandén wapt o wáb bekanant. ¹⁵ Hamé paymá tai Kerrá dega lahtén choshén ham hast ke Nikuláitáni tálimay mannók ant. ¹⁶ Paméshká, pashómán bay, agan na man

pa taw zutt pédák án o gón wati dayay zahmá áyáni helápá jangé bongéja kanán.

¹⁷ Harkasá ke gósh per, gósh bedárit ke Pákén Ruh gón kelisáyán ché gwashit. Hamá ke sóbena bit, man áia cha chér o panáhén manná§ bahré dayán. Man á mardomá espétén sengé ham dayán ke áiy sará nókén námé nebeshtah ent. É námá tahná hamá zánt ke áia dayaga bit.

Pa Tyátirahay kelisáyá

¹⁸ Pa Tyátirahay kelisáaypréshtagá nebeshtah kan:

É Hodáay Chokkay habar ant, hamáiy ke chammi chó ásay bránzá ant o pádi purah táptagén brenj. Á chosha gwashit:

¹⁹ Man tai kárána zánán, tai mehr o imán, hezmat o sabr o ópára. Taw annun cha á kárán géshter kanagá ay ke bendátá kortagant.

²⁰ Bale maná cha taw yak gelagé hast ke taw hamá janén, Izábelá saggagá ay ke watá paygambaré gwashit. Á tálim dayagá ent o mani hezmatkárán gomráh kanagá ent. Áyán béráh o rahbandén wapt o wáb o hamá korbánigáni waragay sójá dayagá ent ke pa botán kanag butagant. ²¹ Man áiará wahd dátag ke balkén pashómán bebit, bale á cha wati zenahkária pashómán bayaga nalóthit. ²² Bechár, man áia tahtay báhotha kanán o hamá ke gón áia zená kanagá ant, áyán sakkén azábéay tahá dawra dayán, agan áiy káráni randgíresh yalah nadát o pashómán nabutant. ²³ Man áiy chokkán wabáé dayán o koshán, gorhá sajjahén kelisá zánant ke man hamá án ke del o hayáláni hálán dara géjit o man shomá harkasá áiy káráni hesábá mozza dayán.

²⁴ Bale Tyátirahay é dega mardom, shomá ke é tálimay mannók naét o “Shaytánay johlén rázán”, anchosh ke lahténa gwashit, sharriá sarpad naét, é gappán shomará gwashán: “Shomay sará dega gránén béré naladdhán, ²⁵ bale hamá chizzáni sará ke shomá watá mohr dáshtag, tán mani áyagá watá anchosh bedáret.”

²⁶ Hamá ke sóbena bit o tán áherá mani kárána kant, man áia kawmáni sará wák o ehtiára dayán. ²⁷ Á gón ásenén asáéá an-chó kawmáni sará hokmránia kant ke kunzag próshaga bant. ²⁸ Anchén ehtiáre cha mani Petay némagá maná rasetag. Man áia sohbay estará ham dayán. ²⁹ Harkasá ke gósh per, gósh bedárit ke Pákén Ruh gón kelisáyán ché gwashit.

† 2:7 2:7 Sóbén, bezán péróz, kámyáb. ‡ 2:9 2:9 Kanisah, bezán Yahudiáni parasteshgáh. § 2:17 2:17 Mann hamá nán ent ke Mussáay zamánagá, Hodáyá gyábáná pa Yahudián ér áwort.

3

Pa Sárdisay kelisáay

¹ Pa Sárdisay kelisáaypréshtagá nebeshtah kan:

É hamáiy habar ant ke haptén estár o Hodáay haptén Ruhi gón ant. Á chosha gwashit:

Man tai kárána zánán. Taw námé dar áwortag ke zendag ay, bale aslá mortagay. ² Ágáh bay o hamá chizzán mohr o mohkam kan ke angat pasht kaptagant bale meragi ant. Chiá ke man tai kár distagant ke mani Hodáay chammán kámel naant. ³ Gorhá tawbah kan o harché ke tará rasetag o taw eshкотag yátesh kan o mohresh bedár. Agan ágáh nabutay, man dozzokáia káyán o taw hech sarpada nabay ke man che wahdá pa taw káyán.

⁴ Bale tará Sárdisá lahtén mardom hast ke wati póshákesh palit nakortagant, á espétpósha bant o gón man gáma janant chiá ke karzant. ⁵ Harkas ke sóbena bit, hamesháni dhawlá espétpósha bit. Man áiy námá hechbar cha “Zenday Ketábá” gára nakanán o wati Pet o Petay préshtagáni déma áia mannán. ⁶ Harkasá ke gósh per, gósh bedárit ke Pákén Ruh gón kelisáyan ché gwashit.

Pa Piládelpiáay kelisáay

⁷ Pa Piládelpiáay kelisáaypréshtagá nebeshtah kan:

É habar hamáiyg ant ke pák o rást ent, hamáiyg ke Dáuday keliti dastá ent. Á chizzá ke á pach bekant, kassi band korta nakant o á chizzá ke á band bekant, kassi pach korta nakant. Á chosha gwashit:

⁸ Man tai kárána zánán. Bechár, man tai déma pachén darwázagé eshtag ke kassi band korta nakant, chiá ke tai zór kamm ent o angat taw mani habar mannetag o cha mani námá enkár nakortag. ⁹ Bechár, man cha Shaytánay kanisahay mardomán lahtén tará dayán, cha hamáyán ke watá Yahudia gwashant bale Yahudi naant o dróga bandant. Bechár, man áyána parmányán, á káyant, tai pádáni déma kapant o sarpada bant ke man tará dóst dáshtag. ¹⁰ Taw mani hokm mannetag o sabr o ópár kortag, paméshká man ham tará cha dádrasiay* sáhatá rakkénán ke pa zemínay sará neshtagénáni chakkásagá sajjahén donyáyá áyagi ent.

¹¹ Man zutt pédák án. Harché ke tará hast, mohresh bedár tánke kass tai tájá pach magipt. ¹² Hamá ke sóbena bit, man áia wati Hodáay parasteshgáhay

menoké[†] jórha kanán o á padá hechbar cha parasteshgáhá dara nayayt. Man áiy sará wati Hodá o wati Hodáay shahr, nókén Urshalimay námá o wati nókén námá nebeshtaha kanán. Nókén Urshalim cha mani Hodáay némagá, cha ásmáná éra kayt. ¹³ Harkasá ke gósh per, gósh bedárit ke Pákén Ruh gón kelisáyan ché gwashit.

Pa Lawdikiáay kelisáay

¹⁴ Pa Lawdikiáay kelisáaypréshtagá nebeshtah kan:

É habar “Ámin”[‡], wapádár o rástén sháhed, Hodáay addh kortagénáni sar-chammagay habar ant. Á chosha gwashit:

¹⁵ Man tai kárána zánán ke taw na sardmehr ay o na garmjósh. Dréगतá taw yá sárt buténay yá garm. ¹⁶ Nun ke taw shirgarm ay, na garm ay o na sárt, paméshká man tará cha wati dapá shánán.

¹⁷ Taw gwashay ke “man hastómand án, man mál o dawlat katthetag o maná hech chizzay zalurat naent,” bale taw sarpad naay ke badhál, bazzag, nézgar, kór o jándar ay. ¹⁸ Man tará nasihata kanán ke cha man ásá táptagén teláh pa bahá bezur tánke hastómand bebay, espétén póshák pa bahá bezur o gwará kan ke tai bénangén jándari chér bebit o pa wati chammán malam pa bahá bezur o chammán bemosh tánke dist bekanay. ¹⁹ Man hamáyán neherra dayán o adaba kanán ke maná dóst ant. Paméshká zutt kan, pa del pashómán bay. ²⁰ Bechár, man darwázagay dapá óshtátagan o thokkagá án. Agan kasé mani tawará eshkont o darwázagá pacha kant, man tahá káyán. Man gón áia o á gón man waráka wárt.

²¹ Hamá ke sóbena bit, man áia gón wat, wati tahtay sará nendagay hakká dayán, hamé paymá ke man sóbén bután o gón wati Petá, áiy tahtay sará neshtán. ²² Harkasá ke gósh per, gósh bedárit ke Pákén Ruh gón kelisáyan ché gwashit.

4

Arshá tahté

¹ Cha eshán o rand man cháret ta ásmáná darwázagé pach ent o hamá karnáay dhawlén tawár ke man pésará eshkotagat gón man habará ent. Gwashagá at: “Edá borzád byá ke man tará pésha darán cha é chizzán o rand allamá ché bayagi ent.” ² Hamá damáná Hodáay Ruh mani delá potert o man dist ta arshá tahté ér ent o yakké tahtay sará neshtag. ³ Á ke tahtay sará neshtagat,

* 3:10 3:10 Dádrasi, bezán hakkén paysalah, hamá shawr ke cha dádgáhána kayt, dáwari. † 3:12 3:12 Menok, bezán menag, sotun. ‡ 3:14 3:14 Edá “Ámin” bezán Issá Masih.

† 4:3 4:3 Yashm, rubi o zomorrod gránbahéen seng ant.

* 4:3 4:3 Sanj, bezán drinn, rangin kamán.

gendağ yashm o rubiay sengay rang at o zomorrodpaymén sanjéa* tahtay chapp o cháğerdá geptagat.† 4 É tahtay chapp o cháğerdá bist o chár taht ér at o bist o chár kamásh áyáni sará neshtagat. Kamáshán espétén póshák gwará at o teláhén tájesh sará at. 5 Cha tahtá grókay shahm dar áyagá at, grand o borzén tawár atant o tahtay déma ásay hapt mashal rók at. É mashal Hodáay haptén Ruh ant. 6 Tahtay déma purah daryáé at ke chó shishshagá at, chó bolóra.

Tahtay chapp o cháğerdá, nyámjiná, chár sahdár hastat ke déma o poshtá sarjamá chammesh per at. 7 Awali sahdár shéray paymá at, domi gwaskay‡ paymá, sayomiá mardomi démé per at o cháromi bálén wakábéay§ rangá at. 8 Cha é chárén sahdarán har yakkéa shash bánzol o har némagá chamm per at, bánzoláni chérá ham. É hech bassa nakanant o shap o róch gwashagá ant:

“Pák ent, pák ent, pák ent,
porwákén Hodáwandén Hodá pák ent,
hamá ke hast butag, hastent o áyagi
ent.”

9 Har wahdá ke sahdár tahtay sará nesh-tagéná, abad tán abad zendagéná shán o shawkat o sharapa dayant o áiy shográ gerant, 10 gorhá bist o chárén kamásh tahtay sará neshtagénay déma kapant o hamáia názénant ke abad tán abad zendag ent, wati táján tahtay déma éra kanant o gwashant:

11 “May Hodáwand o may Hodá!
Taw shán o shawkat, ezzat o zóra
karzay
chiá ke taw sajjahén chizz addh korta-
gant o
sajjahén chizz cha tai wáhagá
jórh butag o hastant.”

5

Ketáb o Gwarándh

1 Padá man dist ke tahtay sará nesh-tagéná ketábé, bezán tumaré* rástén dastá ent ke posht o démi nebeshtah ant o hapt mohr jatag. 2 O man porzórén préshtagé dist ke gón borzén tawaréa jár janagá at: “Kay é mohráni próshag o tumáray pach kanagay láhek ent?” 3 Bale hechkas néstat, na ásmáná, na zeminay sará o na zeminay chérá, ke é tumará pach kort bekant o eshiay tahá bechárít. 4 Ó man zár zárá gréwagá atán chiá ke hech choshén mardomé dar nakapt ke é tumáray pach kanagay láhek bebít yá eshiay tahá cháret

bekant. 5 Bale cha kamáshán yakkéa maná gwasht: “Magréw, bechár Yahudáay kabilahay shér, Dáuday óbádag sóbén butag. Á, é tumár o eshiay haptén mohrán pach korta kant.”

6 Padá man tahtay sará, nyámá, chárén sahdár o kamásháni nyámá, Gwarándhé dist ke óshtátagat o gwashaygá helár kanag butagat. Gwarándhá hapt kánth o hapt chamm per at. É Hodáay haptén Ruh ant ke sajjahén zeminay sará dém dayag butagant. 7 Gwarándh shot o tumári cha tahtay sará neshtagénay rástén dastá zort. 8 Wahdé tumári zort chárén sahdár o bist o chárén kamásh Gwarándhay déma kaptant, har yakkéa changé dastá at o teláhén darpesh gón at ke sóchokiá porr atant. É Hodáay palgártagén mardománi dwá atant. 9 Á nókén sawté janagá atant o gwashtesh:

“Taw tumáray zurag o
eshiay mohráni pach kanagay láhek
ay
chiá ke taw helár kanag butagay o
gón wati hóná pa Hodáyá cha har
kabilah, zobán, kawm o rájá
mardom pa bahá zortag.

10 Taw á pa may Hodáyá dini péshwá o bádsháhié jórh kortagant o á, zeminay sará hokumata kanant.”

11 Padá man cháret o eshкот ke bázén préshtagéay tawár ent. É lakkáni lakk atant, hazáráni hazár. Tahtay chapp o cháğerdá atant, sahdár o kamásháni cháğerdá. 12 Gón borzén tawaréa gwashagá atant:

“Hamá Gwarándh ke helár kanag but,
karzit ke áia zór o mál o dánái o wák
o
ezzat o shawkat o satá dayag bebít.”

13 Ásmáná, zeminay sará, zeminay chérá o daryáay tóká, harché ke áyáni tahá hast, man eshкот sajjahén addh kortagén chizz gwashagá atant:

“Satá, ezzat, shawkat o zór,
tahtay sará neshtagénay o
Gwarándhay bát,
abad tán abad.”

14 Chárén sahdarán “ámin” gwasht, kamásh dém pa chér kaptant o Hodá o Gwarándhesh názént.

6

Mohr pach kanaga bant

1 Man dist ke Gwarándhá cha haptén mohrán awali pach kort o man eshкот cha chárén sahdarán yakké granday tawáray

‡ 4:7 4:7 Gwask, bezán gólo, gókay chokk. § 4:7 4:7 Wakáb mazanén báli sháhiné, Ordu o Pársia oqáb. * 5:1 5:1 Tumár hamá ketábána gwashant ke kwahnén zamánagá kágad yá póstáni sará nebisag o gerd gerdá patáyag butagant.

paymá gwashagá at: “Byá.” ² Man châret ta espétén aspé o aspswára tir kamáné gón. Áiá tájé dayag but, sóbén at o pa géshter sóbén o kámyáb bayagá demá rawán at.

³ Wahdé Gwarándhá domi mohr pach kort, man eshkot domi sahdár gwashagá at: “Byá.” ⁴ Dega aspé demá dar átk ke chó ásá sohr at. Aspswára é zór o wák dayag but ke cha zeminay sará sohl o émeniá halás bekant ke mardom yakdomiá bekoshant. Áiá baláhén zahmé dayag but.

⁵ Wahdé Gwarándhá sayomi mohr pach kort, man eshkot sayomi sahdár gwashagá at: “Byá.” Man châret ta syáhén aspé o aspswára sháhémé* dastá ent. ⁶ Man cha chárén sahdáráni darnyamá tawaré eshkot, gwashagá at: “Kilué† gandom pa róchéay mozzá‡ o say kilu jaw pa róchéay mozzá, bale rógen o sharábay kimmatá kár madár.”

⁷ Wahdé Gwarándhá cháromi mohr pach kort, man eshkot cháromi sahdár gwashagá at: “Byá.” ⁸ Man châret ta mani demá shunzén aspé. Aspswáray nám “mark” at o mordagáni jahán áiy poshtá at. Áyán zeminay chárekay§ sará zór o wák dayag butagat ke pa zahm, dhokkál* o wabá o cha zeminay saray rastaráni dastá óday mardomán bekoshant.

⁹ Wahdé Gwarándhá panchomi mohr pach kort, man korbánjahay chérá hamáyáni arwáh distant ke Hodáay habar o hamá sháhediay sawabá koshag butagatant ke áyán barjáh dáshtag. ¹⁰ Zár zará gréwag o gwashagá atant: “Oo pák o rástén Hodáwand! Tán kadén dádrasia nakanay o may hónay bérá cha zeminay sará neshtagénána nageray?” ¹¹ Á sajjahénán espétén póshák dayag but o gwashag butant ke kammé angat sabr kanét tán shomay hamráhén hezmatkár o shomay brát†, shomay dhawlá koshag bebant o hesáb sarjam bebit.

¹² Man cháragá atán, wahdé Gwarándhá shashomi mohr pach kort, mazanén zem-inchandhé átk. Róch cha mudá addh kortagén sugi goday dhawlá syáh but, chárdahi máh chó hóná sohr tarret o ¹³ ásmánay estár anchó zeminá kaptant ke enjiray drachk trondén gwátéay demá wati kathakkén‡ barán dawra dant. ¹⁴ Ásmán chó nazz átkagén tumaréá shot o har kóh o har jazirah cha wati jáhá soréng but.

¹⁵ Padá zeminay bádsháh, mazanén mardom, pawji sarmaster, hastómand, zóráwar, har golám o har ázátén mardom, sajjahénán watá gáráni tahá o kóháni seng o talaráni nyamá chér dát. ¹⁶ Áyán gón kóh o talarán gwasht: “May sará bekapét o mára cha tahtay sará neshtagénay chehragá o cha Gwarándhay gaz-abá chér bedayét. ¹⁷ Chiá ke esháni gazabay mazanén róch átkag o eshiay demá kay óstáta kant?”

7

Yaksad o chell o chár hazár mardomay mohr janag

¹ Cha eshán o rand man chár préshtag dist. Zeminay chárén kondhán óstátag o zeminay chárén gwátेश dáshtagatant tánke gwáté na zemin, na daryá o na drachkéay sará bekasshit. ² Padá man dega préshtagé dist ke cha hamá jágahá chest but ke róch dara kayt o zendagén Hodáay mohri gón at. Áiá gón hamá chárén préshtagán ke zemin o daryáay táwán dayagay zór o wákesh dayag butagat, sakk kukkár kort o gwasht: ³ “Zemin, daryá o drachkán tán hamá wahdá táwán madayét ke má, may Hodáay hezmatkáráni péshánigá mohr najatag.” ⁴ O man hamáyáni hesáb eshkot ke mohr janag butagatant. Cha Esráilay chokkáni sajjahén kabilahán, yaksad o chell o chár hazár mardom mohr jang butagat: ⁵ cha Yahudáay kabilahá dwázdah hazár mardom mohr jang butagat, cha Rubenay kabilahá dwázdah hazár, cha Gáday kabilahá dwázdah hazár, ⁶ cha Ásheray kabilahá dwázdah hazár, cha Naptáliay kabilahá dwázdah hazár, cha Manassiay kabilahá dwázdah hazár, ⁷ cha Shamunay kabilahá dwázdah hazár, cha Láwiay kabilahá dwázdah hazár, cha Issákáray kabilahá dwázdah hazár, ⁸ cha Zebulunay kabilahá dwázdah hazár, cha Issopay kabilahá dwázdah hazár, cha Benyáminay kabilahá dwázdah hazár kas mohr jang butagat.

Espétpósháni mazanén mocchié

⁹ Cha eshán o rand, man châret ta baláhén mocchié ke kassá hesáb korta nakort. Á cha har kawm, kabilah, ráj o zobáná atant o taht o Gwarándhay demá óstátagatant. Áyán espétén póshák gwará at o macchi pissesh dastá at. ¹⁰ Pa borztawári kukkára atant: “Rakkénag

* 6:5 6:5 Sháhém, bezán tór, tarázu. † 6:6 6:6 Asligén Yunáni labzay máná kesás yak litar ent. ‡ 6:6 6:6 Asligén Yunániay labz “dinár” ent. § 6:8 6:8 Chárek, bezán cha chár bahrá yakké. * 6:8 6:8 Dhokkál, bezán kaht, hoshksáli. † 6:11 6:11 “Brátay” máná har báwarmand ent, mardén o janén. ‡ 6:13 6:13 Kathakk, bezán narasetagén bar.

may Hodáay dastá ent, hamáiy ke tah-tay sará neshtag o rakkénag Gwarándhay ham dastá ent.”

¹¹ Sajjahén préshtag, tahtay chapp o chágerdá óshtátogatant, kamásh o chárén sahdáráni chapp o chágerdá. Tah-tay démá, dém pa chér kaptant o Hodáesh parastesh kort. ¹² Gwashagá atant:

“Ámin,

satá o shawkat o

dánái o shogrozári o ezzat o

zór o wák may Hodáay ant,

abad tán abad. Ámin.”

¹³ Cha kamáshán yakkéá maná jost kort: “É ke espétén póshák gwará dayag butagant, é kay ant o cha kojá átkagant?”

¹⁴ Man passaw dát: “Wájah! Taw wata zánay.” Nun áíá gón man gwasht: “É hamá ant ke cha mazanén azábá dar átkagant o wati póshákesh gón Gwarándhay hóná shoshtag o espét kortagant. ¹⁵ Hamé sawabá, é Hodáay tahtay démá ant o shap o róch, áíay parasteshgáhá, áíay hezmatá kanant o hamá ke tahtay sará neshtag eshán sáhéla kant. ¹⁶ Cha edá o dém é na shodiga bant o na tonnig, na esháni sará róchay bránza kapit o na dega tapt o lewáre. ¹⁷ Chiá ke tahtay nyámá óshtátogant Gwarándh, esháni shopánka bit o eshán zendápay chammagáni ráhá pésha dárit o Hodá cha esháni chammán har arsa pahka kant.”

8

Haptomi mohr o teláhen bósóch

¹ Wahdé Gwarándhá haptomi mohr pach kort arshá kesás ném sáhatá bétawári but. ² Padá man haptén préshtag distant ke Hodáay démá óshtátogatant. Áyán hapt karná dayag but.

³ Dega préshtagé átk o korbánjáhay kerrá óshtát ke teláhen bósóché* gón ati. Áíá báz sóchoki dayag but ke gón Hodáay sajjahén palgártagénáni dwáyán yakjáshesh bekat o hamá teláhen korbánjáhay sará péshesh bekat ke Hodáay tahtay démá ent. ⁴ Sóchokiáni dutt gón Hodáay palgártagénáni dwáyán hawár, cha préshtagay dastá Hodáay kerrá borzád shotant. ⁵ Padá préshtagá bósóch zort, cha korbánjáhay ásá porri kort o zeminay sará dawri dát. Grandán grandet, borzén tawár chest butant, grókán jat o zeminchandhé átk.

Karná

* **8:3** 8:3 Bósóch, bezán jágah yá darpé ke áíay sará yá tahá sóchoki dutta dayant. † **8:7** 8:7 Sayyak, bezán cha say bahrá yakké. ‡ **8:9** 8:9 Bójig, bezán lánch, yakdár, kashti. * **9:1** 9:1 Tahtarun, bezán jahannam, dózash. † **9:5** 9:5 Tej, bezán nésch.

⁶ Padá haptén préshtagán, ke áyán haptén karná gón atant, watá pa karnáyáni janagá tayár kort.

⁷ Awaligá wati karná jat, tróngal o ás gón hóná hawár zeminay sará ér réchag but. Zeminay sayyak† ásá ér bort, drachkáni sayyak ásá ér bort o sajjahén sabzén káh ásá ér bortant.

⁸ Domi préshtagá wati karná jat, baláhen kóhéay dhawléen chizzé ke pahk bon at, daryáay tahá dawr dayag but o daryáay sayyak hón but. ⁹ Daryái sahdáráni sayyak mort o bójigáni‡ sayyak tabáh but.

¹⁰ Sayomi préshtagá wati karná jat, baláhen estaré ke mashaléay dhawlá rók at, cha ásmáná kawr o chammagáni sayyakay sará kapt. ¹¹ Estáray nám “Jawr” ent. Ápáni sayyak tahl but o bázén mardomé cha ápáni tahlíá mort.

¹² Cháromi préshtagá wati karná jat. Róchay sayyak, máhay sayyak o estáráni sayyak anchosh janag but ke sayyakesh tahár but. Róchá ham wati rozhnáiy sayyak gár dát o shapá ham wati rozhnáiy sayyak gár dát.

¹³ Randá man cháret o eshkot ke ásmánay nyámá bálén wakábé kukkár kanagá at: “Apsóz, apsóz, apsóz pa zeminay nendókan, hamá karnáyáni tawáráni sawabá ke é dega sayén préshtagán janagi ant.”

9

¹ Panchomi préshtagá wati karná jat o man dist ke estaré cha ásmáná sestag o zeminá kaptagat. Áíá johlén tahtarunay* chátay dapay kelit dayag but. ² Estará johlén tahtarunay chátay dap pach kort. Nun cha chátá dutt chest but, gwashaygá cha mazanén kurahéá dutt dar áyagá at. Cha chátá dar áyókén duttán róch o ásmánay dém tahár kortant. ³ Nun cha duttán zeminay sará madag dar átk o é madagán zeminay zummáni paymén zóré dayag but. ⁴ Gón eshán gwashag but ke tahná hamá mardom ke Hodáay mohresh péshánigá per naent, áyán o abéd zeminay saray hech káh o sabzag yá dega keshár o drachké tawán madayant. ⁵ Madagán é hakk dayag nabut ke eshán bekoshant bale tahná tán panch máhá azábesh bekanant, anchén azáb ke cha zummay tejá† mardoméá rasit. ⁶ Á róchán mardom marka lóthant bale markesha narasit. Markay lóthóka bant o mark cha áyána tachit.

⁷ Madag purah aspáni paymá atant ke pa jangá tayár kanag butagatant o

áyáni saragay sará teláhén tájay dhawlén chizz atant o chehragesh ensánay paymá atant. ⁸ Áyáni mud janéni mudáni dhawlá atant o dantán shéray dantánáni paymá. ⁹ Áyáni sénagá áseni sénagpósh bastagat o bánzoláni tawáresh purah hamá bázén arrábaháni tawáray dhawlá atant ke aspeh bastag o pa jangá mána rechant. ¹⁰ Zummáni dhawlén letthek o tejesh per at o letthekán é zór mán at ke mardomán tán panch máhá thappig bekanant. ¹¹ Bádsháhé hastatesh ke johlén tahtarunay préshtag at, Ebráni zobáná námi Abaddón at o Yunániá, Apólyón.[‡]

¹² Awali “apsóz” gwastag, bechár, cha é chizzán o rand dega do “apsóz” áyagi ent.

¹³ Shashomi préshtagá wati karná jat o hamá teláhén korbánjáh ke Hodáay démá ent, man cha áyay chárén kánthán tawáre eshкот. ¹⁴ Gón shashomi préshtagá, hamáia ke karnái gón at, gwashagá at: “Hamá chárén préshtagán ázát kan ke mazanén kawr Parátay kashá bastagant.” ¹⁵ Nun chárén préshtag ázát kanag butant ke pa hamá sáhat, róch, máh o sálá tayár kanag butagatant ke bani ádamáni sayyakká bekoshant. ¹⁶ Man eshкот,

aspswárén lashkar do hazár lakk[§] at. ¹⁷ Hamá asp o aspswár ke man elhámay tahá distant, chosh atant: Aspswáráni sénagá ásrangén, syahsabzén o zardén gókortrangén sénagpósh bastagat; aspáni sar; shéri saragay dhawlá atant o cha áyáni dapá ás, dutt o gókort dar áyagá at. ¹⁸ Bani ádamáni sayyak, say azábá kosht, bezán hamá ás, dutt o gókortay azábá ke cha aspáni dapá dar áyagá at, ¹⁹ chiá ke aspáni zór áyáni dap o letthekáni tóká at o áyáni letthek máray dhawlá atant ke saresh per at o gón eshán mardomesh thappiga kortant.

²⁰ Pasht kaptagén mardom ke é azábán nakoshtagatant, angat cha wati dastáni kárán pashómán nabutant o tawbahesh nakort o teláh, nograh, brenj, seng o dáray hamá palitén arwáh o botáni soj dah kanagesh yalah nakort ke na dista kanant, na eshkota kanant o na ráh shota kanant. ²¹ É mardom na cha wati kosht o kóshán pashómán butant, na cha wati sehr o jádugariá, na cha wati zenahkáriá o na cha wati dozzián.

10

Préshtag o kasánén ketáb

[‡] 9:11 9:11 Abaddónay máná tabáh kanag o Apólyónay máná tabáh kanók ent. [§] 9:16 9:16 Asligén nebeshtánka gwasht: “Do dah hazár barán dah hazár.” * 11:1 11:1 Asligén Yunáni nebeshtánka gwasht: Maná kalam o káshé dayag but ke kadd o kesás kanagi latthéay paymá at. † 11:2 11:2 Peshjáh, bezán peshgháh, lógay chárdiwál, sahn.

¹ Nun man dega porwákén préshtagé dist ke cha ásmáná ér áyagá at. Jambari pósháki gwará at, sará sanjé ér ati, chehragi róchay dhawlá at o pádi ási menokay paymá atant. ² Kasánén ketábé dastá ati ke pach at. É ketáb tumaré at. Préshtagá wati rástén pád daryáay o chappén zeminay sará ér kort o ³ kukkári kort, anchó ke shéré gorrit o wahdé kukkári kort, hapt granday tawár atk ke habará atant. ⁴ Wahdé haptén grándén habar kort man lóthet benebisánesh, bale tawáre cha ásmáná eshkoton, gwashagá at: “Harché ke haptén grándén gwasht, chéresh beday o nebeshtatesh makan.”

⁵ Padá man hamá daryá o zeminay sará óshtátagén préshtag dist ke wati rástén dasti ásmánay némagá chest kort. ⁶ O hamáiy sawgendi wárt ke abad tán abad zendag ent, hamáiy ke ásmán o harché ke ásmánáni tahá hast, zemin o harché ke zeminá hast, daryá o harché ke daryáay tahá hast jórhi kortagant. Gwashti: “Nun wahd halás ent. ⁷ Hodáay ráz hamá róchán sarjama bit ke haptomi préshtag wati karnáyá janagia bit, hamá paymá ke Hodáay gón wati hezmatkárén paygambarán jár jatag.”

⁸ Gorhá hamá tawará gón man padá habar kort ke man cha ásmáná eshkotagat. Gwashti: “Beraw, hamá pachén tumará bezur ke daryá o zeminay sará óshtátagén préshtagat dastá ent.”

⁹ Man préshtagay Kerrá shotán o kasánén tumár lóthet. Áiá maná gwasht: “Bezur o bwari. É tai lápay tahá tahla bit bale tai dapá bénagay dhawlá shirken.” ¹⁰ Man kasánén tumár cha préshtagay dastá zort o wárt. Dapá bénagay dhawlá shirken at bale anchó ke man wárt, mani láp tahl but. ¹¹ Maná gwashtesh: “Pa taw é allami ent ke padá bázén kawm, ráj, zobán o bádsháháni bárawá peshgói bekanay.”

11

Doén sháhed

¹ Maná kadd o kesás kanagi latthé* dayag but o gwashag but: “Pád á, Hodáay parasteshgáhá o korbánjáhá kadd o kesás kan o hamá mardomán hesáb kan ke ódá parasteha kanant. ² Bale parasteshgáhay dhanni peshjáhá† yalah kan, kadd o kesási makan chiá ke é darkawmán dayag butag. Á, pákén shahrá tán chell o do máhá lagatmála kanant. ³ O man wati do sháhedá wák o ehtiára dayán ke tán

hamá hazár o dosad o shastén róchán paygambari bekanant. Eshán góni gwará bit.”⁴ É, hamá doén zaytunay drachk ant, zeminay Hodáwanday déma óshtátágén doén cherágdán ant.⁵ O agan kasé eshán táwán dayag belóthit, cha esháni dapá ás dara kayt o dozhmenána wárt. Gorhá agan kasé eshán táwán dayag belóthit, hamé dhawlá allamá koshaga bit.⁶ Eshán ásmánay band kanagay ehtiár gón ent tánke esháni paygambariay róchán hech hawr mabit o ehtiáresh hast ke ápá hónay tahá badal bekanant o har wahdá ke belóthant, gón har paymén wabáéá zeminá jata kanant.

⁷ Wahdé eshán wati sháhedi sarjam kort, cha johlén tahtaruná dar áyókén rastar gón eshán janga kant, eshán shekasta dant o koshit o⁸ esháni jón Urshalimay[‡] bázará ér kanaga bant, hamá shahr ke pa mesále Sodum o Mesray námá zánaga bit, hamódá ke esháni Hodáwand salib kasshag butag.⁹ Tán say o ném róchá cha har kawm, kabilah, zobán o rájá mardom esháni jónána chárant bale kabr o kapon kanagesha naylant.¹⁰ Zeminay sará neshtágén mardom, esháni sará gala bant o jashna gerant o pa yakdomiá théki déma dayant, chiá ke é doén paygambarán zeminay sará neshtágén mardom ázár dátagant.

¹¹ Bale say o ném róchá rand, cha Hodáay némagá zenday ruh esháni jóná per tarret o é wati pádáni sará óshtátant. Harkasá ke distant, mazanén torsé áiy jáná kapt.¹² Padá eshán borzén tawaré eshкот ke cha ásmáná gón eshán gwashagá at: “Edá, borzád byáét.” Esháni dozhmen chárágá atant o é, jambaréay tahá borzád ásmáná shotant.¹³ Hamá damáná baláhén zeminchandhé átk o shahray dahyak tabáh but. Zeminchandhá hapt hazár mardom mort. Pashт kaptágénán sakk báz torset o borzén arshay Hodáesh shán o shawkat dát.

¹⁴ Domi “apsóz” gwastag, bechár, sayomi “apsóz” zutt áyagi ent.

Haptomi karná

¹⁵ Haptomi préshtagá wati karná jat. Ásmáná borzén tawár atant ke gwashagá atant:

“Donyáay bádsháhi may Hodáwand o áiy Masihay bádsháhi jórh butag o á abad tán abad bádsháhia kant.”

¹⁶ Nun bist o chárén kamásh ke wati tahtáni sará Hodáay déma neshtagatant, dém pa chér kaptant o Hodáesh názént.

¹⁷ Gwashtesh:

“Porwákén Hodáwandén Hodá!

Má tai shográ gerén,
hamá ke hastent o hast butag,
chiá ke taw wati mazanén zór o wák
dastá geptag o
hokmráni bendát kortag.

¹⁸ Kawm zahr geptagant o
tai gazab átkag.

Mordagáni dádrasiay wahd rasetag.
Tai hezmatkárén paygambarán,
tai palgártágénán o
harkasá ke tai námay tors hast,
kasán o mazan,
áyáni mozz dayagay wahd átkag o
hamáyáni barbád kanagay wahd
ke zeminá barbád kanagá ant.”

¹⁹ Padá Hodáay parasteshgáh arshá pach
kanag but o Hodáay ahd o karáray péti,[§]
áiy parasteshgáhay tahá gendag but.
Gróki shahm, borzén tawár o grand atant,
zeminchandh o sakk báz tróngal but.

12

Janén o azhdiá

¹ Ásmáná mazanén neshánié záher but:
janéné ke róch áiy póshák at, máh pádáni
chérá o dwázdah estári tájé sará ati.² Lápi
porr at o cha chellagi dardán kukkárá at,
chellag bayagay tawreshtán at.³ Padá
dega neshánié ásmáná záher but: baláhén
sohrén azhdiáé, hapt sarag o dah kánthi
per at o hapt táji sará at.⁴ Azhdiáay
lettheká ásmánay estáráni sayyak ropt o
zeminá dawr dát. Janén ke chokká ka-
pági at, azhdiá, janénay déma óshtátagat
tán anchó ke áiy chokk pédáka bit,
hamá damáná chokká bwárt.⁵ Janená
mardénchokké pédá kort, hamá ke “áiy
sajjahén kawmáni sará gón ásenén asáéá
hokmráni kanagi ent.” Janénay chokk
pach gerag o Hodá o áiy tahtay kerrá
barag but.⁶ Janén tatk o gyábáná shot ke
ódá Hodáyá pa janéná jágahé tayár korta-
gat tánke á, hazár o dosad o shast róchá
ódá chárág o delgósh kanag bebit.⁷ Padá
ásmáná jangé bendát but. Mikáil o áiy
préshtagán azhdiáay helápá jang kort.
Azhdiá o áiy préshtagán ham jang kort.
⁸ Bale azhdiá sarzór nabut o cha ed o rand
ásmáná pa áiy o áiy préshtagán jágahé
nabut.⁹ Baláhén azhdiá dar kanag but,
hamá kwahnén már, ke Eblis o Shaytán
gwashaga bit o sajjahén donyáyá gomrán
kanagá ent. Á gón wati préshtagán zem-
iná dawr dayag but.

¹⁰ Padá man borzén tawaré cha ásmáná
eshkot ke gwashagá at:

“Nun rakkéneg o zór o
may Hodáay bádsháhi o
áiy Masihay ehtiár rasetag,

[‡] 11:8 11:8 Asligén Yunáni nebeshtánka gwashit: mazanén shahray. [§] 11:19 11:19 Péti, bezán sanduk.

chiá ke may brátáni bohtám janók,
hamá ke róch o shap áyáni sará
may Hodáay démá bohtám janagá at,
gallénag butag.

¹¹ May brát, Gwarándhay hón o
wati sháhediay labzay sawabá,
bohtám janókey sará báládast buta-
gant.

Markay démá áyán wati sáhay hech
parwáh nakortag.

¹² Paméshká shádehi kanét,
oo ásmánán o ásmánáni neshtagénán!
Bale bazhn o apsóz pa shomá,
oo zemin o daryá!

Chiá ke Shaytán pa shomá ér átkag,
cha zahrá sakk porr ent,
chiá ke zánt ke áiy wahd kamm ent.”

¹³ Wahdé azhdiáyá dist ke man gallénag
o zeminá dawr dayag butagán, hamá
janénay randá kapt ke mardénchokki
pédá kortagat. ¹⁴ Janéná mazanén
wakábay do bázol dayag but tánke bál
bekant o gyábáná wati jágahá shot bekant.

Á, ódá tán wahdéá, wahdán o ném wahdá*
cha máray dazrasá dur dárag o hayáldári
kanaga bit. ¹⁵ Gorhá márá cha wati dapá
kawréay paymá áp pizzhár dáw tán janéná
hár bebárt. ¹⁶ Bale zeminá janén komak
kort, wati dapi pach kort o hamá kawri
ér bort ke azhdiáyá cha wati dapá dar
kortagat. ¹⁷ Azhdiá janénay sará sakk zahr
gept o gón áiy é dega chokkán pa jangá
dar kapt, gón hamá chokkán ke Hodáay
hokmáni mannók ant o pa Issáyá wati
sháhediay sará mohr óshtátagant. ¹⁸ Nun
azhdiá, tayábay rékáni sará óshtát.

13

Cha daryáyá rastaré

¹ Gorhá man dist ke cha daryáyá rastaré
chest bayagá at. Dah kánth o hapt saragi
per at. Kántháni sará dah táj atant o áiy
har saragay sará kopri nám per at. ² Hamé
rastar ke man dist, polangéay dhawlá at.
Pádi purah mammi* pádáni paymá atant
o dapi shéri dapéay paymá. Azhdiáyá
wati zór, wati taht o wati baláhén ehtiár
eshiárá dátant. ³ Rastaray yak saragéá
gwashaygá koshókén thappé per at, bale
koshókén thapp dráh butagat. Sajjahén
zemin hayrán but o rastaray randgirií kort.
⁴ Áyán hamé azhdiá parastesh kort chiá
ke rastarará ehtiári dátagat o rastaresh
parastesh kort o gwashtesh: “Kay ras-
taray dhawlá ent? Kay gón eshiá jang
korta kant?” ⁵ Rastará dapé dayag bu-
tagat ke bathák janag o koprén habar
kanagá at o ehtiár dayag butagat ke tán

chell o do máhá harché ke kanaga lóthit,
bekant. ⁶ Eshiá wati dap, Hodá, Hodáay
nám o áiy menendjáhay helápá, bezán
hamáyáni helápá pa kopr kanagá pach
kort ke arshá neshtagant. ⁷ Áiá ejázat
dayag but ke Hodáay palgártagén mar-
dománi helápá jang o jadál chest bekant
o áyán prósh bedant. Áiá har kabi-
lah, kawm, zobán o rájay sará ehtiár
dayag but. ⁸ Zeminay sará neshtagén saj-
jahén mardom rastará parastesha kanant,
á sajjahén ke áyáni nám donyáay addh
bayagá pésar “Zenday Ketábay” tahá,
Gwarándhay ketábá nebeshtah kanag
nabutagatant, hamá Gwarándh ke helár
kanag butagat. ⁹ Harkasá ke gósh per, gósh
bedárit.

¹⁰ “Á ke bandig bayagi ent,
bandijáhá rawt.

Á ke gón zahmá koshag bayagi ent,
gón zahmá koshaga bit.”

Eshiyah táhá Hodáay palgártagén mar-
domán ópár† o imánay zalurat ent.

Cha zeminá rastaré

¹¹ Gorhá man dega rastaré dist ke
cha zeminá chest bayagá at. Eshiá
gwarándhéay dhawlá do kánth per at
bale azhdiáyá dhawlá habará at. ¹² Eshiá
awali rastaray sajjahén ehtiár gón at
o cha hamáiy némagá kár kanagá at.
Zemin o zeminay sará neshtagén mardomí
parmátant ke awali rastaray parasteshá
bekanant, hamáiy ke koshókén thappi
dráh butagat. ¹³ Eshiá mazanén nesháni
pésha dásht, ási ham cha ásmáná tán
zeminá mahlukay chammáni démá éra
gétk. ¹⁴ É neshániáni sawabá ke eshiá
rastaray démá pésh dáragay ejázat dayag
but, eshiá zeminay sará neshtagén mar-
dom rada dátant. Hokmi dátant ke “hamá
rastaray sharapá boté jórh kanét ke zahmé
laggetagi, thappig butag bale angat zendag
mantag.” ¹⁵ Domi rastar á ejázat dayag but
ke awali rastaray botá sáh mán bekant
tánke awali rastaray bot habar ham kort
bekant o hamáyán bekóshárénit ke é botá
parastesha nakanant. ¹⁶ Eshiá sajjahén
mardom, kasán o mazan, hastómand o
nézgar, ázát o golám, é hokm dátant ke
wati rástén dastá yá péshánigá neshané
per bekanant, ¹⁷ tánke á hechi gept yá
bahá kort makanant, agan neshánesh per
naent. Neshán rastaray nám yá áiy
námay nambar at. ¹⁸ Edá hekmat pakár
ent. Bell hamá kas rastaray nambará
hesába kant ke zánti hast, chiá ke é nam-
bar bani ádamayg ent. O eshiay nambar
shashsad o shast o shash ent.

* **12:14** 12:14 Pákén ketábay bázén zántkáréay gománá eshiay máná say o ném sál ent.
haywáné ke Pársiá khers gwashanti. † **13:10** 13:10 Ópár, bezán sabr, tahambok, bardásht.

* **13:2** 13:2 Mamm

14

Gwarándh o yaksad o chell o chár hazárén mardom

¹ Randá man chárét ta hamá Gwarándh Sahyunay kóhay sará óshtátag o yaksad o chell o chár hazár mardomi gón ke áiy o áiy Petay námesh péshánigay sará nebeshtah ent. ² O man tawaré cha ásmáná eshкот, chó bázén ápáni tawará, purah baláhén grandéay tawár at. É tawár ke man eshкот purah chang janók atant ke wati changán janagá atant. ³ É yaksad o chell o chár hazárén mardom, tahtay déma o chárén sahdár o kamásháni déma nókén sawté janagá atant. Abéd cha hamá yaksad o chell o chár hazárénan ke cha zeminá mókag* butagatant, dega kassá é sawt dar borta nakort. ⁴ É hamá ant ke watá gón janénán palitesh nakortag chiá ke dast najatagén ant. Har jágah ke Gwarándha rawt, é randgiria kanant. É cha mardománi nyámá mókag butagant, Hodá o Gwarándhay awali bar o samar ant. ⁵ Cha áyáni dapá hech dróg dar nayáttag o bémayár ant.

Sayén préshtag

⁶ Padá man dega préshtagé dist, ásmánay nyámá bál at. Abadi wasshén mestágé gón ati ke pa zeminay saray neshtagénán, pa har kawm, kabilah, zobán o rájá jári bejant. ⁷ Gón borzén tawaréa gwashti: “Hodáay bimmá delá bedaréet o áia shán o shawkat bedayét chiá ke áiy dádrasiay sáhat átkag o rasetag. Hamáia parastesh bekanét ke ásmán o zemin, daryá o ápi chammagi jórh kortagant.”

⁸ Cha eshiá rand, dega préshtagé, domi préshtag átk o gwashti: “Kaptag, mazanén shahr, Bábel kaptag, hamá ke wati zenahkáriáni mast kanóken sharábi sajjahén kawmáná wárentag.”

⁹ Randá dega préshtagé, sayomi préshtag átk. Gón borzén tawaréa gwashti: “Agan kasé rastar o áiy botá parastesh bekant o péshánigá yá dastá áiy nesháná bezurit, ¹⁰ á, Hodáay hezhmay hamá pahkén sharábi wárt ke Hodáay gazabay pyálahá réchag butag o gón ás o gókortá pákén préshtagáni déma o Gwarándhay déma ham azáb dayaga bit. ¹¹ Áyáni azábay dutt abad tán abad chesta bant. Hamá ke rastar o áiy botá parastesha kanant yá rastaray námay nesháná zurant, áyán róch o shap hech áráma nabit. ¹² Edá Hodáay

palgártagénán sabr o ópár pakár ent, hamáyán ke Hodáay hokmáni sará kára kanant o pa Issáyá wati imánay sará mohra óshtant.”

¹³ Gorhá man cha ásmáná tawaré eshкот, gwashagá at: “Nebeshtah kan: Mordag bahtáwar ant, hamá ke cha ed o rand Hodáwanday ráhá merant.” Pákén Ruh ham gwashit: “Haw, áyáni zahmatkasshia hallant o á áráma gerant, chiá ke áyáni kortagen kár áyáni hamráh ant.”

Zeminay rón o mósh

¹⁴ Man chárét ta espétén jambaré o jambaray sarborá purah ensánay chokkay dhawléne neshtag. Áiy sará teláhén tájé o dastá tézén dásé. ¹⁵ Dega préshtagé cha parasteshgáhá dar átk, pa borztawáriá dém pa hamáia kukkára at ke jambaray sará neshtagat: “Wati dásá déma byár o beron, chiá ke rón o móshay wahd átkag. Zeminay keshár rasetag o tayár ent.” ¹⁶ Gorhá hamá ke jambaray sarborá neshtagat, wati dási zeminay sará sorént o zemin rón o mósh but.

¹⁷ Dega préshtagé cha ásmáni parasteshgáhá dar átk. Áia ham tézén dásé gón at. ¹⁸ Dega préshtagé cha korbánjáhá átk ke ásay sará ehtiári hastat. Áia gón borzén tawaréa gón hamáia gwasht ke tézén dási gón at: “Wati tézén dásá déma byár o zeminay anguray drachkáni hóshán borr, chiá ke nun angur rasetagant.” ¹⁹ Gorhá préshtagá wati dás zeminay sará sorént, anguri mocch kortant o Hodáay gazabay mazanén sharábkasshi hawzay[†] tahá dawr dátant. ²⁰ Sharábkasshi hawz cha shahrá dhann lagat dayag but o cha hawzá lón dar átk. Hón anchó báz at ke aspáni lagámán sar but o tán sésad kilumitará[‡] chó ápá tatk.

15

Mussáay o Gwarándhay sawt

¹ Randá man ásmáná dega hayrán kanók o baláhén nesháni dist, hapt préshtag ke haptén godhsari azábesh gón atant, godhsari, paméshká ke gón eshán Hodáay gazab sarjama bit.

² Padá man chizzé dist, daryáey paymá at bale chó shishshagá at, gón asá hawár. O man dist shishshagi daryáay kashá hamá óshtátagatant ke rastaray sará o áiy bot o námay nambaray sará sóbén butagatant. Changesh dastá at ke Hodáyá dátatagatant. ³ Áyán Hodáay hezmatkár

* **14:3** 14:3 Mókag, bezán pa kaséay jánay rakkénagá gránén kimmaté dayag, Pársia “bázkharid”. † **14:19** 14:19 Sharábkasshi hawz jágahé ke angur mána kanant o lagata dayant o anguray shiragá kasshant. ‡ **14:20** 14:20 Asligén Yunáni syáhaga gwasht: hazár o shashsad estádiá.

Mussáay sawt dapá at o Gwarándhay sawt ham. Gwashagá atant:

“Tai kár mazan o hayrán kanók ant,
oo porwákén Hodáwandén Hodá!
Tai ráh pa adl o rásti ant,
oo kawmáni bádsháh!

⁴ Kay ent ke cha taw natorsit,
oo Hodáwand!
Kay ent ke tai námá shawkata nadant?
Chiá ke tahná taw pák ay.
Sajjahén kawma káyant o
tai bárgáhá tará parastesha kanant,
chiá ke tai ádelén kár
záher butagant.”

Hapt préshtag o hapt azáb

⁵ Cha eshiá rand, man cháret o parasteshgáh, bezán “sháhediay tambu” arshá dist ke pach at. ⁶ Haptén préshtag ke haptén azábesh gón atant, cha parasteshgáhá dhanná dar átkant. Áyán sapá o rozhnáén liloméⁿ* god o póshák gwará at o sénagá teláhen patthiesh bastagat. ⁷ Padá cha chárén sahdárán yakkeá haptén préshtagáná hapt teláhen darp dát ke cha Hodáay gazabá porr atant, abad tán abad zendagén Hodáay gazabá. ⁸ Parasteshgáh cha duttá porr but ke cha Hodáay shawkat o áiyay zórá átk o kassá tán hamá wahdá parasteshgáhay tahá shota nakort ke haptén préshtagáni haptén azáb sarjam nabutant.

16

Hodáay gazabay haptén darp

¹ Padá man borzén tawaré eshкот ke cha parasteshgáhá pédák at o gón haptén préshtagán gwashagá at: “Berawét o Hodáay gazabay haptén darpán zeminay sará beréchét.”

² Gorhá awali shot o wati darpi zeminay sará rétk. Hamá mardomán haráb o dardnákén résh dar átk ke rastaray neshánesh per at o áiyay botá parastesh kanagá atant.

³ Padá domiá wati darp daryáay sará rétk. Daryá chó mordagéay hóná but o áiyay tahay har sahdár mort.

⁴ Padá sayomiá wati darp kawr o cham-magáni sará rétk o á hón butant. ⁵ Gorhá man eshкот ke ápáni préshtag gwashagá at:

“Taw ádel ay, taw ke hastay o butagay,
oo Pákén!

Chiá ke taw é dádrasi kortagant.

⁶ Eshán tai palgártagén mardom o paygambaráni hón rétkag,

paméshká taw esháná hón pa nóshagá dátag.

É hameshiay láhek ant.”

⁷ O man eshкот ke korbánjáh gwashagá at:

“Haw, oo porwákén Hodáwandén Hodá!
Tai dádrasi rást o pa adl ant.”

⁸ Nun cháromiá wati darp róchay sará rétk o róchá ejázat dayag but ke mardomán gón ásá besóchit. ⁹ Mardom cha é sakkén garmiá sotkant, bale pashómán bayag o Hodáyá shán o shawkat dayagay badalá, hamá Hodáay námay helápá kopresh kort ke é azábáni sará ehtiári hastat.

¹⁰ Randá panchomiá wati darp rastaray tahtay sará rétk. Áiyay bádsháhi syáh o tahár but o mardom cha é paréshániá wati zobán o lellekán jáyagá atant. ¹¹ Pa wati dard o réshán borzén arshay Hodáay helápá kopresh kort, bale cha wati kárán pashómán nabutant.

¹² Padá shashomiá wati darp mazanén kawr; Parátay sará rétk o kawray áp hoshk but tánke ródarátki bádsháháni ráh sáp bebit. ¹³ Man say palitén ruh dist gwashaygá pogal atant ke cha azhdiáay dapá, rastaray dapá o cha drógén paygambaray dapá dar áyagá atant. ¹⁴ É hamá palitén ruh ant ke mójegah pésha dárant o sajjahén donyáay bádsháháni kerrá rawant ke áyán pa jang kanagá yakjáh bekanant, hamá jang ke porwákén Hodáay mazanén róchá bit.

¹⁵ “Bechár, man dozzokáia káyán. Bahtáwar hamá ent ke ágáha mánit o wati póshákán tayára dárít tánke á jándará dar mayayt o áiyay nang gendag mabit.”

¹⁶ Palitén ruhán é bádsháh hamá jágáhá mocch kortant ke Ebráni zobána námi Hármagedun ent.

¹⁷ Nun haptomiá wati darp gwátá rétk o borzén tawaré cha parasteshgáhay tahtá átk, gwashagá at: “Kár halletag.”

¹⁸ Grókán jat, borzén tawár o grand but o anchén baláhen zeminchandhé átk ke cha hamá wahdá ke ensán zeminay sará pédák butag, choshén zeminchandhé nabutag, anchén zórmandén zeminchandhé at. ¹⁹ Mazanén shahr, Bábel say thokkorá bahr but o kawmáni shahr kaptant o Hodáyá mazanén shahr, Bábel yát at o wati gazab o hezhmay sharábay pyálahi áiárá dát. ²⁰ Har jazirah gár but o hech kóh pasht nakapt.

²¹ Baláhen tróngalé but. Har yak tróngalé chell kiluay* kesásá grán at o cha ásmáná mardománi sará kapt. Áyán pa tróngalay

* **15:6** 15:6 Lilom, goday tahré ke Engréziá “linen” gwashaga bit. * **16:21** 16:21 Asligén Yunáni nebeshtánka gwashit: tálantéay. Tálant yak dáben zarré at. Yak tálant, pánzdah sálay mozz at o grániá tálanté kesás chell kilu at.

tuppánay azábá Hodáay helápá kopr kort, chiá ke é azáb sakk torsnák at.

17

Mazanén kahbag

¹ Randá cha hamá haptén préshtagén ke hapt darpesh gón at, yakké átk o gón man habari kort o gwashti: “Byá edá man tará hamá mazanén kahbagay sezáyá pésah dárán ke bázén ápáni sará neshtag. ² Gón áia zeminay bádsháhán zená kortag o zeminá neshtagén mardom áiy zenahkáriay sharábá bésár kortagant.” ³ Padá préshtagá maná ruhay tahá gyábánéá bort o man janéné dist ke an-chén rozhná sohrén rastaréay sará neshtagat ke kopri námán póshetageat o hapt sarag o dah kánthi per at. ⁴ Janéná jamu* o rozhná sohrén god gwará at. Gón teláh o gránbaháén seng o morwáredá sambahetageat. Teláhén pyálahé dastá ati ke cha bazhnákén chizz o áiy zenahkáriáni palitián porr at. ⁵ Áiy peshánigá námé nebeshtah at ke rázé at: “Mazanén Bábel. Kahbagáni o zeminay palitiáni má.” ⁶ Nun man dist ke janén cha Hodáay palgártageání o Issáay sháhedáni hónay nóshagá neshah o malár at. Man ke dist, sakk hayrán o habakkah mantán. ⁷ Préshtagá gón man gwasht: “Taw parchá hayrán ay? Man tará é janén o hamá hapt sarag o dah kánthi rastaray rázá gwashán ke janén áia swár ent. ⁸ Á rastar ke taw dist, yak wahdéá hastat, nun néstent bale cha johlén tahtaruná dar áyagi ent o barbádiay némagá rawt. Zeminá neshtagén hamá mardom ke cha jahánay jórh bayagay wahdá áyáni nám ‘Zenday Ketábá’ nebeshtah naent, é rastará ke gendant hayrána bant, chiá ke é rastar yak wahdé hastat o nun néstent bale padá áyagi ent. ⁹ Pa eshiay sarpad bayagá dánáén saré lóthit. Haptén sar, hapt kóh ant ke áyáni sará janén neshtag. Hapt bádsháh ant ham, ¹⁰ panchay bádsháhi halás butag, yakké annun bádsháh ent o dega yakké angat nayátkg o á, wahdé kayt, allam pa kammén wahdéá mánit. ¹¹ Hamá rastar ke yak wahdé hastat o nun néstent hashtomi ent, bale cha hapténán yakké o tabáhiay némagá rawt. ¹² O dahén kánth ke taw distant, dah bádsháh ant ke angat hech bádsháhiesh narasetag, bale áyán rastaray hamráhiá pa yak sáhatéá bádsháhiay ehtiára rasit. ¹³ É sajjahénáni maksad yakk ent o é wati zór o ehtiárá rastará dayant. ¹⁴ É gón Gwarándhá janga kanant bale Gwarándh eshán prósha dant, chiá ke á hodáwandáni Hodáwand o

bádsháháni Bádsháh ent o hamá ke gón áia góna bant, áiy tawár jatagén, dar chetagén o wapádárén hamráh ant.”

¹⁵ Nun préshtagá maná gwasht: “Hamá áp ke taw distant, hamódá ke kahbag neshtag, kawm, mocchi, ráj o zobán ant. ¹⁶ Hamá rastar o dahén kánth ke taw distant gón kahbagá naprata kanant, áia wayrán o jándara kanant, áiy góshhá warant o áia gón ásá sóchant. ¹⁷ Chiá ke Hodáyá áyáni delá dátag ke Hodáay maksaday sará kár bekanant, hamshawr bebant o wati bádsháhiá rastará bedayant tán hamá wahdá ke Hodáay habar sarjam o purah bebant. ¹⁸ O hamá janén ke taw dist, mazanén shahr ent ke zeminay saray bádsháháni sará hokmránia kant.”

18

Bábelay sará zár o peryát

¹ Cha é chizzán o rand man dega préshtagé dist ke cha ásmáná ér áyagá at. Áia mazanén ehtiáré gón at o zemin cha áiy shán o shawkatá rozhná but. ² Gón mazanén tawaréá kukkári kort:

“Kaptag, kaptag, mazanén Bábel,
nun palitén ruháni menendjáh butag
o
har nápákén arwáhay jágah ent o
har nápákén morgay kodóh ent o
har nápák o bazhnákén sahđaray lóg
ent.”

³ Chiá ke sajjahén kawmán
áiy zenáay mast kanókéén sharáb
wártag.
Jahánay bádsháhán gón áia zená kortag o
donyáay sawdäger cha áiy zyádahén
aysh o ásudagián
hastómand butagant.

Bábelay sezá

⁴ Randá man cha ásmáná dega tawaré eshkot, gwashagá at:

“Oo mani mardomán! Cha eshiá dar áét
tánke shomá eshiay gonáhán sharik
mabét o

eshiay azáb shomay sará makapant,
⁵ chiá ke eshiay gonáh sar pa sar ant o
ásmáná rasetagant o

Hodáyá áiy radén kár yát kortagant.
⁶ Harché ke áia kortag gón áia hamá paymá
bekanét o

do sari* bedayéti,
hamá pyálah ke áia ér rétkag, cha
hamá pyálahá
pa áia do sari ér réché.

⁷ Haminchok ke watá shán o shawkati
dátag o
aysh o nóshay tahá zendi gwázéntag,

* 17:4 17:4 Jamu, rangé ke Pársiá banafsh o Orduá banafshi gwashanti.

* 18:6 18:6 Do sari, bezán do barábar.

nun haminchok azábi bedayét,
chiá ke wati delá gwashtagi:
‘Man malakahé án o tahtay sará nesh-
tagán,
janózámé naán o
hechbar porsa nagendán.’

- ⁸ Esháni sawabá yak róchéay tahá áiy azáb,
bezán mark, pors o dhokkála káyant o á gón ásá sóchaga bit,
chiá ke Hodáwandén Hodá porwák ent o
áiy dadrasíá kant.”

Pa Babelá say bará apsóz

⁹ Zeminay bádsháhán ke gón Bábelay shahrá zená kortag o aysh o nóshay zensh gwázéntag, wahdé áiy sochagay duttána gendant, pa áiy gréwant o porsiga bant. ¹⁰ Áiy azábá ke gendant, torsant, dura óshant o gwashant:

“Apsóz, apsóz, oo mazané shahr!
Oo Babel, oo mohkamén shahr!
Chiá ke yak sáhatéay tahá tai dádrasiay wahd raset.”

¹¹ Zeminay sawdágera gréwant o pa áiy porsiga bant, chiá ke áyani sámánán nun kass pa bahá nazurit; ¹² teláh, nograh, gránbaháén seng o morwáred, lilomé god, jamu o harir o rozhná sohrén god o har paymén washbóén dár, har paymén ájén[†] chizz, cha gránbaháén dár, brenj, ásen o sengmarmará jórh kortagén chizz, ¹³ dárchini, masálah, sóchoki, morr, sóchagi, sharáb, zaytunay thél, gehterén árt, gandom, gók o pas, asp o aspgárhi, golám o ensáni zend.

¹⁴ Hamá bar o samar ke shomay arwáh pa áiy hodónák[‡] butag, cha shomay dastá shotag. Sajjahén zinati o drapshókén chizz cha shomay dastá shotagant o nun hechbar dar géjaga nabant.

¹⁵ É chizzáni sawdáger ke cha é kahbagá hastómand butagant, cha áiy azábay torsá dur durá óshant, gréwant o porsiga bant. ¹⁶ Gwashant:

“Apsóz, apsóz, oo mazané shahr!
Chiá ke lilomé god, jamu o rozhná sohrén póshák gwará dayag butay o gón teláh o gránbaháén seng o morwáredá sambahéng butay,

¹⁷ bale choshén baláhén mál o melkat yak sáhatéay tahá tabáh kanag but.”

Sajjahén náhodá, jánshó o hamá mardom ke daryáya sapara kanant yá kára kanant dur óshátatagant. ¹⁸ Wahdé áiy sochagay duttesh dist, kukkáresh kort o

gwashtesh: “É mazané shahray dhawlén dega shahré butag?” ¹⁹ Á hák pa sar butant o gréwant o mótk áraná kukkár kanagá atant:

“Apsóz, apsóz, oo mazané shahr!
Hamá ke daryáya bójjesh hastat, cha tai mál o melkatá hastómand butagant,
bale yak sáhatéay tahá tabáh kanag butay.”

²⁰ Áiy sará shádehi kanét, oo ásmánán!
Shádehi kanét, oo Hodáay palgártagén mardomán, oo kásed o paygambarán!
Chiá ke Hodáya eshiay dádrasi hamá paymá kortag ke eshiá gón shomá kortag.

Bábelay ásar o ákebat

²¹ Padá porwákén préshtagéá, jenteri[§] táay kaddén mazané sengé chest kort o daryáya dawr dát o gwashti:

“Gón hamé trondiá mazané shahr, Babel jahlád dawr dayaga bit o padá hechbar shóház kanag buta nakant.

²² Chang janók, sázger, nal o sorná janókáni sázay tawár padá hechbar tai tahá eshkonaga nabit.

Hech honaray honarmand padá hechbar tai tahá shóház kanaga nabit.

Jenteri tawaré padá hechbar tai tahá eshkonaga nabit.

²³ Cherágay rozhn padá hechbar tai tahá nadrapshit.

Sálónk o bánóri tawaré padá hechbar tai tahá eshkonaga nabit,

chiá ke tai sawdáger zeminay sakkén mazané mardom butagant o tai jádugariay sawabá, sajjahén kawm rad dayag butagant.

²⁴ Paygambar o Hodáay palgártagén mardom o harkas ke donyáay tahá koshag butag, áyani hón é shahray tahá dar kapt.”

19

Bábelay kapagay sará Hodáay shogr

¹ Cha é chizzán o rand man an-chén mazané tawaré eshкот, gwashaygá ásmáná sakkén baláhén mocchiéay tawár at, gwashagá atant:

“Hodáwandá benázénét, Halléluyá.

[†] **18:12** 18:12 Ájén, bezán cha ájy adhd butagén. Áj cha pillay dantánán dara kayt. [‡] **18:14** 18:14 Hodónák, bezán wáhagdár, armáni, lóthók, delmánag. [§] **18:21** 18:21 Jenter do seng ant ke gón áyan gandomá droshant o ártá kanant.

Rakkénag o shawkat o zór may
Hodáayg ant,

² Chiá ke áiy dádrasi rást o pa adl ant.
Áiá hamá mazanén kahbag sezá dátag
ke zemini gón wati zenahkárián
gomráh kortagat.

Hodáyá cha áiá wati hezmatkáráni
hónay bér geptag.”

³ O áyán yak randé padá gwasht:
“Hodáwandá benázénét, Halléluyá.

Abad tán abad cha áiá dutt chesta bit.”

⁴ Padá bist o chárén kamásh o chárén
sahdár dém pa chér kaptant. Tahtay
sará neshtagén Hodáesh parastesh kort,
gwashtesh:

“Ámin. Hodáwandá benázénét,
Halléluyá.”

⁵ Gorrhá cha tahtá tawaré átk, gwashti:

“May Hodáay tawspíá bekanét,
oo áiy sajjahén hezmatkárán
oo sajjahén Hodátorsán,
kasán o mazan!”

⁶ Padá man anchén tawár eshкот ke chó
mazanén mocchi o bázén áp o trondén
grandáni tawará atant ke gwashtesh:

“Hodáwandá benázénét, Halléluyá.
Chiá ke may porwákén Hodáwandén Hodá
hokmránia kant.

⁷ Gal bebén o shádehi bekanén o
hamáiá shán o shawkat bedayén,
chiá ke Gwarándhay suray wahd
átkag o

áiy bânórá watá tayár kortag.

⁸ Áiá lilomén, rozhná o sapáén god,
pa gwará kanagá dayag butag.”

Lilomén god, Hodáay palgártagén mar-
dománi pahrézkári ant.

⁹ Padá préshtagá maná gwasht:
“Nebeshtah kan: bahtáwar ant hamá
ke Gwarándhay suray shámá lóthag
butagant.” Padá gwashti: “É Hodáay
rástén habar ant.”

¹⁰ Nun man áiy pádáni demá sojdah
kanagá kaptán, bale maná gwashti: “Chó
makan, man ham tai o tai brátáni dhawlén
hezmatkáré án ke Issáay sháhediá dayant.
Hodáyá parastesh kan. Issáay bárawá
sháhedi dayag paygambariay jawhar ent.”

Rastar prósha wárt

¹¹ Man dist ke ásmánay dap pach ent
o mani demá espétén asp o aspswáré.
Aspswáray nám “wapádár o rást” at. Pa
adl dádrasia kant o pa adl jang ham
kant. ¹² Áiy chamh chó rókén ásá
atant o bázén tájé sará ati. Áiy saragay
sará námé nebeshtah at ke áiy jendá
abéd, dega kassá é nám nazánt. ¹³ Áiá
hóná méntagén kabáhé gwará o o námi
“Hodáay Gál” at. ¹⁴ Ásmáni pawj, hamáiy

poshtá gón atant, espétén aspán swár o
sapá o espétén lilomén póshák gwará.

¹⁵ Cha aspswáray dapá tézén zahmé
dar áyagá ent tánke gón eshiá kawmán
bejant o gón ásenén asáé áyáni sará
hokmráni bekat. Á, porwákén Hodáay
gazab o hezhmay sharábkasshi hawzá
lagat dayagá ent. ¹⁶ Áiy kabáh o rány
sará námé nebeshtah ent: “bádsáháni
Bádsáh o hodáwandáni Hodáwand.”

¹⁷ Padá man dist ke préshtagé róchay
tahá óshtátag. Gón borzén tawaréá saj-
jahén morgáni némagá kukkári kort ke
ásmánay nyámá bál atant:

“Byáét o pa Hodáay mazanén shámá
mocch bebét,

¹⁸ tánke shomá bádsáháni góshht,
sálaráni góshht,
porwákén mardománi góshht,
asp o aspswáráni góshht,
sajjahén mardománi góshht,
ázát o golámáni o kasán o mazanénáni
góshhtá bwarét.”

¹⁹ Nun man rastar dist o zeminay
bádsáh o áyáni pawj ham distant ke
gón aspswár o áiy pawjá pa jangá
mocch butagatant. ²⁰ O rastar, hamá
drógén paygambaray hamráhiá gerag
but ke rastaray demá mójezahi pésh
dáshtagat. Gón é mójezahán, áiá hamá
rad dátagatant ke rastaray nesháesh
zortagat o áiy botesch sojdah kortagat.
Doén, zendagá hamá gwarmá* dawr
dayag butagatant ke gón ás o gókortá bon
at. ²¹ Á dega pawji gón aspswáray zahmá
ke cha áiy dapá dar áyagá at koshag
butant o sajjahén morgán watá cha áyáni
góshhtá sérláp kort.

20

Hazárén sál

¹ Randá man préshtagé dist ke cha
ásmáná ér áyagá at. Áiá johlén tahtarunay
kelit o mazanén zamzilé dastá at. ² O
áiá azhdiá gept o pa hazár sálá bast,
bezán hamá kadimi már ke Eblis o Shaytán
ent. ³ Johlén tahtarunay tahá dawri dát
o tahtarunay dapi kobl kort o mohr jat
ke tán é hazárén sál purah mabant, á
dega baré kawmán rad dát makant. Cha
hazárén sálán o rand, allamá Shaytán pa
kammokén wahdéá ázát kanaga bit.

⁴ Randá man taht dist o á ke tahtáni
sará neshtagatant, ayán dádrasiay ehtiár
dayag but. O man hamáyáni arwáh distant
ke áyáni sar pa Issáay bárawá sháhedi
dayag o Hodáay habaray sawabá borrag
butagatant, hamáyáni ke rastar o áiy
botesch sojdah nakortagat o wati péshánig

* 19:20 19:20 Gwarm, bezán daryáchah.

yá dastay sará áiy neshánesh nazortagat. Á padá zendag butant o pa hazár sálá gón Masihá hokmrániesh kort. ⁵ É awali jáh janag ent. Pasht kaptagén mordag, tán hamá wahdá padá zendag nabutant ke é hazarén sál purah nabutagatant. ⁶ Bahtáwar o pák o palgár ant hamá ke é awali jáh janagá sharika bant, domi marká áyáni sará hech ehtiár nést o á, cha Hodá o Masihay némagá dini péshwá jórha bant o gón Masihá tán hazár sálá hokmránia kanant.

Shaytánay goddhi sezá

⁷ Wahdé hazarén sál sarjama bant, Shaytán cha wati bandijáhá ázát kanaga bit o ⁸ zeminay chárén kondhán nesh-tagén kawmáni rad dayagá rawt ke Ajuj o Májuj ant. Eshán pa jangá moccha kant. É daryáay rékáni kesásá báza bant. ⁹ É sajjahén kawm dém pa zeminay práhén patthá borzád butant o Hodáay palgártagén mardománi ord* o dóstnákén shahresh chapp o chágerd kort, bale ásé cha ásmáná jahlád átk o éri bortant. ¹⁰ Padá esháni rad dayók, Eblis, ás o gókortay gwarmá dawr dayag but, hamódá ke rastar o drógén paygambar ant. Eshán, shap o róch, abad tán abad azába rasit.

Baláhén espétén taht

¹¹ Randá man baláhén espétén tahté dist o hamá ham ke tahtay sará nesh-tagat. Zemin o ásmán cha áiy demá tatkant o pa zemin o ásmáná hech jágahé pasht nakapt. ¹² Man mordag distant, mazan o kasán, ke tahtay demá óshtátagatant. Ketáb pach kanag butant o dega ketábé ham pach kanag but, “Zenday Ketáb”. Mordag wati kortagén káráni hesábá dádrasi kanag butant, hamá káráni hesábá ke ketábáni tahá nebeshtagat. ¹³ Daryáyá wati lápay mordag dar kortant o mark o mordagáni jaháná ham wati tókay mordag dar kortant o har yakké wati kortagén káráni hesábá dádrasi kanag but. ¹⁴ Mark o mordagáni jahán, ásay gwarmá dawr dayag butant. É ásay gwarm, domi mark ent. ¹⁵ Agan kaséay nám “Zenday Ketábay” tahá nebeshtah naat, á, ásay gwarmá dawr dayag but.

21

Nókén ásmán o nókén zemin

¹ Randá man nókén ásmán o nókén zeminé dist chiá ke awali ásmán o awali zemin gár butagatant o daryá ham nun néstat.

* **20:9** 20:9 Ord bezán jangi kaymp.

o áheri ábáni nám gerag butag.

* **21:6** 21:6 Asligén nebeshtánká pa bendát o halásiá Yunáni zobánay awali

² O man pákén shahr dist, nókén Urshalim, cha Hodáay némagá cha ásmáná ér áyagá at. Bánóréay dhawlá tayár kanag o pa wati lógwájahá sambahénag butagat. ³ O man borzén tawaré eshкот ke cha tahtá pédák at, gwashtagá at:

“Bechár! Hodáay menendjáh mardománi kerrá ent,
nun á wat áyáni kerrá nendóka bit.

Á, Hodáay mardoma bant o
Hodá wat gón áyán yakjáha bit.

⁴ Hodá cha áyáni chammán har arséa pahka kant.

Mark nun pashta nakapit o
na pors o na zári o na darda bit,
chiá ke péсарigén chizz gwashtagant.”

⁵ Hamá ke tahtay sará neshthagat, gwashti: “Bechár, man sajjahén chizzán cha nóksará addha kanán.” Padá gwashti: “Nebeshtah kan, chiá ke é habar porehtebár o rást ant.” ⁶ Chosh ham maná gwashti: “Kár halletant. Bendát

man án o halási man án,* bongéj o ásar. Hamá ke tonnig ent, man áia cha zenday chammagá mopt o bé zarrá ápa dayán.

⁷ Hamá ke sóbena bit, é sajjahén chizzi mirásá rasant, man áiy Hodá bán o á mani chokka bit. ⁸ Bale lagór o nábáwar o hamá ke bazhnák ant, hónig o zenahkár o jádugar o botparast o sajjahén drógband, esháni ásar esh ent ke ásay gwarmá gón ás o gókortá sóchag bebant. É domi mark ent.”

Nókén Urshalim

⁹ Cha hamá haptén préshtagán ke cha goddhi haptén azábán porrén hapt darpesh gón at, yakké átk o maná gwashti: “Edá byá, man tará bánóra pésha dárán, Gwarándhay lógbánoká.” ¹⁰ Áiá ruhay tahá maná baláhén o borzén kóhéay sará bort o pákén shahr, Urshalimi pésh dást ke cha Hodáay némagá cha ásmáná ér áyagá at o ¹¹ gón Hodáay shán o shawkatá drapshagá at. Eshiy drapshnáki chó gránbaháén seng, akikay dhawlá sáp at. ¹² Baláh o borzén diwálé hastati o dwázdah darwázag ke har darwázagay dapá préshtagé óshtátagat o darwázagay sará námé nebeshtagat. É Esráilay dwázdahén kabilaháni nám atant. ¹³ Ródarátká say darwázag, shomálá say darwázag, jonubá say darwázag o rónendá ham say darwázag atant. ¹⁴ Shahray diwálá dwázdah bonred hastat o áyáni sará Gwarándhay dwázdahén kásedáni nám atant, har yakkéay sará yak námé. ¹⁵ Hamá ke gón man habará at, kadd o

kesás kanagi teláhén latthé gón ati ke shahrá o áiy darwázag o diwálá kadd o kesás bekant. ¹⁶ O shahr chárkondh at, haminchok ke eshiay dráji at haminchok práhi. Préshtagá shahr gón latthá kadd o kesás kort, sarjamiá kesás do hazár o dosad kilumitar[†] at. Dráji, práhi o borzi yakkén kaddá atant. ¹⁷ Padá áiy diwáli kadd o kesás kort. Ensáni kadd o kesásay hesábá ke préshtag kár bandagá at, diwál kesás shast o panch mitar[‡] at. ¹⁸ Shahray diwál cha yashmá[§] jórh kanag butagat o shahr cha pahkén teláhá, chó shisshagá sáp. ¹⁹ Diwálay bonred gón har warhén gránbaháén sengán singárag butagat. Awali bonred yashm at, domi nilam, sayomi akik, cháromi zomorrod, ²⁰ panchomi senge solaymán, shashomi rubi, haptomi teláhrangén ákut, hashtomi bayrel, nohomi pokráj, dahomi shunzén akik, yázdahomi pérózah, dwázdahomi jamuén ákut. ²¹ Dwázdahén darwázag cha morwáredá jórh kanag butagatant, har yak darwázagé cha yak morwáredéa o shahray práhén damk cha pahkén teláhá jórh kanag butagat, chó shisshagá sáp. ²² Man eshiay tahá hech parasteshgáh nadist, chiá ke porwákén Hodáwandén Hodá o Gwarándh eshiay parasteshgáh ant. ²³ O shahrá na róch pakár ent o na máh ke áia rozhná bekanant, chiá ke Hodáay shán o shawkat eshiá rozhná kant o Gwarándh eshiay cherág ent. ²⁴ Kawm eshiay rozhnay tahá gáma janant o zeminay bádsháh wati shán o shawkatá eshiay tahá kárant. ²⁵ Eshiy darwázag hechbar róchá banda nabant chiá ke ódá hechbar shapa nabit. ²⁶ Sajjahén kawmáni shawkat o sharap eshiay tahá áraga bant. ²⁷ Hech paymén palitén chizz yá hamá ke bazhnákén kára kanant o dróga bandant, ódá poterta nakanant, bass hamá shota kanant ke áyáni nám “Zenday Ketábá” nebisag butagant, hamá Gwarándhay ketábá.

22

Zendápay kawr o zenday drachk

¹ Randá préshtagá maná zendápay kawr pesh dásht ke chó bolóra sáp at. Cha Hodá o Gwarándhay tahtá dar áyagá ent o ² shahray bázaray nyámá tachán ent. Kawray é dast o á dastá zenday drachké ke dwázdah bar o samara kárit, har máh cha bará bár ent o drachkay ták pa kawmáni dráh kanagá darmán ant. ³ O hech paymén nálaté pashta nakapit.

Hodá o Gwarándhay taht hamódá bit o áiy hezmatkár áiy hezmatá kanant. ⁴ Áiy chehragá gendant o áiy nám áyáni peshánigána bit. ⁵ Ódá hechbar shapa nabit, cherág o róchay rozhnay zalurata nabit, chiá ke Hodáwandén Hodá wati áyáni sará wati rozhná drapshénit o á, abad tán abad hokmránia kanant.

Goddhi habar

⁶ Préshtagá gón man gwasht: “É habar porehtebár o rást ant. O Hodáwand, paygambaráni ruhay Hodáay, wati préshtag dém dátag ke áiy hezmatkárán é chizzán pesh bedárit ke allamá zutt bayagi ant.”

⁷ “Bechár, mane Issá zutt pédák án. Bahtáwar hamá ent ke hamé peshgóiy habaráni parmánbardáriá kant ke é ketábá mán ant.”

⁸ O man, Yuhanná, hamá án ke é chizzi eshkotag o distagant. Wahdé man eshkot o dist, hamá préshtagay pádáni démá pa sojdahá kaptán ke maná é chizzi pesh dáshtant. ⁹ Bale áia maná gwasht: “Na, chó makan. Man ham tai o tai brátén paygambaráni dhawlén hezmatkáré án o hamáyáni dhawléné án ke é ketábay habaráni mannók ant. Hodáay parastesh bekan.” ¹⁰ Randá maná gwashti: “É ketábay paygambariay habarán mohr man, chiá ke wahd nun nazzik ent. ¹¹ Hamá ke badia kant, bell angat badia kant, hamá ke palit ent, bell angat palit ent o hamá ke pahrézkár ent, bell angat pahrézkária kant o hamá ke pák o palgár ent, bell angat pák o palgár ent.”

¹² Bechár, mane Issá zutt pédák án o maná mozz gón ke harkasá áiy káray hesábá mozz bedayán. ¹³ Bendát man án o halási man án,* awali o áheri, bongéj o ásar.

¹⁴ Bahtáwar hamá ant ke wati póshákána shódant tánke cha zenday drachká waragay ejázatesh bebit o cha shahray darwázagán, tahá shot bekanant. ¹⁵ Bale kochek, jádugar, zenahkár, hónig, botparast o harkas ke dróga bandit o gón drógá mehra kant, é sajjahén cha shahrá dhanna bant.

¹⁶ “Man ke Issá án, wati préshtag dém dátag tánke kelisáyáni háterá shomará é chizzáni sháhédia bedant. Man Dáuday rishshag án o Dáuday poshtpad ham. Sohbay rozhnáén estár man án.”

¹⁷ Pákén Ruh o bánóra gwashant: “Byá.”

Hamá ke eshkont, bell gwashtit “Byá.” Hamá ke tonnig ent, bell kayt,

[†] 21:16 21:16 Asligén Yunáni nebeshtánka gwashtit: dwázdah hazár stádiá. [‡] 21:17 21:17 Asligén Yunáni nebeshtánka gwashtit: yaksad o chell o chár kyubeth. [§] 21:18 21:18 Yashm gránbaháén sengé. * 22:13 22:13 Asligén nebeshtánká pa bendát o halásiá Yunáni zobánay awali o áheri ábáni nám gerag butag.

hamá ke lóthók ent bell cha zendápá mopt o bé zarrá zurit.

¹⁸ Man pa harkasá ke é ketábay péshgóiy labzán eshkonagá ent, sháhedia dayán ke agan kasé esháni tahá chizzé gésh bekant, Hodá áiy sará hamá ázárán gésha kant ke é ketábay tahá nebeshtah ant. ¹⁹ O agan kasé cha ketábay péshgóiy habarán chizzé dar bekant, Hodá cha zenday drachká o cha pákén

shahrá ke é ketábay tahá áyáni bárawá nebeshtah ent, áiy bahrá dara kant.

²⁰ Hamá ke é chizzáni sháhedia dant, gwashit: "Haw, man zutt pédák án."

Anchosh bát. Ámin. Byá, oo Hodáwandén Issá!

²¹ Hodáwandén Issáay rahmat gón shomá sajjahénán bát. Anchosh bát. Ámin.